

Р Е В
СЕНІҢ ҚАРЖЫЛЫҚ
РЕВОЛЮЦИЯҢ

Келісімнің құдіреті

О Л Ю
ГЭРИ КИСИ

Ц И Я Ң

Р Е В

СЕНІҢ ҚАРЖЫЛЫҚ РЕВОЛЮЦИЯҢ

Келісімнің құдіреті

О Л Ю

ГЭРИ КИСИ

Ц И Я Ң

**Your Financial Revolution,
*The Power of Allegiance, Kazakh***

Copyright © 2021 by Gary Keesee

Originally published in English
Copyright © 2015 by Gary Keesee
ISBN : 978-0-9729035-9-2

Gary Keesee Ministries,
P.O. Box 779, New Albany,
OH 43054, USA

GaryKeesee.com

This book is a FREE GIFT from Gary Keesee Ministries and is
NOT FOR SALE

**Сенің қаржылық революцияң,
*келісімнің құдіреті, Қазақ тілінде***

© 2021, Гари Киси

Бастапқыда ағылшын тілінде шыққан
© 2015, Гари Киси
ISBN : 978-0-9729035-9-2

Гари Киси қызметі,
П/Ж 779, Нью Албани,
Огайо 43054, США

GaryKeesee.com

Бұл кітап — Гари Киси қызметінің сыйлығы
САТУҒА АРНАЛМАҒАН

Осы кітабында Гари Киси қаржылық жағдайы өте мүшкіл болған кезеңнен кейін өмірінде түбегейлі әрі жылдам өзгерістер болғанын баяндайды. Кітаптың авторы әуелі өзінің дәрменсіз жаңдайын бүкпесіз әңгімелейді де, артынша оқырманын Киелі Кітаптағы қағидаларға жетелейді. Жаратқанның жарылқауына толы, табысты өмірі сол қағидаларға негізделген.

МАЗМҰНЫ

АЛҒЫ СӨЗ	5
КІРІСПЕ	7
1-ші тарау. Патшалық	19
2-ші тарау. Көгілдір нұр	61
3-ші тарау. Құдайым, рақым ете гөр!	69
4-ші тарау. Алып балық.	99
5-ші тарау. Бұл кімнің таңдауы?	109
6-шы тарау. Жаратқанның жарылқауы	143
7-ші тарау. Есік	163
8-ші тарау. Келісімнің құдіреті	173
9-шы тарау. Оларға тамақты сендер беріңдер!	183
10-шы тарау. Тер төгу емес, өнім жинау!	197
11-ші тарау. Жүргеннен ұшқан оңай!	205

АЛҒЫ СӨЗ

Осыдан бірнеше жыл бұрын әйелім Дренда екеуімізді Құдай рухани сапарға жетелеген еді, сіздерге сол сапар жайлы әңгімелеп бергім келеді. Өміріміз түбегейлі өзгерді! Киелі Кітапта баяндалған кереметтерді Иса көз алдымызда жасады: өлі адамның қайта тірілгенін, сал адамның төсектен тұрып, өз аяғымен жүріп кеткенін, ертеңіне, тіпті, жұмысқа шыққанын, шипа алып, аурудан айыққан көптеген адамдарды, жүздеген мың адамның жоқшылықтан шыққанын көзімізбен көрдік, куә болдық. Дегенмен, біз үшін ең ғажап кереметтер – өз өмірімізде болған өзгерістер.

Мен сізді осы сапарға бірге аттануға шақырмақпын, жолдасалай жаңалық ашасыз, саяхат барысында менің өмірімдегідей, сіздің де өміріңізде түбегейлі өзгерістер болады. Және бұл саяхатты бір кітапқа сыйғызу мүмкін емес, қолыңыздағы кітап – туындылар топтамасының бастамасы ғана. Аталмыш туындыларым жеке қаржылық революцияға қол жеткізіп, Құдай Патшалығының өміріңізді өзгертер құпияларына қанық болуыңызға көмектеседі. Мен үшін бұл сапар – қуанышқа толы саяхат, және ол ешқашан бітпек емес. Білім бұлағынан әрдайым сусындай бермекпіз! Құдай Патшалығындағы даналықты сарқып тауысу мүмкін емес.

Құдайға деген алғысым шексіз: Иеміздің рақымы таң атқан сайын жаңарады. Көктегі Әкеміздің жүрегі төзім мен кешірімге толы, Ол бізді құтқарылу жолына бағыттаудан таймайды. Сізді

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

осы саяхатқа шақыра отырып, сүйікті жұбайым Дренданы елеусіз қалдыра алмаймын. Оның Құдайға толығымен бағышталған жүрегі, махаббаты мен шыдамының арқасында әлсіздігімді жеңіп, көкейімді тескен сұрақтардың жауабын Құдайдан іздей бастадым. Қуана отырып, сіздермен бөліспекпін:

Сенің қаржылық революцияң.

Келісімнің құдіреті



КІРІСПЕ

*Тыныштық атаулыдан айырылды жаным,
Амандықтың не екенін мүлдем ұмытқанмын.*

— Жоқтау 3:17

Ұйқыдан оянғанда, алғашқы сезгенім – бойымда қалыптан тыс өзгеріс бар! Санамды үрей биледі. Тілімді сезіне алмаймын; аяқ-қолым, бетімнің бір жақ жартысы жансызданып қалғандай. Дренданы ояттым да, жағдайымды түсіндірмек болдым. Алайда, тілім мен жағым икемге келмей, әбден қиналдым. Әйеліме жай-күйімді түсіндірмек болып жанталасқан сайын, тынысым тарылып, ентіге бердім. Жүрегім дүрсілдеп, алқымыма тығылды. Дренда дереу мінәжат ете бастады. Әлгіндей оғаш та қорқынышты күйім басылғандай болды. Төсегіме қайта жаттым. Дренда шай әкелмек болды. Оқыстан келген дерт үрей мен абыржу әкелді. Осы сезімдермен арпалысып, көңілім алабұртып, Құдайға сиынып жатырмын. Алабұртқан көңілімді дүрбелең үрей билеп кете береді; мұндай үрейді бұрын-соңды басымнан кешіп көрген жоқпын.

Мойнымдағы қарыздарым еңсемді басып жүрген. Қаражат жетіспеушілігінің арқасында қорқыныш ажырамас серігіме айналған болатын. Қаржылық жағдайымыздың төмендеуі

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

соңғы жылдардағы жойқын стресстің көзіне айналды. Кәсібім сақтандыру компаниясының полистерін сату болатын. Сатылымнан түскен табыстың белгілі бір пайызы – менің айлығым. Алайда, ісім өрге баспай-ақ қойды. 1800-жылы салынған шағын үйді жалға алып, сонда тұратынбыз. Өзі шағын, өзі жұпыны үйіміздің сиқы салынғалы бір жөнделмегендей еді. Асыра айтқандай естілер, дегенмен, үйіміз шынымен де нашар болатын. Терезе жақтауындағы саңылаулардан сырттағы ағаштардың бұтақтары үйдің ішіне кіре өсетін. Сынған шынының орнын скотч пен картонның көмегімен жауып қойғанбыз. Осынау ұйсымақты Дренда екеуіміздің отауымызға айналдыра білді. Алайда, әйелім қанша әрлеп, безендірсе де, тозығы жеткен үйдің ақауын түгел жасыра алмады.

Үйіміз ғана емес, мүлкіміздің барлығы – тозған, қирап тұрған заттар! Көлігіміздің екеуі де – 300 мың шақырымнан астам жүрген, ескірген, әупірімдеп әрең от алатын машиналар. Екі ұлымыздың төсегі – қайырымдылық үйінен шығарылған ескі жиһаз, ал еденге төселген алашаны жол жиегіндегі қоқыстан тауып әкелген болатынбыз. Қарыз беретін кассалардың тұрақты клиенттеріне айналдық, танысымыздың бәрінен қарыз алып шықтық. Ақшамызды қайтсек жеткіземіз деумен әлекпіз, қажетімізге жарайтын аз-мұз қаражатты таба қоюдың жолын іздеп әуре боламыз да жүреміз. Ертеңгі күннен үміт күтіп, күнімізді әрең көріп жүрген кезіміз.

Несиелік карточкаларымның оншақтысы қарызыма бола бірнеше ай бұрын бұғатталған. 28 пайыз жылдық төлеммен алынған үш несием коллекторларға өткен. Екі машинамың ай сайынғы төлемін тоқтатқаным 120 күннен асты, енді олардан да айырылып қалу қаупі төніп тұр (иә, сол ескі көліктерді де қарызға алған болатынмын). Әрбір қарызым, әрбір төлемімнің мерзімі өткен. Мені қарыздан қашып жүрген борышкер деп таныған бірнеше сот қаулысы шықты, мүлкіме тыйым салынған, күнде

таңертең коллекторлар телефон шалып оятады. Сонымен қатар, салық қызметі де дер кезінде салық төлемегенім үшін менің үстімнен сотқа арыз түсірген еді. Дренда екеуіміз әке-шешемізге 26 мың доллар қарызбыз, ол кісілер бізге көмектесуден әбден мезі болған. Тоңазытқышымыз тамаққа толған емес. Электр қуатын кесіп тастау қаупі ай сайын төніп тұратын. Жүйкем әбден тозды, тығырыққа тірелдім

Енді міне, стресс жүйкемді жұқартумен тоқтамай, денсаулығымға нұқсан келтірді. Бірнеше дәрігерге қаралдым. Олар дүрбелең ұстамасына шалдықтың деп, антидепрессант жазып берді. Өкінішке орай, үрей қысу қайталана берді, бара-бара жиілеп кеткені сонша, үйден шығуға қорқатын болдым. Сол бір ауыр күндерде денсаулығымға не болғанын түсінуге тырысып, ізденумен болдым. Құрамында қант, крахмал немесе кофеин бар тамақтар ұстаманың қайталануына септігін тигізеді екен, соны байқадым. Енді ас ішуге де қорқатын болдым, кез келген тамаққа күдікпен қараймын. Ақыры, жұмыс істей алмайтын күйге жеттім. Жоқшылыққа бата бердік.

Әйелім о дүниелік болып кетуімнен қорқып, уайымдап жүр. Кейінірек өзі айтқандай, жесір қалса, екі баланы қалай асырайтынын көп ойлаған екен. Құдайға жалбарынып, көмек сұраумен болдым. Басыма түскен осынау ауыртпалықтың себебін түсінуге не білімім, не тәжірибем жеткіліксіз. Дәрігерлер ағзамда не болып жатқанын ұғыныңқы етіп түсіндіре алмады, бұл дерттің емделмейтінін, дәрі-дәрмекпен енді қайтып қоштаспайтынымды ғана айтады. Енді бір дәрігерлердің айтуынша, қант диабетіне шалдығуға таяу екенмін, жасым ұлғайған сайын, ауру асқына түспеу үшін, үнемі анализ тапсырып, денсаулығымды тексеріп тұруым керек.

Мәсіхші болсам да, рухани шайқас жүргізуде тәжірибем жоқ, дұшпанға төтеп беруден бейхабармын. Өмірімдегі қиындықтың

барлығы – шайтан рухының шабуылы екенін ол кезде түсіне алған жоқпын. Мәселе денсаулығымда деген ойда болдым. Сондықтан Құдайдан тәнімді сауықтыруын сұрадым. Мәсіхші болғандықтан, мәселемнің шешілуі Құдайдың қолында екенін білетінмін. Алайда, өмірімнің сол кезеңінде Құдай менен тым алыс сияқты көрінетін. Дәрігерлер маған неше түрлі диагноз қойып, дертім психологиялық мәселелерге байланысты деп, оны емдеуге көп дәрі-дәрмек қажет екенін айтатын. Бұл ауру емделмейтін ауру еді. Ал дәрі-дәрмектер психикамды реттеуге ғана қажет. Оның үстіне дәрілер көптеген қосалқы әсер тудыратын, және көмегі де ойдағыдай емес. Меніңше, сол дәрілердің әсерінен жаңа симптомдар пайда болды, санам тұманданып тұратын, санамды қорқыныш пен түрлі ойлар билеп алатын болды. Сұрақтарым мен мұқтаждықтарым жауапсыз қалып жатты. Жағдайымның жеңілдейтін түрі жоқ. Маған енді ештеңе де көмектесе алмайтын секілді. Осы күйім бірнеше аптаға созылды, қорқыныш өмірімді түгелдей билеп алды.

Сол бір жабырқау күндердің бірінде дұшпанның бекінісі құлай бастады. Азаттығымның ең басты кілті табылды. Сәрсенбі күні қауымға, кешкі жиналысқа бардым. Мадақтау кезінде, тағы да үрей билеп, ұстамам басталды. Мінәжатқа қатты мұқтаж едім, дәрменсіз қалпымда алға, қауымның алдына шықтым. Оғаш қылығым жиналыстың жоспарланған барысына қайшы келгеніне де қараған жоқпын. Қауымда адам көп, бағушы мені танымайды. Мадақтау тобындағы бір кісімен таныс болатынмын. Дерт меңдегені сонша, сүйретіліп, сахнаға әрең жеттім. Мадақтау тоқтап қалды, жұрттың көзі менде. Тәртіп тобының қызметкерлері мені алып кетпек болып, алға ұмтылды. Алайда, мадақтаушы танысым жылдам әрекет етіп, іске араласты.

Ол бағушыға жақын барып, менің жағдайымды айта бастады. Бағушының қатуланған жүзі жылып сала берді. Маған қарап: “Бұл кісіні әлсіздік рухы меңдеп жүр” деді де, қос алақанын басыма

қойып, жынды қуып шықты. Міне ғажап: сол сәт азат болдым! Бірнеше айдан бері санамды билеген қорқыныш пен азапты ойлар сап тыйылды. Жүрегіме тыныштық орнады. Керемет сезім! Алғысым мен қуанышымды сөзбен айтып жеткізе алмаймын. Өзімді жеп-жеңіл сезініп, шаттыққа кенеліп тұрмын.

Қауымнан шығып, Дренда екеуіміз, қуанышымызды атап өтпек болып, бірнеше досымызбен бірге пиццерияға бардық. Пицца жеп, мәз-мейрам болып отырғанбыз. Радиодан беріліп жатқан әуенді құлағым шалды. Кенет үрей құрсап алды, әлдебіреу еркімнен тыс ауыр да қалың көрпеге орап тастағандай күй кештім. Қорқыныш сезімі қайта оралды. Жай қорқыныш емес, шайтанның рухы екенін анық сезіндім. Бағушының “әлсіздік рухы” дегені есіме түсті, алайда, бұл сөздің мағынасын жете түсінбедім. Қауымдағы жиналыс кезінде толықтай азат болдым деп ойлаған едім, олай емес екен. Ертеңіне ұстамамен арпалысым қайта басталды. Дегенмен, қауымдағы кешегі оқиға есімнен кетпеді. Бағушы мен үшін мінәжат еткенде, Құдайдан шипа сұраған жоқ. Ол кісі арам рухқа үстемдік етіп, рухани билігін қолданды. Осындай мінәжаттан кейін жағдайымның күрт өзгеруі – мені меңдеген тән ауруы емес, жын-шайтан екеніне дәлел. (рухани тәжірибемнің аздығынан солай екенін өзім түсіне алмаппын). Рухани шайқас жайындағы білімім өте саяз болғанымен, арам рухтардың, яғни, жындардың бар екенінен хабардар едім. Олардың бірін көргенім де бар.

Әке-шешем екі пиццерия ұстайтын. Жас кезімде солардың менеджері болып жұмыс істеген едім. Кештердің бірінде пиццерияға бір адам келіп, жергілікті методистік қауымда ояныш жиналыстарын өткізетінін айтты. Мені келесі жиналысқа шақырды. Сөзінің соңында: “Иса Киелі кітаптағы істерін әлі де жалғастыруда” деді. Осы сөзі елең еткізді. Балалық шағым қауымда өткен еді. Бесінші сыныпты бітіргенімде, сенушілердің жазғы демалысында өмірімді Исаға арнаған болатынмын. Алайда, қанша жыл сенуші

болсам да, Құдайдың кереметімен дерттен айыққан адамды көрген емеспін. Жалпы, қалыптан тыс, назарымды өзіне аударған ешбір оқиғаға куә болған жоқпын. Бірте-бірте Құдайдан алыстай бердім. Мектепті бітірер кез келгенде, сенімнен тіпті алшақ болатынмын. Оқта-текте қауымға баратын боламын деп бел буатынмын. Бірақ, бұл шешімім ұзаққа бармай, ықыласым тез суып қалатын. Алайда, мына жігіт мен білетін сенушілерден өзге. “Иса Киелі Кітаптағы істерін әлі де жалғастыруда” дей ме? Нені айтып тұрғанын көзіммен көргім келді. Кейбір жұмыскерлерім сол қауымға баратын, олар да шақырып жүрген. Баратын болып келістім.

Алғаш барғанымда-ақ Құдайдың құзырын анық сезіндім. Мұндайды бұрын-соңды сезінген емеспін. Жаратқан Иенің жақын болғаны сонша, Құдайдың осында екенін жаным ғана емес, тәнім де сезетін сияқты! Уағыз айтып тұрған адамның әрбір сөзінен құдірет сезіледі. Ол Исаға өмірін арнағысы келетін немесе Құдаймен қарым-қатынасын жаңартқысы келетін адамдарды шақырғанда, дереу қолымды көтердім. Мәссаған! Не деген тамаша кеш! Жүрегім жалындап, Құдайдың ұлылығын әлемге паш еткім келді.

Кассета, CD-диск, Ғаламтор дегендер ол заманда жоқ, ал теледидардағы арналардың саны небары үшеу-ақ. Шағын қалашықта тұрамыз, жастар кешке ермек іздейді. Сондықтан күнде, кеш түскенде, жастар пиццерияның жанына жиналып алып, түннің бір уағына дейін отыратын. Жұма мен сенбі күндері пиццерия түнгі бірге дейін ашық, ал жанымыздағы көлік тұрағын жастар босатпайды. Бізге келушілердің көлігіне орын босатып беру үшін, тысқа шығып жастардың тұрақтан кетуін талап ететінмін. Төбелесті тоқтатып, жастарды үйлеріне тарату үшін полиция шақырту да жиі болып тұрады. Ал енді менде жақсы идея бар. Жастар Иса жайлы естуі тиіс. Тысқа шықтым да, пиццерия жабылғаннан кейін Киелі Кітаптан тәлім

беретінімді, қатысам деушілер болса, келуіне болатынын айттым. Клиенттеріміз тарағаннан кейін пиццерияның ішін жинауымыз керек, түнгі сағат бір жарымда Киелі кітапты оқып, зерттеуге келетін адам табылады ма, оны өзім де білмеймін. Дегенмен, бірнеше адам келді, жұмыскерлердің екі-үшеуі де қалды. Бірінші жиналғанымызда-ақ бір жігіт Мәсікке қызмет еткісі келетінін айтып, менен не істеу керектігін сұрады. Бұлай боларын білген жоқпын, мынадай сұраққа тіпті дайын емеспін. Киелі Кітапты әлі өзім де оқып шыққан жоқпын. Дегенмен, есіме бір аят түсті, мына мәселеге жауап осы болар деп ойладым.

*Ал Иеміздің атын атап Оған сиынған әркім
құтқарылады.*

– Елшілердің істері 2:21

Еш қиындығы жоқ сияқты. Сондықтан, дәл осылай істеймін деп шештім. Басқалардың барлығы тарап кеткен, пиццерияда әлгі жігіт екеуіміз ғана қалғанбыз. Танысыма орындық ұсындым да, Исаның атымен мінәжат етуге шақырдым. Одан оңай не бар? Алайда, мына жігіттің жағы қарысып қалғандай. Екі минут өтті, аузын ашып бір ауыз сөз айта алмады. Естімеген болар деп, мінәжаттың сөздерін тағы қайталадым. Танысым тағы үнсіз. Бажайлап қарасам, аяқ-қолы, бүкіл денесі жын соққандай селкілдеп отыр. Бет-әлпетінен Исаның атын дауыстап айта алмай отырғанын аңғардым. Әлдебір күшпен арпалысып отырып, ақыры «Иса» деп дауыстап жіберді. Сол сәтте денесі босап, түрі өзгеріп сала берді. Мінәжаттың күшін анық көрдім. Бұдан былай Исаны қабылдағысы келген адам болса, осыны қайталайтын болдым. Әлгі адамды орындыққа отырғызамын да, Исаның атын дауыстап атап, жүрегінен орын беруге шақырамын. Адамдардың көбісіне қиынға соғады. Барлығы дерлік денесі қалшылдап, Исаның есімін дауыстап айту үшін әжептәуір күш салады. Артынша-ақ тыныштыққа кенеледі.

Бірде түпкі бөлмеде пиццаға қамыр илеп жатқанымда, есікті біреу қақты. Аштым. Бұрынырақ Мәсіх туралы айтқанымды тыңдаған екі жігіт екен. Ішке шақырдым. Жастардың бірі өмірін Құдайға арнағысы келетінін айтты. Жігітті орындыққа отырғыздым да, мінәжатта жетеледім. Денесі біраз қалшылдап барып, Исаның атын айтты-ау әйтеуір. Сол кезде екінші жігітке бұрылып қарадым. Ол менен үрейлене шегініп барып, бөлменің бұрышына тығылып, қабырғаға кіріп кетердей болып тұр, тұзаққа түскен аң дерсің. Менен қайтсе де қашып кеткісі келгендей, жанталасып, қабырғаны тырналайды. Мына көрініске таң қалып, аңырып қалдым.

“Бәлкім, бұл адамды жын қысқан болар” деген ой келді. Бұл салада тәжірибеден жұрдаймын. Дегенмен, Киелі Кітаптан шайтанның рухтары туралы оқығаным бар. Ал мына жігіттің оғаш қылығын жын-шайтанның әрекеті болмаса, басқа не деп түсіндіруге болады? Сондықтан “Иса, бұл не, жын ба?” деп сұрадым. Дәл сол сәт шымылдық ашылғандай болды: әлгі жігіттің бүйіріне жабысып алған жынды көрдім. Бойы бір метрдей жеркенішті мақұлық жігітке төрт тағандап жабысып алыпты. Менен жын-шайтанның түрі қандай болады екен деп сұраушылар көп. Маймылға ұқсас, дегенмен, өзгешелігі де бар. Сабалақ жүнді, қолы маймылдыкіндей ұзын, қып-қызыл көздері оттай жанып тұр. Бет-әлпеті мейлінше жексұрын. Көзіне қарағанымда, еріксіз дауыстап жібердім. Көзіне тұнып тұрған өшпенділікке дәтім шыдамады. Оның көзіндегі қастандық отын сипаттауға сөзім жетпейді. Өшпенділіктің түпсіз тұңғыығы да, қастандықтың жалмауыз жалыны да – осы көзде. Әлемдегі бар зұлымдық әлгі бәленің көзінен көрініс тапқандай. Маған деген өшпенділігі бойына сияр емес.

Енді не істемекпін? Мына құбыжықты көргенімде, не істерімді білмедім. Жалғыз ойым, Исаның аты адамға Құдай Патшалығының есігін ашатын болса, жын-шайтанға да билігі жүретін болса керек.

Сондықтан “Исаның атымен!” дедім бар дауысыммен. Сол сәт шымылдық қайта жабылды. Ескі теледидарлар есіңізде болар: оларды сөндіргеніңізде, экранында соңғы кадрдың бейнесі қалып қояды да, бірте-бірте көмескіленіп барып сөнеді. Менің де көз алдымда әлгі құбыжықтың өзі емес, көмескі бұлыңғыр бейнесі қалды. Шымылдық жабылғанда, жігіт кенет сыртқа жүгіріп шығып кетті.

Сонымен, жын-шайтанның бар екенін анық білемін. Мені қинаған қиындықтар шайтанның ісі екенін білгенімде, жынды қуып шықтым да, сол мезеттен бері азат өмір сүрудемін деп айтқым-ақ келеді. Алайда, олай болған жоқ. Өкінішті, дегенмен, қауымда бір емес, бірнеше жыл болсам да, Мәсіхте өзімнің кім екенімді білуге күш салған жоқпын, құқымды дұшпанға қарсы қолдануды үйренбеппін. Алайда, басыма түскен қиындықтың бірден бір себебі – арам рух екенін білгенімде, жын-шайтанды жеңуді үйренудің реті келді. Жын атаулыға үстемдік жүргізуге билігім бар екенін білемін, бірақ, билігім жүзеге аспайтынын байқап, қынжыламын. Бірнеше күннен кейін мәселенің, шынымен де, арам рухта екенін дәлелдейтін тағы бір оқиға болды.

Бөлмеде бөтен тілде мінәжат етіп отырған болатынмын. Мәселенің анық-қанығына жетіп, біржола азат болуға бел будым. Бір кезде өткен жолы қауымдағыдай, жеңілдік пен азаттықты тағы да сезіндім. Сол күні осы жеңіл күйім екі сағаттай созылды, артынша бұрынғы қалпыма қайта түстім. Алайда, мінәжаттың әсері болғандықтан, мәселе арам рухта екеніне көзім жетті. Қайтадан дұға ете бастадым. Бұл жолы жағдайым өзгере қоймады. Енді рухани шайқас туралы және өзімнің Мәсіхші ретіндегі мәртебем жайлы аяттарды қайталап оқып шықтым, ештеңе өзгермеді. Арам рухқа билігім жүрмей қалды. Неге бұлай? Түсіне алар емеспін. Не істерімді білмей, Құдайға жүгіндім. Толықтай азат бола алмай жүргеніммен, үрей ұстамасы мен денемнің жансызданып қалуы қайталанған жоқ! Жеңіске жете бастадым. Санамды билеп алатын

жаман ойлар мен депрессиямен әлі де күресудемін. Дегенмен, күннен-күнге күш-қуатым артып келе жатқанын анық сеземін. Мәсіхтегі рухани билігімді терең ұғынбақ болып, Киелі Кітапты күн сайын зерттеумен болдым.

Бір күні, кеңсемде жұмыс істеп отырғанымда, санамды тағы да үрей басты. Осынау жексұрын сезіммен арпалыс тағы басталды. Мінәжат етіп, жынды қуып шығуға әрекет еттім, әрекетім нәтиже бермеді. Кенет жүрегіме Құдайдың сөзі келді. Арам рухты өктем дауыспен, рухани билігімді қолданып, қуып шығуым керектігін айтты. Сосын рухани билікке деген көзқарасымды түбегейлі өзгерткен сөздерді айтты. Жынға кет деп бұйрық бергенімде, сезімдеріме назар аудармауымды, көріп не сезіп тұрғаныма емес, Құдайдың Сөзіне сенуім керек екенімді айтты. Кеңседе, әріптестерімнің арасында отырған едім. Атып тұрып, шайтанға айғай салуды жөн көрмедім. Сондықтан дәретханаға бардым да, оңаша қалып, былай дедім: “Үрей рухы, сені Исаның атымен байлаймын. Сенің іс-әрекетің заңсыз, Исаның атымен бұйырамын, дәл қазір жоғал!” Еш өзгеріс сезгенім жоқ. Алайда, Құдайдың айтқаны есімде. Сезімге назар аударудың қажет жоқ. Жын-шайтанның үстінен билік бергені үшін Құдайға алғысымды айтып, азаттығым үшін мадақтадым. Кеңсеге қайтып келіп, жұмысыма кірістім. Ешқандай оң өзгеріс байқамасам да, үрей қысқан сайын, Құдайға азаттық сыйлағаны үшін алғыс айта бердім. Жұмыс істеп отырып, кенет Құдайдың құзырын анық сезіндім. Сол сәт бір қара бұлт менен алыстап барып, сейіліп, ақыры, кеңсенің төбесінен өтіп кеткенін көрдім.

Енді мен азатпын!

Үрей тудыратын арам рухтан құтылдым. Тағы да қайтып келсе, оны қалай жеңетінімді білемін. Не деген қуаныш! Дрендәға телефон шалып, болғанды айтып бердім. Жұбайым екеуіміз өзіміз жақсы көретін қытай аспазханасына барып, қуанышымызды

тойлайтын болып келістік. Арам рухтар оңайлықпен жеңіле қоймайды, сол себепті үрей туғызатын жынға сол күннен кейін де талай рет төтеп беруіме тура келді. Және сол жыннан құтылғаныммен, қаржылық мәселелерім әлі де шиеленіскен күйінде қала берді. Қаражат жөніндегі уайымым айналып келе берді, санама үрей болып орнықтап. Қорқынышты ойлардың жетегінде кетпей, сабыр мен тыныштық сақтауды үйренуіме тура келді.

Құдай Патшалығы жайлы білімімді арттыра отырып, басқа да рухани шайқастарды жүргіздім. Жоқшылықтан туған стрестің адамға қалай әсер ететінін, жүрегіне үрей ұялататынын жеке тәжірибемнен білемін. Хикаямды сіздерге айтып отырғанымның себебі – осыны оқырманымға жеткізу.

Осы кітапта сөз болатын қиындықтардың бәрі де өз басымнан өтті. Құдай Патшалығы жайлы қазір білетінімді ертерек білгенімде ғой, шіркін! Тоғыз жыл бойы Дренда екеуіміз қаржылық мәселелерден көз аспадық. Соны ойласам, өкініш кернейді.

Өкінішке орай, қаржы мәселесі біз үшін радардың сигналы емес, радардың өзі еді. Тоғыз жыл бойы қарыздан қарыз, бітпейтін қиындық пен қорлық... Осының барлығын тезірек ұмытқым келеді. Әйелім не деген төзімді жан еді! Небір қиындықтардан мойымай өтті! Қазіргі кезде әйеліме қолымнан келген жақсылықты жасап, жұбайымды қуантқым келеді.

Үрей туғызатын арам рухқа тойтарыс беруді үйреткеніндей, Құдай маған қаражатты рухани тұрғыдан дұрыс ұстай білуді үйретті. Құдайдың қаржы туралы ашып берген ақиқаттары өмірімізді түбегейлі өзгертті. Ендігі өмірімізді осынау ақиқаттарды басқалармен бөлісуге арнадық.

Дренда екеуіміз жоқшылықтан шығып, қол жетпес арман болған үйді салып алатын дәрежеге жеттік. Қалаған көлігімізді сатып алатын болдық. Мұның барлығына бір цент те қарыз

алған жоқпыз. Бірнеше компания аштық. Теледидарда күн сайын шығатын «Қаржы мәселесінің шешілуі» (Fixing the Money Thing) атты өз бағдарламамыз бар. Бұл бағдарлама әлем бойынша көрсетіледі. Онымен қоймай, Дренда ABC Family телеарнасында жанұяларға көмек беру мен әйелдерді қолдауды көздейтін «Дренда ТВ» атты бағдарлама жүргізеді. Құдай бізді «Сенімдегі өмір» (Faith Life Church) деп аталатын қауым ашуға жетеледі. Қауымызда апта сайын мыңдаған адамға Құдай Патшалығы жайлы тәлім береміз. Бүгінгі таңда қызметімізге миллиондаған доллар қаражат жұмсаймыз. Телебағдарламалардың өзіне ай сайын 200 мың доллар жұмсалады. Құдай рухани ақиқаттарды ашып бермегенде, бұлардың бірі де жүзеге аспайтын еді. Қолыңыздағы кітап – осы ақиқаттар жазылған кітаптар жинағының бір бөлігі. Өзімде бар білімді сіздермен бөліспекпін. Бұл кітапты қаржылық сауатыңызды ашатын кезекті оқулық деп қарастырмаңыз. Бюджет жоспарлауды үйрететін сабақтар маңызды, дегенмен, бұл кітап ол жайлы емес. Табысың жеткіліксіз болса, шығыныңды азайтуың керек екені жайлы баяғыдан айтылып жүрген ескі әңгіме емес.

Бұл кітап – революция, яғни, алқымыңыздан алған жоқшылыққа және түнек патшалығына қарсы көтеріліс жайлы. Мойныңызға түскен бұғауды талқандап, жаңа өмірге аяқ басу туралы. Мені жоқшылықтан шығарған – қаражат саласындағы білім емес, түбегейлі қаржылық төңкеріс –

ҚАРЖЫЛЫҚ РЕВОЛЮЦИЯ!

1-ші ТАРАУ

ПАТШАЛЫҚ

Өмірімді қорқыныш шырмап, үрей жалмап жүрген шағым жайлы кіріспеде айттым. Әрі қарайғы саяхатымызды өте маңызды мәлімдемеден бастауымыз керек: ҚОРҚЫП ӨМІР СҮРУДІ ӘДЕТКЕ АЙНАЛДЫРМАҢЫЗ! Осыны санаңызға әбден сіңіріп алыңыз. Қорқыныш арқылы шайтан өміріңізге еніп, өз ықпалын жүзеге асырады, яғни, қорқыныш – рухани есік. Көңіліңізге қорқыныш орнығып алса, оның салдары депрессия, абыржу, тағы басқа күйзелістер болмақ. Менің өмірімде де, басқа миллиондаған адамдардың өмірінде де солай болды. Қаржылық дағдарыс – ең зор ауыртпалықтардың бірі, өзімен бірге қорқыныш алып келеді. Қаржылық жоспарлау саласында жұмыс істейтін компаниям бар. 34 жыл бойы көптеген клиенттеріме қаржы мәселесінде кеңес бердім. Осы жұмыстың барысында қаражат мәселесінде тығырыққа тірелген адамдардың өте көп екеніне көзім жетті.

Осы мәселені тереңірек зерттегенімде мынадай мәлімет таптым: Америка тұрғындарының 23 пайызы банктердің алдындағы қарыздарының минималды төлемін де төлемейді екен. Осылайша олар бірте-бірте қаржылық дәрменсіздік күйіне түсе береді. Елдің төрттен бірінің жағдайы осындай! Қырық жеті миллион адам – халқымыздың алтыдан бір бөлігі – азық-түлік

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

талондарымен күн көріп отыр, еліміздегі он отбасының сегізі ақшасын келесі айлыққа дейін әрең жеткізіп отыр. Ал Америка Құрама Штаттарының сыртқы қарызы 18 триллион доллар, бұл қарыздан біз ешқашан құтыла алмаймыз. 120 триллион доллар көлеміндегі борыштық міндеттемелер жайлы сөз қозғамай-ақ қояйын. Оларды төлеп шығудың ешбір жолы жоқ. Біз едәуір қаржылық проблемаларға батқан елде тұрып жатырмыз! Өз тәжірибемнен білетінім, қаражат саласындағы шешілмеген мәселелер мен қаржылық тығырыққа тірелудің салдарынан өміріңізді қорқыныш жайлайды.

Алайда, бұдан шығудың жолы бар! Сіз азат бола аласыз! Киелі Кітап былай дейді: Иса жарлыларға ізгі хабарды жеткізу үшін келді!

Маған Жаратушы Тәңір Ие Өзінің Рухын қондырды.

*Жаратқан Ие мені жарлыларға ізгі хабар
жеткізуге және жаралы жүректерді жұбатып
орнықтыруға тағайындады, сондай-ақ тұтқындарға
босатылатындарын, бұғаудағыларға азат
болатындарын жар салуға жіберді.*

– Ишя 61:1

Ал жоқшылық көріп жүрген адам үшін ең қуанышты хабар – не? Жоқшылықтан азат бола алатыны жайлы хабар! Бәлкім, бүгінгі таңда кедейліктен құтылу жолының бар екеніне сенудің өзі сіз үшін қиын шығар. Мүлде дәрменсіз күйде мен де болғам. Қалтамда қарызға алынған ақша емес, өзіме тиесілі, ең болмаса, жүз доллардың болуы – орындалмас арман сияқты еді. Өмірім соншалық қапалы болмаса, жағдайың оңалып, ауқатты адамдардың санатына кіресің дегенге ішек-сілем қатып күлер едім. Тоғыз жылға созылған жоқшылық санамды қатты күйзелтіп тастады. Ақшадан тапшылық көріп жүрген адамның өмірінің әр саласы ойсырайды.

Сол жылдардағы отбасылық видеоларымызды қарағанда қатты қынжыламын. Әйелім түсірген бейнежазбаның бірінде – жұмыстан үйге келген сәтім. Көлігімді үйдің алдына тоқтатып, машинадан түсемін. Реңім шаршаңқы. Ұлдарым алдымнан жүгіріп шығып, «Папа! Сәлем!» деп қуана дауыстайды. Екеуі екі аяғымды қапсыра құшақтап алған. Құлыншақтарым. Мен болсам, оларға көз ілмеймін де, тіл қатпаймын. Көңілім соншалықты жабырқау, жаным соншалық күйзелген, ненің шынайы маңызды екенін сезіне алар емеспін.

**ЖАРАТҚАН ИЕ МЕНІ
ЖАРЛЫЛАРҒА ІЗГІ
ХАБАР ЖЕТКІЗУГЕ ЖӘНЕ
ЖАРАЛЫ ЖҮРЕКТЕРДІ
ЖҰБАТЫП ОРНЫҚТЫРУҒА
ТАҒАЙЫНДАДЫ, СОНДАЙ-
АҚ ТҰТҚЫНДАРҒА
БОСАТЫЛАТЫНДАРЫН,
БҰҒАУДАҒЫЛАРҒА АЗАТ
БОЛАТЫНДАРЫН ЖАР
САЛУҒА ЖІБЕРДІ.**

– ИШАЯ 61:1

Жас кезімде жүзумен айналысқан болатынмын. Жаттықтырушының мына сөзі есімде: суға батып бара жатқан адамның айқайын естісең, өте сақ та абай бол. Неге? Өйткені батып бара жатқан адам өз өмірі үшін жанталаса күресіп жүріп, көмекке келген адамды қапелімде суға батырып жіберуі мүмкін. Мен де дәл сондай күйде едім. Сезімі өлген, жан-жағын аңғарудан қалған адаммын. Әлдебір әрекеттер жасаймын, таңертең тұрып, жұмысқа барамын, кешке үйіме келемін, бірақ сезім дегеннен жұрдаймын. Отағасы ретінде де, әке ретінде де, табыскер ретінде де сәтсіздікке ұшырадым. Депрессияға батқан өмірім бір сарынды – көңілсіз, армансыз, мақсатсыз, мән-мағынасыз өтіп жатты.

Сол жылдары Огайо штатындағы Колумбус қаласында жаңа үйлер көптеп салынуда еді. Әр көшеде жаңадан салынған үйлер бой түзеп жатты. Қалада бірнеше жыл қатарынан үйлер көрмесі өтті. Оның не екенін түсіндіре кетейін. Құрылыс компаниялары өздері салған үйлерге көрем деушілердің барлығын шақырып, оларға

салған үйлерін, үй салудағы өздерінің бірегей стилін, мүмкіндіктерін, үй салу мен әрлеудің жаңа технологияларын көрсетеді. Мұндай көрмелерге мыңдаған адам баратын еді. Үй көрмелері қала тұрғындарының сүйікті сауығына айналды. Алайда, мен үшін бұл көрмелер – нағыз азаптың өзі. Дренданың сондай көрмеге барғанынан қорқатынмын. Жоқшылықтан әбден мезі болған мен, әйелімнің көрмеге барып, жағдайымыздың қаншалықты мүшкіл екенін бұрынғыдан бетер ұғына түскенін қаламаймын. Осындай ойлардың әбестігін қазір жақсы түсінемін, дегенмен, өмірімнің сол бір кезеңінде көзқарасым осындай болатын. Жұбайым көрмеге барып, жаңа салынған үйлерді көрсе, сондай үге қол жеткізуді арманына айналдырады, білем. Сондықтан, жыл сайын көрмеге барудан бас тартатын едім. Алайда, сол бір жолы әйелім сөзін өткізді. Көрмеге баратын болдық.

Әлбетте, көрмедегі үйлер тамаша екен. Біздің 1800 жылы салынған үйіміз – олармен салыстырғанда, баспана болуға мүлде жарамсыз күрке. Көшенің басындағы бірнеше үйді көріп болған соң, әрі қарай жүрдік. Сол кезде Дренда жанымда жоқ болып шықты. Жұбайымды іздеп, жан-жағыма қарадым. Сөйтсем, әйелім жаңа ғана өзіміз кіріп шыққан үйдің алдында тұр екен. Жанарынан жас сорғалайды. Жанына барып, не болғанын түсінбей тұрғандай кейіппен “Не болды?” дедім. Сұрағым орынсыздау болды, әрине. Дренда маған қарап: “Менің де осындай үйім болады ма?” деді. Ойым сан-саққа жүгірді: “Үй? Мынадай үй? Бұл үйлердің бағалары 500 мың доллар мен 700 мың доллардың аралығында. Отырған үйіміздің ай сайынғы 300 доллар ақысын тірнектеп жинасам да, жақсы ғой”. Өкінішке орай, сүйікті жарыма айтатын еш уәжім болмады. Санамды да, іс-әрекетімді де қорқыныш пен дәрменсіздік шырмап тастаған. Өзімді өзім танымай қалғандаймын: қуанышым, жайдары көңіл күйім, бақытым қайда кеткен? Жоқшылықтан туған күйзеліс көзқарасымды тұмшалап тұмандандырып жібергендей.

Түнгі сағат екі не үш болатын. Әлі көз ілген жоқпын. Жағым ауырып, жанымды қоярға орын таппай жүрмін. Отыз алты сағат бұрын тісімді емдеткен болатынмын. Оның алдында тісім қатты ауырып, жағым ісіп кеткен еді. Тіске түскен инфекциядан құтылу үшін, дәрігерге барып, ем алдым. Енді міне, жағым, тісім, бетімнің бір жартысы ауырып, шыдатар емес. Ауыруды басу үшін төрт сағат сайын тайленол ішудемін, дегенмен, оның көмегі тиіп жатқан жоқ. Сонымен, ұйықтай алмай, төргі бөлмеде отырмын. Дәрінің кезекті мөлшерін іштім. Көзім тайленолдың қорабына түсті. Қораптың сыртына жазылған нұсқаулықты оқи бастадым. Дәріні қалай, қай мөлшерде ішуді білмеймін емес, білемін. Жәй, көзім шалған соң оқи салғаным. Таңертең, сұлы үлпегін жеп отырып, қораптың сыртындағы жазуды оқығандай нәрсе. Оқын деп, бірдеңе білейін деп оқыған жоқпын, көз алдымда тұрған соң оқыдым. Сонымен, оқып отырмын... Иә, иә, төрт сағат сайын екі таблеткадан ішу керек. Әрі қарай. Тәулігіне он таблеткадан асырмау керек. Не дейді? 24 сағат ішінде он таблеткадан артық ішуге болмайды дей ме? Төрт сағат сайын екі таблеткадан ішіп отырсам, бір тәуліктің ішінде неше таблетка ішетінімді миым еріксіз есептей қойды. Он екі таблетка шықты. Яғни, белгіленген мөлшерден екі таблетка артық. Асқазаным түйіліп қалғандай болды, санамды үрей құрсап алды.

Тоғыз жылғы жоқшылық жайпап кеткен өмірім, барлық саладағы бітпес сәтсіздік әбден аздырып жіберген болатын. Тозған жүйкемді сәл болса да, дұрыстау үшін дәрігерлер депрессияға қарсы дәрі жазып берген болатын, бірақ дәрінің де көмегі шамалы. Сонымен, тісіме түскен инфекция бар, ұйқысыз өткен екі түн бар, шыдатпай ауырған жағым бар, енді тайленолдың нұсқалығын оқып, мазасыздықтың шыңырау шегіне жеттім. Тайленолды рұқсат етілген мөлшерден артық ішудің қандай қаупі бар екенін білмеймін. Дегенмен, жол бойындағы дәріхананың қай-қайсысында сатыла беретін осынау кең тараған дәріден келер

зор қауіптің жоғына сенімдімін. Өндірушінің әлгіндей ескертуі – заң талабын оындағаны болар деп ойладым. Тайленолдың екі таблеткасын артық ішкенімнің әлдебір ауыр салдары бола қоймас деген ойдамын. Алайда, үрей тудыратын арам рух нұсқаулықтағы ақпаратты пайдаланып, санамды билеп алды да, неше түрлі күдікті ойларға түрткі болды. Сондықтан, Улануды емдеу Орталығына телефон шалдым. Ниетім – сұрақтарыма білікті мамандардың тарапынан жауап алып, мазамды алған күдіктен арылу. Төніп тұрған қауіптің жоқ екенін естіп, тыныштық табатыныма сенімдімін.

Телефонмен жауап берген қыздың үні өте байсалды екен, өз ісін білетін адам сияқты. Қандай көмек керек екенін сұрады. Тайленолды 36 сағат бойы, төрт саған сайын ішкенімді айттым. Бір тәулікте ішуге рұқсат етілген он таблетканың орнына он екі таблетка ішкен екенмін. Артық ішкен екі таблетканың маған айтарлықтай зиян келтірмейтініне көз жеткізу үшін хабарласып тұрмын дедім. Тыныштық орнады. Компьютер тетікшелерінің басылып жатқанын естідім. Ар жақтағы маманның маған берген жауабын сөзбе сөз келтіремін: “Сэр, бізде тайленолды осындай мөлшерде артық ішкен адамның тірі қалғаны жайлы бір де бір мәлімет жоқ”. Бұл қалай? Не дедіңіз? Мен сізді дұрыс түсінбеген болармын? Әлде сіз сұрағымды дұрыс түсінбедіңіз бе? Дәріні 24 сағаттық мөлшерден екі-ақ таблетка артық ішкенімді, оның өзі небары екі күн болған нәрсе екенін тағы қайталап айттым.

Бұл жолы қыздың үні қатқыл шықты. “Сэр, тағы да қайталаймын, бізде тайленолды осындай мөлшерде артық ішкен адамның тірі қалғаны жайлы бір де бір мәлімет жоқ. ТЕЗДЕТІП жедел жәрдем бөлімшесіне жетуге тиіссіз”. Сөзімді дұрыс түсінбеген болар деп, қайта түсіндірмек болдым. Бірақ сөзімді “Не ауруханаға өзіңіз жетесіз, не сізді жеткізуге жедел жәрдем машинасын жіберемін”, – деп бөліп тастады. Мына сөзі төбемнен жай түсіргендей болды! “Өзім барамын” деп айтуға ғана шамам келді. “Қай ауруханаға барасыз?” Сұраққа жауап бердім. Сонымен әңгіме тәмам болды.

Не істерімді білмей, аңырып тұрмын. Таңғы сағат тоғызға белгіленген өте маңызды кездесуім бар. Қазір түнгі сағат үш жарым. Сүйретіліп жатын бөлмеге әрең жеттім де, Дренданы оятып, мән-жайды айттым. Ол маған қынжыла қарады. Бірнеше айдан бері жұбайының есі кіресілі-шығасылы, өзі әбден қажыған, енді тағы қандай бәлеге тап болдық? “Гэри, артық ішкенің – бар болғаны екі таблетка емес пе? Онда тұрған не бар? Төніп тұрған қатер жоқ. Орталыққа қайта звандашы”, – деді. Алайда, қорқыныш сананы торлайды, жанды қинайды. “Жауап берген маман қыз жағдайым өте қауіпті деді. Өліп кетуім мүмкін. Баруым керек”. Әйелімнің көзінен “Әзілдеп тұрған боларсың?” дегенді көрдім. Бөлмеден шығып кеттім.

Ауруханаға жақын барғанымда, мені ақ халат киген екі жігіттің күтіп тұрғанын көрдім. Көлігімнің жанына келіп, “Гэри Киси деген сіз бе?” деп сұрады. Бас изедім. Олар мені жылдамдатып дәрігердің кабинетіне жеткізді. Қабылдау бөлімшесінен өтіп бара жатып, қабырғаға ілінген тақтаға жазылған «Гэри Киси — дәріні мөлшерден тыс қабылдау» деген жазуды оқыдым. Өз көзіме өзім сене алар емеспін. Әңгімемді қысқартайын: қысқасы, дәрігер қолымнан қан алды да, тексеріске алып кетті. Кабинетіне қайта кірді де, «Неге келдіңіз? Қаныңыздағы тайленолдың мөлшері, тіпті, бас ауруын басуға да жетпейді» деді. Улануды емдеу Орталығына хабарласқанымды айтқанымда, қарқылдап тұрып күлді. Күлетіндей ештеңе де жоқ, меніңше. Әсіресе, поштамен екі мың долларға чек келгенде тіпті күлгенім жоқ. Шайтан мені тағы да алдап соқты, тағы да тонады.

Осы оқиғаларды баяндағандағы мақсатым – сіздерге Құдай Патшалығы жайлы ақиқатты білгенге дейінгі өмірімнің қандай болғанын көрсету. Рас, мәсіхші болатыным. Қауымға ондық аппаратыным да рас еді. Біраз уақыт мадақтау тобының жетекшісі болғаным да рас. Құдайды сүйетінім де рас. Алайда, өмірімде береке болған жоқ! Құдайдың маған қорқыныш

рухына қарсы тұруды үйреткені жайлы, кенеттен келетін үрей ұстамасынан арылғанымды, депрессияға қарсы дәрі ішуден құтылғанымды жоғарыда айтып кеттім. Дегенмен, ең басты мәселе, қорқыныштың кірер есігі – жоқшылық мәселесі шешілген жоқ! Әлі де күн сайын төлемдерімді жабатын ақша іздеудемін, оның үстіне бұғатталған он карточкамдағы қарызымды төлеуім керек, үш несием тағы бар, салық органдарына да қарызбын, туыстарыма қайтаратын қарыз бар, көптеген коллекторлардың, сот орындаушыларының талаптары да жетіп артылады, қысқасы, жоқшылықтың шеңгелінен босаған жоқпын.

Жоғарыда айтып кеткенімдей, қаржы саласында еш береке, реттілік жоқ, шым-шытырық қарыз. Ажырамас серіктерім – стресс пен әбден жұқарған жүйкем. Мәсіхші болсақ та, қаржы мәселесінде шайтаннан күйрей жеңілдік. Несиелік карталарым бірінен соң бірі бұғатталды. Қолымда – мені қарызын төлеуден бас тартып жүрген борышкер деп таныған көптеген сот шешімдері. Мүлкім тәркіленуге аз-ақ қалды. Банктер маған несие беруден бас тартады. Коллекторлар мен сот орындаушыларының телефон шалуынан көз ашпаймыз. Кәсібімнен пайда түспеген

қайғылы күндер де болды, сондай күндерде тамақ алып жеуге де ақша таппадық.

**АЛ ИСА МӘСІХПЕН
ЖҮРГЕН СЕНДЕРДІҢ
БАРЛЫҚ ҚАЖЕТТЕРІҢДІ
ДЕ МЕНІҢ ҚҰДАЙЫМ
ӨЗІНІҢ КЕРЕМЕТ
БАЙЛЫҒЫ БОЙЫНША
ҚАМТАМАСЫЗ ЕТЕТІН
БОЛАДЫ**

Жағар май жағып, үйімізді түгел жылытуды қалтам көтермегендіктен, үлкен бөлмедегі отын жағатын пештің айналасына жиналып, әрең жылынатынбыз. Екі баламызға «Мақдоналдстан» бір Нарру Meal алып бермек болып, жихаздың саңылауларына түсіп кеткен тиын-тебенді іздеп жүретін едік.

– ФІЛІПІЛІКТЕРГЕ 4:19

Үйге телефон соққан коллекторлардан үйтіп-бүйтіп құтылуға әбден машықтанып алдым. Бірақ, мен қарыз болып қалған компаниялардың бірі менен қарызын өндіріп алу мақсатымен заңгер жалдады. Ол кісі маған телефон шалды да, ай-шайсыз “Ақшаны үш күннің ішінде қайтару керек, талабым орындалмаса, сотқа жүгінемін” деді. Мына сөз жайпап кеткендей болды. Тығырық деген осы болар. Маған ешкім сенбейді. Достарымның барлығынан қарыз алып болғам. Бұл тығырықтан шығар жол жоқ. Біттім. Сұлдерімді әрең сүйреп, жатын бөлмеге жеттім. Төсектің үстіне көлденең құлай кеттім де, Құдайға жан ұшыра жалбарына бастадым. Сол сәт жүрегіме бір аят сап ете қалды. Бұл аятты бәріміз жиі естиміз.

Ал Иса Мәсіхпен жүрген сендердің барлық қажеттеріңді де менің Құдайым Өзінің керемет байлығы бойынша қамтамасыз ететін болады

– Філіпіліктерге 4:19

Бұл аятты бұрыннан білетінімді, алайда, жоқшылықтан әлі де шықпағанымды алға тарттым. Құдай лезде жауап берді: “Оның рас. Алайда, жоқшылықтан шыға алмай жүргенің – Менің жазығым емес. Менің Патшалығымда қандай заңдар мен қағидалардың жүзеге асатынын білуге ұмтылған емессің. Сенушілердің көбісі Көне Өсиет заманындағы Исраил халқына ұқсас, өмірлері құлдың өміріндей. Қарызға батып, қаржылық құлдықта өмір сүреді. Халқымның азат болғанын қалаймын”.

Бөлмеден шығып, асүйге жеттім де, Дрендаға Құдайдың айтқанын тездетіп айтып бердім. Құдайдың жүзін іздемегенімді, Құдай Патшалығын зерттеп, ұғынуға ынталанбағанымды әйелімнің алдында мойындап, тәубе еттім. Шын мәнінде, Құдай Өз Патшалығындағы тәртіп жайында айтқанда, нені меңзегенінен бейхабар едік. Әйтеуір, көп жылдан бері қауымның мүшесіміз,

ондығымызды үнемі дерлік қауымға апарамыз, Құдайды шын жүрегімізбен сүйеміз. Құдай Патшалығы жайлы бәрін білетін сияқтымыз. Аспандағы мекенімізге бара жатқан жолаушы болсақта, Аспан Патшалығының құдіреті мен билігін жерде қолдану жағынан мүлде білімсіз екенбіз. Сонымен, Киелі Кітапты мұқият зерттеуге кірістік, Құдай бізге Өз Патшалығы жайлы ақиқаттарды ашып, түсіндіре бастады. Жаңа біліміміз санамызды түбегейлі өзгертті! Қараңғы бөлмеде кенет жарқ етіп шам жағылғандай әсер алдық. Қаржылық мәселемізді шешуге апаратын жолдың бар екеніне көзіміз жетті, шиеленіскен түйіннің шешімі табылды.

Құдайым, Патшалық дегенді қалай түсінуім қажет?

Құдай “Менің Патшалығымды тереңірек ұғынуға ұмтылған емессің” дегенде, абыржып қалдым десем, артық болмас. Патшалық дейді ме? Дренда екеуіміздің де бұдан еш хабарымыз жоқ. Мінәжат етіп, Құдайдан бізге не айтқысы келгенін түсіндіруін сұрадық. “Иеміз, Патшалығыңның не екенін бізге ұғындыра гөр!” Ең алдымен Құдай Патшалығының қандай екенін түсінуім керек.

Американдық демократия мен азаттық ұғымдарын санасына терең сіңірген Батыс елдерінің тұрғындарына мұны түсіну қиындау деп ойлаймын. Құдай Патшалығы – демократия емес; ол – Патшалық, ондағы бірден бір билеуші – Патша. Патшаның билігі өкілетті мекемелер мен сол билікке бағынып әрекет ететін адамдар арқылы бүкіл патшалықта жүзеге асады. Айналаңа бір топ адамды шоғырландыру – патшалық құрумен бірдей емес. Айналаңа миллиондаған адамды жинасаң да, бұл патшалық емес. Патшалық дегеніміз – бір заңға, бір үкіметке бағынатын, бір билікті мойындайтын адамдардың тобы. “Патшалық” сөзінің сөздіктегі анықтамасы мынадай екен: “Патшалық – патша немесе патшайым басқаратын мемлекет немесе үкімет”.

Жылда Исаның туған күнін тойлаймыз. Алайда, иеміз жер бетіне келгенде, Өз Патшалығын ала келгенін жете түсінбейміз. Осы жайт тіралы Киелі Кітап былай дейді:

Себебі Сәби дүниеге келді,
 Біз үшін осы Ұл сыйға берілді!
 Билік Оның қолында қала береді:
 Ол «керемет ақылды Кеңесші,
 Құдіретті Құдай, Мәңгілік Әке,
 Тыныштықты сыйлайтын әмірші»
 Деп те аталатын болады.
 Оның құрған билігі арта түсіп,
 Оратқан тыныштығы шексіз болады,
 Өзі Дәуіттің тағына отырып,
 Мәңгі патшалығын сол кезден бастайды,
 Әділдікпен нығайтып, жалғастырып,
 Ақиқатты да ұстанатын болады.
 Барлық қайрат-жігерімен бұларды
 Әлемнің Иесі іске асырады!

— Ишая 9:6-7

Иса – осынау зор биліктің Иесі. Исаны Құтқарушым деп қабылдағанымызда, Оның Патшалығына кіреміз, яғни, сол Патшалықтың азаматтығын аламыз. Онымен қоймай, Құдайдың перзенті – ұлы немесе қызы атанамыз.

Бірақ Оны қабылдап, Оған сенім артқандардың
 бәрін Ол Құдайдың рухани балалары болуға құқықты
 етті. Бұлар табиғи жолмен, пенденің қалауы бойынша
 бұл дүниеге келгендіктен емес, Құдай оларға шынайы
 өмір бергендіктен ғана Оның рухани балалары болды.

— Жохан 1:12-13

Сонымен сендер енді не бөтен, не келімсек
 сияқты емес, Құдайдың халқы болып келген яһуди
 сенушілерімен бірдей, сол халықтың азаматысыңдар,
 тіпті «Құдайдың отбасысының мүшелерісіңдер»!

— Ефестіктерге 2:19

Құдайдың отбасының мүшесі болғандықтан, біз, Құдайдың игіліктерін иеленеміз, әрі өзіміз Құдайдың меншігінің бір бөлігіне айналамыз. Сонымен қатар, біз Жаратушының Ұлы билігіне бас иеміз, яғни, қол астына кіреміз. Осының нәтижесінде заңды құқықтарға және Патшалықтың азаматы ретінде билік уәде еткен артықшылықтарға ие боламыз.

Осы ойымды тереңірек түсіну үшін АҚШ азаматы болудың не екенін қарастырайық. АҚШ заңдары сізге осы елдің азаматы ретіндегі құқықтарыңызды іске асыруға кепілдік береді. Сіздің құқықтарыңыз Конституцияда және үкімет қабылдаған заңдарда жазылған. Бұл құқықтар барлық азаматтарға бірдей берілген. Олар сіздің ақылыңызға немесе көңіл-күйіңізге қарап берілмейді. Жоқ, азаматтық құқықтар заңмен бекітілген әрі Америка Құрама Штаттарының әрбір азаматына тең берілген. Азамат өз құқығын білмеуі де мүмкін, дегенмен, оның құқықтары күшін жоймайды.

Осы айтқанымды әбден зерделеп, терең ұғынып алыңыз. Сонда Құдайдың қандай екені туралы ұғымыңыз өзгеріп, осы ақиқат Құдайдың бергенін иеленуіңізге әсерін тигізер деген үміттемін. Америка Құрама Штаттарында әлдене немесе әлдекім сізді құқықтарыңыздан айырмақ болса, сізге қарсы заңсыз әрекет етсе, сіз құқық қорғау органдарына немесе әділ сотқа жүгінесіз. Сот әділдігі дегеніміз – заңды пайдаланып, құқықтардың іске асуын және әділдікті қалпына келтіру. Сот үкім шығарарда сіздің бет-жүзіңізге, әл-ауқатыңызға қарамайды. Әділ сот тек заңға бағынады. Соттың мақсаты – әрбір істе заңның қалтқысыз орындалуын қамтамасыз ету. Осы жайт бізге қауіпсіздік береді. Біздің заңды құқықтарымыз бар, әділет жүйесі арқылы үкімет сол құқықтарымыздың бүкіл АҚШ аумағында жүзеге асуын қадағалайды. Осыны есімізде сақтай отырып, Ишая пайғамбардың жазбасының 9-шы тарауына қайта оралайық. Исаның Өз билігін жер бетіне орнатқаны жайлы былай делінген:

*Оның құрған билігі арта түсіп,
Орнатқан тыныштығы шексіз болады,
Өзі Дәуіттің тағына отырып,
Мәңгі патшалығын сол кезден бастайды,
Әділдікпен нығайтып, жалғастырып,
Ақиқатты да ұстанатын болады.*

– Ишая 9:7

Құдайдың Патшалығы әділдікпен нығайып, жалғасады дейді. Ал әділдік дегеніміз – заңды құқықтарды жүзеге асыру. Сіздің заңды құқықтарыңыз – Киелі Кітапта әділдік деп аталады, Яғни, Құдай дұрыс деп таныған нәрселер, Құдайдың заңы. Құдай Патшалығының тұрғысынан дұрыс деп танылған игіліктерге сол Патшалықтың азаматы ретінде қол жеткізуіңізді көздейді. Иеміз Өзінің әділдігін бізге қолжетімді еткен, яғни, Құдай уәде еткен игіліктерді иелене алатынымызға кепілдік берген. Құдайдың еркі Киелі Кітапта ашып көрсетілген. Сонымен қатар, Киелі Кітапта Құдай Патшалығындағы біздің азаматтық құқықтарымыз да жазылған. Бұл қуанышты хабар! Сіз Құдай Патшалығының азаматысыз, сондықтан Құдайдың уәделеріне сіз де ортақсыз, сол уәделер сізге берілген!

Қорынттықтарға арналған 2-ші хаттың 1-ші тарауы, 20-шы аятында Құдайдың әрбір уәдесі (әрбір уәдесі!) *жүзеге асып, «иәға» айналады делінген. Солай шешілген, солай бекітілген, біздің берілген.*

*Оның барлық уәделері Мәсіх арқылы жүзеге асып,
«иәға» айналады; сондықтан «аумин» деп, Мәсіхтің
атымен Тәңір Иенің ұлылығын мадақтаймыз.*

– 2 Қорынт. 1:20

Құдай Патшалығы әділдік пен әділетке негізделеді. Құдай

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

Патшалығы – мызғымас, іргесі шайқалмас мәңгі Патшалық. Бұдан былай “Құдай Патшалығының заңын, яғни, Құдайдың еркін білсем, сол заңның орындалуына кепілдік беретін әділдік маған қолжетімді болса, нық сенімді бола аламын әрі ештеңеден қорықпаймын” деген бағытта ойлана бастаңыз.

Біз Оның еркіне сай бір нәрсе сұрасақ, Құдай тілегімізге құлақ салады деп нық сенеміз. Не сұрасақ та, Құдай бізге құлақ салады деп білсек, Оның тілегенімізді беретінін де білеміз.

– Жоханның 1-хаты 5:14-15

Құдай бізді тыңдайды әрі естиді делінген. Мұнда сөз біздің үнімізді, біз шығаратын дауыс толқындарын есту жайлы емес; Құдайдың біздің бұйымтайымызды мән бере тыңдайтыны жайлы. Соттағы төрешіні алайықшы. Сот пен төрешінің міндеті – әрбір азамат үшін әділдік орнату. Сот шешімі көңіл-күйге, жеке көзқарасқа емес, заңға негізделеді. Сот заңның барлық жағдайда, әрбір азаматқа қатысты мүлтіксіз орындалуын қадағалайды. Сот төрешісі жазылған заңға сәйкес әділеттілік орнатуға міндетті.

Исаға келіп, Құдай Патшалығының азаматтығын алған әрбір адам үшін Құдайдың билігі (төреші ретінде) әділдікті (Құдайдың еркінің орындалуын) қамтамасыз етеді.

Соңғы сөйлемді асықпай қайталап оқып шығыңыз. Осы ой сіздің Құдай туралы бүгінгі ұғымыңызбен қалай үйлеседі? Сенушілердің көбісі Құдайдың шешімдері әр жолы әртүрлі деп ойлайды. Әрбір жағдайда Иеміз шешімді әртүрлі қабылдайтындай көреді. Бұл – жаңсақ ой. Құдай – заңдары мәңгі өзгермейтін Патшалықтың билеушісі. Ол Өз заңдарына қайшы келетін, немесе заңнан тыс үкім шығармайды. Сондықтан да, өтінішімізді Құдайдың алдына әкелерден бұрын-ақ, жауабы қандай болатынын білеміз. Өз заңын жүзеге асыруға Құдайдың құдіреті жетеді. Олай болса, Құдайдың

заңында жазылған нәрселердің қайтсе де орындалатынына алдын-ала, көзімізбей көрмей тұрып-ақ, нық сене аламыз.

Дренда екеуіміз Киелі Кітапты зерттеп, Құдай Патшалығындағы құқықтарымызды біле бастағанымызда, Құдай жайлы, Құдайдың Сөзі жайлы түсінігіміз түбегейлі өзгерді. Жаңа көзқарасымыздың жемісі – жаңа, гүлденген өміріміз. Құдайдан әлденелерді жалбарына сұрап, жалынуды қойдық. Құдайдың Сөзіне сәйкес, Құдай Патшалығының азаматтары ретінде, бізге берілген уәделерді оқып білдік. Енді өзімізге заң жүзінде тиесілі нәрселерді иеленуді, оларды жердегі өмірімізге келтіруді үйренуіміз керек. Банктегі шотыңызда тұрған ақшаны алып, пайдаланғандай. Шотыңыздағы қаражатыңыз қаншалықты көп болса да, ақшаңызды қолыңызға алмай, жұмсай алмайсыз. Ақшаңызды шоттан алу үшін әуелі банкке барып, керек құжаттарды толтырасыз, сосын ақшаңызды қолма-қол аласыз. Кез келген жүйеде меншігіміздегі мүлікке не қаражатқа деген құқымызды көрсетуіміз керек, оның тәртібі заңда белгіленген.

Құдай бізді құдіретті күшімен және Оны жақыннан танып білуіміз арқылы Өзіне ұнамды жаңа өмір сүруімізге қажеттінің бәрімен қамтамасыз етті. Ол бізді Өзінің ұлы да ізгілікті болмысы арқылы меншікті халқы болуға шақырады.

– Петірдің 2-хаты 1:3

Бұл – Құдайдың Патшалығы! Патшалықтың әрбір азаматы басқа азаматтармен тең құқыққа ие. Осы тұста мына ақиқатты терең ұғынуымыз керек: Құдай патшалығында жүзеге асатын заңдар ешқашан өзгермек емес. Мұны білу неге маңызды дейсіз ғой? Себебі, мызғымас заңдарға негізделген патшалықта алалық, біреуге бұра тартушылық жоқ. Барлық азаматтардың құқы тең. Әрбір азамат Патшалықтың заңдарына жүгініп, заңмен бекітілген игіліктерге қол жеткізе алады.

Алайда, осы тұста сенушілердің арасында түсінбеушілік туады. Көптеген сенушілердің ойынша, Құдай көңіл-күйге еріп, кездейсоқ, ретсіз шешім қабылдайды. Басқаша айтқанда, олар Құдайдың біреуге көңілі түседі де, сол адамды жарылқайды, ал бүйрегі бұрмаған біреуді жарылқамайды деп ойлайды. “Адам өз өміріне өзі ықпал ете алмайды, бәрі тек Құдайдың қолында, ал Құдай қай кезде не істейтінін ешкім білмейді” деген көзқарас. Құдай біреуді сауықтырып, енді біреуді шипасыз қалдырады деген ой. Сенушілердің көбісі Құдайдан көмек сұрап жалбарынады, ал өздеріне қажеттің барлығын Құдай алдын ала қарастырып қойғанын ескермейді. Құдай оларға Патшалықты берді! Бүтін бір Патшалықты!

Маған Өз Патшалығы жайындағы ақиқаттарды аша бастағанда және қаражат жайлы білім бере бастағанда, Құдай мына аятты көрсетті:

Сол кезде Иса шәкірттеріне қарап былай деді: «Жарлылар, сендер бақыттысыңдар: Құдайдың Патшалығы өздеріңе арналған!»

– Лұқа 6:20

Менің қаржылық мұқтаждығыма жауап – Құдайдың Патшалығы, Иса тәрізді мен де, Патшалыққа “кіріп”, қажетімді ала аламын. Ол үшін Патшалықтың заңдарын осында, жердегі өмірде қолдана білуім керек. Құдай маған осындай нәрселерді айта бастады. Шынымды айтайын, әуелде ештеңе түсіне алмадым. Алайда, Құдайдың айтқандары жайлы ойланған сайын, патшалықтардың барлығында, расында да, заң үстемдігі жүретінін түсіне бастадым. Заңдар тұрақты, бәріне бірдей, сондықтан, әр жағдайда бірдей орындалады. Сол себепті, әлдебір заңның қалай жүзеге асып, қалай орындалатынын әр жағдайда болжап білуге болады. Бұл жайында бұрын рухани тұрғыдан ойламаппын. Алайда, осы

ойларым рас болса, Құдай Патшалығы, шынында да, мызғымас заңдарға негізделген болса, онда сол заңдарды мұқият зерттеп, қолдана аламын, олардың пайдасын өз өмірімде көре аламын.

Жердегі табиғат заңдары тұрақты екені бәрімізге аян. Табиғат заңдары үнемі әрі мүлтіксіз орындалады. Айнымас заңдылықтарға сүйеніп, адамзат ұшақпен ұшатын, тіпті, ғарышқа самғайтын болды. Дегенмен, мәсіхшілердің көбісі Құдай Патшалығына қатысты осы тәрізді ұғымдарды қолдана алмайды. Олар Құдайдың алдында жылап-еңіреп, керегін сұраумен болады. Шынымен де мұқтаж екеніне Құдайды қайтсе де сендіруі керек, ал Құдай оларға қамқор болатын-болмайтынын ойлана жатар.

Қауымымызда конференция өткізбек болдық делік. Бүкіл қауым конференция кезінде қауым ғимаратына электр қуатының берілуі жайында мінәжат етеді ме? Сенушілер ораза тұтып, “Иеміз, осы конференцияның қаншалықты маңызды екенін, конференция кезінде электр қуатының қаншалықты қажет болатынын білесің ғой” деп Құдай алдында көздеріне жас алып жалбарынады ма? Өйте қоймас, меніңше. Конференцияны жоспарлағанда, жарық болмай қалады деген ой, тіпті, ешқайсымыздың санамызға келе қоймас. Әлдебір себептермен, электр қуаты болмай қалса, тұтынушыларға ток жеткізетін ұйымға телефон шалып, жарық беруін жалбарына сұрайды ма? Жоқ. Ал телефон шалса, жауап берген адам бірер секунд тыңдағаннан кейін жанындағы әріптесіне бұрылып, “Бізге бір есалаң адам хабарласып тұр” дер еді. Сосын “Біз электр қуатын үзбей беріп отырмыз. Мәселе өзіңізде болар” дейді.

Осы мысалды келтіргенімде, тыңдармандарым бір күліп алады. Неге екенін білесіз бе? Өйткені, қаланы электр қуатымен қамтамасыз ететін ұйымға хабарласып, жыларман болып, шамыңызды жағып беруін өтіну – әпенділік. Бізден керегі – тетікті басып, шамды жағу. Бар болғаны, сол ғана. Қарапайым

ғана әрекет! Уайымның да, абыржудың да керегі жоқ – тетікті бассаңыз болды. Шам жағарда сары уайымға салынып, стресске ұшырап қалмаймыз ғой. Неге екенін білесіз бе? Өйткені, тетікті бассақ, шам жанатынына сенімдіміз. Электр тогының қалай жұмыс істейтінін білеміз, сондықтан, шамның жанатынына СЕНІМДІМІЗ. Электр қуатын басқаратын ЗАҢДЫ білеміз және сол заңның әрқашан орындалатынын білеміз.

Алайда тарихтың тереңіне сапар шегіп, осыдан мың жыл бұрынғы әлемге түстіңіз дейік. Сол кездегі адамдарға бүкіл қаланы шыныдан жасалған шамдармен жарықтандыруға болатынын айтсаңыз, сөзіңізге ешкім сенбес еді. Ата-бабаларымыз электр шамдарын көрсе, мұны тылсым құдіреттің күшімен жасалған керемет деп ойлайтын еді. Бірақ электр шамы – жұмбақ та, Құдайдың кереметі де емес, жай ғана физикалық заңдардың жүзеге асуы. Бұл заңдарды біліп меңгерген әрбір адам, оларды өз игілігіне пайдалана алады.

Сонымен, электр қуатының қасиеттерін біліп, осы салада ойымызды жаңарттық деуге болады. Енді біз осы заңдарды өз игілігімізге пайдалана аламыз, олардың жүзеге асатынына кәміл сенімдіміз, электр қуатының арқасында шамның жанғанын көргенімізде еш таң қалмаймыз. Қайта, шамымыз жанбай қалғанын оғаш көреміз. Физикалық заңдарды зерттеп, меңгеріп алғаннан кейін, электр қуатын жердің кез-келген нүктесіне апара аламыз. Қалай дейсіз ғой. Сол жердің тұрғындарына да физика заңдарын үйретсек, олар да электр қуатын өз игілігіне пайдаланып, рахатын көре алатын болады. Рухани заңдар да солай. Оларды түсінбесек, әлбетте, керек кезде қолдана да алмаймыз.

Көкке самғаған ұшақты көргенімізде, “Мынау не деген керемет!” деп қайран қалмаймыз. Ұшақтардың қалай ұшатынын, қандай заңдылықтардың арқасында ұша алатынын білеміз. Алайда, осыдан мың жыл бұрын адамдардың төбесінен реактивті

қос палубалы Airbus A380 ұшып өтсе, мұны көргендер не дер еді? Құдайдың кереметін көріп тұрмыз деп ойлайтын еді! Airbus A380, расында да, — ұмытылмас әсер қалдыратын ұшақ. Салмағы 500 тоннадан асады, сыйымдылығы 800 адам, жылдамдығы сағатына 900 км, 15 мың шақырымды жерге бір қонбастан ұшып өте алады. Осынау тамаша көлік, шынымен де, Құдайдың кереметі іспетті! Дегенмен, оның пайда болуына да, ұшуына да ешбір тылсым күштің қатысы жоқ. Ұшақты құрастырған мамандарға жүгінсек, физика заңдарын қолдана отырып, оны қалай ұшырғандарын айтып береді. Ұшақтың әрбір тетігі мен бөлшегі жайлы да айтып бере алады. Бір де бір инженер алғаш рет ұшқан ұшақтың кабинасында отырып, «Мынау ғажап қой! Мына көлік шынымен де ұша алады ма? Сене алар емеспін!» демейді. Тағы да қайталаймын, ұшақтың аспанға самғауы – кездейсоқтық та емес, Құдайдың кереметі де емес, физикалық заңдарға негізделген құбылыс. Осы заңдарды ұстансақ, ұшақ құламайды. Ұшаққа қорықпай мінетініміздің себебі де – сол. Заңдар өзгермейді, осыны мықтап түйіп алыңыз!

Физикалық заңдар тұрақсыз болса, ешкім де ұшаққа мінбес еді. Сіз ұшаққа билет алдыңыз дейік. Билетте басқа жазулардан басқа мынадай ескерту бар: «Аэродинамика заңы тұрақсыз, сондықтан сапарыңыз сәтті аяқталатынына кепілдік бере алмаймыз. Қалай болатынын ешкім анық білмейді. Жолыңыз болатынын жүрегіңіз сезеді ме? Сапарыңыздың сәтті болуына тілектеспіз!» Басқа мысал қарастырайық. Отырған орындығыңыздың үстінен жиі қалықтайсыз ба? Қалықтаған емессіз бе? Неге? Өйткені тартылыс күші қашанда бар, гравитация заңы тұрақты.

Табиғаттағы физикалық заңдардың барлығын Құдай орнатқан. Құдай Патшалығындағы рухани заңдар да дәл солай – олар да тұрақты! Құдай маған Өз патшалығындағы заңдарды ашып бермей тұрғанда да табиғат заңдарын білетінмін, әлбетте. Алайда, Құдайдың Патшалығында бәрі басқаша деп ойлайтынмын.

Жаратқан Ие қалаған уақытында қалаған нәрсесін жүзеге асырады деп ойлатынмын. Құдай Патшалығындағы рухани заңдардың еш мызғымайтынын, оларды зерттеп түсінуге, қолдануға болатынын түсінгенімде, Исаның “Құдай Патшалығы қандай нәрсеге ұқсас, оны немен салыстырайын?» деген сөздерінің де сырын ұқтым. Иса Құдайдың Патшалығын бәрімізге таныс құбылыстармен немес заттармен салыстырып, адамдарға түсінікті етуге тырысқан екен. Кенет қараңғы бөлмеде шам жарқ еткендей әсер алдым. «Құдай бізге Патшалықты тапсырған болса, ол Патшалықта белгілі бір заңдар жүретін болса, ол заңдар тұрақты болса, мен сол заңдарды зерттеп, өз өмірімде қолдана аламын ғой».

Шағын қауым, қорықпа! Көктегі Әкең Патшалықты сендерге тапсыруға ризалық еткен.

– Лұқа 12:32

Сол күннен бастап, рухани зерттеушіге айналдым! Киелі Кітапты мүлде басқаша түсінетін болдым. Құдайдың Сөзін оқып отырып, «Балықтың молаюының себебі неде? Мына адамның сауығып кетуінің себебі неде? Нан қалайша осынша көбейіп кетті?» деген тәрізді сұрақтар қоюмен болдым. Киелі Кітапты осылай оқып, Құдайдан Патшалық қағидаларын ашып беруін сұрай бастағанымда, кереметтер көре бастадым!

Үйімізге заңгер телефон шалған күн есіңізде ме? Сол күні Құдай Патшалығында қандай заңдар мен қағидалардың жүзеге асатынын білмегендігімнен осындай жағдайға душар болғанымды білдім. Құдайдың жүзін іздемегенімді, Құдай Патшалығын зерттеп, ұғынуға күш салмай, отбасымды осынша аянышты халге жеткізгенімді мойындап, әйелімнен кешірім сұрадым. Құдай Патшалығында бізге керек жауаптардың барлығы бар екеніне сену деген не, оны өзіміз де білмейтін едік. Тағы да қайталап айтып кетейін, біз сенуші болатынбыз, Құдайды сүйетінбіз, бірақ,

«Патшалық» дегенде, Құдай нені айтатыны бізге беймәлім еді. Әлгі заңгер ақшаны үш күннің ішінде тауып бермесек, ісіміздің сотта қаралатынын айтқанда, не істерімізді білмедік.

Міне, Құдайдың айтқанын сынап көрудің сәті түсті. Қаржы мәселесін шешудегі алғашқы тәжірибем осы болмақ. Құдайдың маған «Патшалық» деген сөздің терең мағынасын ашып беруін күттім. Сонымен, болған жайды айтып берейін. Есіңізде ме, заңгер қарызымды қайтаруға үш күн мерзім берген болатын, ал менің бір тиын ақшам жоқ! Қолымнан бар келгені – бөлменің есігін жауып алып, Құдайға жалбарына сиыну. Нағыз тығырыққа тірелдім. Міне, сол күні Құдай мұқтаждығымның жауабы – Оның Патшалығында екенін айтты.

Арада екі күн өтті. Сақтандыру компаниясында жұмыс істейтін едім, клиентпен кездесуге дайындалып жатқам. Клиенттің үйіне барғанымда, көлігімді қашанда үйдің артындағы бұрылыстың ар жағында қалдыратынмын. Клиенттің үйінің алдына машинамен барған емеспін. Тозығы жеткен машинамды көрмесін деген амалым ғой. Көлігімді оталдырған кезде, көшені ақ түтін алып кететін еді. Клиенттің үйінің алдын түтінге толтырып кеткенім ісімнің алға басуына септігін тигізбесін білемін. Мен клиенттеріме құны жүздеген мың доллар сақтандыру полистерін сатамын, өзім өте білікті қаржы менеджерімін, сөйтіп тұрып, мынадай көлік мініп жүргенімнен ұяламын. Сол күні де дәл солай болатын.

Клиенттің үйінен шықтым да, машинама тұрған жаққа бет алдым. Әлгі кісі менен қалар емес. Әңгімені жалғастырып, қатарласып келе жатырмыз. Мазам кете бастады. Көлігімді оталдырғанымда мына кісі машинаның жанында тұрар ма екен? Минивэніме отырдым. Әңгімеміз әлі жалғасуда. Әйнекті түсіріп қойып, терезеден сөйлесіп отырмын. Ойым – клиент бұрылып, қайтуға оңтайланғанда, бірер минут қағаздарыма үңіле тұрам да, ол кісі бұрылыстың ар жағына өтіп кеткенде, жүрем. Алайда,

клиентімнің кететін түрі жоқ. Біраз сөйлескеннен кейін, қоштасты-ау, әйтеуір. Бірақ, қырсық қылғандай, үйіне кетпей, әрірек барып тұрып алды. Амал жоқ, көлігімді оталдыра бастадым. Осы жолы түтіндемес деген үмітім де бар. Алайда, үмітім ақталмады. Көше көзді ашытқан ащы түтінге толды да кетті.

Танысым қолын бұлғап, моторды сөндір деп белгі берді. Жақын келді де, капотты ашуымды сұрады. Кезінде автомеханик болып жұмыс істепті, моторымды қарап шықпақ болды. Сәлден кейін көлігімнің қауын көрсетті де, «Үйіңе тездетіп жет те, машинаңды дереу жөнде» деді. Рахметімді айттым. Бірақ, қайтейін, машина жөндетуге ақшам жоқ.

Кеңсем жақын жерде болатын, арасы небары тоғыз шақырым. Жолай көрпеге оранғандай, депрессияға тағы орандым. Дегенмен, Құдайдың айтқандарын есіме түсіре бастадым. Енді Жаратқан Иеме көлігім жайлы айта бастадым. «Ием, мына машинаны жөндеуге ақшам жоқ. Өзі қарызға алынған. Сатып, қарызымды қайтарайын десем, сынған қалпында сата алмаймын. Не істерімді білмеймін.

**ҚҰДАЙДЫҢ ҚАРЖЫЛЫҚ
ЖҮЙЕСІ МІНСІЗ ЕКЕНІНЕ
КӨЗІМІЗ ЖЕТТІ. ҚҰДАЙ
ПАТШАЛЫҒЫНЫҢ
ҚАҒИДАЛАРЫН ЗЕРТТЕП,
ҚОЛДАНА БЕРЕМІЗ ДЕП
БЕЛ БУДЫҚ.**

Бұл машинаның өртеніп кеткені жақсы ма еді? Сонда бір жағынан, сақтандыру компаниясынан құнын алып, қарызымды жабар едім, екінші жағынан қираған көліктен құтылатын едім”.

Кеңсеме бес шақырымдай қалғанда капоттың бетінде төмпешік пайда болғанын көрдім.

Бұрын жоқ-ты. Төмпешік бірте-бірте үлкейіп барып, кеңсенің алдына келіп тоқтағанымда, жалындап өртене бастады. Сасып қалдым. Машинамның алдыңғы жағы отқа оранды. Жалын капоттан екі метр биіктікке көтеріліп жатыр. Кеңсеге жүгіріп

кірдім де, өрт сөндірушілерді шақырдым. Ертеңіне сақтандыру компаниясы өртенген көлігімнің құнын төлеп берді. Төлемнің сомасы машинаның қарызын түгел жабуға жетті, үш күн бұрын үйге телефон шалғанға заңгердің талап еткен ақшасын да сол сомадан төледім. Дренда екеуіміз аң-таңбыз. Не ойларымызды да білмедік. Жалғыз-ақ, өмірімізде Құдай әрекет ете бастағаны, түбегейлі өзгерістердің басталғаны анық. Алайда, Патшалық қағидаларын үйреніп, ұстануға деген беталысымыз сыналып, болашақта дұрыс бағыт ұстануымызға сол сынақтар септігін тигізеді екен.

Минивэнымыз өртеніп кеткеніне қуанып қалдық, әрине. Бірақ жаяу қалдық. Көлік алуға алған қарызымызды жаптық, заңгердің алдында да борышты емеспіз, алайда, басқа машина алатын ақшамыз да жоқ. Көліксіз қалғанымызды естіп, әкем хабарласты. Жаңа көлік алуымызға көмектеспек. Мына жаңалыққа қатты қуанып қалдық. Әкеммен бірге жақын жердегі көлік сататын дилерге барып, көңілімнен шыққан машинаны таңдадым. Әкем 5 мың долларды өзі төлейтінін айтты, машинаның құны 17 мың. 12 мыңын өзіміз төлеуіміз керек, тәуекелге бел буып, несие алуға құжат толтырдым. Құжатқа әкем екеуіміздің қолымыз қойылды. Несиенің берілетін-берілмейтінін ертеңіне таңертең білетін болдық.

Мойынымызға тағы бір қарыз ала алмайтынымызды ойлап, түні бойы көз ілмедік. Алдында ғана Құдай сол жайлы айтқан болатын. Бірақ жаяу қалғаныма қиналып, тайып кетуге дайын едім. Уайымға толы ұйқысыз түннен кейін Дренда екеуіміз несие келісімшартына қол қоймайтын болып ұйғардық. Әкеме хабарласып, көмектеспек болғаны үшін алғысымды айттым да, тағы да қарызға кіре алмайтынымызды жеткіздім. Сосын дилерге телефон шалып, оған да осыны айттым. Сатушы несие құжаттары дайын екенін, машинаны алып кетуге болатынын айтып, налыды. Мынадай жағдайда Құдайдың қалай көмектесетінен мүлде бейхабар болсақ та, жүрегімізде – тыныштық.

Сол күндері Дренданың қолдан алған антиквариат бұйымдарын сататын ұсақ-түйек кәсібі бар еді. Минивэнымыз өртеніп кеткенге дейін бір ай бұрын Дренда бір кісіге хабарлама жіберген еді. Ол адам жихазын сатпақ болатын. Бірақ, сатушы хабарламаға жауап бермеді. Көлігіміз өртеніп кеткеннен кейін бір-екі күн өткенде, әлгі кісі бізге телефон соқты. Үш шеберханасы бар екен, үшеуі де антиквариат жихазға лық толы. Осы мүліктің барлығын небарымың долларға сатпақ. Дренда аукцион өткізетін компаниямен сөйлесіп, жихазды сол компания арқылы сататын болып келісті. Ақысына ақша емес, машина алатын болды. Мінілген көлік болса да, күтімі жақсы екен. Сонымен, қарыз алмай-ақ, жап-жақсы машинаға қолымыз жетті. Бұрынғы екі қарызымыз да өтелген.

Міне, ғажап! Патшалықтың заңдары деген осы екен ғой! Құдайдың қаржылық жүйесі мінсіз екеніне көзіміз жетті. Құдай Патшалығының қағидаларын зерттеп, қолдана береміз деп бел будық. “Қай қағиданы қолдандыңдар?” деп сұрайтын боларсыз. Ең басты қағида – қарызға кірмеңіз, оның орнына мұқтаждығыңызды Құдайдың алдына әкеліп, жауабын алудың жолын көрсетуді сұраңыз.

Минивэнмен болған жағдай екі ай бұрын орын алған оқиғаны есіме түсірді. Алайда, сол уақытта Құдайдың не айтпақ екенін түсіне алған жоқпын. Айнаның сынықтарындай жарықшақтардан Құдай Патшалығының бүтін бір бейнесі құрала қойған жоқ еді ол кезде.

Аңшылықты, бұғы атуды жақсы көремін. Бірақ қанжығам майланбай-ақ қойғаны. Мылтығымды асынып алып, аңға шығамын, бұғыларды аңдып, қырдың үстінде тығылып ұзақ жатамын, әбден тоңамын, сөйтіп үйіме құр қол қайтамын. Мәселе аңшылыққа құмарлығымда емес. Бала-шағама тамақ керек, бұғының еті біразға дейін талғажау болар еді. Ертеректе аңшылықтан олжалы қайтқан кездерім болған. Алайда, одан бері

бірнеше жыл өтті. Бірде, алда аңшылық маусымы келе жатқанын ойлап отырғанымда, жүрегіме Құдай сөйледі: “Биыл бұғы алуды саған Өзім үйретпекпін, келісесің бе?” Абдырап, “Бұғы алуды үйретесің бе? Мұны қалай түсінуге болады?” дедім. Құдайдың айтқанын түсінуге тырысып, ойланып отырғанымда, жүрегімде ақшалай тұқым егіп, жемісін бұғының етімен алуға деген қалау пайда болды. Тұқымды еккенде-ақ, көзбен көрмей тұрып, жемісін алдым деп сенуім керек. Құдай жүрегіме Марқа жазған Ізгі хабардағы аятты салды:

Сондықтан сендерге былай деймін: Құдайға сиынып (Оның еркіне сай) не сұрасаңдар да, соны қабылдадық деп сеніңдер! Сонда ол орындалмақ.

– Марқа 11:24

Көп жылдан бері сенушімін, сондықтан, құрбандық беріп, қауымды қолдау – ежелгі әдетім. Алайда, осылайша, көрмей тұрып алдым деген сеніммен, әрі анық мақсат қойып құрбандық беру – мен үшін жаңалық. Чек толтырдым да, қосымша «1987 жыл. Бұғы үшін» деп жазып қойдым. Чекке қолымды қойып мінәжат еттім де, өзім сенетін қызметтердің біріне құрбандық ретінде жібердім. Чекті жібере отырып, бұғымды қабылдадым деп жарияладым.

Оклахома штатындағы Талса қаласында тұрғанымызда, төңіректе аң аулайтын жер жоқ еді. Бір күні қауымдағы достарымның бірі әжесінің ауылына барып, Алғыс айту мерекесін сол жақта бірге өткізуге шақырды. Фермаға жақын жерде бұғылар бар көрінеді. Сонымен, белгіленген күн жеткенде таңертең жанұямды алып, жолға шықтым. Ойымыз – жақсы достармен дастархандас болып, мерекені көңілді өткізу. Және, жолымыз болса, бұғы атып алу.

Досым аңшылыққа әуес емес, сондықтан, бұғы алу үшін қай

бағытта жүру керек екенін білмейтін болып шықты. Ферманың маңында жан-жағын орман қоршаған үлкен жайылым бар екен. Сонда барып, жайылымның ортасында өскен үлкен ағаштың түбіне жайғасатын болып шештім. Енді көз алдыңызға елестете беріңіз. Шөбі орылған жайылымның ортасындағы зәулім ағаштың түбінде арқамды сүйеп отырмын. Орманның шеті – алдымда, менен жүз метрдей жерде. Қазір ойлап отырсам, ағаштан да, шөптен де жұрдай, ашық алаңдағы жалғыз ағаштың түбі – аңшыға тиімді орын емес.

Қырық минуттай уақыт өткенде, жайылымды бір бұғы кесіп өтпек болды. Ол орман ішінен шығып, алаңның ортасына қарай жүрді. Менің ту сыртымнан ағашқа жақындап келді. Бұғының келіп қалғанын білгенім жоқ. Жануар да ағаштың жуан діңінен мені көре алмапты. Жақынырақ келгенде, бөтен иістен секем алса керек, тоқтай қалып, жан-жаққа қарайды. Енді ағашты айналып келіп, мені көрді де, кілт тоқтады. Көзіміз түйісіп қалды, арамыз есік пен төрдей. Ол да аң-таң, мен де аң-таңмын. Адам мен бұғының бетпе-бет келіп қалуы деген – күтпеген жайт. Бұғы осықырынып қалып орманға қарай тұра ұмтылды. Отырған күйімде мылтығыма жармастым. Бұғы орманға қарай ағызып барады. Қапелімде мылтығымның қарауылына ілінер емес.

Ескерте кетейін, бар пәрменімен шауып бара жатқан бұғыны алыстан дәлдеп ату – оңай шаруа емес. Шауып бара жатқан бұғыны бұрын-соңды атқан емеспін. Аққұйрық бұғылар шабыс кезінде жоғары-төмен секіріп бара жатқандай болады, сондықтан, көздеп ату өте қиын. Дегенмен, шүріппені басып қалғанымда, бұғы жалп етіп құлап түсті. Аң-таңмын! Осының барлығы бірнеше секундта болған оқиға. Жүз метр жерде шауып бара жатқан бұғыны жалғыз оқпен атып алдым.

Мылтықтың даусын естіп, досым келді. Олжамды көріп, қуанып қалды. Досыма Құдайдың маған бұғы алуды үйреткені

жайлы айтып бердім. “Мына бұғы асқан аңшылық қабілетімнің арқасында қолыма түскен жоқ” дедім, досыма қарап. Қалтамнан “Исаның атымен, 1987 жылы бұғы атып аламын деп сенемін” деген жазуы бар бүктелген қағаз алып шықтым. Бұл сөздерді чек толтырған күні жазған болатынмын. Парақтың астыңғы жағында сол мінәжатымның күні мен сағаты жазылыпты. Қағазды досымның қолын ұстаттым да, мән-жайды айта бастадым.

Сол күнгі оқиға көңіліме оттай басылды. Бұл – Құдайдың ісі, оған күмән жоқ. Дегенмен, Құдай Патшалығының заңы жүзеге асқанын ұға алар емеспін. Шын мәнінде, “Патшалық” ұғымын сол уақытта қарастырған да жоқпын. Бұғыны атып алу, тамаша, әрине. Бірақ, бұған себеп болған заңдылықты білмей, екінші рет олжалы бола алам ба? Құдай Патшалығының қағидаларын білмесем, бұғының алаңға шығуына ненің себеп болғанын да білмеймін. Сондықтан Құдайдың жасаған кереметін жүрегіме түйіп қойдым да, келесі жылы қанжығамның тағы да майлануын күттім. Бірақ келесі аңшылық маусымы басталмай тұрып, минивэным өртеніп кетті. Сосын басқа көлікке ақысыз-пұлсыз қол жеткіздік. Осы оқиғалар тізбегі назарымды баурап алды. Енді келесі аңшылық маусымын асыға күте бастадым. Құдай Патшалығы жайлы білгендерімді тағы да сынап көрмекпін, және білімімді тереңдете түскім келді. Аңшылық маусымы де жақындап қалды!

Сол бұғыны мен 1987 жылдың күзінде, Оклахома штатында атып алған болатынмын. 1988 жылы, шілде айында өзім туып өскен Огайо штатына көшіп бардық. Балалық шағым сонда өткен еді. Дегенмен, он екі жылдан бері мұнда болған жоқпын. Огайо штатында тұрғанымда, бірнеше рет аңшылыққа шыққаным бар. Бірақ жолым болған емес. Бұғы атып алудың сәті бірде-бір рет түспепті. Сонымен, Огайоға көшіп келдік. Таунхаус жалдап, сонда қоныстандық. Алайда, аң аулайтын жерлерді мүлде білмейді екенмін. Бала кезімде көшенің арғы жағындағы өзеннің бойындағы тоғайдың ішінде қоян аулайтын едім. Көп жыл бойы

сол маңайда тұзақ құрып жүрдім. Бірақ бұғы көрген емеспін, Тіпті бұғының ізі де көзіме түспепті. Кейінірек, колледжде оқып жүргенімде, інім телефон шалып, өзеннің бойынан бұғы көргенін қуана айтты. Екеуіміз де бұл жайтқа қатты таңырқаған болатынбыз.

Енді міне, сол әңгіме есіме түсті. Аңшылық маусымы ашылған күні өзен жағалап, төмен қарай жүруді ұйғардым. Ініме хабарласып, жөн сұрадым. Оның да көшіп кеткеніне бірнеше жыл болған. Дегенмен, өзен мен орманның арасында өскен үлкен үйеңкі ағашы есінде екен. Бұғы аулауға сол ағаштың төңірегі ыңғайлы болар деді. Бала кезімнен таныс соқпақтармен жүріп отырып, кәрі үйеңкіні тез тауып алдым.

Оклахомадағы бір жыл бұрынғы оқиға да, Құдайдың сондағы үйреткендері де Дренда екеуіміздің есімізде: тұқым егу, Марқа жазған Ізгі хабарда (11:24) айтылғандай, мінәжат еткен сәтте жауап алдық деп сену, қандай жеміс күтетінімізді жазып қою. Сол уақытта Огайода бұғы аулаға шектеу қойылған еді, еркек болсын, ұрғашы болсын, екі бұғыдан артық атуға болмайды. Бірақ Дренда екеуіміз алдымен Құдайдан бір бұғы сұраймыз да, екіншісін сұрауды кейінге қалдырамыз деп ойладық. Тұқымымызды ектік те, жемісін қабылдадық деп сендік. Енді мына кереметті қараңыз: аңшылық маусымы ашылған күннің таңертеңінде қырық минуттың ішінде бір емес, екі бұғы атып алдым! Ал керек болса! Бір құпияның кілтін тапқан сияқтымыз!

Бір ай өтті. Түсімде бір тиімді кәсіп ашудың жолын көрдім. Сақтандыру компаниясында жұмыс істеп жүріп, қаржы саласында көп білім жинап, білікті маманға айналған болатынмын. Түсімдегі кәсібім сол біліміме негізделген, тек мақсаты басқа. Түсімнің мән-мағынасын жете түсінбесем де, Құдай мені сегіз жыл жұмыс істеген компаниядан шығып, өз бетімше кәсіп бастауға жетелегенін ұқтым. Түс көрген кезде мен әлі де акциялар мен

сақтандыру полистерін сатумен айналысып жүрген болатынмын.

Түс көргеннен бірнеше күн кейін бір жанұямен кездесіп, отбасы мүшелерінің өмірін сақтандыру жайлы сөйлесуім керек болатын. Шын мәнінде, сақтандыру полисін сатып алу – олардың дәл қазіргі мұқтаждығы емес екенін білемін. Бұл отбасының қарыздары шамадан тыс көп, ай сайын ақшаларын әрең жеткізіп отырады. Әдетте, клиенттермен жұмыс жасағанымда, анкета толтыртып, қаржылық жағдайы жайлы толық мәлімет аламын. Сол мәліметтерге сүйеніп, сақтандырудың қай түрі қажет екенін шешемін. Әлгі отбасының қиын жағдайын ойлап, қынжылып отырғам. Оларға қолұшын созғым-ақ келеді, бірақ қалай көмектесе алатынымды түсіне алар емеспін. Сол отбасының анкетасын алып, тығырықтан шығудың түрлі жолдарын қарастыра бастадым. Есеп жүргізіп отырып, сақтандыру полисі жайлы ойлауды ұмытып, ай сайынғы бюджеттерінен аздап ақша үнемдеудің жолын іздей бастадым. Біраз есеп-қисаптан кейін кейбір кіріс-шығыстарды ретке келтірсе, бұл отбасы жеті жылдан кейін барлық қырызынан құтыла алатынын көрдім. Мынадай нәтиже күткен жоқ едім. Жеті-ақ жыл! Және бұл кірісті көбейтпеген жағдайда. Барлық қарыздар дегенімде, ішінде ипотекалық несие де бар.

Қаржы саласында жұмыс істегеніме сегіз жыл болған еді. Мұндайды естіп көрген емеспін. Есептен жаңылдым ба деп, анкетадағы мәліметтерді де, өз есебімді де қайта-қайта тексеріп көрдім. Сол нәтиже шыға берді: алты жыл екі айдан кейін қарыздары түгел жабылады. Клиенттерімнің анкеталары сақталған папкаларды алып шықтым. Басқа анкеталардағы

**ИПОТЕКАЛЫҚ НЕСИЕНІ
ҚОСҚАНДАҒЫ БАРЛЫҚ
ҚАРЫЗДАН КІРІСТІ
КӨБЕЙТПЕЙ-АҚ ЖЕТІ
ЖЫЛДЫҢ ІШІНДЕ
ҚҰТЫЛУҒА БОЛАТЫНЫН
ТҮСІНГЕНІМДЕ, ҚАЙРАН
ҚАЛДЫМ.**

мәліметтерге сүйеніп, әлгіндей есеп жүргіздім. Сол нәтиже шыға берді. Қарыздың барлығын жеті жылдың ішінде түгел төлеп шығуға болады екен. Шынымды айтсам, мына жаңалық аздап есеңгіретіп тастағандай болды.

Клиентімді қуантуға асықтым. Сақтандыру тақырыбына арналған кездесу барысында ол кісіге қаржылық тығырықтан шығудың жолын да көрсетпекпін. Ойымды неғұрлым ұғынықты етіп жеткізу үшін көрнекті презентация дайындадым. Бұл отбасының жағдайы жаныма қатты батқан еді. Ақшаның жетіспеушілігі өмірдің әр саласына кері әсерін тигізетінін жақсы білемін, өз басымнан өткен жағдай. Сондықтан, осы кісілерге ықыласым қатты ауды. Сонымен, кездесу үстінде презентациямды көрсетіп, ойымды цифрлармен дәлелдеп шықтым. Үй иелері қайран қалып отыр. Барлық қарызынан қай мерзімде және қалай құтыла алатынын көрсеткенімде, отағасы орнынан атып тұрып, алғысын жаудыра берді, көзіне мөлтілдеп жас келеді. Мына көрініс лотерея немесе әлдебір теледуманда басты сыйлық ұтып алған адамдарды есіме түсірді. Сөзіме сенер-сенбесін білмеді. Олар да, мен де балаша қуандық.

Кейін осы кездесу жайында көп ойландым. Клиентімнің активтерін басқаша үлестіріп, аздап есеп-қисап жасап, нәтижесінде бір отбасының жеті жыл ішінде қарыз атаулыдан толық арылу жолын тапқанымды қайта-қайта ойлай бердім. Сол кісілерге болған оқиғаның қандай әсер қалдырғанын, жүректеріне үміт оты жарқ етіп жанғанын көзіммен көрдім. Енді басқа клиенттерімнің құжаттарын ақтара бастадым. Жеті жылдық мерзімнің ішінде қарыздан шыға алатындар бар ма екен деп, есепке кірістім. Таң қалғаным, ондайлар 85 пайыз екен. Бірақ оларға мұны айтатын адам жоқ. Міне, осылайша борышкерлерге қарыздан құтылу жолын көрсетуді кәсіп қыла алатынымды түсіндім.

Өмірімнің сол кезеңінде өзімнің де жағдайым мәз емес-ті,

қарыз тұзағына түскен адамның өмірі қандай болатынын жақсы білемін, оларға жаным ашиды. Жаңа миссиям сақтандыру полистерін сатқаннан әлдеқайда ұнамды. Сақтандыру саласындағы клиенттерімнің барлығына қарыздан құтылу жайлы презентация көрсететін болдым. Презентациямды көргендер аңтаң болып жатты.

Алайда, бұл ісімді кәсіпке айналдырардан бұрын бірнеше мәселені шешіп алуым қажет. Біріншіден, есеп-қисап жүргізу мен презентация жасау көп уақыт алады, барлық жұмысты өзім істеймін ғой. Екіншіден, осы кәсіптен қалайша табыс табуға болады? Ақыры, программист маманмен келісіп, қаржы жоспарын тез жасайтын компьютерлік бағдарлама жасаттым. Ал екінші мәселенің шешімі тез табыла қойған жоқ. Қарыздан құтылу жолын көрсеткенім үшін қарызға батқан адамнан қалайша ақша алмақпын? Осы жайында дұға ете бастадым.

Біраздан кейін санама жарқ етіп сұрағымның жауабы келді. Құдай компания ашып, адамдарға ақысыз көмектесем де, кәсібім табысты бола алатынын көрсетті. Клиенттерімнің “жоғалған ақшасын”, яғни бар екенін өздері де білмейтін қаражатын тауып беремін. Несиеге алынған мүлік: автокөлік, үй, сақтандыру полисі, т.б. банкке төленетін үстемақысын қарап шығамын. Несиенің үстінен төленіп отырған пайызы жоғары болса, оны азайтудың жолын көрсетемін. Өзім бұл салада маман болмасам да, несие саласында жақсы білімім бар. Клиентіме несие пайыздарын азайтып, ақша үнемдеу жолын көрсетемін. Ол менің жоспарымды орындай алатын компания тауып, сол компаниямен келісімшарт жасасады. Немесе несиені қайта қаржыландыратын ұйымға жүгінеді. Олай болса, мен әлгі компаниялардан клиент тауып бергенім үшін ақы сұрай аламын ғой. Санама осы ой сап ете қалғанда, мәселенің түйіні шешілді.

Клиенттеріме әлгіндей компаниялар туралы айтып, соларға

баруға кеңес беріп жүргем. Сол ұйымдар менен барған клиенттермен келісімшарт жасасып, табыс тауып жүр. Сонымен, клиенттерімнің мәселесін қолға ала алатын компаниялармен келіссөз жүргізе бастадым. Оларға өз жұмысымды түсіндіріп, оларға клиент тауып бергенім үшін ақы алғым келетінін айттым. Ешқайсысы да қарсылық білдірмеді. Осы кәсіппен айналыса бастадым. Жұмысымнан шығып, өз кәсібімді бастадым. Кәсібім – адамдарға қарыздан құтылуға көмектесу болды. Ісім табысты болып, Дренда екеуіміз барлық қарызымызды екі жарым жыл ішінде төлеп шықтық! Біз үшін бұл зор қуаныш болды! (Қарыздан шығудың жоспарын тегін алғыңыз келсе, бізге хабарласыңыз. Телефонымыз 1-800-815-0818. Бұл кәсіппен 28 жылдан бері әлі айналысып келеміз!)

Құдай бізге Өз Патшалығы жайлы ақиқатты ашқан сайын, біліміміз күн санап, тереңдей берді. Кезекті клиентіммен кездесу барысында жұмыскерлер жалдап, бизнесімді жаңа деңгейге шығара алатынымды ойладым. Бұл ойды жүрегіме Құдайдың Өзі салған болатын. Бірнеше жұмыскер жалдадым, кәсібім өркендей түсті. Енді көлікті несиеге емес, қолма-қол ақшаға алатын болдық. Көкейіміздегі арманымыз орындалды – ойымыздағыдай үй салып алдық. Жұмыскерлеріммен ай сайын бизнес-кездесу өткізетін болдым. Компанияма келіп, қол астымда жұмыс істегісі келетін адамдардың саны көбейе берді. Олардың көздегені – табыс қана емес, Құдай Патшалығы жайлы көбірек біліп, Патшалық қағидаларын өздерінің өмірінде пайдалануды үйрену.

Құдайдан таңғажайып сабақтар алумен болдым. Әлбетте, олардың көбісі жыл сайынғы аңшылықта орын алды. Адам сенгісіз хикаялар басымнан өтті. Көзіммен көрмей, біреуден естісем, сенбес едім. Әрбір жаңа оқиға Патшалықтың өзім білмейтін жаңа қырларын ашып көрсетті. Қолыңыздағы кітапта олардың кейбірі ғана сөз болады. Толығырақ ақпарат алғыңыз келсе, менің веб-сайтымнан «Сенімге сүйенген аңшылық» (Faith Hunt) атты кітабымды оқи аласыз.

Патшалық жайындағы жаңа білімімді алғаш рет аңшылықта қолданғаныма екі жылдай болғанда бір маңызды оқиға болды. Жоғарыда айтқанымдай, бұғы алмақ болсам, тұқым сеуіп, жемісін сол мезгілде сеніммен қабылдауым керек екенін үйрендім. Содан бері осы қағида үнемі орындалып келеді. Жемісімді 30-45 минут аралығында аламын. 28 жылда бір рет мүлт кеткен емеспін. Сол бір жылы тағы да аңға шықтым, бұғы кездесетініне тарыдай да күмәнім жоқ. Бірнеше минуттан кейін екі жүз метрдей қашықтықта көршімнің шалғындығына қарай беттеп бара жатқан бұғыны көзім шалды. Орманға кіріп кетсе, бұғыдан айырылатынымды білемін. Сонымен қатар, бұл бұғының – менікі екеніне кәміл сенімдімін. Садақпен немесе дыбыстық алдауыштардың көмегімен аң аулаудың қыр-сырын жете меңгермеген кезім болатын. Бұғы көршімнің жеріндегі орманға кіріп, көзден ғайып болуға сәл-ақ қалды. Мен болсам, бұғының маған бұйырғанын білсем де, дәрменсіз күйде тұрмын. Кенет рухымда Құдайдың «Бұғыны шақыр» деген сөзін естідім. «Бұғыға кел деймін бе? Қалай шақырамын?» Тәуекел, бұғыға естілмейтіндей, даусымды бәсеңдетіп: «Бұғы, саған бұйырамын, дәл қазір тоқта, кері бұрыл да, мен жасырынған ағаштың жанына келіп тұр» дедім. Бұл жолы аңға мылтықпен емес, садақпен шыққан едім. Ағашты айтқан себебім, бұғының жақынырақ келгені керек еді. Бұғы бұйрығыма бағынатын болса, дәл мен отырған ағаштың түбіне келсін, дәлдеп атуыма жақсы деген ойым бар.

Менің бұйрығымнан кейін бұғы кілт тоқтады да, мен жасырынып отырған ағашқа қарай тұра бет алды. Өз көзіме өзім сенбей отырмын. Бұғы арадағы екі жүз метр жерді асықпай жүріп өтті де, дәл ағаштың түбіне келіп тоқтады. Мен отырған жерден үш метрдей төменде тұр. Үстімде камуфляж киім де, иіс не дыбыс шығаратын арнайы еліктіргіштер де жоқ. Құдай және мен. Басқа еш құрал-қондырғым, амал-тәсілім жоқ. Сонда да бұғы қолыма өзі келіп тұр. Мынадай жағдайда мүлт кету мүмкін емес. Бұғыны

үйіме жеткіздім. Шаттығымда шек жоқ. Өзім куә болған керемет көз алдымнан кетпейді. Бұғының бұйрығыма бағынғаны рас па? Солай сияқты.

Огайо штатында 40 гектар жері бар ферманы жалға алдық. Жерімізде шалғындықтар, шағын тоғай, жағасын бұта басқан өзен бар. Қыс айларындағы ермегіміз – қоян аулау. Огайода қоян аулау маусымына қырғауыл атуға рұқсат берілетін мерзім тұспа-тұс келеді. Бірақ фермамыздан қырғауыл көрген емеспіз.

Бірде қоян атуға шықтық. Өзен жағасына жақындағанымызда, қырғауыл ұшты. Мылтығымды дереу кезеніп, шүріппені бастым. Оқ құстың қанатына тиді. Қырғауыл жерге жалп етіп құлап түсті де, орнынан атып тұрып, жүгіре қашты. Қырғауылдар сағатына 50 шақырым жылдамдықпен жүгіре алады. Мына қырғауыл соны дәлелдемек болғандай. Түнде ғана қар жауып өткен болатын, аппақ қардың бетінде құстың ізі сайрап жатыр.

Ізге қарап мен тұрмын. Қырғауылым жеткізер емес. Олжамнан айырылдым-ау деп өкіндім іштей. Бірақ жүрегімде басқа бір сезім бар. Әлгі бұғыға бұйрық бергенім есіме түсті. Осы жолы да солай етуім керек. “Қырғауыл, Исаның атымен бұйырамын, ТОҚТА!” Құс көрінбей қалды. Жан-жағым анық көрінеді. Мен айқай салғанда, қырғауыл кілт тоқтады. Жанымда ұлым Тим бар. “Папа, сен айқалағанда, қырғауыл кілт тоқтады” деді ол. Бірақ қырғауылымыз көрінбейді. Қайда кеткен? Тим екеуіміз із қуалап жүріп отырып, тауып алдық. Басын қардың ішіне тығып алыпты. Денесі түгел сыртта. Бір шоқ биік шөп бар екен, қырғауылды көре алмағанымыздың себебі – сол. Өлі ме, тірі ме өзі? Мойнынан ұстап, жатқан жерінен көтердім. Сол сәт қанатын сабалап, ащы даусымен байбалам салды. Тірі болғанда қандай! Кейінірек, құсты сойғанда байқағаным, оқ тиген қанаты болар-болмас жараланыпты. Тим екеуіміз аң-таңбыз. Бүгінгі көргенімізді біреуге айтсақ, сенбейді-ау.

Огайода бұғы атуға шектеу қойылған, оны жоғарыда айтып

кеткен болатынмын. Бір маусымда екі бұғы атуға болады. Бірақ бір аңшы бір жылда бір ғана еркек бұғы ата алады. Штат әкімшілігі бұғының ұрғашысын атуға рұқсат бергенде, бұғы санын аздап азайтуды көздеген болса керек. Мен бір ұрғашы, бір еркек бұғы алмақпын. Тұқым септім. 30-40 минут өткенде, еркек бұғы көрінді. Келесі жолы ұрғашы бұғы жолықты. “Тоқтай тұр, еркек бұғыны бірінші, ұрғашы бұғыны екінші жазып едім, сол ретпен түсткені ме? Қалай жазсам, алдыма солай келгені ме сонда? Рас па? Ал керісінше жазғанымда не болар еді?” Құрбандық жасағанда, үнемі еркек бұғыны бірінші жазатынмын, дәл сол ретпен атып алып жүргем. Келесіде орындарын ауыстырып жаздым. Қалай жазсам, бұғылар солай кездесті. Теориямды бірнеше рет тексеріп те көрдім, расында да солай болып шықты. Бұғылар мен жазған ретке сай келеді екен. Осыған көзім жеткенде, Құдай Патшалығының құдіретіне қайран қалып, басымды идім. Әрі Патшалықтың мен білмейтін талай сыры барын түсіндім. Әйтеуір, білетінім: менің билігім өзім ойлағаннан әлдеқайда астам екен. Осы билікті өмірде қолдануды үйренуім керек.

Қазір – 2015 жылдағы аңшылық маусымы. Мүйізінің төрт не одан көп тармағы бар бұғы, соғымға бұғының бір еркек тайыншасын, бір ұрғашы тайыншасын атып алмақпын. Соған арнап тұқым септім. Кәрі ағаштың бұтақтарының арасында жасырынып, бұғыларымның келуін күтіп отырмын. Көп кешікпей, ағаштың жанына мүйізінің алты тармағы бар бұғы, артынша бір жасар ұрғашы бұғы келді. Ендігісі бір жасар еркек бұғы болатынын білемін. Осы айтып отырғаным ертегідей естілетін шығар, дегенмен, аңшылығым осылай өтеді.

Бір жолы мені аса таңырқатқан оқиға болды. Мүйізінің төрт немесе одан көп тармағы бар бұғы мен мүйізі шықпаған жас бұғы атып аламын деген ниетпен тұқым ектім (мүйізі шыға қоймаған жас бұғы ұрғашы бұғы болып саналады). Әдеттегідей, мылтығымды асынып, сыртқа шықтым да, он бес минуттан кейін

сегіз тармақты мүйізі бар бұғы атып алдым. Келесіде жас бұғы кез болатынына күмәнім жоқ.

Екі аптадан кейін аңшылыққа тағы шықтым. Әдеттегідей, ағаштың бұтақтарының арасында, тасада отырмын. Көп ұзамай сегіз тармақты мүйізі бар сұлу бұғы көрінді. Менен үш жүз метрдей жерде. Мен отырған ағашты бетке алып жақындап келеді. Бағытынан бір ауытқымай, шалғындықты кесіп өтті де, ағаштың дәл түбіне келіп тоқтады. Жиырма секундтай тұрды да, келген ізімен кері қайтты. Огайода бір жылда бір-ақ рет еркек бұғы атып алуға болады, есіңізде болар. Биылға мүйізі қарағайдай бір бұғы атып алғаным бар. Сол себепті мына сұлу жануарға қарап отырмын, атпадым. Осы бір жайт алаңдатты. Аңшылық кезінде дәл жаныма мен сұрамаған бұғының келуі алғаш рет. Бұғының жазықты кесіп өтіп, тікелей менің алдыма келіп, кідіруі, артынан сол жолмен кері қайтуы – осының барлығы оғаш көрінді. Бұғы өз еркімен емес, біреудің әмірімен жүрген сияқты. Жас бұғыны күтумен біраз уақытым өтті. Бұғым келмеді.

Кешке өз бөлмемде отырғам, болған жайт ойымды мазалайды. Неге бұлай? Мүйізі шықпаған жас бұғы келуі керек еді ғой. Бағанағы мүйізі қарағайдай жануардың келуінің себебі неде? Бөтен тілде мінәжат етіп, Құдайдан сұрағымның жауабын күттім. Көп күттірмей, жауап та келді. Құдай “Еккен тұқымыңа қарашы” деді. Қарайтын несі бар? Қай тұқымды не үшін сепкенімді білемін. Жарайды. Чектерімнің көшірмелері түгел сақтаулы. Керек чекті таптым да, жазғанымды оқып шықтым. Екі бұғы атып алуды көздеген болатыным: бірінің мүйізі төрт тармақтан кем болмауы тиіс, екіншісі ұрғашы деп саналатын тұқыл бұғы. Алайда, чекке былай деп жазыппын: “Екі бұғы, мүйізі төрт тармақтан кем болмасын, мүйізі жоқ жас бұғы”. Көздегенім, екі бұғы атып алу болатын. Бірақ мына жазуымның мағынасын мүйізі бар екі бұғы мен мүйізі жоқ бір бұғы, яғни, барлығы үш жануар деп түсінуге болады екен. Дәл солай болды да, екінші бұғы да – мүйізі төрт

тармақтан асатын ірі бұғы. Мәссаған! Таңырқауымда шек жоқ! Үлкен мүйізді екінші бұғы жаныма келгенде, шынымен де, әмірге көніп келген екен. Жануар Құдай Патшалығының заңына бағынып келіпті. Орнымнан атып тұрдым да, қуанышым қойныма симай, билей жөнелдім. Осындай да болады екен-ау!!!

Бұл жайт қуанып қана қойған жоқ, аздап қорқыныш та тудырды. Құдай Патшалығында осыншалық мүлтіксіз дәлдік пен нақтылық бар болса, өте мұқият болуым керек. Өзім қаламаған оқиғаға түрткі болдым. Менің көздегенім – олемес-ті, бірақ, рухани заңдылықтар қалайда жүзеге асады. Көптеген адамдар, оның ішінде өзім де бармын, өздері қаламайтын нәрселерді өміріне шақырады екен, соны түсіндім. Есіңізде ме, Иса тұт ағашын бір ауыз сөзімен құратып тастады, бір ауыз сөзімен Елазарды тірілтті. Екі жағдайда да бір қағида орындалды, тек мақсаты бөлек болды. Келесі жолы аңшылыққа шыққанымда, тұқым себуде де, ойымды тұжырымдауда да мұқият болып, қалаған бұғымды атып алдым.

Бірінен соң бірі орын алған осы оқиғалар Патшалық жайындағы ойымды түбегейлі өзгертті. Енді білетінім – Құдай Патшалығында дәлдік пен нақтылық бар. Таңқаларлық жай емес, әрине. Жер бетінде іске асатын кез келген физикалық заң да өте дәл. Табиғат заңдары рухани әлем қағидаларынан туындайтынын біле тұра, екеуінің арасында ұқсастық бар екенін бұрын ескермеппін. Құдай Патшалығының заңдары қаншалықты дәл екенін енді білдім.

Аңшылықта болған тағы бір оқиғаны әңгімелеп берейін (аңшылық кезінде алған сабақтарым өзіме қатты ұнайды, сондықтан шыдай тұрарсыз). Құдай Патшалығындағы заңдардың дәл орындалатынын білгенімде, тағы бір тәжірибе өткізіп көрмек болдым. Мүйізінің жеті тармағы бар бұғы алуды көздеп, тұқым себемін. Әдетте, бұғының екі мүйізі бірдей болады. Яғни, төрт тармақ дегеніміз, әр мүйізінің екі тармағы бар, сегіз тармақ дегеніміз – әр мүйізінде төрт тармақ бар деген сөз. Демек,

бұғының мүйіздерінің тармақтарының саны – көбінесе, жұп сан. Сирек жағдайда, түрлі себептермен екі мүйізі бірдей болмауы да мүмкін. Бұл ілуде-шалуда бір кездесетін өте сирек жағдай.

Қалыптан тыс, сирек болатын, өте нақты нәрсе көздесем ше? Сенімім жеміс береді ме? Соны сынап көргім келді. Менің білуімше, мақсатың неғұрлым нақты болса, соғұрлым ұзақ күтесің, және мақсатқа жету жолындағы Киелі Рухтың жетелеуі де соғұрлым нақты болады. Сонымен, садақпен аң ату маусымы басталды. Бірақ қазір аңға шығудың қажеті жоқ екенін ішім сезеді. Менің бұғым әлі келген жоқ, білем. Қазан айында да шыққан жоқпын. Рухымда білетінім: “Менің бұғым ол жерде әлі жоқ”. Орман әсем алтын түстерге малынып, көздің жауын алады. Мен сабыр сақтап күтіп жүрмін.

Міне, уақыт келді. Джорджия штатында тұратын ата-енем қонаққа келген болатын. Сол кісілермен бірге дастархан басында отырғанбыз. Кенет ертең таңертең көптен күткен олжам қолыма түсетінін сездім. Мүйізінің жеті тармағы бар еркек бұғыны атып аламын! Ертең өз бұғымды алатынымды жақындарыма айттым.

Күндегіден ерте тұрып, таң қылаң бере үйден шығып кеттім. Жүрегімді шаттық кернейді. Бұтақтардың арасындағы жасырын орныма орналастым. Садағым дайын. Шеті маған тиесілі орманға барып тірелетін бес гектардай батпақты жерлерді көзіммен шолып отырмын. Өте әдемі алқап. Анадай жерден бір топ үйрек ұшып өтті. Батпақтың шетінен жылт етіп сусуыр, кейде, тіпті, қаракүзен де көрінеді. Батпақтың жиегі – ну. Бұғылар сонда. Мен олжамның қолыма келіп түсуін күтіп, тасада отырмын. 45 минут өтті, бір сағат өтті, бұғым жоқ.

Үйім тұрған жақтан машинаның есігінің ашылып-жабылған дыбысы жетті. Атам мен енем қайтуға дайындалып жатыр. Мен ол кісілерге таңғы асты өзім дайындап бермек болатынымын. Бастапқыда бұғыны атып аламын да, таңғы ас мезгілі

жақындағанда, үйге келемін деген жоспарым бар еді. Алайда, мен күткен бұғы келмеді. Ағаштан түстім де, үйге қарай беттедім. Мен кеткеннен кейін артынша-ақ бұғының келуі мүмкін, дегенмен, қайтуым керек. Бүгін жолым болмады, басқа күні тағы да келуіме тура келеді.

Үйдегілермен сәлемдестім де, таңғы ас әзірлеуге кірістім. Біздің үйде таңғы асты қашанда мен дайындаймын. Сыры өзіме ғана мәлім ерекше әдіспен дәмі таңдай қақтырар вафли дайындаймын. Жұмыртқа, шұжық, ірімшік тұраймын. Дастарханның сәнін келтіретін сүйікті тағамымыз – үйеңкі тосабы. Огайода үйеңкі ормандары көп. Біздің штатымызда үйеңкі шырынан тосап жасап шығаратын өндіріс орны бар. Дастарханымда жасанды тосап тұрмайды, тек табиғи, тек сапалы тосап! Сонымен, ас дайындап жүрмін. Асүйдің терезесінен батпақты жазық пен арғы жағындағы орман көрінеді. Кенет шалғындықты кесіп өтіп бара жатқан бұғыны көзім шалды. “Менің бұғым!” деп айқай салдым. Үйдегілерге отта тұрған тамақты қарауды тапсырдым да, жүгіріп сыртқа шықтым!

Бұғылардың осы бағытпен жүргенін талай көргенмін, қайда бара жатқанын дәл білем. Ағаштағы орныма жүгіріп жетіп, жасырынып үлгерсем, бұғы жақындағанда атып аламын. Бірақ ол жерге бұғыдан бұрын жету оңай емес. ДЕРЕУ жүгіруім керек! Жүгіріп бара жатып, садағымды ала кеттім. Ағашыма жеттім де, шу шығармауға мейлінше тырысып, бұтақтардың арасына тығылдым. Әзірге бәрі ойдағыдай, бұғыны үркітіп алған жоқпын.

Тасадан қарап отырмын. Бұғы мен жасырынған ағашты бетке алып, жақындап келе жатыр. Байқауымша, осы жермен жүріп өткен ұрғашының ізіне түсіп келеді. Мені көрген де, иісімді сезген де жоқ. Әлгі ұрғашы бұғы маған таяу жерде жайылып жүр. Менің бұғымның бағыты осылай қарай. Мен үшін өте қолайлы жағдай. Бұғы жиырма метрдей жерге келгенде, садағымды кезеп, атып

қалдым. Жебем мүлт кетті. Шынымды айтуым керек, ағашқа бұғыдан бұрын жетем деп жанұшыра жүгіргеннен алқынып қалған екенмін.

Садақтың оғы тым төмен ұшты. Бұғының осал жеріне тиген жоқ. Соны көріп, қынжылып қалдым. Жануар бұталар жаққа орғып кетті де, көзден таса болды. Садақ атылғаннан кейін, бұғылардың кейде не болғанын бірден түсіне қоймайтыны бар. Аңшыны көрмесе, адамның иісін сезбесе, жайбарақат кете береді. Тағы білетінім, жаралы бұғы алысқа кетпей, бұтаның арасына кіріп жатады. Әлгі бұғы мені көрген жоқ. Ағаштан абайлап түстім де, алыстан айналып барып, бұғы тығылған бұталарға жетпек болдым. Бұғыны үркітіп алмауым үшін айналма жолмен жүруім керек, яғни, алдымен үйіме қарай жүремін.

Үйдегілер мені көре сала, не болғанын, аңшылық қалай өткенін сұрай бастады. Мән-жайды айттым. Ұлдарым менімен бірге жүріп, бұғыны атып алуға көмектесетін болды.

Бұталарды сыртынан қоршап алдық, қоршауды тарылтып келеміз. Үшеуіміз үш жақтан жақындай түскенімізде бұғы үркіп, қаша жөнелді. Бұталардың арасында, менен елу метрдей жерде оңнан солға қарай орғып-орғып зытып барады. Кенет екінші ұлымды көріп қалды. Сасқалақтаған жануар кілт тоқтап, құлағын қайшылады. Қай бағытта қашарын білмей тұрған тәрізді. Ту сыртындағы мені әлі көрген жоқ. Арамыз 60 метрдей. Бұғы алдын кес-кестеген ұлыма қарап тұр. Арадаға қашықтыққа садақтың оғы жете алады, бұғыны құлатып түсіруге екпіні де жетеді, бірақ неғұрлым алыстан атса, ату дәлдігі соғұрлым төмен болады. Садақты мынадай алыс қашықтықтан атқан емеспін. Әрі қолымдағы садағым жебесі секундына 120 метр жылдамдықпен ұшатын жаңа, қымбат арбалет емес. Менің садағым әрі кетсе 30-35 метр жерден дәл тигізер, одан алысқа шамасы жете қоймайды.

Бұғы қозғалмастан, бір қырын тұр, атуға қолайлы. Тәуекел.

Садағымды көтердім де, аттым. Жебем жануардың дәл мойнына барып қадалды. Сенер-сенбесімді білмей сәл кідіріп қалдым. Алайда, бұғының мойнын тесіп өтіп, ар жағынан шығып тұрған садақтың оғын анық көріп тұрмын. Жануар бұталарға қарай тұра ұмтылды. Жайлап жақындап бардым. Олжам қолыма түсті-ау әйтеуір!

Ұлым Тим жаныма келгенде бірінші сөзім бұғының мүйізіндегі тармақтарының саны туралы болды. Алыстан анық көре алмаған едім, енді санасам, жетеу екен. Сегізінші тармақтың орны ғана көрінеді. Тим екеуіміз Құдайды мадақтадық. Құдай Патшалығы ғажап! Сол жерде тұрып, бір-бірімізге қарап, “Мынаны біреуге айтсақ, сенер ме екен? Құдай патшалығының осындай екенін білетін адамдар бар ма екен?” дестік.

Әңгіменің мәнін ұққан боларсыз. Құдай Патшалығындағы заңдар өте дәл, өте нақты, тұрақты түрде мүлтіксіз орындалады. Бұл заңдар барлық салада, соның ішінде, қаржы саласында да жүзеге асатынын білгенімде, қуанышымда шек болмады. Патшалықтың заңдарын зерттеп біле аламын. Рухани зерттеушіге айналып, Құдайдың Патшалығындағы заңдар мен қағидаларды білуім керек. Құдайым, маған көмектесе гөр!

2-ші ТАРАУ

КӨГІЛДІР НҰР

Дренда екеуіміз Құдай Патшалығының құдіретін көргеннен кейін, қарыздарымыздың барлығынан толық құтылды. Әрі үйренгенімізді айналамыздағы адамдармен бөліскіміз келді. Тыңдауға ықылас білдірген әрбір адамға Құдай Патшалығы туралы айтумен болдық. Бизнеспен айналысып жүріп, қауым аштық. Екеуін қатар жүргіздік. Алайда, мұнымен шектелмеуіміз керектігін жүрегіммен сездім. Қалай екенін анық білмесем де, Патшалық туралы ілімді кең таратуым үшін, Құдай мені алға жетелейтінін ішім біледі.

2005 жылдың басынан аяғына дейін “Қаржылық революция” деген тақырыпта конференция өткізу ойымнан шықпады. Конференция барысында бес жиналыс өткізіп, Құдай Патшалығының өмірімді өзгерткен қағидаларын тыңдармандарға ашып бермекпін. Жастық шағым методистік қауымда өткен болатын. Бір аптаға созылған рухани ояныш конференцияларын өткізіп тұратынбыз. Конференцияны сол нұсқамен өткізбек ойым бар. Бес жиналыс. Сол бес жиналыс барысында Құдайдың өзіме ашып берген заңдары мен қағидаларын тыңдаушыларға айтып жеткіземін. Осы уақытқа дейін сол қағидаларды жинақтап, жүйелеуге тырысқан емеспін. Алайда, бес жиналыс бойы қаржы

тақырыбына уағыз айтып тұрғаным көз алдымнан кетпейді.

Осы жайлы мінәжат етіп жүргенімде, көптен көрмеген досым Лэрримен кездесіп қалдым. Ол Албанияда конференция өткізбек екен. Мені сонда уағыз айтуға шақырды. Лэрридің Албанияда миссионер қызметін атқарып жүргеніне 12 жыл болған еді. Танымал, беделді қызметкер. Осынша алыс сапар шегіп көрген жоқпын. Албанияда болған емеспін, бұл елдің қайда екенін де білмеймін. Лэрри алдағы конференция – бүкілұлттық деңгейдегі іс-шара екенін, онда Албанияның түкпір-түкпірінен бағушылар жиналатынын, оларға менің Патшалық жайлы сөзім мен қаржы саласындағы білімім өте қажет екенін айтты. Жігерленіп қалдым. Конференция барысында екі немесе үш жиналыста қызмет ететінімді айтты. Бес жиналыс болмаса да, көкейімдегіні басқалармен бөлісу мүмкіндігі туғанына қуанып қалдым. Сонымен, Албанияға барып, конференцияға қатысуға келістім.

Албанияда ұшақтан түскенімде, Лэрри қарсы алды. “Гэри, уағыздаушылардың бірі конференцияға келе алмайтын болды. Сен бес рет қызмет етесің” деді ол. Жүрегім лүпілдеп кетті. Міне! Мұның бәрі – Құдайдың ісі екені анық. Құдайдан келген арманымның орындалуын асыға күттім. Конференцияға дайындаған жазбаларымды қайта қарап, бес уағызға лайықтап жинақтадым. Конференцияның бес күні мен үшін бір үлгімен өтті. Уағыз, қонақүйге қайтып келіп, бөтен тілде мінәжат ету, ертеңгі уағызға дайындық. Әр жиналыста Құдайдың құзырын анық сезіндік.

Мен барғанда, Албания өте кедей ел болатын. Орташа айлық табыс 500 доллар шамасында, ал жемқорлық үйреншікті іске айналған. Қаражат жайындағы әңгімемді тыңдармандарым қалай қабылдайды деген қобалжу да болды. Құдайдың Сөзі құдіретті екенін білемін, дегенмен, бұл менің алғашқы тәжірибем. Бірінші жиналыста уағыз айтқанымда, тыңдаушыларыммен арада

көзге көрінбейтін қабырға бардай сезілді. Екінші жиналыста адамдардың рухани шөлі байқалды. Патшалық туралы ізгі хабарды тыңдаған сайын сенімі артып келе жатқанын көрдім. Күн санап еңселері көтеріліп келе жатты. Олар Құдай Патшалығы жайлы жаңа білімді масаттана қабылдады.

Құдай соңғы рет уағыз айтатын күні, кешкі жиналыста жергілікті қауымдарды қолдау үшін құрбандық жинауым керек екенін айтты. Маған бұл оғаш көрінді. Біріншіден, мен бұл қауымның бағушысы емеспін. Екіншіден, адамдар қалай қарайтынын білмеймін. Лэрри екеуіміз жергілікті бағушылардың конференцияға келіп, қатысуына жағдай жасау үшін, жолы мен қонақүйін төлеуге біраз қаражат шығардық. Ойымды Лэриге айтып көріп едім, құрбандық жинағанымды дұрыс көрді.

Сонымен, соңғы жиналыста қатысушыларды құрбандық беруге шақырдым. Құдайдың құзыры күшті болғаны сонша, құлап түсуге аз-ақ қалып тұрмын. Адамдар шаттана билеп құрбандық беріп жатыр. Сенушілер құрбандықтарын арнайы себеттерге салып жатыр, ал себет ұстаған қызметкерлер көздерінің жасы көл болып, әрең жүр. Мұндайды алғаш көруім. Әсіресе, құрбандық жинау осылай өтеді деп мүлде ойлаған емеспін. Аса құнды құрбандықтарын себеттерге салып жатқан адамдардың шаттана билегендерін, Құдайды дауыстап мадақтағандарын, олардың шексіз сенімі мен Құдайдың құдіретін көріп, қарап қайран қалып тұрмын.

Бұл көрініске қарап Лэрридің де жүрегі елжіреді. Кешке қарай екі үлкен қолдорба жиналған құрбандыққа лық толды. Әдетте олар толар-толмас бір сөмке құрбандық жинайды екен. Лэрри аң-таң. Адам мен көлік толған көшемен жүріп, қолдорбаларды Лэрридің жалдап тұрып жатқан шағын пәтеріне жеткіздік.

Пәтерге кіріп, төргі бөлмеге жайғастық та, ақшаны санамақ болып, сөмкелерді аштық. Лэрри қолдорбаның ішіндегісін үстелдің үстіне төкті. Осы сәтте бөлменің іші нұрланып, ғажап

көгілдір мұнар алып кеткендей болды. Үйдің іші Құдайдың құзырына толып кетті. Болғанды сөзбен айтып жеткізу мүмкін емес. Лэрри екеуіміз үнсіз қалдық. Уағыз айтқанымда немесе біреулер үшін мінәжат еткенімде келетін майлану емес, бұл жолғысы – Құдайдың құзырының өзгеше көрінісі. Мұнартқан көгілдір тұман Құдайдың құзырына толы сияқты. Қасиетті, Киелі Құдайдың алдында тұрғанымызды сезіндік. Құдайдың құзыры күшейе берді. Қолымыздан бар келгені – орнымызда отырған күйі жылай беру. Кенет үстел үстіне үйіліп қалған ақшаның арасынан неке жүзігін көрдім, өлшемі мен пішініне қарағанда, ер адамдыкі. Құрбандық беруге ақшасы болмаған сол бір адамның Құдайға ең қымбат дүниесін қиғанына қайран қалдым.

Сол сәт жүрегіммен Киелі Рухтың айтқанын естідім:

– Сені халықтарға Патшалық пен қаражат заңдарын үйретуге тағайындадым. Бұл сақинаны берген адам зор сеніммен берген болатын. Сақинаны ал да, осы күндерден естелік ретінде сақтап қой. Неке жүзігі – жұбайлардың арасындағы мызғымас келісімнің белгісі. Менің де Өз халқыммен жасасқан келісімім бар, сол келісімге сай Мен – халқыма Қамқоршымын. Осы сөзімді жариялайтын боласың. Мынаны біл: сені қайда жұмсасам да, қаражатың жеткілікті болады.

Таң атқанша көз ілмедім. Лэрридің үйінде қондым, майлану да ешқайда кеткен жоқ. Атлантикалық Мұхиттың үстімен ұшқан сегіз сағат тағы да ұйқысыз өтті. Терезеге қарап, жылаумен ғана болдым. Құдайдың әлгі сөзінен кейін 46 сағат бойы көзім бір ілінген жоқ. Сол кеш есіме түскен сәтте Құдайдың құзырын қайта сезініп, көзімнің жасын тия алмай қалатын болдым. Осынау тебіренген күйім бірнеше айға созылды.

Құдайдың жүзік тұрасындағы сөзін Лэрриге айтқан жоқпын. Жиналған құрбандық Албаниядағы қауымға тиесілі. Сақинаны сатып, ақшасын іске жаратуға болады. Алайда, сақина жайында

Құдайдың айтқаны бар. Лэрри “Құдай жүзікті саған бергенімді қалайды” дегенде, қуанышым қойныма сыймады. Сол сақина кеңсемде, арнайы жасалған тұғырдың үстінде тұр. Қаражат мәселесіне тап болған күндерім болды, сол кезде бұл мәселелер маған айтарлықтай зор көрінетін. Қиналған кезімде жүзікке қарап, Құдайдың сол кештегі айтқан сөзін есіме аламын. Құдай қашанда сөзіне адал, уәдесіне берік болды. Өзі көрсеткен бағытта жүруіме керектің барлығын дер кезінде беріп отырды. Албаниядағы сол бір кеш өмірімді күрт өзгертті. Сонымен қатар, алда әлі де талай кереметтер бар екен.

Үйіме қайтып келгенімде, Патшалық туралы жолдауды жер-жерге таратуға деген қатты ықылас пайда болды. Құдай ашып берген ақиқаттарды әрі қарай тарата беру арманымна айналды. Тағы да бес жиналыс өткізіп, қалай боларын көргім келді. Ондай мүмкіндікті ұзақ күттім. Ақыры Юта штатындағы бір қауымнан шақыру келді. Бұл – шағын ғана, өте кедей қауым екен. Қауым бағушысы менің Албанияда бес жиналыс өткізгенімді, жиналыстардың қалай өткенін, қаншалықты әсерлі болғанын Лэрриден естіген екен. Енді өзінің қауымына барып, дәл сондай бес жиналыс өткізуімді сұрады. Қауым жоқшылықтан әбден мезі болған. Лэрридің айтқаны рас болса, менің уағыздарым оларға молшылыққа жол ашар деп үміттенеді екен.

Сонымен, Юта штатына бардым. Әлгі қауымда жексенбі күні таңертең және кешке, кейінгі үш күнде кеш сайын бір жиналыс өткіздім. Албанияда айтқанымды қайталап айттым. Уағыздарымның әсері де сондай. Конференцияның соңғы кешінде тыңдаушыларым шаттыққа бөленіп, құрбандық жиналған кезде майлануға бөленіп, билей жөнелді. Бұл жолы көгілдір нұрды көргенім жоқ. Алайда, Құдайдың құзырын өте анық әрі күшті сезіндім. Соңғы жиналыстан кейін жиналған құрбандықтарды көріп, Албаниядағыдай бұл жолы да қатты таңырқадық. Небары 17 отбасы осынша мол құрбандық әкеле алады деп кім ойлаған!

Ақшаны арнайы сөмкеге салып, мөр басып жаптым да, ертеңіне санамақ оймен кеңсеме апарып қойдым.

Келесі күні таңертең телефоныма қоңырау түсті. Хатшым екен. Даусы өзгеріп кетіпті. Бірдеңе болғанын біле қойдым. Хатшы қыз жылап тұр, даусы дірілдеп, әрең сөйлейді. “Бағушы, кешегі сіз әкелген ақшамен түсініксіз бірдеңе болып жатыр” деді. “Трэйси, не болды?” дедім. Трэйси ақшаны санамақ болып, қолдорбаны ашқанда, керемет майланудың әсерінен жерге құлап түскен екен. Екінші хатшым естіп қалып, жүгіріп барса, майланудың құдіретінен қалшылдай бастайды. “Бұл ақшаға не болған? Ютада не болып еді?” деп сұрады Трэйси. Не болғанын білмейтінімді айттым.

Екі аптадай уақыт өткенде, Огайо штатының оңтүстігіндегі шағын қауымдардың бірінде тәлім бердім. Бұл қауымға алғашқы төрт уағыз жазылған DVD-дискіні алдын-ала жіберген болатынбыз. Қауым мүшелері оларды көріп шыққан. Өзім жексенбі күні кешке келдім, соңғы, бесінші уағызымды айтуым керек. Құдайдың құзыры күшті болғаны сондай, түрегеп тұрудың өзі оңай емес. Құрбандық жинағанымызда, адамдардың көңіл-күйі өткен жиналыстардағыдай болды. Зор қуанышқа кенелген адамдар құрбандықтарын беріп жатты. Сахнаның алдына арнайы себеттер қойылған болатын, адамдар сый-тартуларын сонда салуда. Сол жолы көгілдір нұрды тағы көрдім. Құрбандық салатын себеттің айналасы сол нұрға толып кетті. Майланудың күшінен жүре алмай қалдым, жиналыс біткенде, басқа қызметкерлердің көмегімен машинама әрең жеттім.

Сол уақытта мұның не екенін өзім де білгенім жоқ. Мұндайды бұрын-соңды естіген емеспін. Конференцияларды өткізе бердім. Майлану сол күйі өте күшті болды. Бірнеше рет көгілдір нұр көрінді. Нұрдың не себепті басқа жерде емес, ақшаның тұсында пайда болатыны мен үшін – жұмбақ. Ақша санайтын сәт кеңсемнің қызметкерлеріне оңай соқпайды. Албанияда Лэрридің ақшаны

үстел үстіне төккен сәті есіңізде ме? Құдайдың құзыры ғажап болып еді ғой. Ақшаға қолымыз тиген сәтте майлану келіп, бүкіл денеміз дірілдеп сала береді. Бұл әңгімем құлаққа оғаш естілуі мүмкін, дегенмен, расы сол.

Осы жағдай мен үшін жұмбақ болды, дәл құрбандыққа келгенде, майланудың соншалық зор болуының сырын Құдайдан сұрадым. Құдайдың жауабы былай болды: сенушілердің көбісі құрбандық беруді өздеріне міндет санайды, заңды орындаумен бірдей көреді. Құрбандық беруді ереже сақтауға теңейді, ал сенімін қоспайды. Құрбандық бермесек, Құдайдың қаһарына ұшыраймыз деп ойлайтындар да көп. Енді біреулер, бермесе, өздерін қарыз болып қалғандай сезінеді. Құдай Патшалығы жайлы тәлім беріп,

қаржы туралы қағидаларын үйреткенімде, тыңдаушыларымның жүрегіндегі сенімі арта бастайды екен. Сонда олар құрбандықтарын шынайы сеніммен береді, сенім арқылы Құдай Патшалығымен тікелей байланыс орнатады. Сондықтан майлану төгіледі.

2005 жылы Албанияға сапар шеккенімнен кейін, өмірім күрт өзгерді. Құдай Патшалығы туралы ізгі хабарды тарата беруге деген ниет Дренда екеуіміздің жүрегімізде жалындай берді. Ізгі хабарды неғұрлым көп адамға жеткізбек болып, теледидарға шығатын болдық. Өзіміздің көп жылдан бері жинаған рухани тәжірибемізді басқалармен бөлісуге жыл сайын миллиондаған доллар қаражат жұмсаймыз. Бәлкім сіз де Құдай Патшалығының қандай екенін білмейтін шығарсыз. Біз де сондай едік, Аспан Патшалығына бара

**ИСА БІЗДІҢ ЖҰМАҚҚА
КІРУГЕ ДЕГЕН
ҚҰҚЫҒЫМЫЗДЫҢ
ҚҰНЫН ТӨЛЕП ҚАНА
ҚОЙҒАН ЖОҚ. СОНЫМЕН
ҚАТАР, ҚҰДАЙДЫҢ ҰЛЫ
МЕН ҚЫЗЫНА ЛАЙЫҚ
ӨМІР СУРІП, ҚҰДАЙ
ПАТШАЛЫҒЫНДАҒЫ
ҚҰҚЫМЫЗДЫ
ОСЫ ӨМІРДЕ ДЕ
ПАЙДАЛАНУҒА
МҮМКІНДІК БЕРДІ.**

жатқанымызға сенімді едік, алайда Патшалықты жерде қалай орнатуға болатынын білмейтінбіз.

Иса біздің Жұмаққа кіруге деген құқығымыздың құнын төлеп қана қойған жоқ. Сонымен қатар, Құдайдың ұлы мен қызына лайық өмір сүріп, Құдай Патшалығындағы құқымызды осы өмірде де пайдалануға мүмкіндік берді. Және, ең бастысы, әлі де миллиондаған адамдарға ізгі хабарды жеткізуіміз керек, ал бұл іс қаражатты қажет етеді. Айналамыздағы адамдардың көзі бізде. Біздің өміріміз олардың өмірінен өзгеше болуы тиіс!

Албанияда қандай тәлім бергенімді, не себепті соншалық күшті майлану келгенін білгіңіз келетін шығар? Құдай маған халықтарға қандай ақиқатты жеткізуді тапсырды? Осы кітап сол жайында. Осындағы ақиқаттар менің өмірімді қалай өзгертсе, сіздің де өміріңізді солай өзгертеді деп сенемін.

3-ші ТАРАУ

ҚҰДАЙЫМ, РАҚЫМ ЕТЕ ГӨР!

Мен бір шағын қалашықта, жергілікті телеарналардың біріне сұхбат берген едім. Джерри кеңсеме қоңырау соғып, сол қалашықта тұратынын, маған жолыққысы келетінін айтты, бірге түстенетін болдық. Джерри теледидардан бағадарламаларымды көріп, менен тәлім алғаннан кейін өмірі қалай өзгергенін айтпақ екен. Телефонмен бір-екі рет сөйлескенім болмаса, бұл жігітпен жүздескен емеспін. Джерридің ұсынысын қуана қабыл алдым. Бәрібір бір жерге барып, түскі ас ішуім керек, сол уақытымды Джерримен бірге өткізіп, әңгімесін тыңдамақпын.

Сонымен, түскі үзіліс кезінде кездестік. Джерри ұлын ертіп келді. Әңгімеміз басталды. 30 жыл бойы бағушы болып қызмет етіпті. Инсульт алып, денсаулығынан айырылғаннан кейін, қызметтен кетуге мәжбүр болған. Өмірі құлдырай берген. Жұмыс істей алмағандықтан, отбасының жағдайы төмендей беріпті. Несиеге алған үйі саудаға шығарылды. Коммуналдық қызметтерді төлеу, тамақ алудың өзі қиын болып кетті. Жағдайының нашарлап кеткені сонша, бір күні Джерри бір қолына оқтаулы тапанша, бір қолына Киелі Кітап ұстап, өмірмен қоштасар кез келгенін ойлап отырады.

Дәл осы сәтте көзі теледидар экранына түседі. Менің бағдарламам болып жатыр екен. Джерри сөзіме құлақ түреді, үзілген үміті маздап жана бастағандай болады. Менің материалдарымды алып, Құдай Патшалығы туралы ілімді зерттемек болады. Сол уақытта негізгі қарызын өтеуіне және үйіне тамақ алуына кем дегенде, екі мың доллар ақша қажет екен. Яғни, бұл ең жедел қажеттіліктерін өтеуге керек қаражат. Менің тәлімімді тыңдаған сайын, жүрегіндегі сенім арта берді. Құдайдың екі мың доллар беретініне сенуге бел буды. Сондықтан, алғашқы бұғымызды алу үшін Дренда екеуіміздің істегенімізді ол да істеді. Екі мың доллар өнім алатынына сеніп, тұқым екті. Чекты біздің қызметке жіберді. Марқа жазған Ізгі хабардың 11-ші тарау, 24-ші аятына сай өнім алғанына сенетінін жазып күні мен уақытын көрсетіп қойды.

Джерри деген адам жайлы, оның жағдайы мен құрбандығы туралы мен ол кезде ештеңе білмеймін. Оншақты күннен кейін үйінің жанына бір адам келіп, Джерримен сөйлескісі келетінін айтыпты. Бұрыннан таныс адам, бірақ көптен бері аралары алшақтап кеткен. Біраз сөйлескеннен кейін әлгі кісі келуінің шынайы себебі – Джерриге екі мың доллар беру екенін айтады. Оншақты күн бұрын, пәлен күні, пәлен уақытта Киелі Рух ол кісіге Джерриге осы соманы апарып беруді тапсырыпты.

Джерридi мына жаңалық қайран қалдырды. Әмиянынан тұқым еккен күні жазған әлгі қағазын дереу алып шығып, танысына көрсетеді. Қағазда жазылған күн мен көрсетілген уақыт танысының айтқан күні мен уақытына дәл келеді. Мұның кездейсоқ нәрсе емес екені айдан анық. Бұл – Құдай Патшалығынан тікелей келген жауап, дәлірек айтсақ, Патшалық заңдарының орындалуы.

Джерри әңгімесін жалғастырды. Жеті баласы бар екен. Кенжесінен басқасы үйлі-баранды. Жанымызда отырған бала – 16 жасар кенже ұлы. Әкесінің басына түскен қиындықты көріп,

Құдайдан көңілі қалыпты. Әкесі 30 жыл бойы Құдайға адал болды. Құдай болса, қиындықта олардың отбасын тастап кеткен сияқты.

Джерри ұлының жүрегін Құдайға бұрудың амалын іздейді. Құдайдың маған бұғы аулауды үйреткенін естігенде, Джерриге бір ой келеді. Оның ұлы да аңшылықты ұнатады. Джерри ұлына енді, Патшалықтың заңдарын білгеннен кейін, бұғыны басқаша аулайтынын айтады. Баласы ойланып барып, келіседі. Екеуі Джерридің екі мың доллар алуға қолданған әдісін осы жолы да пайдаланады. Сегіз минут өткенде, бұғы қолдарына түседі! Джерри ұлымен бірге бұғыны ет дүкеніне апара жатып, дискіге жазылған уағызымды тыңдайды. Джерри етті өткізуге дүкенге кіріп кеткенде, ұлы көлікте қалып, уағызды әрі қарай тыңдайды. Әкесі қайтып келгенде, ол “Әке, неше жыл сенуші болсақ та, біраз нәрседен құр қалыппыз. Бүгінгі олжамыз – Құдай Патшалығының заңдарының жүзеге асуының нәтижесі екені анық” деген екен.

Бала өмірін Құдайға қайта арнауға бел буып, екі мың доллар мен бұғы берген Құдай үйдің қарызын өтеуге қажет 17 мың долларды да бере алатынын айтыпты. Джерриден алғаш рет хат алғаным есімде. Хаттың ішінде чек бар екен. Бұл – Джерридің ипотекасын жабуға арнап сепкен тұқымы болатын. Хат қысқа жазылған, тек осы мұқтаждығы ғана айтылған екен. Хатқа қолымды қойып мінәжат еткенім, хат иесімен бірге осы тұқымның өнім беретініне сенетінімді жариялағаным есімде. Күні мен уақытын да анық білемін.

Әрі қарай не болғанын Джерриден білдім. Өткен жолғы жайт қайталаныпты. Екі аптадай уақыт өткенде, Джерридің үйіне бір кісі келді. Бұл кісі де – Джерридің бұрынғы танысы. Банктер қарызын төлей алмай қалған борышкерлердің мүлкін хабарландыру беріп сататынын білетін боларсыз. Әлгі кісі Джерридің үйін несие берген банк сатылымға шығарғанын газеттен оқыған екен. Үйін қарыздан босатып алуы үшін қанша қаражат керек екенін сұрапты. Джерри қарызының сомасы 17 мың доллар екенін айтқанда, ол осы сомаға

чек жазып, Джерридің қолына ұстатады да, кетіп қалады. Джерри өз көзіне өзі сенбей, чектен көзін ала алмаған күйінде қалады.

Әңгімесінің осы тұсына келгенде, Джерри көзінің жасын тыйя алмай қалды. Құдай Патшалығы жайлы ақиқаттарды бөлісіп жүргенім үшін алғысын жаудырды. Құдайдың рақымын көріп, жеті баласының да Ізгі хабарды естуге жүректері ашылыпты. Джерри үшін ең зор қуаныш – осы. Осындай куәліктер маған да қатты ұнайды! Құдай Патшалығы, шынында да, тамаша! Патшалықтағы заңдарды адамдарға көрсетіп, кейін олардың куәліктерін есту – мен үшін нағыз бақыт. Өзіңіз көріп отырғандай, Джерриге қажет болғаны – есіркеу емес, нақты көмек еді. Сол көмекті Құдай Патшалығынан тапты.

Джерридің хикаясына қатысты тағы бір нәрсеге назар аударғым келеді. Біреулер үйіне келіп, ақша әкеп бергенін оқығаныңызда, түк бітірмей, шалқасынан жатқан адамның қаржылық мәселелері өзінен-өзі шешіледі деген пікір қалыптасуы мүмкін. Шын мәнінде, олай емес. Әлденеге арнап тұқым себумен шектелмей, егін оруға күш салуыңыз керек. Джерридің отыз жыл бойы бағушы қызметін атқарғаны есіңізде болар. Ол – ұзақ жылдар бойы қауымдағы адамдардың жүрегіне сенім ұялату үшін еңбек еткен адам. Екінші жағынан, insultқа шалдыққандықтан Джерри еңбек ете алмай қалған болатын. Джерри жемісті өзі еңбек еткен егіндіктен, яғни, көп жылдар бойы сенімдерін өзі сусындатқан адамдардан алды.

Тағы да айта кететін жайт: Джерри insultтен құлан-таза айығып кетті. Ол 30 кг артық салмақтан арылды. Түскі ас үстінде танысқанымызда, Джерри – дені сау, сымбатты, бақытты адам болатын. Құдай Патшалығы жайлы ақиқатты қабылдағаны үшін Құдайға мың алғыс! “Әрине, Джерри бағушы болған адам, Құдай Патшалығы жайлы бәрін біледі ғой” дерсіз. Алайда, білмейтін болып шықты. Және Құдай Патшалығы жайлы ақиқатты толық білмейтін сенуші – жалғыз Джерри ғана емес. Өкінішке орай,

Құдай Патшалығынан мұқтаждығының жауабын ала білетін адамдар өте аз. Матай жазған Ізгі хабардағы мына әңгіме көптеген адамдардың көзқарасын сипаттайды.

Иса үш елшісімен таудың етегінде жиналған халыққа қайтып келді. Бір адам Оның қасына жақындап, тізесін бұгіп тағзым етіп, былай деп өтінді:

— Мырза, менің ұлымды аяй көріңіз! Оның ұстамасы бар, содан қатты азап шегеді. Жиі-жиі отқа да, суға да құлайды. Ұлымды шәкірттеріңізге әкелген едім, бірақ оны сауықтыру қолдарынан келмеді.

Сонда Иса:

— Ей, сенбейтін, шындық жолынан тайған ұрпақ-ай! Қанша уақыт қастарыңда болмақпын, қанша уақыт сендерге төзбекпін?! Кәне, баланы Маған әкеліңдер!
— деді. Содан соң Ол жынға қатаң бұйрық берді. Жын баланың денесінен шығып, ол сол сәтте-ақ сауығып кетті. Кейінірек шәкірттері оңашада Исаның қасына келіп:

— Неліктен біз жынды қуып шығара алмадық? — деп сұрады. Иса оларға былай деді:

— Сенімдеріңнің жеткіліксіздігінен. Сендерге шындығын айтайын: тіпті тарының түйіріндей ғана сенімдерің болса, мына тауға: «Бұл жерден ана жаққа көш!» десеңдер, ол көшер еді. Қолдарыңнан келмейтін ештеңе де болмас еді.

— Матай 17:14-20

Әңгіме кейіпкері – әбден қажыған адам, жын қысқан баласы өлім аузында. Исаның жасаған кереметтері жайлы естіген, жындарды қуып шығаратын құдіреті бар екенін біліп, баласын Құдайдың Ұлының алдына әкелді. Алайда, межелі жерге

келгенде, Исаны таппайды. Ұстаз шәкірттерінің үшеуін ертіп, тау басына мінәжат етуге кеткен екен. Қалған шәкірттер Иса берген билікті қолданып, жындарды шығарып жүрген. Сондықтан әкелі-балалы екеуіне баланы сауықтыра алатынын айтады. Алайда, олар мінәжат етсе де, жын шықпай қояды. Баланың әкесі мұндайды күтпеген еді, көңілі қалды. Көрген жұрт та қапаланды.

Осы кезде үш шәкіртімен бірге Иса таудан түседі. Халықтың көңіл-күйін аңғарып, не болғанын сұрайды. Науқас баланың әкесі болған жайды, шәкірттер жынды қуып шығара алмағанын айтады. Әңгімесін айтып болып, тығырықтан шығар жол таппаған адамдардың істейтінін бұл кісі де істейді: Исаға жалбарынып, рақым етуін сұрайды. Құдайдан рақым сұрау – өте дұрыс, жақсы нәрсе болып саналады. Дегенмен, мәселенің шешілуінің себебі – ол емес. Әлгі әке, Исадан жанашырлық іздеп, баланың қалай қиналып жүргенін, жынның оны қалай азаптайтынын егжей-тегжейлі айта бастады. Иса оның сөзін бөлді. Байғұс баланың азабы жайлы әңгімені тыңдап жатудың қажеті жоқ. Иса «Ей, сенбейтін, шындық жолынан тайған ұрпақ-ай! Қанша уақыт қастарыңда болмақпын, қанша уақыт сендерге төзбекпін?! Кәне, баланы Маған әкеліңдер!» деп дауыстады.

Исаның сөзін тереңірек қарастырудан бұрын мынаны есіңізге түсірейін: Құдай ешқашан жалған сөйлемейді, жалған сөйлей алмайды да. Құдайдың өтірікке, өтіріктің Құдайға еш қатысы жоқ. Құдайдың айтқаны – қашан да ақиқат. Берік негізіміз – осы. Әлгі оқиғаға осы тұрғыдан қарасақ, «Жындар Исаның атымен берілген бұйрыққа бағынуға МІНДЕТТІ» екенін көреміз. Шық дегенде, шықпаса, бір жерден қате кеткені. Және мәселе Құдайда емес, бізде. Есіңізде болсын, Құдай уәде еткен игіліктерге қол жеткізе алмай жүрсек, мәселе – өзімізде. Иса осыны айтты. Мәселе сенімнің жетіспеушілігінде және адамдардың шындық жолынан таюында еді. Осы екі мәселе жайында тағы да сөз болады. Ал қазір әкелі-балалы екеуіне қайта оралайық.

Ұлының қамын ойлап әбден қажыған әке. Исаның шәкірттері мінәжат етті, алайда, жын шықпады. Үміт арқалап алыс сапар шеккені бекер болып шықты. Соңғы үміті үзілді. Енді Құдайдан рақымшылық сұрау ғана қалды. «Рақымшылық сұрау» деген сөздің өзі «мәселені шешу қолынан келетін әлдебір билік пен құдірет иесі бар, бірақ оның мәселені шешкісі келмейді» дегенді білдіреді. Яғни, осындай жағдайда қалған жалғыз жол – баланың азабын айтып, әлгі құдірет Иесінен жанашырлық іздеу.

Шынтуайтына келер болсақ, сенушілердің көбісі осылай мінәжат етеді. Құдайда құдірет барын біледі, алайда, көмектескісі келетініне күмәні бар. Сондықтан, Құдайдан рақым сұрап жалбарынады. Ұзақ-сонар дұғаларын айтып, қалай қиналып жүргендерін, көмекке қаншалықты зәру екендерін түсіндіреді. «Көктегі Әкем, жұмаға дейін ақша қолыма тимесе, біттім. Жағдайым қиын екенін білесің ғой, көмектесе гөр». Немесе «Баламды сауықтырсаң, өмір бойы Саған қызмет ететін боламын. Көмектесе гөр, Ием!» Басқа түскен ауыртпалықтарыңызды түсінбейді деп ойлап қалмаңыз. Тек Исаның жүрегін дұрыс түсінгеніңізді қалаймын. Исаның жауабы қаншалықты жылдам келгенін қараңызшы. Баланы азат ету үшін Құдай көп уақытты да, көп сөзді де қажет еткен жоқ. Құдайдың жүрегін, қалауын осыдан-ақ көруге болады. Құдайдың жанашырлығы да, билігі де, құдіреті де мол. Мәселе осылардың бірінің жетіспеушілігінде емес. Мәселенің түп тамыры – сенбеушілік пен адамдардың шындық жолынан таюында. Қорыта келгенде, бұрмаланған көзқарас пен сенімнің аздығы Патшалық заңдарының жүзеге асуына кедергі келтіреді.

Бұл хикаяда тағы да біраз терең сырлар бар. Мұқият қарастырсақ, Патшалықтың кілттерін де, қағидаларын да осы аяттардан таба аламыз. Дегенмен, тереңге бойламай-ақ, сол заңдарды атап өткім келеді. Мұнда айтылатын заңдардың нақты қалай орындалатынын кейінірек талдаймыз.

Құдай Патшалығының заңдарын түсінуіміз үшін ең басты әрі негізді қағиданы есте ұстауымыз керек: Құдай жер бетіндегі билікті толығымен Адам атаға берген болатын. Жаратушы Адамды жердің билеушісі етіп тағайындады.

Құдай енді: «Біз (рухани жағынан) Өзімізге ұқсас әрі бейнелес етіп адамды жаратайық. Адамдар теңіздегі балықтар мен аспандағы құстарға, малдар мен аңдарға, бүкіл жер бетіне және онда жорғалап жүрген барлық жануарларға билік жүргізісін», — деді.

— Жаратылыс 1:26

Еврейлерге арналған хатта да осы жайлы жазылған:

*Оны періштелерден сәл төмен қойдың,
Құрмет, салтанатты оған тәждей сыйладың,
Бәрін де оған бағындырып бердің».
Құдай адам баласына бәрін де бағындырып берген
кезде оған бағындырмаған еш нәрсені қалдырған жоқ.
Алайда біз бәрінің де адам баласына бағынғандығын
қазір көре алмаймыз.*

— Еврейлерге 2:7-8

Мынаны ұғып алайық: Құдайдың билігі жер бетінде жүзеге асуы үшін, жердің заңды билеушісі адам Көктің билігін жүзеге асыруы тиіс.

Сол себепті, Матай жазған Ізгі хабарда Иса шәкірттеріне:

«Сендерге шындығын айтамын: жер бетінде тыйым салғандарыңды да, рұқсат еткендеріңді де көктегі Әкем бекітпек» деген болатын.

— Матай 18:18

Тағы да қайталаймын, жер бетінде Аспан Патшалығының

заңдары адамның рұқсатынсыз жүзеге аса алмайды. Алайда, адам күнә жасап, Құдай берген құзыретінен айырылып қалды. Сондықтан, адам Аспанның билігін жерде қолданбақ болса, Құдайдың Патшалығы оны қолдайды. Құдай Патшалығының қағидалары жерде орындалуы үшін, адамның билігі қажет. Жердегіні біз тыймасақ, Құдай да тыйя алмайды. Біз рұқсат

етпесек, Құдай ешбір іске араласа алмайды. Осы тұжырым сізге оғаш көрінсе, көп тоқталмай, әрі қарай оқи беріңіз. Кейінірек тағы да қарастыратын боламыз. Қазір тек мына ақиқатты ұғып алыңыз: жынның баланың бойынан шықпай қоюының себебі – шығуға міндетті емес еді! Ол қала беруге құқылы болатын. Тағы да қайталап айтып кетейін: Иса жынның шықпауының екі себебін айтып көрсетті – сенімнің жетіспеушілігі, не болмаса, заңды құзыреттің жоқтығы. Адам ата Жаратушыдан саналы түрде бас тартқанда, Құдай адам өміріндегі заңды өкілеттілігін жоғалтқан болатын. Дәл сол сәтте сол өкілеттілік шайтанға көшті.

Бұдан кейін әзәзіл шайтан Оны ертіп алып биік бір жерге шығарып, әп-сәтте әлемнің барлық мемлекеттерін көрсетіп:

— Осы мемлекеттердің бүкіл билігін, олардың сән-салтанатын Саған беремін. Бұл билік маған тапсырылған, оны көңілім қалағанға сыйлаймын. Сонымен маған ғибадат етсең бәрі де Сенікі болады, — деді

— Лұқа 4:5-7

Жер бетіндегі заңды билік адамға тиесілі еді, алайда, адам

Құдайдан теріс айналды. Нәтижесінде Құдайдың билігі жерде жүрмейтін болды. Бұл тақырыпқа кейінірек оралып, терең қарастыратын боламыз. Қазіргі мақсатым – Исадан рақым сұрап жалбарынған әкенің көңіл-күйі мен сезімін көрсету. Төмендегі сөйлемдерді мән беріп, асықпай оқып шығыуыңызды сұраймын.

Егер мұқтаж адамның мәселесін шешуге заңды өкілеттілік, заң немесе әділ сот болмаса, тек бір жол қалады, ол – қолында билігі бар адамнан рақым сұрап, жалбарыну ғана. Басына іс түскен адамның көмек алатын заңды жолдары болмаса, соттың әділдігіне деген сенімі болмаса, онда мәселесінің әділ шешілетініне еш сенімі болмайды. Қолынан бар келетіні – жалбарыну.

Алайда, осының барлығы – сен туралы емес, достым! Құдай Патшалығының әділдігі сен үшін қолжетімді. Мәселеңнің қайсысы да шешімін табады. Құдай Патшалығындағы заңдар адамның бет-жүзіне қарамайды, бұл заңдар Патшалықтың заңын мойындайтын әрбір азаматының құқығын қорғайды, соны ұмытпаңыз. Бұрынырақ айтқанымдай, Құдайдың Патшалығы әділдік пен әділетке негізделеді. Құдай Патшалығы әділ заңдарға негізделеді. Жынның баланың бойынан шықпай қоюының себебі – Құдайдың әлсіздігі немесе уәдесінен тануы деп ойламаңыз. Исаның сөзі мен ісінен-ақ Құдайдың құдіреті де, сүйіспеншілігі жеткілікті екенін көруге болады.

Құдай Патшалығының үстемдігін көрмесе, кейбір сенушілер бастапқы сенген ілімінен таяды. Олар «жындардың барлығы Исаның атына бағынып шыға бермейді екен» дейді. Олар Құдайда құдірет те, билік те бар екенін біледі және Құдай жер бетінде Өз қалағанын істей береді деп ойлайды, сондықтан жын адамнан шықпаса, Құдайдың еркі солай болды деп түйеді. Достым, бұлай жаңылыспаңыз. Бұл – мүлде қате түсінік. Иса ӨЗДЕРІНІҢ сенімдерінің жетіспеушілігі мен адасуларының салдарынан солай болды деген еді. Яғни, жынның шықпауының себебі заңға

негізделген жайт еді. Басқа себеп жоқ. Құдай Патшалығының билігін орнатып, Құдайдың заңының орындалуын қамтамасыз ете алатын адам жоқ еді сол жерде. Жалғыз себеп – осы болатын. «Гәри, олар бәрін дұрыс істеді ғой!» дерсіз. Жоқ, заң тұрғысынан қарағанда, жын шығуға міндетті емес еді. Неге дейсіз ғой? Өйткені, Аспан Патшалығының заңды өкілеттілігі болған жоқ.

Осы ойымды басқа сөздермен тұжырымдап көрейін. Құдайдың көзқарасында бұрыс әрі өрескел болып табылатын нәрселерді дұрыс әрі ақылға қонарлық деп қарастырған адамдардың ой-санасы – шындықтан тайған, бұрмаланған сана. Сенбеушілік тағы бар. Аспанның заңы жерде орындалу үшін сенімге толы жүрек керек. Ал шәкірттер жынның шығатынына күмәнді болатын, оларда нық сенім болған жоқ. Қорқыныш болды.

Жер бетіндегі заңды билік адамға берілген, сондықтан Құдайдың Сөзіне нық сенетін адам Патшалықтың өкілеттілігін жерге әкелгенде ғана Иеміздің ықпалы мен билігі жүзеге асады. Сенім дегеніміз – Құдайдың айтқанына қалтқысыз нану, Құдайдың Сөзі орындалатынына еш күмәнданбау. Өкінішке орай, сол күні сол жерде жүрегі сенімге толы бір адам табылмады. Олардың ой-санасы екіге бөлініп, күмәнға берілді. Соның салдарынан Құдай Патшалығының өкілеттілігін жерге әкеле алмады. Алайда, Исаның жүрегі сенімге толы болатын, Ол жынның кететініне тарыдай да күмәнданған жоқ. Иса билігін нық сеніммен қолданды, жынның баладан шығып кеткеннен басқа еш амалы қалмады. “Гәри, Иса, Иса болғандықтан құдіретті, солай емес пе?” дерсіз. Шынымен солай ойлайсыз ба? Онда Марқа жазған Ізгі хабардың 6-шы тарауын ашайық. Мұнда Исаның туған қаласына келуі баяндалады:

Содан да Иса сол жерде бірқатар науқас адамдарға қолын тигізіп сауықтырғаны болмаса, басқа кереметтер жасай алмады

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

Исаның науқастарды сауықтыруға деген құдіреті бар екеніне келісесіз ғой? Олай болса, кереметтерді жасай алмауының себебі неде? Сол жерде шипаға мұқтаж адамдар бар еді, бірақ Иса оларға көмектесе алмады. Мұның себебін 6-шы аяттан табамыз. Иса «Жұрттың сенбеушілігіне таңғалды» деп жазылған. Сенім (Аспанмен келісу) жер бетінде Патшалық заңдарының орындалуына мүмкіндік береді. Мысалы, сіздің Мәсікке келіп, құтқарылғаныңыз – осының көрінісі.

Себебі Мәсікке жүрегімен сенуі арқылы адам күнәсінен ақталады, Оны аузымен мойындауы арқылы құтқарылады.

– Римдіктерге 10:10

Жүрегіңіз Аспанның айтқанымен толықтай келіседі, яғни сенесіз, сол сеніміңіз арқылы ақталасыз. Ақталу дегеніміз – заң саласында қолданылатын термин. Ақталудың нәтижесінде Құдай Патшалығы жердегі өмірге араласа алады. Адам ата жер бетіндегі заңды билікке ие болатын. Билік әлі де адамның қолында. Едем бағында Адам ата рухани билікті шайтанның қолына беріп қойды. Бұл екі жайтты шатастырмаңыз. Адам жер бетіндегі өкілеттілігінен заң жүзінде айырылып қалды. Құдай өзі орнатқан заңға қарсы шыға алмайды. Құдайдың заңды түрде жердегі өмірге араласуы үшін Аспанмен келісімге келетін адам керек.

Пауыл елшінің Римдіктерге жазған хатын (10:10) мұқият оқысаңыз, мынаны байқайсыз: Құдайдың құдіреті жерде көрініс табуы үшін екі шарт орындалуы тиіс. Біріншіден, нық сенім, яғни, Құдайдың айтқанымен толықтай келісу. Екіншіден, біздің сеніміміз Құдайдың құдіретін жерге өздігінен келтіре алмайды. Таң қалып отырсыз ба? Түсіндірейін. Электр сымдарына электр қуаты келіп тұр. Дегенмен, шам жансын десек, тетікті басуымыз керек. Аспанның айтқанымен шын жүрегімізден

келіссек, Аспаннан жерге сым түскендей болады. Енді Құдайдың құдіретін жүзеге асыруымыз керек. Яғни, тетікті басуға тиіспіз. Құдай Патшалығының заңдарына сай сенімімізді жариялап, сол заңдарға сай әрекет еткеніміз – шам жағатын тетікті басқанмен бірдей.

Құдай өзіңізге уәде еткен игіліктерді иемденбек болсаңыз, Патшалықтың осы заңын түсіну АСА МАҢЫЗДЫ. Құтқарылу сыйына қалай қол жеткізсеңіз, Аспан Патшалығынан келетін игіліктердің қай-қайсысына қол жеткізудің жолы да дәл сондай: Құдайдың айтқанына шын жүреппен сену, сенімімізді жариялау, сенімге сай әрекет ету.

Шәкірттер Иса әкелген Патшалық жайында мүлде бейхабар болатын. Көз алдарында жасалған кереметтерге шәкірттердің қайран қалғаны жайлы бірнеше рет айтылады. Жын қысқан баланы көргенде, шәкірттер жыннан тайсалса керек, үрейдің салдарынан екіойлы болып, сенімдері әлсіреді. Олар жынды қуып шықпақ болып, балаға жақындағанда, жын баланы жерге құлатып, тағы басқа үрейлі көріністер жасаған болар деп ойлаймын. Мұны көрген Исаның шәкірттері қорқынышқа бой алдырады. Менің ұйғарымым мынадай: сол тұста орын алған бір жайттардың әсерінен шәкірттердің жүректері Құдаймен келіскен қалпынан шығып, сенбеушілікке берілген. Бұл бір күтпеген, оғаш жайт болса керек.

Иса болса, Құдай Әкенің осындай жағдайлар жайында айтқанымен толық келіскен қалпында қала берді. Сондықтан Ол жынға бұйрық бергенде, сөзінде құдірет болды. Сонымен, қорыта айтсақ,

**СОНДЫҚТАН СЕНДЕРГЕ
БЫЛАЙ ДЕЙМІН:
ҚҰДАЙҒА СИЫНЫП
(ОНЫҢ ЕРКІНЕ САЙ) НЕ
СҰРАСАҢДАР ДА, СОНЫ
ҚАБЫЛДАДЫҚ ДЕП
СЕНІҢДЕР! СОНДА ОЛ
ОРЫНДАЛМАҚ.**

– МАРҚА 11:24

жынның баланың бойынан шықпауының себебі – Құдайда емес, адамдарда еді.

Марқа жазған Ізгі хабардың 11-ші тарауындағы 22-24 аяттар Құдай Патшалығының жер бетіндегі көрінісін өте жақсы суреттейді. Бұл үзіндінің мағынасын терең түсінуіміз үшін, оқиғаны басынан бастап оқиық. Шәкірттерімен бірге Бетаниядан шыққанда, Исаның қарны ашты. Алысырақтан жапырақ жайған інжір ағашын көрген Ол жемісінің бар-жоғын байқау үшін қасына барды. Бірақ ағаштан жапырақтан өзге ештеңе табылмады. Сонда Иса: «Бұдан былай мәңгі ешкім де жемісіңнен дәм татпасын!» — деді. Шәкірттері Исаның осы айтқандарын естіді. Ертеңіне олар інжір ағашының тамырына дейін қурап қалғанын көрді. Бұған қайран қалған Петір Исаға: «Ұстаз, қараңызшы, Өзіңіз қарғаған інжір ағашы қурап қалыпты!» деді.

Иса жауап беріп шәкірттеріне былай деді:

— Құдайға сеніңдер! Сендерге шындығын айтайын: біреу мына тауға «Орныңнан көтеріліп, теңізге лақтырыл!» деп, айтқан сөзінің іске асатынына жүрегінде еш күмәнданбай сенсе, сол өтініші орындалады. Сондықтан сендерге былай деймін: Құдайға сиынып (Оның еркіне сай) не сұрасаңдар да, соны қабылдадық деп сеніңдер! Сонда ол орындалмақ.

— Марқа 11:22-24

Петір болған жағдайға қайран қалды. Бұл қалай? Иса ағашқа сөйледі де қойды. Ағаш Исаның сөзіне бағынып, қурап қалды. Содан кейін Иса Петірге Құдай Патшалығының заңын, ақиқатты ашып берді. Құдай Патшалығы мен жердегі тіршіліктің арасындағы өзара әрекеттестік қалай жүзеге асатынын Исаның сөзінен анық ұғамыз. Осы мысалдан жоғарыда айтылған заңның орындалуын көріп отырмыз: Құдайдың айтқанына нық сенетін

(демек, ақталған) адам сенімін жариялап, Құдайдың құдіретін жер бетінде босатып шығарады. Келтірілген үзіндіде бұл адам Исаның Өзі болатын. Алайда, Исаның істегенін әрбір сенуші істей алады, Иеміздің Өзі солай деген.

Сенушілердің барлығы Иса үйреткен осы заңды біліп, дұрыс түсінетін болса, олардың өмірі түбегейлі өзгертін еді. Дренда екеуіміз өмірімізге деген Патшалықтың ғажап ықпалын көрдік. Өзіміздің білгенімізді басқа адамдарға үйреткенімізде, олардың өмірі қалай өзгергенін көру тіпті тамаша болды біз үшін. Осы заңның орындалуын бейнелейтін, қауымымызда болған бір оқиғаны баяндап берейін. Патшалық жайындағы білімнің баржоғына өмір мен өлім мәселесі тікелей байланысты болатын жағдайлар да кездеседі екен. Төмендегі оқиға – соның айғағы.

Дженнифер біздің қауымға келіп, сенім мен Патшалық жайында білім ала бастады. Патшалықтың азаматы ретіндегі құқы мен билігін қолдануды үйренді. Дженнифердің аяғы ауыр болатын, перзентханаға бармай, үйде босанбақ болып, дайындалып жүрген. Ол Құдайдың балаларымызға қатысты қандай уәделер бергенін зерттеп, көңіліне тоқып жүрген. Үйде аман-есен босанатынына нық сенімді еді. Дженнифер акушер әйелмен және өзі де бірнеше рет үйде босанған бір сенуші әйелмен келісіп қойған, олар Дженниферге көмектесуі тиіс болатын.

Сонымен, Дженнифер қауымдағы жиналыстардың бірінен қалмай, Патшалық туралы тәлімді санасына сіңіре берді. Құдай Патшалығында барлық мұқтаждықтарымыздың жауабын ала алатынымызға өте қуанышты еді. Өкініштісі, сол кезде Дженнифердің жұбайы жұмыстан қолы босамай, қауымға сирек келетін еді. Айы, күні келгенде, олардың үйіне акушер әйел мен әлгі сенуші әйел келді.

Түнгі екі-үштің кезінде төсегімнің жанында тұрған телефонға қоңырау түсті. Ар жақтан сенуші әйел “Бағушы, тезірек мінәжат

етіңіз! Бала өлі тұды!” деп айғай салды. Ұйқым шайдай ашылды. “Баланы жаңа ғана жедел жәрдем алып кетті. Келген дәрігерлер баланың өлі екенін растады” деп қосты.

Дренда екеуіміз атып тұрып, киіне бастадық. Киелі Рухтың жетелеуін күтіп, бөтен тілде мінәжат ете бастадым. Шайтанның қауымымызды қаралау үшін мынадай оқиғаны қалт жібермейтіні анық. Көз алдыма басты беттерінде “Баланың өлі тууы – үйде босануды қолдайтын сектаның кінәсі” деп бақырайта жазылған газеттер елестеп кетті. Шынтуайтына келгенде, әйелдердің қайда босануы дұрыс деген мәселені қауымда қарастырған емеспіз, ол жайында сөз де болған емес. Дегенмен, біздің қауымдағы әйелдердің көбісі үйде босанғанды жөн көретіні рас. Ауруханаға бара жатқан жолда Дренда екеуіміз тынбай мінәжат етумен болдық. Екі ара шамамен жиырма минуттық жол. Орта жолда Киелі Рухтың тыныштығы келді, жүрегімде оқиғаның жақсы аяқталатынына деген нық сенім пайда болды. Дәл сол сәтте жұбайым маған қарап, Құдайдан сөз келгенін, баланың жақсы болып кететінін айтты.

Әйеліме де, өзіме де Құдайдың сөйлегенін білемін. Сондықтан жедел жәрдем ауруханасында не болып жатқанын тезірек көргім келді. Кірсем, жаңа туған нәрестенің айналасында жиналған жеті-сегіз медбике тұр екен. Баладан ешбір науқастың белгілері байқалмайды, іңгәләп жылап жатыр, кәдімгі қызыл шақа нәресте. Медбикелердің жүздеріне анықтап қарадым. Әдетте, балаға қарап тұрған әйелдердің жүздерінде жылу болады. Бұл жолы олай емес. Медбикелердің түрлері бұзылып кеткен бе, қалай?

Бізге телефон соққан әйел де осында екен. Осыдан жиырма минут бұрын үйге барған дәрігер баланың өлі екенін растаған деп тағы айтты. Баланы ауруханаға әкелгенде, өлі екенін мұндағы дәрігер де растапты. Алайда, бала өзінен-өзі тіріліп кеткен. Құдайға шүкір! Дренда екеуіміз жүрегіміздің лүпілін баса алмай

жақынырақ бардық. Киелі Рух айтқандай, бала аман-есен екен.

Жедел жәрдемнің екінші машинасы Дженниферді осы аурухананың басқа бөлімшесіне алып келгенін де білдік. Демек, ол баласының жағдайынан бейхабар. Дренда Дженнифер жатқан бөлімшеге барды да, палатаға кіре сала, “Дженнифер, бала аман-есен, бәрі жақсы, өзі тәп-тәтті бөпе екен” деді. Дженнифердің жанындағы медбике “Жоқ, бала мәйітханада болуы тиіс” деп сөзін бөлді. Әйелім өз дегенінде тұрды.

Бүгінде сол бала – бой жеткен көрікті қыз, денсаулығында да, ақыл-ойында да ешбір ақау жоқ. Құдай Патшалығының мызғымас заңдарға негізделетінін білемін, сондықтан бұл жағдай – кездейсоқтық емес. Мен рухани зерттеушімін (мәсіхшілік ғылымын зерттеуші емес, Құдай Патшалығының қағидаларын зерттеуші), сол себепті болған жағдайдың мән-жайын түгел білмек болдым.

Жедел жәрдем Дженнифердің үйіне барғанда, дәрігер Хэйлидің өлі туғанын анықтаған. Ауруханада баланың өлі екенін тағы бір дәрігер растаған. Сонда қалай болғаны? Дженнифер босанғанда қасында болған әйелден оқиғаны егжей-тегжейлі айтып беруін сұрадым. Құпияның сырын тапқым келді. Әлгі әйел бала құрсақтан шыққан сәтке дейін бәрі ойдағыдай болғанын айтты. Алайда нәресте өлі туған, денесі көкшіл тартқан, дем жоқ. Акушер баланы тірілтпек болып, әрекеттенген, онысынан түк шықпады. Дженнифердің жақындары қатты сасқалақтап, дүрбелеңге салына бастады. Алайда, Дженнифер оларға нық сөйлеп, тыныштыққа шақырды. Сосын күйеуіне қарап, “Тіс жарма! Бала жақсы болып кетеді!” деді.

Осы тұста әңгімені тоқтатып, Дженнифердің жұбайына не айтқанын қайталап сұрадым. Әлгі әйел сөзбе-сөз қайталады: “Тіс жарма! Бала жақсы болып кетеді!” Мәссаған! Міне, құпияның кілті – осы! Хэйлидің өмірін құтқарып қалған сәт осы болатын!

Өзімді шиеленіскен жұмбақтың шешуін тапқан детективтей сезіндім! Дженнифер басына түскен қиындықта рухани заңға жүгінген екен! Сол заңның жүзеге асуының арқасында баласы өмірге қайта оралды. Шаттығымда шек болмады. Өте қарапайым, сонымен қатар өте терең ақиқат!

Дженнифер күйеуінің сенімі әлсіреп жүргенін білетін еді. Есіңізде ме, ол жігіттің соңғы кезде жұмысбасты болып кеткенін айтып едім ғой. Сонымен қатар, күйеуі баланың өлімімен келіссе, рухани билігін теріс қолданып, нәрестенің ажалын бекіткендей болатынын да білетін еді. Сондықтан, Дженнифер ең алдымен жұбайымен сөйлесіп, баланың өлімімен келісуіне жол бермеді. Өзі баланың аман-есен қалатынына нық сенімді еді және сол сенімін батыл жариялады.

Дженнифер ауруханадан шыққаннан кейін жедел жәрдем қызметкерлерімен кездесіп, сол түні баланы ауруханаға апара жатқан жолда балаға қандай шара қолданғандарын сұрады. Олар қысылса да, шынын айтты:

- Ештеңе істеген жоқпыз, – деді бірі.
- “Ештеңе” дегеніңізді қалай түсінуге болады? – деп сұрады Дженнифер.
- Реанимация, яғни, тірілту шараларын жасаған жоқсыздар ма?
- Жоқ.
- Балаға мүлде ешқандай ем-дом жасалған жоқ па?
- Жоқ. Біз ешқандай шара жасаған жоқпыз, – деп қайталады дәрігерлер.

Баланың өлі екені анық болғандықтан, оны тірілтуге ешқандай әрекет жасалмаған еді. Жедел жәрдем қызметкерлерінде бала тірілуі мүмкін деген үміт болған жоқ. Алайда, ауруханада бала кенеттен тыныс ала бастады! Медиктер командасы басшылықтан

алғыс хат алды. Күрделі жағдайды жеңген дәрігерлерге берілетін жыл сайынғы марапатты да алған. Алайда, ештеңе істемегендерін өздері мойындады.

Жақында Дженнифер мен Хэйлиді телебағдарламамызға шақырып, Құдай Патшалығының сол күнгі жеңісін көзімізге жас ала отырып, қайта тойладық. Арамызда Патшалықтың рухани заңдарын білетін, сол заңдарға сүйеніп, билікпен әрекет ете алатын адамның болғанына қуандық.

Осы оқиғадан түйгеніміз, біріншіден, Дженнифер Құдайдың сөзімен толықтай келіскен адам еді, Құдайдың айтқанына нық сенетін. Екіншіден, ол сенімін жариялап, рухани билігін қолдана білді. Патшалықтың заңдары өзгермейді!

Біздің қауымдағы тағы бір отбасы Құдай Патшалығының осы заңының ұқсас жағдайда жүзеге асқанын көрді. Апалы-сіңлілі екі келіншек бала-шағасымен бірге дастархан басында жиналды. Екеуінің балаларын қоса есептегенде, он екі немесе он үш бала. Түскі ас уақыты келгенде, төрт жасар Джоэл дастархан басына келмеді. Олар үйдің ішін қарап шықты, бала табылмады. Қызық көріп тығылып қалған болар деп, үйдің бұрыш-бұрышын тағы тінтті. Бала жоқ. Кенет Джоэлдың анасы Тинаның есіне үйдің артындағы бассейн түсті. Жүрегі солқ ете қалды. 13 жасар жиені Кортни екеуі солай қарай тұра ұмтылды. Джоэл бассейнің түбінде қимылсыз жатыр екен. Қанша уақыт осылай жатқаны белгісіз. Тина дереу құтқарушыларды шақыртыңдар деп дауыстады да, өзі бассейнге түсті. Джоэлда тыныс та, селт еткен қимыл да жоқ, өңі боп-боз.

Кортни біздің қауымдағы балалар қызметіне қатысатын еді. Ол әпкесіне “Жо-жоқ, әпке, құтқарушыларды шақыртудың қажеті жоқ. Билік өзімізде. Мінәжат етейік” деді. Екеуі дұға ете бастады, өзгеріс бола қоймады. Тина “911-ге тез хабарласыңдар” деп тағы да айқай салды. Кортни “Тина әпке, Джоэлдің денесіне тіріл деп бұйыру керек” деді де “Джоэл, Исаның атымен бұйырамын, есіңді жи!” деді.

Кенет Джоэл кеудесін керіп тыныс алды да, аузындағы суды түкіріп тастады, есі де жиналды; өзі түк болмағандай, сап-сау қалпында.

Осы оқиға есіме түскен сайын Джоэлдың толық сауығып кеткенінен гөрі 13 жасар жеткіншектің қиын сәттегі жинақылығы мен батыл әрекетіне таң қаламын. Інісі өлім аузында жатқанда, үрейге берілмей, жағдайды дұрыс бағалап, дұрыс әрекет ете білді. Құдай Патшалығының заңдарын білу – әдемі тәлім ғана емес, керек сәтте адам өмірін құтқарып қалатын күш екенін осы оқиға тағы да бір дәлелдеді!

Патшалықтың заңы жүзеге қалай асатынына тағы қайталап назарыңызды аударайын. Алдымен Кортни мінәжат ету керектігін айтты. Олар мінәжат етті, өзгеріс болмады. Оның себебі – мінәжатта біз Құдайдың құдіреті мен билігін қолданбаймыз. Біз даналық пен жетелеу сұрап сиынамыз. Сол сәтте керегі де – сол еді. Содан кейін Кортни Джоэлдың тірілуін жариялау керек деді. Солай етті де. Сол сәт Джоэл тіріліп кетті. Бүгінгі таңда Джоэл аман-есен, дені сап-сау. Мұнда да Құдайдың сөзіне нық сенетін жүректі көріп тұрмыз. Дегенмен, шүбәсіз сенетін адам өз билігін қолданбай, нәтиже болмайды екен.

Енді өз отбасымызда болған оқиғаны баяндап берейін. Балдызым Джоннидің әйелі бесінші баласын босанатын күні аурухананың жанына біз де бардық. Дренда кішкентай сіңлісін көруге асықты. Кэндидің толғағы басталды деген хабарды естігеннен кейін перзентханаға асықпай, араға біраз уақыт салып жеттік. Кэнди босанып болып, аздап тыныққанда бармақ болатынбыз. Келсек, келініміздің толғағы дұрыс болмай, ауыр босаныпты. Біз кіргенде жаңа туған нәрестені медбике арнайы бөлмеге апара жатыр екен. Сол бөлменің бір қабырғасы түгел шыныдан жасалған, сәбилерді көруге болады.

Біздің баланың реңі маған тым бозғылт көрінді. Джоннидің блалары шетінен ақ сары. Сондықтан ішімнен Холланд та әкесіне

тартқан бала ғой дедім де қойдым. Дегенмен, бір күдігім бар. Кенет барлық дәрігерлер мен медбикелер қауырт қимылдай бастады. Медбикелер шыны қабырғаны шымылдықпен жауып қойды. Баланы көрмей қалдық. Ішім суып сала берді. Шымылдықта саңылау қалып қойыпты, содан қарап тұрмын. Медбикелер жабдықтарын алып шықты да, Холландқа реанимация жасай бастады. Есіктің жанына барып, дәрігерлердің сөздеріне құлақ түрдім. Баланың жүрегі тоқтап қалыпты, дәрігерлер қолдарынан келгенді істегенмен, жүрек соғысын қалпына келтіре алмай жатыр екен. Жүрек соғысын қадағалайтын монитордың даусы естіледі. Баланың жүрек соғысы өте сирек, 15-20 секундта бір соғады. Холландтың жағдайы нашар.

Дәрігер палатадан шығып, Джоннидің жанына келді. “Джонни, жағдай нашар. Қолдан келгеннің барлығын істеп жатырмыз” деді. Ішке кіруге рұқсат жоқ. Сондықтан Дренда, Джонни, мен үшеуіміз қолымызды палатаның есігіне қойып мінәжат еттік. Сосын Исаның атымен Холландтың өмірі үзілмейтінін, аман-сау болатынын жарияладық.

**ПАТШАЛЫҚТЫҢ
ЗАНДАРЫ ӘРДАЙЫМ
ЖӘНЕ ӘРБІР АДАМНЫҢ
ӨМІРІНДЕ ОРЫНДАЛАДЫ!**

Кенет әлгі дәрігер палатадан атып шықты. Жанымыздан үн-түнсіз өте шықты да, бірнеше минуттан соң бір медбикемен бірге қайтып келді. Медбике “Доктор, олай істей алмаймыз. Біздің аурухана бұл процедураны өткізуге құқылы емес. Сізге қанды алуға рұқсат бере алмаймын” деген сөздерді айтып жатыр. Дәрігер медбикенің сөзіне назар аудармастан палатаға кірді де, нұсқаулықты қолына алды. Мұқият оқып тұр. Жорамалдауымша, оқып тұрғаны – процедураны орындау тәртібі. Саңылаудан көре алғаным, дәрігер қағазды оқып болды да, ұзын түтікшені қолына алды. Балаға қан құймақшы.

Кенет монитордың даусы естілді. Баланың жүрегі соға бастады. Жүрек соғысы жиілей берді де, жаңа туған нәрестеге тән жиілікке жетті. Аздан кейін дәрігер палатадан шығып, “Жанымда періштелер болды. Мына баланың жанын алып қалуға Құдай көмектесті!” деді. Өзі қалш-қалш етеді. Кейін білгеніміздей, бұл кісі – Кэндидің дәрігері емес екен. Бүгін тіпті бұл дәрігердің жұмыс күні де емес. Ауруханаға басқа науқастың жағдайын білмек болып соғыпты. Ақырында өлім аузында жатқан баланы құтқарып қалды. Болған оқиғаға өзі де қайран қалып тұр. Баланың жүрегі 36 минут бойы тоқтап тұрды!

Бүгінгі таңда Холланд – төрт мүшесі сау, сүп-сүйкімді төрт жасар бала. Сол күнгі қауіпті жағдайдың жақсы аяқталуы – Құдай Патшалығының заңдарын білуіміздің жемісі деп білемін. Қолымды есікке қойып тұрып, ішімнен “Жаңа туған нәрестені жерлемейміз! Келіспеймін оған!” дегенім есімде.

Құдай Патшалығындағы заңдардың әсері көрініс тапқан осы оқиғалардан түйгенім: Патшалықтың заңдары әрдайым және әрбір адамның өмірінде орындалады! Кітабымның бас жағында табиғат заңдары жер бетінде әрдайым және бірдей жүзеге асатынын айтқан болатынмы. Табиғат заңдары адамның бет-жүзіне қарамайды. Игеріп, қолдана білген әр адамға қызмет етеді. Электр қуаты АҚШ-та да, Африкада да бірдей жарық береді.

Құдай Патшалығы – нақты заңдары бар патшалық екенін түсінгенімде, көп құпияның кілтін тапқанымды білдім. Мұқтаждығыма жауап ала алмағанымның себебі – Құдайда емес екен. Құдай менен жақсылығын аяған емес, қол жеткізе алмай жүрген өзім екен. Иса Мәсіх Өзінің қаны арқылы мен үшін Аспанда сақталған игіліктердің барлығына жол ашқан. Құдай өміріме қажеттің барлығын әлдеқашан берген. Тек ала білуім керек. Құдай Патшалығы нақты заңдарға негізделеді, сол заңдарды зерттеп, ұғынып, өз өмірімде пайдалана білуім керек.

Киелі Кітаптағы әрбір әңгімені жаңаша оқитын болдым, енді Құдайдың Сөзінен Патшалықтың басқа заңдарын ашып беретін кілттерді іздеймін. Киелі Кітапта айтылған, өзіме бұрыннан таныс оқиғалардың не себепті солай өрбігенін түсінуге ұмтылып, рухани әлемді зерттеуге кірістім.

Жоханның бірінші хатындағы аяттар кейбір адамдарға оғаш көрінуі мүмкін. Сіз бұл аяттармен таныссыз, дегенмен, мәтінді тағы да оқиық, себебі, онда біз іздеген ақиқат ашылады.

Біз Оның еркіне сай бір нәрсе сұрасақ, Құдай тілегімізге құлақ салады деп нық сенеміз. Не сұрасақ та, Құдай бізге құлақ салады деп білсек, Оның тілегенімізді беретінін де білеміз.

– Жоханның 1-ші хаты 5:14-15

Бұл аяттарды сүйіп оқимын, өйткені, мұнда заң туралы айтылады, ал заң – әділеттің қалайда орнайтынына негіз болып табылады. Құдайдың еркіне сай не сұрасақ та, аламыз. Құдайдың еркіне сай дегеніміз – Құдай дұрыс деп таныған немесе заңға қайшы келмейтін нәрселер. «Құдай бізге құлақ салады» деген сөз Құдай тек айтқан сөзімізді естиді де қояды деген сөз емес. Әрине, Жаратқан Ие сөзімізді естиді. Естумен шектелмейді, ең бастысы, ісімізді ден қойып қарастырады. Әлдебір істі қарастыратын сот төрешісін алайықшы. Төреші істі өз көңіл-күйіне, көзқарасына емес, тек заңға негізделіп қарайды (Солай болуы керек). Жоғарыдағы аятта осындай жағдай туралы айтылған. Құдай бізге құлақ асады, яғни, ісімізді қарайды. Әділеттің орнайтынына сенімді бола аламыз, өйткені оған заңды құқымыз бар.

Қымбатты оқырман, осы тұста тоқтап, жоғарыдағы аятты асықпай қайталап оқып шығыңыз. Егер оқығаның шындық болса, өмірің қуанышқа кенелуге тиіс! Осы ақиқатты ұқпастан мінәжат етіп жүрген сенушілерде шынайы сенім жоқ, олар тек мінәжат

сөздерін қайталап айта беруде. Матай жазған Ізгі хабарда Исаның сөздері жазылған.

Құдайға сиынғанда жалған тәңірлерге құлшылық етушілер іспетті құр сөз сөйлей бермеңдер! Олар көп сөз айтсақ еститін болады деп есептейді.

– Матай 6:7

«Артық сөз» дегеніміз – әлдебір сөздерді, мағынасына терең бойламай, қайталай беру. Көптеген сенушілер осылай сиынады. Олар әділетке деген өздерінің заңды құқын білмейді. Құдай Патшалығында өздеріне не берілгенінен бейхабар. Өзіңе тиесілі нәрселерді сұрап, жалбарынудың қажеті жоқ!

Осы ойым түсініктірек болуы үшін, ойдан шығарылған мысал келтірейін. Жол жиегінде полиция қызметкері тұр дейік. Ол жүк машинасын тоқтатып, тексермек. Полиция қызметкері «Өтінемін, тоқташы! Маған рақымыңды түсіре гөр! Айналайын, тоқташы деймін!» деп жалбарынады, тіпті, көзіне жас та алады. Мұндай әрекет оғаш, ақылға қонымсыз, онысымен қоймай, Америка Құрама Штаттарының да, еліміздің құқық қорғау жүйесінің де беделін түсіретін әрекет болар еді. Жоқ, полиция қызметкері олай істемейді. Ол еңсесін жоғары ұстап, анық сөйлейді. Көлікті батыл тоқтатады. Еліміздің заңды билігінің өкілі болып табылатын қызметкерге жүргізуші бағынуға тиіс, сондықтан көлік полиция қызметкерінің талабына бағынып тоқтайды.

Құдайдан рақым сұрап, жалбарынатын адамдар Құдай Патшалығының заңдарынан және өздерінің құзыретінен бейхабар. Полиция қызметкері жүргізушіні тоқтатарда оған жалынатын болса, мемлекетті масқаралайтын еді. Мұндай жағдай өкіметтің беделі де, заңдары да қалмағанын көрсетер еді. Мұндай елді заңсыздық билейді. Мәсіхшілердің Құдайдан әлденені сұрап, қайта-қайта жалынғаны Құдай Патшалығын әлсіз, мұқтаждықтарға

жауап беруге қауқарсыз етіп көрсетеді. Мұндай жағдай Құдайдың құдіреті мен сүйіспеншілігіне деген күмән тудырады. Сенушілер сұрағанын алуға құқылы. Иса жалбарына сұрауға бейім сенушілер туралы айтып келіп, «Олай етпеңдер!» деп ескертеді.

Құдайға сиынғанда жалған тәңірлерге құлшылық етушілер іспетті құр сөз сөйлей бермеңдер! Олар көп сөз айтсақ еститін болады деп есептейді. Сендер сондайларға ұқсамаңдар! Себебі көктегі Әкелерің өздерің сұрамай тұрып-ақ, сендерге не керек екенін біледі. Сонымен Құдайға мына іспетті мінажат етіп сиыныңдар:

Көктегі Әкеміз!

Сенің киелі есімің қастерлене берсін,

Патшалығың осында орнасын!

Сенің еркің көкте орындалғандай,

Жер бетінде де орындала берсін!

Күнделікті нанымызды бүгін де бере гөр.

Бізге күнә жасағандарды кешіргеніміздей,

Сен де күнәларымызды кешіре гөр.

Азғырылуымызға жол бермей,

Бізді жамандықтан сақтай гөр.

(Патшалық, құдірет және ұлылық

Мәңгі бақи Сенікі! Аумин.)

– Матай 6:7-13

Иса бізге осылай мінәжат етуді үйреткен. Өкінішке орай, кейбір адамдар осы сөздерді әдемі етіп жазып, қабырғаға іліп қойғаннан арыға бармайды. Олар Исаның осы айтқанының шынайы мағынасына үңілмейді. Бұл дұғаны “Көктегі Әкеміз” деп атаймыз. Бұл – Исаның шәкірттеріне үйреткен дұғасы. Иса осы мінәжатты сөзбе-сөз қайталау керек деп айтқан жоқ, дегенмен, қауымдарда

көбінесе солай. Исаның жоғарыда келтірілген сөздері – керек десеңіз, нақты іс-әрекетке деген нұсқаулық. Жай ғана қандай сөздерді жаттап алып, қайталау емес, мақсатқа жету үшін қалай мінәжат ету керек, сол туралы айтқан.

“Патшалығың осында орнасын! Сенің еркің көкте орындалғандай, жер бетінде де орындала берсін!» деген сөздер – дұрыс мінәжаттың шарты. Дұғада біз Құдайдың еркін Аспаннан жерге, күнделікті өмірімізге әкелуге тиіспіз. Сонымен, Исаның айтқанына біздің жауабымыз қандай болмақ? Құдай уәде еткен игіліктер бізге тиесілі екеніне сену, Құдай Патшалығының азаматы ретіндегі құқымыз бен рухани билігімізді пайдаланып, сол игіліктерді өзіміз бен басқалардың мұқтаждықтарына жауап ретінде қолдану.

Бір сәт кідіре тұрып, осы жайында ойланайық. Мінәжатыңыз Құдайдың құлағына жететініне, дұғаңызды Аспан Патшалығы қолдайтынына күмәнсіз сенетін болсаңыз, батылырақ сиынар ма едіңіз? ИӘ!!! Құдай Патшалығының азаматы бола тұрып, заңды құқыңызды жақсы білсеңіз, өзіңізге берілген уәделерді анық түсінсеңіз, уәде етілген игіліктерді қалай иелене алатыныңызды ұғынсаңыз, Патшалықтың заңдары беретін артықшылықтарды пайдаланып, мүлде жаңаша өмір сүретін едіңіз. Өміріңіз Құдай Патшалығының азаматына лайық өмір болар еді. Қорқынышыңыз бен күмәніңіз қайда қалар еді? Біліміңіз жарқын болашағыңызға деген сеніміңізді қалай арттырар еді, дауыл кезінде тыныштық берер ме еді? Дренда екеуіміз Құдай Патшалығы жайлы білімімізді тереңдеткен сайын, Патшалықтың бізге деген ықпалы осындай болды. Кезекті ақиқат ашылғанда, бір жағынан қайран қалып, бір жағынан шаттанатын едік. Осы күйді басымыздан жиі кештік. Жиі емес-ау, үнемі осы күйде жүретінбіз! Сонымен қатар, Құдайдың қауымға берген билігі қайран қалдырады. Сол билік жүзеге асқанда, Құдайдың Өзі қауым арқылы әрекет етіп, Жартқан Иеміз жердегі өмірге әмірін жүргізеді.

Себебі Иса Мәсіхпен тығыз байланыстағы өмір ЗАҢЫ мені күнәлі құмарлық пен рухани өлім ЗАҢЫНАН азат етті.

– Римдіктерге 8:2 (орысшадан аударма)

«Күнә мен өлім заңынан» азат болып, Патшалыққа кіргеніміз бен бұдан былай өмір заңына бағынатынымыз жайлы ақиқат Дренда екеуімізді шаттыққа бөледі. Патшалықтың әділетті заңдары өмірімізде орындалғанын көріп, одан бетер қуанумен болдық.

Құдай Патшалығының азаматы ретінде, жанымда сауықты – өшкен үмітім қайта лаулап, күйзелістен шықтым, депрессияға қарсы дәрілердің қажеті болмай қалды. Есіңізде болар, әрбір 300 доллар үшін арпалысып жүріп, 1800 жылы салынған, тозығы жеткен үйіміздің ақысын әупірімдеп төлейтін едік. Патшалықтың заңдары бізді жоқшылықтан шығарды, 700 шаршы метр жаңа үй салуға мүмкіндік берді. 23 гектар жеріміз тағы бар. Әйелімнің маған деген махаббаты қайта жанданды! Екі күннің бірінде сынып жатпайтын, жаңа, сапалы көлік мінудің өзі қандай тамаша! Ізгі хабар таратуға жүздеген мың доллар қаражат жұмсаймын деген ой осыдан бірнеше жыл бұрын үш ұйықтасам, түсіме кірмес еді. Патшалықтағы өмір нұры түнекті жойды. Әлемді жаратқанда Құдай, жаратылысқа қарап, жақсы екенін көрді. Мен де солай. Өміріме қарап, таң қаламын да, «Жақсы! Өте жақсы!» деймін.

Дренда екеуіміз шабыттанып, Патшалық жайлы білгендерімізді айта беруден жалықпадық, тыңдар құлақ болса болды. Біздің қауымдағы адамдар да біздікіне ұқсас нәтижелерге қол жеткізді. Сол адамдардың бірі өзіміздің 12 жасар қызымыз еді. Ол Құдайдың талай кереметін көріп, Патшалықтың мызғымас заңдарының өмірімізде жүзеге асқанына талай рет куә болды. Қызым бізге қарап, рухани заңдарды үйрене берді. Оның Патшалық заңдарын қаншалықты меңгергенін төмендегі оқиға көрсетті.

Бір күні қызымның бөлмесіне кіріп, қабырғаға ілінген суретті көрдім. Бұрын жоқ еді. Суретте кіп-кішкентай сүйкімді шпиц тұқымдас күшік бейнеленген. Тарыдай да болса, тәжірибесі бар ата-ана үшін бұл анық белгі: енді бала қыңқылдап ит асырауды сұрай бастайды. Мен соның алдын алмақ болдым. Тағы бір ит асырамақ емеспін. Кирстеннің әпкесі Поллидің иті бар. Екі қызым бір бөлмеде жатады. Ит те үнемі қастарында.

Суреттің өте әдемі екенін айттым да, тағы бір ит асыраудың қажеті жоқ дедім. Баламның көңілін қалдырғым келмей, мейлінше жұмсақ сөйледім. Итпен ойнағысы келсе, әпкесінің итімен ойнауына да болады. Кирстен сөзімді тыңдады да, жауап қайтармады. Осымен әңгіме тәмам деп жүрсем, баламның өз ойы бар екен. Бірер күн өте “шпиц тұқымдас итіміз болса, шіркін”, “шпиц күшіктері не деген сүйкімді” дегендей әңгімелер басталды. Содан кейін, әрине, интернеттен шпицтің суреттерін тауып, көрсете бастады. Мен “жоқ” деп қайталай бердім. Менің шешімім – тағы бір ит асыраудың қажеті жоқ. Осы шешімімнен танбақ емеспін.

Алайда, арада бір ай өткенде, күтпеген жағдай болды. Қауымнан келдік. Кирстен “Папа, сенімімді өзің үйреткендей қолданып, бүгін күшігімді қабылдадым!” деп қуана хабарлады. Тағы бір ит алмайтынымызды қайталадым. Бұл менің үзілді-кесілді шешімім екенін де есіне салдым. Қызым күлімсіреген күйі “Папа, Құдай патшаның жүрегін өзгерте алатынын айтты ғой” деді. Баламның сөзі – әкеге қарсы шығу, бүлік шығару емес-ті. Бар болғаны, анасы екеуі келісіп, Құдайдан менің жүрегімді жібітуін сұрап, дұға еткен. Тұзаққа түсіп қалдым. Анасы баланың жүрегіне Құдай менің шешімімді өзгертуіме септігін тигізеді деген сенім ұялатқан екен.

Анасының қолдауын сезген бала сол күні қауымда шпиц күшігін алатынын жариялап, сеніммен тұқым сеуіпті. Сонда да қайтпадым. Қызымның көңілін аулап, жұмсақ сөйлесем де, бұрынғы сөзімді қайталадым: “Үйімізде екі ит болмайды”. Бұл шешім өзгермек емес.

Сөзіме налымаған тәрізді, қабағын шытпастан бөлмесіне кетті. Мен де мәселе осымен шешілген болар деп жеңілдеп қалдым.

Тағы бір ай өтті. Миссисипи штатындағы бір шағын қауымнан шақыру келді. Жан-жағын егістік алқаптар алып жатқан кішкене ғана қауым екен. Бірінші күнгі уағызымнан соң жаныма қауым бағушысы келді. Жиналыс кезінде Құдайдан сөз алғанын айтты. “Шпиц тұқымдас ит асырайтынымды білетін шығарсыз. Сізге күшіктердің бірін сыйлауым керек, Құдайдың еркі солай. Күшіктер алты айлық, анасынан ажыратуға болады” деді. Аңтаң болып тұрмын. Дегенмен, ит алар ниетім жоқ. Сондықтан “ойланып көрейін” деген сөзбен шектелдім. Мен бұл кісінің ит асырайтынын естіген емеспін. Кирстен шпиц тұқымдас күшік асырағысы келетінін тіс жарып ешкімге айтқан емеспін.

Ішкі арпалыстан шаршап, Дрендаға мән-жайды айттым. Бірақ күшікті алғым келмейтінін қостым. Әйелім маған қарап, “Қызымыздың сенімін су сепкендей баспақсың ба?” деді. Тағы бір ит асырауды Дренданың да көксеп жүргені шамалы еді. Алайда, бала арманы орындалуы үшін тағы да бір жануардан келетін қолайсыздыққа ана жүрек төзуге дайын. Сонымен, қызымыздың сеніміне жауап ретінде Құдай сұрағанын беріп тұр – мен қалай бас тартпақпын. Әлгі бағушыға күшікті алатынымды айттым.

Кирстенге ештеңе айтқан жоқпыз. Тек бізді қарсы алмақ болған үлкен қызымызға аэропортқа сіңлісін ала келуін тапсырдық. Ұшақтан түскенімізде бізді күтіп тұрған қыздарымызды көрдік. Күшікті жолда алып жүруге арналған кішкене кейсті Кирстеннің қолына ұстаттық. Кирстен кіп-кішкентай күшікті көргенде, жылап жіберді. Дүние тоқтап қалғандай болды. Айналамыздағы адамдар күшікті құшақтап жылап тұрған баладан көз ала алмай, елжірей қарап тұр. Құдайдың сол күшікті Кирстеннің сеніміне жауап ретінде бергенін Дренда осы күнге дейін айтып жүр.

Сол сәтте ұққаным, қолыңда кіп-кішкентай сүйкімді күшігің

болса, тіпті әуежайда да Ізгі хабар тарату жиналысын өткізуге болады екен. Жұрттың бәрі күшікті көруге тырысты. Кирстенге қарап, бізді қоршаған жұрттың көзі жасқа толды. Тіпті, қауіпсіздік қызметінің офицерлері де жүректерінің елжіреп кеткенін жасыра алар емес. Мен болсам, соншалық мейірімсіз болғаныма өкіндім. Күшіктің балама қандай қуаныш сыйлағанын көргенімде, баланың сеніміне Құдайдың жауап бергені есіме түскенде, өзімнің мынадай кереметке қарсы болғаныма өкіндім! Кирстен күшіктің атын Шекспир деп қойды. Ол ақылды күшік болып шықты, бара-бара отбасымыздың бір мүшесіне айналды. Кирстен қайда барса да, Шекспир бір елі қалмайтын болды.

Осы бір жүректі елжіретер әңгіменің соңында өте маңызды сұрақ қоймақпын. Бұл ит қайдан пайда болды? Осы сұраққа жауап беруге міндеттіміз. Және бұл сұрақтың жауабы қолыңыздағы кітапты жазуымның мақсаты болып табылады. Бұрын-соңды біреу маған күшік сыйлаған емес. Тағы бір сауал: қалайша басқа емес, қызым армандап, Құдайдан сұрап жүрген шпигер тұқымының күшігі кезікті? Бұл кездейсоқтық па? Жоқ, әсте де кездейсоқтық емес. Бұл жағдай – Құдай Патшалығындағы заңның жүзеге асуының тікелей нәтижесі. Біз өмірімізді сол заңға бағындырған едік. Патшалық заңдары қашанда орындалады. Тек сол заңдарды білетін, жүрегі сенімге толы әрі Патшалық билігін жерде жүзеге асыра алатын адам болса, болды. Шекспирді бізге сыйлаған – Құдай Патшалығы болатын. Сізде “бұл қалай жүзеге асты?”, “осы жағдайда нақты қандай заң орындалды?” деген сұрақтар туындауы мүмкін. Кітапты оқу барысында барлық сауалдарыңызға анық жауап табасыз деген үміттемін. Құдай Патшалығының азаматтығы беретін артықшылықтарды пайдаланып, тамаша өмір сүретін боласыз. Патшалықтың азаматы екеніңізді, заңды құқықтарыңыз бар екенін ұмытпаңыз! Әңгімені әрі қарай өрбітпес бұрын, отбасымызда болған тағы бір оқиғаны әңгімелеп берейін.

4-ші ТАРАУ

АЛЫП БАЛЫҚ

Дренда екеуіміз Құдай Патшалығы жайындағы білімімізді тереңдеткен сайын, өмірінің қандай боларын әр адам өзі шешетініне көзіміз жете берді. Құдай Патшалығы біздің өміріміздің әрбір саласына ықпал етті. Алайда, Құдай уәде еткен игіліктерге қол жеткізуіміз үшін басқа емес, өзіміз нық сенімге ие болуға тиіс едік. Сеніммен әрекет ету де – өз міндетіміз. Яғни, Құдайдың жарылқаулары өмірімізге өзінен өзі келген жоқ. Патшалық заңдарына бағынбайтын нәрсе жоқ. Біздің ұсақ-түйек деп елеусіз қалдырып жүрген нәрселеріміздің өзін де Патшалықтың заңдары арқылы қарастырғанымыз жөн. Қызымыздың ит асырап алуы соны көрсетті. Енді біз үшін қолымыз жетпейтін нәрсе қалмады. Көп жыл бойы сенуші болсам да, Құдайдың бізге Патшалықты – БҮКІЛ ПАТШАЛЫҚТЫ – рахаттанып өмір сүруіміз үшін бергенін білмеппін. Сондықтан Құдай патшалығының заңдары тіпті елеусіз, ұсақ-түйек істерде де жүзеге асатынын көру мен үшін ерекше қуанышты. Осы тұста алып балық жайында әңгіме айтып берейін.

Дренда екеуіміз бала-шағамызды алып, Аляскаға дем алуға бардық. Алясканы көру – көптен бергі арманым. Сол арманым орындалды. Анкоридж қаласына ұшақпен жеттік те, сол жерде жалға автофургон алдық. Үш аптаның ішінде Алясканың батыс

жағалауын түгел шарлап шықтық. Сол жолғы саяхатымыз тамаша болды! Бірде, Кенай түбегінің жағалауымен келе жатып, жағалауда тұрған балықшы кемелердің бірінің бортына ілінген ірі балықты көрдік. Кемежайда тұрған кемелердің бәрінде дерлік, борттың сырт жағына іліп қойған алып балықтар. Сырт пішіні камбалаға ұқсас. Ол кезде палтус деген балықты көрген емеспін, мына балықтардың үлкендігіне қайран қалдым. Кемежайға жақынырақ барып, бүйірінде ілулі тұрған балықтарға қызыға қарап жүрміз. Бұл кемелер палтус аулауға туристерді алады екен. Кенет жұбайым маған қарады да, «Палтус аулағым келеді. Мына бір кеме дұрыс сияқты» деді. Ол көрсеткен кемеңіздің бүйірінде балық бейнесіндегі мәсіхшілік таңбасы бар екен. «Палтус аулап алмақсың ба?» деппін қапелімде. Әйелім балық аулауға мүлде әуес емес еді. Дегенмен, Дренда қайтпады. Көлігімді балықшылардың кеңсесінің алдына тоқтаттым. Кеңсе қызметкері басқа клиентпен сөйлесіп отыр екен. Біз жан-жағымызға қарап, хабарландыруларды оқыдық. Мұнда жыл сайын «Палтус Дерби» деп аталатын, палтус аулаудан жарыс өтеді екен. Биылғы жарыстың соңғы күндеріне келіппіз. Бұл жарыс туралы білмейтін шығарсыз, сондықтан түсіндіріп кетейін. Кемелердің капитандары ең ірі балық аулаудан жарысады, жарыс бір айға созылады екен. Жеңімпаз ақшалай сыйлық алады және суреті жергілікті газетте басылады. Дренда екеуіміз ақыры балық аулайтын болған соң, жарысқа қатысайық деп бел бұдық. Жарысқа түсу үшін аздап ақша төлеуіміз керек. Міне, осы тұста кереметтер басталды.

Нәзік те сүйкімді әйелім Дренда маған бұрылып, жарыста жеңіп шықпақ екенін айтты. Кемеңіздің капитаны – мәсіхші, біздің жеңісіміз оның атын шығарады, кәсібі өркендейді, сөйтіп, Құдай мадақталады. Әйелімнің ойы осындай екен. Сонымен, жарысқа жазылар сәт келгенде, Дренда «Палтус Дерби» жарысында жеңіп шығатынын батыл жариялады. Бұл жеңіс арқылы Құдай мадақталатынын, мәсіхші капитанның компаниясы танымал

болатынын да айтты. Мына сөзді естігенде, капитанның санасына қандай ойлар келгенін елестету қиын емес. Әрине, жарысқа түскен әркімнің жеңіске жеткісі келеді. Капитан мұндай сөзді туристердің көбісінен естіген болса керек. Дегенмен, жеңетініне Дрендадай сенгендер көп болды дей алмаймыз.

Қалай болғанда да, капитан Дренданың айтқаны туралы да, жарыс туралы да көп сөз қозғаған жоқ. Теңізге шықтық та, балық аулауға кірістік. Капитанымыз кемеңіз қожайыны да өзі екен. Дренда ол кісіден жарыста жеңімпаз атану үшін алған балығының үлкендігі қандай болуы керектігін бірнеше рет сұрады. Капитан тек жаңа ғана алған балығымыздан ірілеу болу керек деумен шектелді. Дренда келесі балығын алып шыққанда, тағы сол сұрағын қояды. Жауап тағы сол. Дренда 20 килограмдық балық алғанда капитан бұл палтустың да кішкілеу екенін айтты. Дренда 30 килограмм тартатын балық аулады. Оның да үлкендігі жеткіліксіз болды. Палтус өте дәмді балық. Олжамызды үйімізге жеткізіміз келді. Әр турист екі балық әкете алады, сондықтан 30 килограммдық балықты өзіміз алатын болдық.

Кеш түсіп, ымырт жабылды. Өзімнің, ұлым Томның, қызым Поллидің екі балықтан олжамыз бар. Тағы екі баламыз Эми мен Тим конференцияға қатыспақ болып, үйге ертерек қайтып кеткен болатын. Дренданың 30 килограмдық балығы бар. Дегенмен, балықтарымыздың бірі де жеңіске жеткізе алар емес. Алайда Дренда алып балық аулап алатынына сенімді. Қас қарая берді, капитан жабдықты жинауға бұйрық берді. Кемежайға қайтуымыз керек. Капитан қармақтарымызды жинауға көмектесіп жүргенде, Дренда әлі де балық аулап жүрген болатын. Ол тағы бірнеше минут уақыт сұрады да, «Палтус Дерби» жарысын жеңіп шығатын балықты қолына түсіретінін қайта жариялады. Капитан бірнеше минут күтті де, Дренданың жанына барып, «Кешіріңіз, қайтуымыз керек» деді.

Капитан Дренданың қолындағы қармақты ұстай бергенде қармақтың сабы оқыс жұлқынып қалды. Қармақтың майысқаны мен қармақбаудың үзілердей керілгеніне қарап, бұл жолы зор балық қапқанын білдік. Капитан қармақтың сабын өзі тартып көрді. Жай ғана ірі балық емес, акула түскен болса керек деді. Балықтың қармақты тартысынан да көрініп тұр деді. Дренда бар күшін салып, балықпен біраз уақыт алысты. Ақыры жүз метрдей тереңдіктен олжасын алып шықты. Балық судың бетіне шыққанда алып палтус екені белгілі болды. Дренданың өзінен де үлкен.

Енді бірнеше адам жабылып, балықты кеменің бортына қарай тарттық. Мұншалық ірі балықты кемеге тірідей шығару қауіпті. Қатты шоршып, кемеге немесе кемедегі адамдарға зақым келтіруі мүмкін. Капитанның осындай жағдайға арналған электрошокері бар екен. Капитан электрошокерді палтустың басына жақындатты. Дәл сол сәтте балық оқыс жұлқынып қалды да, электр қуаты нысанаға тимеді.

Шокердің дыбысынан балық бұрынғысынан бетер шоршып түсті. Енді суға түсіп, көрінбей кетті. 100 метрлік қармақбаудың шарғысы шыр айналды. Балық су астында жанталасып шоршып жүр. Қармақтың бауы үзіліп кете ме деп те, балық қармақтан босап кете ме деп те уайымдадық. Дренда қармақты қолынан шығарып алмайын деп жанталасуда. Әйелімнің арқа тұсынан келіп, қармаққа мен де бар күшіммен жармастым, төрт қолдап ұстап, балықты жйлап шығара бастадық. Бұл жолы капитан шокерді сәтті қолданды. Балықты алып шықтық. Палтустың үлкендігіне бәріміз таң-тамашамыз.

Қаланың орталық алаңында үлкен таразы бар екен, олжамызды сонда апарып өлшеттік. Палтустың салмағы 55 килограмм болып шықты, денесінің ұзындығы Дренданың бойынан асады. Балықты таразыға тартқан кісінің айтуынша, жарыс өткізіле бастағалы көрген ең үлкен балығы екен. Дегенмен, «Палтус Дерби» әлі екі

апта бойы жүреді. Сондықтан, балығымыз осы жолғы жарыста ұтады ма, оны білмейміз. Жарыс аяқталғаннан кейін не болғанын өзіңіз де сезіп отырған боларсыз, поштамызға Дренданың атына жазылған чек пен әйелімнің суреті шыққан газет келді. Тамаша!

Құдай Патшалығының құдіретін тағы көрдік! Тағы да сол сұрақ: «Дренда алып балық ұстау үшін не істеді?» Әйелімді бар болғаны екі-ақ рет балық аулауға апарған едім. Балық аулау – Дренданың сүйікті ісі деп айта алмаймын. Дренданың қармағына балық қапқыш деп те айтудың реті жоқ. Жұбайым кемеге мініп, балық ауламақ болғанда, мұнысына қатты таңырқадым. Онысымен қоймай, Дренда жарыста жеңіп шықпақ болды! Жеңді де! Аляскада капитанмен қоштасқан күні, оған Құдай Патшалығы туралы және алып балыққа қалай қол жеткізгенімізді айтып беруіміз керек еді. Сол күні жарыстың жеңімпазы белгілі болмаса да, балығымыздың үлкендігі көзге түсіп тұр еді. Әрине, біздің балығымыз ең ірі балық болып шықты!

Осымен балықтың әңгімесі бітті деп ойлап отырған шығарсыз? Дәлірек айтқанда, Дренданың балық аулауы жөніндегі әңгіме. Егер Дренданың жай ғана жолы болды деп ойласаңыз, әрі қарай не болғанын айтып берейін. Араға бес жыл салып, Аляскаға тағы сапар шектік. Бұл жолы бағушы қызметін атқарып жүрген бір жақсы досымызды ала кеттік. Аляскаға жеттік те, өткен жолғыдай автофургон жалдадық. Ақсерке аулау маусымының қызып тұрған шағы болатын. Жағалауға барып, балық аулауға кірістік. Жолай досымызға бес жыл бұрынғы палтус аулағанымызды, Дренданың жарыстың жеңімпазы атанғанын айтып бердік. Досым бұрынсоңды палтус аулап көрмепті. «Реті келіп тұр!» дедік біз. Бес жыл бұрын барған жерімізге бармақ болдық. Баяғы кемежайға барамыз да, өзімізге таныс капитан сол кәсібімен әлі айналысып жүрген болса, кемесіне мініп, палтус аулаймыз.

Капитанымызды да, кемесін де бұрынғы орнынан таппадық.

Басқа кеме жалдамастан бұрын, танысымызды іздестіріп көрмек болдық. Кемеңіз атын есімізге түсіре алмадық, сол себепті капитанның аты-жөнін интернеттен іздестіріп едік, бес жыл бұрынғы мақалаға тап болдық. Дренданың олжасымен бірге түскен суреті де, капитанның аты-жөні де, кемеңіз атауы да бар екен. Кеме мен компанияның аты табылған соң, телефон номері де табыла кетті. Хабарластық. Компания әлі бар екен, тек жеті шақырымдай жерге ауысып кетіпті.

Капитанның жұбайы үстел басында отыр екен. Кеңсеге кіргенімізде, «Палтус аулаудағы жеңімпаз!» деп дауыстады. Қуана көрістік, өткенді еске алып, біраз шүйіркелесіп қалдық. Бес жылда болған жаңалықтарды да сөз қылдық. Көптеген елдердің экономикасы дағдарыста еді. Кәсіпкерлердің жағдайы мәз емес-ті. Адамдар бұрынғыдай саяхаттап, балық ауламайды. Күйеуінің көңіл-күйі болмай жүр екен. Біз Құдай Патшалығы жайлы айтып едік, күйеуінің Құдайға деген ықыласы суып кеткенін айтты.

Кемеге міндік. Капитан да бізді ұмытпапты. Балық аулау қалай жүріп жатқанын сұрап едік, қазіргі балықтың Дренданың олжасынан әлдеқайда ұсақ екенін айтты. Теңіздің бұл тұсы саяз, ірі балық жоқ. Бұрынғы орнында акула көп болғандықтан, осы жерге ауысуға мәжбүр болыпты. Акулалар қармаққа ілген жемді балықтан бұрын жеп қояды. Соның салдарынан, бір жағынан, жемге шығатын шығын көбейсе, екінші жағынан, балық аулауға уақыт шектеледі.

Жаңа орнында қандай балық аулап жүргенін сұрадық. Алып жүрген балықтарының салмағы 10-15 килограмнан аспайды екен. Сонда Дренда капитанға қарап «Бүгін мен өте ірі, осы маусымдағы ең ірі балықты аулап аламын. Құдайдың уәдесіне берік екеніне көзіңіз жететін болады» деді. Капитан бұл сөзге күлді де қойды. Күні бойы қармағымызға, капитан айтқандай, 10 килограмдық ақсеркелер түсумен болды. Капитанымыз Дренданың алып

балығын айтып, қағытумен болды. Оқиға өткен жолғыдай өрбитін түрі бар.

Кеш түскенде, капитан жабдықтарымызды жинауға белгі берді. Дренда да ірі балық түсіріп алуы үшін бірер минут керек екенін айтып, сол жолғыдай капитанға бағына қоймады. Капитан аз күтті де, қармақты Дренданың қолынан алмақшы болды. Дәл сол сәтте қармақсаптың басы майысып кетті. Қысқасын айтсам, Дренданың қармағына 35 килограмдық ақсерке түсті. Капитан таң-тамаша қалды.

Кешкісін ресторанда басқа капитанмен дастархандас болдық. Дренданың 35 килограмдық балық алғанын естігенде, сенер-сенбесін білмеді. «Балықты қай жерде ауладыңыз? Қай тереңдікте?» Капитан сондай ірі балықтың қай жерде түсетінін білгісі келді. Кешкі асымызды ішіп болдық та, кеңсеге бардық. Олжамызды үйге жеткізуге қажет құжаттарды толтырмақ едік.

Ісімізді тәмамдап, капитанымызбен қоштасатын болдық. Бірақ алдымен, Құдай патшалығы туралы айту мүмкіндігін пайдаланып қалғым келді. Капитанға қарадым да, «Дренданың қармағына әлгі балықтардың қалай ұсталғанын білгеніңіз жөн болар еді. Патшалықтың заңдары қаржы мәселелерінде де дәл солай жүзеге асады» дедім. Осы жолы сөзіме құлақ асты. Капитанға «Қаржы мәселеснің шешілуі» атты кітабымды сыйладым. Сонымен қош айтыстық.

Әлгі екі балықтың қармаққа ілінуі – кездейсоқтық па? Әлде Құдай Патшалығының ықпалы ма? Қалай десеңіз де, өз еркіңіз. Дренда екеуімізге бұл сұрақтың жауабы баяғыдан-ақ мәлім. Балық аулаудағы осы екі оқиға ғана емес, көптеген қарыздан құтылуымыз да, шипа алуымыз да – осының барлығы, яғни, Құдай Патшалығының тікелей ықпалын өз өмірімізден көруіміз қашан да, ғажап, қашан да жан тебірентер қуанышты болды. Басқа сенушілер де Патшалықтың әсерін көрді. Дренданың куәлігін

оқыған бір әйел бізге мынадай хат жолдады.

Сәлеметсіздер ме, Гэри мен Дренда!

Дренданың алып балық аулап алғаны жөніндегі әңгімені кітабыңыздан оқыдым. Мен де сіздермен өз куәлігімді бөліскенді жөн көрдім. Флорида штатындағы Канаверал мүйісінде Коко-бич деген жер бар. Жақында сол жерге дем алуға бардық. Күйеуім терең судан балық ауламақ болды. Қайтарда олжамызды үйімізге, Колорадоға ала кетеміз деген ойымыз бар еді. Бұл демалысты бірнеше ай бұрын жоспарлап, алдын-ала дайындалған болатынбыз. Роберт балық аулауға барғысы келетінін айтқанда, бұл ойын қуана қолдадым. «Барайық! Құдайдың бізге мол олжа беретініне сенейік!» дедім. Роберттен Флориданың суында, әсіресе, біз баратын жерде қандай балықтар кездесетінін сұрадым. Ол бірнеше балықты айтты. Мен аталған балықтардың ішінен алып қызыл луциан деген балықты алатынымызға сенемін деп шештім. Сол үшін мінәжат ететін болдым.

Межелі күн де жетті. Кеменің бортында капитанның нұсқауларын тыңдап тұрмыз. Мен алып қызыл луцианды алатыныма нық сенімдімін, сенімімді жарияладым. Капитанның сөзін тыңдап тұрып, сол сәтті асыға күтудемін. Кенет капитан аулауға тыйым салынған бірнеше балықты атады. Бұл балықтарды, қармаққа түссе де, бортқа шығаруға, олжа етіп алып қалуға болмайды. Аталған балықтар: алабұға, камбала, қызыл луциан! «Амал жоқ, – дедім ішімнен, – басқа балық жайлы сенейін». Роберт айтқан балықтарды есіме түсіре бастадым.

Сенімімді сынаудың мүмкіндігін қалт жібергім келмеді. «Құдайым, алып қызыл луциан аламын деп сенген едім. Солай болсын. Ал үйіме кетерде басқа балық алып кетермін!» дедім.

8 жасар қызым Рэйчелге бұрылдым да, «Құдайға сиынып, бүгін жақсы олжа алып қайтатыныңа сене алатының есінде ме? Сенесің бе?» дедім. Қызым күлімсіреп, басын изеді. 21 жасар үлкен қызым Джорданға да осыны айттым. Ол маған таңырқап қарады, бірақ ол да келісті. Робертке бұрылып, «Олжалы қайтатынымызға сенейік!» дедім.

Арада бірнеше сағат өтті. Қармақтарымыздың бауы селт еткен де жоқ. Кенет Рэйчелдың қармағы оқыс майысып кетті. Қызым әкесін қуана шақырды. Бірнеше минуттан кейін екеулеп жүріп, түскен балықты кемеге шығарды. Атлантикалық акула екен! Керемет! Рэйчелдың тілегі қабыл болды! Бәріміз мәз-мейрам болдық. Олжа деп осыны айт!

Қармағыма бүгін балық түспес деп ойлай бастағаным есімде. Алайда бұл ойымды тыйып тастадым да, балықты мінәжат еткен сәтте-ақ сеніммен қабылдадым деп жариялай бастадым. Көңілім орнына түсті, орындыққа отырып, тынықпақ болдым. Осы сәтте жүрегіме Құдайдың “Тынышталып, дамыл тапсаң, сұраған балығыңды алдың алып келер едім” деген сөзі келді. Балықшы емеспін, балық аулаудың қыр-сырын білмеймін. Сондықтан, Құдайға сенім артқаннан басқа амалым да жоқ. Сол себепті, қармағымды суға салдым да, сабыр сақтап тыныш қана отырдым. Жиырма-отыз минут өткенде, қармағымның бауы әлденеге ілініп қалғандай болды. Балық түсіпті.

Роберт пен капитан не істеуім керектігін айтып, бағыттап тұрды. Капитан қармағымның бауының керілгеніне қарап, өте ірі балық түскенін айтты. Алып қызыл луциан болса керек деді. Балықты көрмей-ақ қай балық екенін болжағанына таң қалдым! Қармақбауды тарта бердім. Міне 10 килограмдық алып қызыл луциан көрінді! Құдайға алғысымды жаудыра бердім! Сол күні сенімім жаңа деңгейге шыққанын білемін.

Дренданыкіндей нық сенімге ие болғым келген еді.
Мақсатыма жеттім!

Қызметтеріңіз үшін, “Сенімге негізделген аңшылық” атты кітабыңыз бен басқа да кітаптарыңыз үшін көп рахмет. Сіздердің қызметтеріңіздің арқасында көптеген жаңа жарылқауларға қол жеткіздім. Сол үшін Құдайға деген алғысым шексіз. Болашағым жарқын екеніне сенімдімін. Сол жолғы оқиға жақындарымның да сенімін нығайтты!

Құрметпен,

С.Т.

5 –ші ТАРАУ

БҰЛ КІМНІҢ ТАҢДАУЫ?

Жоғарыда айтылған әңгімелерден көргеніміздей, Құдай Патшалығы отбасымызға қажет болған көлік пен үйдің құнын төлеуге қажет қаражат, тіпті ит пен балықты да берді, ипотекалық несиенің өтелуі, үш баланың өмірін алып қалу тәрізді кереметтерді де жер бетіне алып келді. Осы айтылғандардың барлығын жасаған – Құдай Патшалығы, дәлірек айтсақ, біздің Құдайымыздың Патшалығы! Құдаймыздың патшалығы ұлы, билігі шексіз, сондықтан, мұндай ғажаптардың болуы – заңды нәрсе.

Петір елші былай деп жазған болатын:

Иеміз Иса Мәсіхтің Әкесі — Құдай мадақталсын! Ол бізге зор мейірім көрсетіп, рухани қайта туғызып жаңа өмір сыйлады және Иса Мәсіхті өлімнен қайта тірілтуімен бізді тірі үмітке кенелтті.

– Петірдің 1-ші хаты 1:3

Жоғарыда айтылған жағдайларды қарастырып отырып, бір сұрақ қойғым келеді. «Кереметтердің болу-болмауы кімнің таңдауымен байланысты еді?» Сауалымды нақтылайын: «Не себепті Құдай Кирстенге ит немесе Дрендаға балық беруді жөн көрді? Құдайдың тікелей араласып, нақты сол жағдайда шешім

қабылдады ма? Әлде басқа бір себептер болды ма?» Бұл сұрақтың жауабы көптеген сенушілердің санасына сыймауы мүмкін, білем. Өзімді де қатты таңыртқан болатын.

Сонымен, Лұқа жазған Ізгі хабардың 8-ші тарауындағы әңгімені оқып шығайық.

Ол кісінің он екі жас шамасындағы жалғыз қызы бар еді, сол өлім аузында жатқан болатын. Иса Жайырдың үйіне бара жатқанда, халық Оны жан-жақтан қаумалап қыспақтады. Халықтың арасында он екі жыл бойы қан кетіп ауырып келген бір әйел де бар еді. Ол бар мал-мүлкін дәрігерлерге жұмсағанмен, біреуі де оны емдеп жаза алмады. Әйел Исаның арт жағынан жақындап келіп, Оның шапанының шетіне қолын тигізді. Сол сәтте-ақ қаны тоқтады. Иса:

— Маған қолын тигізген кім? — деп сұрады. Ешкім де мойындамаған соң, Петір мен оның қасындағылар:

— Ұстаз! Халық Сізді қаумалап қыспақтап тұр ғой. Ал Сіз: «Маған қолын тигізген кім?» дейсіз бе?! — деді. Бірақ Иса:

— Біреу Маған қолын тигізді! Өйткені Менен біраз сауықтыру құдіретінің шыққанын сездім, — деп кесіп айтты. Әлгі әйел істеген ісін жасыра алмайтынын білген соң қорыққанынан қалтырап, Исаның қасына келіп, аяғына жығылды. Сосын өзінің қандай себеппен қолын тигізгенін және сол сәтте-ақ қалай сауығып кеткенін бүкіл халықтың алдында айтып берді. Иса оған:

— Қарындас, сенімің арқылы құтқарылдың. Аман-есен қайта бер, — деді.

— Лұқа 8:42-48

Исаны жан-жағынан халық қаумалап тұрған. Ине шаншыр жер жоқ. Иін тірескен халық. Исаның «Маған қолын тигізген кім?» деген сұрағы Петірге орынсыз көрінді. Рухани зерттеуші ретінде менің не себепті жалғыз ғана әлгі әйел шипа алғанын білгім келеді. Дәлірек айтқанда, білуім керек. Исадағы майлану неліктен қалың бұқараның арасында тек сол әйелге ғана әсер етті? Жауапты бірге іздеп, бірге табамыз. Дегенмен, әуелі тағы бір сұрақ қояйын. Иса нақты сол әйелге қызмет етті ме? Оған қолын тигізіп, мінәжат етті ме? Жоқ. Иса, тіпті, бұл әйелдің келгенін де білген жоқ. Оны көрген де жоқ. Сондықтан, сауықтыру құдіретін өзіне тартып алған адамның кім екенін сұрауға мәжбүр болды. Сонымен, әйелдің шипа алуы – кімнің шешіміне байланысты еді?

Сол күні әйелді сауықтыру – Құдайдың шешімі ме еді? Әлде, шипа алу – әйелдің өз байламы ма? Бұл – өте маңызды сұрақ, өйткені, сенушілердің көбісі шешімді де, әрекетті де Құдайдан күтеді. Менің ойым былай: әйелді сауықтыру – Құдайдың шешімі емес, шипа алу – әйелдің өз байламы болатын. Оған дәлел – Исаның шипа алған адамның кім екенін білмеуі.

Сонымен, Киелі Кітаптың осы тұсында өте маңызды рухани ақиқат ашылады. Бір адамды сауықтырып, енді біреуді сауықтырмай жүрген – Құдай емес. Шипа алып, дерттен сауығып кетуге бәріміздің заңды құқымыз бар. Өйткені барлығымыз – Құдай Патшалығының азаматымыз. Сондықтан, таңдау – өзімізде деп анық айта аламын. Ал енді, сауықтыру құдіретінің әсеріне сол әйелдің қол жеткізуінің сыры неде? Шипа аламын деген шешімге қалай келді? Патшалықтың құдіреті мен билігін қолдана алуының құпиясын Исаның Өзі ашып берді. «Қарындас, сенімің арқылы құтқарылдың. Аман-есен қайта бер» деді Иеміз. Міне, бізге керек рухани ақиқат осы сөйлемде. Неліктен сол күні қалың топтың ішінен бір ғана осы әйел сауығып кетті деген сұрақтың жауабы осы. Нағыз рухани зерттеушілердей осы әңгімені мұқият қарастырып, кейіпкеріміздің ғажап нәтижеге қалайша қол жеткізгенін түсінейік.

Біріншіден, Иса оны “қарындас” дейді. Яғни, ол – жат елдік емес, Израил халқының қызы. Демек, Құдайдың Израил халқымен жасасқан келісімшартына ортақ. Израилдік ретінде оның да Құдайдан сұрағанын алуға деген заңды құқы бар. Дегенмен, мұның бәрі жеткіліксіз. Өйткені, мұндай құқық сол күні Исаны жан-жағынан қаумалағандардың барлығында да бар еді.

Исаның бойындағы Құдайдың сауықтыру құдіреті әсер ету үшін тағы да бір себептер керек. Сол себепті Исаның сөзінен табамыз. Шындап келгенде, басқа адам емес, дәл сол әйелдің сауығуының негізгі себебі де сол еді. “Сенімің арқылы құтқарылдың” деді Иса.

Сонымен, науқас әйелдің шипа алуының сырын білдік. Біріншіден, Ыбырайымның ұрпағы ретінде Құдайдың алдына келіп, сұрағанын алуға деген құқы бар. Екіншіден, әйелдің сенімі Құдайдың құдіретін іске қосатын “тетік” болды. Ыбырайымның Құдаймен арадағы келісімшарты ұрпақтарының барлығына ортақ. Бұл жайт үйге сымдармен келіп тұрған электр қуаты іспетті. Алайда, шамның жануы үшін тетікті өзіңіз басуыңыз керек. Яғни, бізге керегі – сол тетікті табу немесе ненің тетік болып табылатынын білу. Иса шамды жағатын тетіктің сенім екенін айтты. Олай болса, сенім дегеніміз не және оны іске қосудың жолы қандай? Бұл сұрақтың жауабын табу – біз үшін ең маңызды мәселелердің бірі.

Сенім деген не?

“Сенім” деген сөзді мәсіхшілер оңды-солды қолдана береді. Сенімнің шын мәнінде не екенін, оның қайдан келетінін сенушілердің біразы, тіпті, көбісі білмейді. Сенім – науқас әйелдің сауығуына себеп болған тетік болса, сенім мәселесін өте мұқият зерттеуге тиіспіз! “Сенім” сөзінің анықтамасын Римдіктерге арналған хаттың 4-ші тарауының 18-21-ші аяттарынан табуға болады. “Жоқ, Гэри. Еврейлерге арналған хат 11:1, міне, сенім

туралы аяттар – осы” деп ойлап отырған боларсыз.

Ал сенім дегеніміз — үміттенгеннің жүзеге асатынына күмәнданбау, әлі де көрінбей тұрған уәденің орындалуына шүбәсіз илану.

– Еврейлерге 11:1

Иә, бұл – сұрағымыздың әдеттегі жауабы. Дегенмен, оқыған аяттарымыздың мағынасына терең үңілсек, байқайтынымыз, мұнда сенімнің не екені емес, артықшылықтары жайлы айтылған. Римдіктерге арналған хат сенімнің не екенін нақтылауға көмектеседі.

Үміттенетінеш шара қалмаған кездің өзінде Ыбырайым үмітін үзбей, сенімінде берік тұра берді. Сондықтан да ол «Сенің үрім-бұтағың да осындай сансыз көп болады!» деген уәде бойынша көптеген халықтардың рухани түп атасы болды. Жасы жүзге келіп қалған Ыбырайым өз денесінде ешқандай күш қалмағанын, әйелі Сараның да құрсағына бала бітпейтінін жақсы білгенімен, уайымдап сенімін әлсіретпеді. Қайта, Ыбырайым Құдайдың уәдесіне күмәнданбай, Оған деген сенімінен қуат алды. Осылай ол Тәңірдің өз уәдесін орындай алатынына қалтқысыз сеніп, Оған құрмет көрсетті.

– Римдіктерге 4:18-21

Оқиғаны еске түсірейік. Ыбырайым мен Сарада бала жоқ. Және мәселе тек Сараның бала көтере алмауында емес. Мәселе – олардың жасында. Екеуі де жүз жасты алқымдаған қария. Денелері кәріліктен тозған. Балалы болу қайда! Табиғи тұрғыдан мүмкін болмаса да, Құдай Ыбырайымға мұрагер беретінін уәде еткен болатын. Киелі Кітапта Ыбырайым Құдайдың Өз уәдесін, қалай болғанда да, орындай алатынына сенімді еді. Сонымен,

«сенім» ұғымына беретін анықтамамыз мынау: «Құдайдың Өз уәдесін орындай алатынына шүбәсіз сенушілік». Мен сенімді былай деп тұжырымдаймын: «Аспан Патшалығымен толықтай келісу. Сананың ғана емес, жүректің де келісуі. Сырт жағдай толығымен қарсы болса да, Құдайдың айтқанына нық сену мен жүректегі тыныштық».

Сенімге берген анықтамамыз:

Аспан Патшалығымен толықтай келісу. Сананың ғана емес, жүректің де келісуі. Сырт жағдай толығымен қарсы болса да, Құдайдың айтқанына нық сену мен жүректегі тыныштық.

Сенім неліктен қажет?

Құдай ауруханада жатқан кез келген науқасты Өзі қалаған сәтте сауықтырып жібере алады ма? Құдай соғыс атаулыны тоқтата алады ма? Құдай неліктен періштелерін жіберіп, барлық адамға Ізгі хабарды жеткізбейді? Осы тәрізді сұрақтарды барлығыңыз естіген боларсыздар. Жоқ, Құдай олай ете алмайды. Құдайдың құдіреті, әлбетте, жеткілікті. Алайда, бұлай істесе, Өз заңын Өзі бұзған болар еді. “Гэри, сонда Құдай Өз қалағанын істей алмайды демексің бе?” Менің жауабым тым оғаш естілмеуі үшін, әуелі Киелі Кітапқа үңілейік.

Қайта, Киелі жазбалардың бір жерінде осы туралы

біреу мынаны байыппен айтқан ғой:

«Өзің ескеретіндей адам сонша кім?

Сен қамқорлайтындай адам баласы кім?

Оны періштелерден сәл төмен қойдың,

Құрмет, салтанатты оған тәждей сыйладың,

Бәрін де оған бағындырып бердің».

Құдай адам баласына бәрін де бағындырып берген

кезде оған бағындырмаған еш нәрсені қалдырған жоқ.

Алайда біз бәрінің де адам баласына бағынғандығын қазір көре алмаймыз.

– Еврейлерге 2:6-8

Осы аяттардан көріп тұрғанымыздай, Құдай адамды жаратқанда, оған жер бетіндегі биліктің барлығын тапсырған болатын. Адамның заңды билігінен тыс қалған нәрсе жоқ. Адам жердің жалғыз заңды билеушісі еді. Адамның өкілеттілігі Құдайдан еді, яғни Адам атаны жердің билеушісі етіп тағайындаған – Жаратушы Құдайдың Өзі. Демек, ол Құдай Патшалығының жердегі өкілі. Адам ата Құдайдың салтанатты ұлылығы мен құдіретіне бөленіп, билігін жүзеге асыруы керек еді.

Жерде билік құрған патшалардың бірін еске алайық. Ол – бәріміз тәрізді жұмыр басты пенде. Алайда, патшалық мәртебесі – бұл адамның жай адам емес, бүкіл патшалығы мен өкіметінің өкілеттілігін арқалаған тұлға екенінің белгісі. Патшаның әмірі жүруінің бірден-бір себебі – артында патшалығы мен өкіметінің бүкіл күші мен әлеуеті тұр.

Артында тіркемесі бар алып жүк машинасын жалғыз-ақ «Заңның атынан бұйырамын, тоқта» деген бұйрығымен тоқтататын жол полициясы қызметкерін көз алдыңызға елестетіңізші. Жүк көлігі адамнан әлдеқайда үлкен, дегенмен, полиция қызметінің бұйрығына бағынып, тоқтайды. Ол форма киген адамның өзіне емес, кеудесіне таққан, өкіметтің өкілі екенін көрсететін белгісіне бағынады. Өйткені, өкімет белгі таққан адамнан әлдеқайда зор. Жүк көлігінің жүргізушісі полицияда қызмет ететін адамның өзіне бағынбаса да, оның артында тұрған өкіметке бағынуға мәжбүр. Біздің қарастырып отырған мысалымызда да солай. Адам ата жер бетіндегі жаратылыстың үстінен қарайтын билеуші болып тағайындалған. Адам ата Құдай Патшалығының атынан билік етті. Құдайдың құдіреті адамның аузынан шыққан сөз арқылы жүзеге асады.

Адам ата Құдайдың бұйрығын орындамай, күнә жасағанда,

жерге билік жүргізу мәртебесінен де айырылды. Әлемге күнә енді. Күнәнің әсерінен бүкіл жаратылыс өзгеріске ұшырады. Енді жердің бетін өлім жайлады. Шайтан адамның өміріне араласуға заңды құқық алды, адамның билігіне таласатын болды. Айтып кететін өте маңызды нәрсе, адам әлі де жердің заңды билеушісі, өйткені, Құдайдың Өзі солай шешкен. Дегенмен, адам рухани билігін әуелдегідей жүзеге асыра алмайды. Алайда, күнәға батса да, адамның билігі әлі де үстем. Құдайдың салтанатты ұлылығына бөленіп, Құдай Патшалығының өкілеттілігімен билік жүргізе алмайтыны рас, дегенмен, рухани әлем жер бетіне тек адам арқылы ғана ықпал ете алады. Сондықтан да Құдай адамдардың өмірінде Өз еркін жүзеге асыру үшін Киелі Рухтың жетелеуімен әрекет ететін мәсіхшілерді қолданады. Дәл солай, шайтан да жындарға бағынышты адамдарды қолданып, жер бетіне өз жоспарына сай ықпалын таратуға тырысады. Құдай Патшалығының заңдарын түсіну үшін осыны білу өте маңызды. Рухани әлемдегі белгілі бір оқиғалар не себепті орын алғаны, енді бір оқиғалардың неліктен жүзеге аспай қалғаны сияқты көптеген сұрақтарға дұрыс жауап алу үшін де жоғарыдағы ақиқатты ұғынғанымыз жөн.

«Жер жүзі мен ондағының бәрі Жаратқандікі емес пе?» дерсіз. Оныңыз рас. Ойымды түсіндіру үшін мынадай бір мысал келтірейін. Мен үйімді жалға бердім дейік. Үйдің егесі болып қала беремін. Алайда, үйіме қалаған уақытымда кіріп, жайғасуға деген құқымнан бас тарттым. Жалға беру келісімшартында меншік иесі жалға берілген меншігіне қай жағдайда кіре алатыны нақтылап айтылады. Ондай жағдайлар – төтенше оқиғалар немесе жөндеу жұмыстары. Соның өзінде үй иесі тұрғындарды алдын ала ескертуге міндетті. Осы шартты бұзып, яғни, жалға алушыға ескертпей, үйіме кірсем, бұл заң бұзушылық болып табылар еді. Үй – өзімдікі, бірақ заң солай дейді. Келісімшарт ережелерін бұзсам, полиция шақыртып, мені үйден мәжбүрлеп шығаруға

болады. Үй – өз меншігімде екені рас. Заңның солай дейтіні де рас. Сол себепті, жер бетіне өз ықпалын тарату үшін, шайтан адам арқылы әрекет етуі керек. Жердің кілті Адам атаның қолында еді! Шайтан сол кілтті қолына түсірді. Жер бетіне басқа жолмен келсе, Құдай шайтанды сөзсіз қуып шығар еді.

Бұдан кейін әзәзіл шайтан Оны ертіп алып биік бір жерге шығарып, әп-сәтте әлемнің барлық мемлекеттерін көрсетіп:

— Осы мемлекеттердің бүкіл билігін, олардың сән-салтанатын Саған беремін. Бұл билік маған тапсырылған, оны көңілім қалағанға сыйлаймын. Сонымен маған ғибадат етсең бәрі де Сенікі болады, — деді.

— Лука 4:5-7

Осы аяттан көріп тұрғанымыздай, шайтан бүкіл елдің билігін, байлығын, сән-салтанатын өз меншігім деп санайды. «Бұл билік маған тапсырылған» дейді. Билікті шайтанға берген кім? Әрине, биліктің иесі, Адам ата! Сонымен, Құдай адамның өміріне тек заңды жолмен ғана араласа алады. Олай болмаса, шайтан Құдайдың ісін заңсыз деп, Иемізге кінә тағар еді. Жоқ, Құдай жер бетіне Өз билігі мен үстемдігін қайтару үшін адам арқылы әрекет етуі тиіс. Ал осыған келісетін адам бар ма еді?

Жаратқан Ие Ыбырамға сөзін арнап былай деп бұйырған еді:

*«Сен еліңді, туған-туысқандарыңды
Және әкеңнің үйін тастап,
Мен өзіңе көрсететін елге көш!
Мен сенен үлкен халықты өрбітіп таратамын,
Сені жарылқаймын әрі атыңды шығарамын.
Сен арқылы ақ батам басқаларға да жететін болады.*

— Жаратылыс 12:1-3

Ыбырайым – Мәсіхке сенушілердің түп атасы. Олай аталуының себебі, ол – Құдайға жер бетіне жол ашып, осындағы өмірге араласуына мүмкіндік берген адам. Соның арқасында жер барлық халықтарға Құдайдың ақ батасы жетті. Мұнда айтылған Құдайдың ақ батасы – әлбетте, Иса Мәсіх. Иса Құдайдың жер бетіндегі өмірге тікелей араласуына заңды жол ашты. Ыбырайымның сенімі Аспан мен жердің арасындағы есікті ашты. Ал Құдай Ыбырайым мен оның ұрпақтарымен заңды келісімшарт жасасып, сол есікті мәңгі ашық қалдырды.

Осы ойымды басқа сөзбен жеткізіп көрейін. Құдай Патшалығы жердегі істерге тек адам арқылы ғана араласа алады. Өйткені, Құдайдың Өзі адамды жердің заңды билеушісі етіп тағайындаған болатын. Және бір шарт, сол адамның жүрегінде Құдайдың Сөзіне деген мызғымас сенім болса ғана, заң жүзеге асады.

Құдайдың билігі мен үстемдігін толығымен және ерікті түрде мойындайтын адам ғана Құдай Патшалығының ықпалын жерге әкеле алады. Жердегі өмірге араласу мүмкіндігіне ие болу үшін шайтан да осы заңдылықты пайдаланған болатын. Ол Адам атаны Құдайға сенуден бас тартуға арандатты да, сол арқылы Адамды Құдайдың Сөзімен толық келіскен қалпынан айнытты. Нәтижесінде Адам шайтанның сөзіне еріп, Құдайдың билігінен шығып кетті.

Кейін Ыбырайым Құдайға сенді, Құдай Ыбырайымды сеніміне бола ақтады. Яғни, Ыбырайым Құдайдың жердегі өкіліне айналды. Құдай мен Ыбырайымның арасындағы келісімшарт Аспан Патшалығының жердегі өмірге араласуына мүмкіндік берді. Алайда, бұл келісімге тек Ыбырайымның ұрпақтары ғана кіретін еді. Келісімнің белгісі – сүндет Ыбырайымның еркек жынысты барлық ұрпағына ортақ.

Алайда, келісімге кіретін адам да заң талабын орындауға, яғни, Құдайдың Сөзіне күмәнсіз сенуге тиіс еді. Сонда ғана ол келісімде уәде етілген игіліктерге қол жеткізе алады. Сайып келгенде,

келісім үйге келіп тұрған электр сымдары тәрізді. Дегенмен, сенім тетігін басып, Құдайдың Сөзіне негізделіп әрекет ету керек.

Сонымен, сенімнің не екенін, не үшін керек екенін білдік. Енді сенімді қайдан алатынымызды, өзіміздің сенімде екенімізге қалай көз жеткізе алатынымызды да білуге тиіспіз.

Сенімге қалай қол жеткіземіз?

Құдайдан сенім сұрап дұға ете алмаймыз. Бұл сөзіме таңырқап қалған боларсыз?

Сонымен, сенім хабарды естуден келеді, ал естудің өзі Мәсіхтің сөзін жариялаудан болады.

– Римдіктерге 10:17

Сенім Құдайдың Сөзін естуден келеді екен. Бұл қалай? Құдайдың Сөзін есту жеткілікті ме? Құдайдың сөзін ести берген адамның жүрегінде сенім өзінен өзі пайда болады ма? Сенімнің қалай келетінін және Римдіктерге арналған хаттың осы аяттарын дұрыс түсінуіміз үшін Марқа жазған Ізгі хабардың 4-ші тарауын ашып оқиық. Бұл тараудың маңыздылығы сондай, өзіңіз оқып жүрген Киелі Кітап қолыңыздан түсіп кетсе, жерге түскенде, Марқа жазған Ізгі хабардың 4-ші тарауы ашылуы тиіс! Марқа жазған Ізгі хабардың 4-ші тарауы, 13-ші аятында Иса “Бұл әңгімені түсінбей тұрсыңдар ма? Онда басқа да астарлы әңгімелердің бәрін қалай ұқпақсыңдар?» дейді. Яғни, осындағы ақиқатты түсінбесек, Исаның басқа сөздерін де түсіне алмаймыз.

Киелі Кітаптағы осы тараудың маңыздылығы неде? Мұнда Аспан Патшалығының жер бетіне ықпал етуі туралы және сол ықпалдың қай уақытта заңды түрде жүзеге аса алатыны жайлы айтылған. Осы тарауда ашылған ақиқатты ұғынудан маңызды нәрсе жоқ. «Құдай Патшалығының заңдары қалай жүзеге асады?»

деп сұрайтын болсаңыз, Марқа жазған Ізгі хабардың 4-ші тарауын оқып шығыңыз! Иса адамның жүрегінде сенімнің қалай пайда болатынын түсіндіретін үш астарлы әңгіме айтады. Ал Құдай Патшалығының жердегі өмірге араласуына заңды негіз – адамның жүрегіндегі сенім – керек.

Осы тараудағы Иса айтқан астарлы әңгімелер – егін еккен адам жайлы екі әңгіме мен қыша дәні жайлы мысал. Тұқым сепкен адам жайлы әңгімеден бастайық.

Иса тағы да былай деді: «Құдайдың Патшалығы мынаған ұқсас: біреу егіндікке тұқым сеуіпті. Ол ұйықтап жатсын, не жүріп-тұрсын, бәрібір, тұқым күні-түні көктеп, өсе береді. Әлгі адам оның қалай өсіп жатқанын түсінбейді. Жер өздігінен алдымен көк өскінді, содан кейін масағын шығарып, соңынан масақтағы дәндерді өсіріп толыстырады. Егін піскенде оратын мезгілі жетіп, диқан оған дереу орақ салады

– Марқа 4:26-29

Ең әуелі, осы әңгімедегі тұқым мен жердің не екенін анықтап алайық. Мұны Иса сол тарауда, диқан туралы бірінші әңгімесінде түсіндіреді. Тұқым дегеніміз – Құдайдың Сөзі, ал жер немесе топырақ – адамның жүрегі, басқаша айтқанда, рухы. Сонымен, адам Құдайдың Сөзін өз жүрегіне егеді деп қорыта аламыз. Содан кейін адамның жүрегі сенімді өздігінен өсіре береді. Ал сенім дегеніміз – жер бетін мекендейтін адамның Аспан Патшалығымен толық келісуі.

Осы тұжырымды ойыңызға түйіп қойыңыз. Жоғарыдағы аятта айтылғандай, адам мұның қалай жүзеге асатынын білмесе де, жүрекке түскен Құдайдың Сөзі өзінен өзі сенімге айналады. Адам ұйықтап жатса да, ояу жүрсе де, өсу тоқтамайды. Құдайдың Сөзін жүрегіне сақтаған адам бірте-бірте Аспанның айтқанымен

келісімге келісе береді, нәтижесінде сенім пайда болады. Марқа жазған Ізгі хабардағы астарлы әңгімеде жүректің Аспанмен келісуі бір сәтте емес, бірте-бірте жүзеге асады. Алдымен жүрек Құдайдың Сөзін қабылдайды. Иса мұны көк өскінге балайды. Өскін масаққа айналады. Масақтың басында дән пайда болады. Дегенмен, масақтың толысуы, дәннің пісуі аяқталған жоқ. Яғни, Аспанмен толық келісу жоқ, демек, көзге көрінетін өзгерістер де жоқ. Дегенмен, егіннің толысу үрдісі жалғаса береді. Ақырында дән толысып, егін әбден піседі. Осы тұста сенім кемеліне келіп, адам жүрегіне егілген тұқымның жемісіне – көзге көрінетін өзгерістерге қол жеткізеді.

Ал енді өте мұқият болыңыз. Құдайдың Сөзі жерге түскен тұқым тәрізді, адамның жүрегіне себіледі. Жүректегі сенім бірте-бірте артып, Аспанмен толық келісімге келуі тиіс. Мұндай кемелдікке әлі жеткен жоқ. Дегенмен, үрдіс басталып кетті, тұқым өздігінен өсіп-өне береді. Иса диқанның тұқым егуі жайлы айтып, көз алдымызға тамаша бейнені келтіреді. Бұл – сенімнің бейнесі. Толысып піскен дәннің топыраққа түскен тұқымнан еш айырмашылығы жоқ. Тағы да қайталап айтайын.

Толысып піскен дәннің топыраққа түскен тұқымнан еш айырмашылығы жоқ.

Жүгері дәнін егіп көріңізші, жүгеріңіз піскенде, собықтағы дәндердің түр-түсі өзіңіз еккен дәннен еш айнымайды. Иісі де, дәмі де тура сол. Арасында ешбір айырмашылық жоқ.

Исаның айтқанын басқа сөздермен жеткізіп көрейін. Құдайдың Сөзін тыңдағанымызда, біз шын мәнінде, Құдайдың Сөзін тұқым іспетті жүрегімізге себеміз. Егер сол сөзді жүрегімізде сақтасақ, ол өздігінен пісіп, жетіле береді. Дән әбден піскенде, жүрегіміздегі ойлар мен өміріміздегі өзгерістер Аспанның айтқанына толықтай сәйкес болады. Басқаша айтқанда, Аспаннан келген уәделерді жүрегімізге тұқым етіп себе берсек, олар Құдайдың айтқанына

деген нық сенімді өзінен-өзі тудырады. Нәтижесінде жүрегіңіз Аспанның айтқанымен толықтай келісімде болады. Мысалы, сіз ауырып қалдыңыз дейік. Денеңіз науқас екеніңізді айтады. Ал Иса Мәсіх сіздің шипа алып, сауығып кетуіңіздің құнын әлдеқашан төлеп қойған болатын. Егер сіз жүрегіңізге Құдайдың осы жайлы сөзін себе берсеңіз, жүрегіңіздегі сенім өздігінен арта береді.

Тұқым өніп, масақтағы дән піскен сайын, дениңіз сау екеніне сеніміңіз нығая түседі. Енді сіз Құдайдың Сөзін қайталап айта беруді қажет етпейсіз, өйткені, жүрегіңіздің өзі оған нық сенеді. «Мен сауықтым» деген сөзіңіз қайталауды қажет ететін әлдебір формула емес, өзіңіз нық сенетін, шынайы факт деп қабылдайтын ақиқат. Аспанның айтқаны енді сіздің өміріңіздегі шындыққа айналады. Еврейлерге арналған хатта былай делінген:

Ал сенім дегеніміз — үміттенгеннің жүзеге асатынына күмәнданбау, әлі де көрінбей тұрған уәденің орындалуына шүбәсіз илану.

– Еврейлерге 11:1

Сеніміңіз болса, Құдайдың Сөзіне еш шүбәланбайсыз. Дегенмен, алда тағы бір қадам бар.

Енді адам орағын алып шығып, өміріне өзі сенетін өзгерістерді алып келуі тиіс. Яғни, сенімінің жемісін оруы керек.

Егін піскенде оратын мезгілі жетіп, диқан оған дереу орақ салады.

– Марқа 4:29

Байқасаңыз, адамның жүрегі Аспанның айтқанымен толық келіссе де, осы сәтке дейін, өмірінде көзге көрінетін өзгерістер болған жоқ. Жер бетіндегі өкілеттілік адамға тиесілі болғандықтан, Құдай Патшалығының заңдары жерде адамның қатысуынсыз

жүзеге аса алмайды. Құдай адамсыз ешбір кереметін жасай алмайды. Римдіктерге арналған хаттың 10-шы тарауына қайта оралайық. 10-шы аят былай дейді:

Себебі Мәсіхке жүрегімен сенуі арқылы адам күнәсінен ақталады, Оны аузымен мойындауы арқылы құтқарылады.

– Римдіктерге 10:10

Адам Құдайдың Сөзіне жүрегімен сенеді, сол арқылы ақталады. Ақталу дегеніміз – заңгерлер қолданатын термин. Оның мағынасы – әділ заңның орындалып, әділеттің орнауы. Сонымен, адамның жүрегі Аспанның айтқанымен толық келісімге келсе, әрі Құдайдың Сөзіне нық сенімді болса, ондай адам ақталады. Бұдан былай Құдай оның жердегі өміріне заңды түрде араласа алады. Алайда, Құдайдың құдіреті іске асу үшін бұл да жеткіліксіз. Электр сымдары кіріп тұрған үйдегідей, шам жағу үшін тетікті басу керек. Неге дейсіз ғой? Өйткені, Римдіктерге арналған хатта айтылғандай, ақталғаннан кейін тағы бір қадам керек.

Аспан мен жердің алдында ақталған адамның аузынан сенімге негізделген сөз шығуы тиіс. Ондай адамның әрекеті де сеніміне сай болуы керек. Сонда жердегі өміріне Құдайдың құдіреті келеді. Жоғарыдағы аятты тағы бір рет, сосын тағы да қайталап оқып шығыңыз. Менің ойымды әбден ұққаныңызша, қайталап оқи беріңіз. Міне, рухани заңдар деген осы! Адамның жүрегі Аспан мен жердің кездесетін жеріне айналғанда, Құдайдың құдіретінің жерге төгілуіне заңды мүмкіндік туады. Сөзіміз бен іс-әрекетіміз шам жағатын тетік іспетті Құдайдың құдіретін өмірімізге келтіреді. Аяттың екінші жартысына мұқият назар аударуыңызды сұраймын: Құдайдың билігін жер бетіне әкелетін – біз.

Адам, біріншіден, өз әрекеттерін заңдастыруы тиіс, екіншіден, жер бетіндегі өкілеттілігін қалпына келтіруі керек. Сонда ғана

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

Құдайдың құдіретін көре аламыз. Тәртіптің осындай екенін Исаның Матай жазған Ізгі хабардағы сөздерінен анық көреміз.

Сендерге шындығын айтамын: жер бетінде тыйым салғандарыңды да, рұқсат еткендеріңді де көктегі Әкем бекітпек.

– Матай 18:18

Иса қауымға Құдайдың жердегі Патшалығының кілтін беретінін айтады. «Жер бетінде тыйым салғандарыңды да, рұқсат еткендеріңді де көктегі Әкем бекітпек» дейді Иса. Полиция қызметкерін есіңізге түсіріңізші: оның қолында билік бар, алайда, шынайы күш-құдірет өкіметте. Полиция қызметкерінде кілт бар, билікті оған өкімет берген. Ол өкіметтің өкілі ретінде адал қызмет етуге ант берген. Қызметкердің айтқанын өкімет қолдайды, өйткені, ол өкіметтің атынан сөйлейді. Жоғарыда айтып кеткеніміздей, адам ғана – Құдайдың жердегі өкілі, Құдай адам арқылы ғана жер бетінде Өз еркін жүзеге асыра алады. Сенім жайлы тағы бір нәрсені білуіміз керек. Марқа жазған Ізгі хабардың 4-ші тарауына тағы үңілейік.

Жер өздігінен алдымен көк өскінді, содан кейін масағын шығарып, соңынан масақтағы дәндерді өсіріп толыстырады.

– Марқа 4:28

Бұлаяттағы жер, жоғарыда атап өткеніміздей, адамның жүрегін, басқа сөзбен айтқанда, рухын бейнелейді. Сенімнің қайда пайда болатынын байқадыңыз ба? Сенім – Аспанның туындысы емес. Ол осында, жер бетінде өсіп-өнеді. Сенім – сіздің жүрегіңіздің өнімі. Сенімді Құдайдан сұрап ала алмайсыз. Көкте сенімнің қажеті жоқ. Сенім, Аспанның айтқанымен келісу дегендер көкке

барғанымызда қажет болмайды. Олар жерде ғана керек және адамның жүрегінде ғана туады. Марқа жазған Ізгі хабардағы астарлы сөзден оқығанымыздай, сенімге ие болудың бірден-бір жолы – Құдайдың Сөзін жүрегімізге сақтап, өнім беруін күту. Яғни, сенім керек болған жағдайда не істеуім керек? Құдайдың Сөзін жүрегіме салып, өсіп-өнуіне мүмкіндік беруім керек. Сенімге ие болудың жалғыз жолы – осы.

Марқа жазған Ізгі хабардағы астарлы әңгімені талдауымызды аяқтамастан бұрын орақ жайлы сөз қозғайық.

Егін піскенде оратын мезгілі жетіп, диқан оған дереу орақ салады».

– Марқа 4:29

Меніңше, сенушілердің көбісі орағын қолдана алмайды. Оларға өздері соншалық қажет етіп жүрген өнімді жинауды ешкім үйретпеген. Қауым тұқым себуді біледі, ал егінді күтуді және өнім алуды білмейді. Осы аятта Иса егін піскенде, БІЗ, яғни, өзіміз, орақ салып, еккен тұқымның өнімін жинап алуымыз керек екенін анық айтады. Тұқым еккенімізбен, орақ ұстап, егін оруды үйренбесек, өнімнен құр қаламыз. Шынымды айтайын, Құдай үйретпегенде, мен де егін орудан бейхабар едім. Егін орып алудың не екенін түсіндіретін бірер мысал келтірейін.

Атланта штатындағы бір қауымнан шақыру алдым. Сәрсенбі күнгі кешкі жиналыста қызмет етуім керек. Шағын ғана қауым. Бірақ мен үшін тыңдаушыларымның саны маңызды емес. Мен Құдай Патшалығы жайлы тәлім бергенді ұнатамын. Қауымға келдім. Есік жабық, іште ешкім жоқ. Жиналыс басталардан он минут бұрын келген болатынмын. Кенет жақындап келе жатқан көліктің гүрілін естідім. Мына машинаның даусы жер жарады. Артыма бұрылып қарадым да, қауым ауласына кіріп келе жатқан тозығы жеткен, салдырлаған пикапты көрдім. Атланта штатының

ортасындамын ғой, мән бермедім. Бір кезде қауым ғимаратының ар жағынан бір адам шығып, жаныма келді. Амандастық. Осы қауымның бағушысы екен. Кешіккені үшін кешірім сұрады, біраз әуре болып, көлігін әрең дегенде от алдырыпты. Машинасын от алдыру үшін төмпешіктен төмен қарай итеріп жүргізіп жібереді екен де, аздап жылдамдық алғаннан кейін моторын оталдырады екен. Басқа амалы жоқ, өйткені стартері істен шыққан. Машинасы оталмай қалған кездері жиі болады. Ондай күндері қауымға жаяу барады, арадағы жол сегіз шақырым.

Бағушы әңгімесін сабақтады. Қауымдағы негізгі қызмет – кедей адамдарға тамақ тарату. Бір айдың ішінде төңіректегі аудандарда 10 мың сыбаға тамақ таратады екен. Бағушының әңгімесін тыңдаған сайын, жабырқай түстім. Айына 10 мың сыбаға тамақ тарататын Құдайдың қызметкерінің астында тәуір көлігі де жоқ. Өзі тамақтандырып жүрген адамдар осы қызметкерге қарап, Құдайдың бейнесін көреді. Құдаймен танысуға олардың көбісінде басқа мүмкіндік болмайды. Құдайға қызмет етіп жүрген адам күнін әрең көріп жүрсе, отыз бес градус ыстықта сегіз километр жолды жаяу жүруге мәжбүр болса, маған Құдай қайдан көмектессін деген ой тұмайды ма оларда? Бұл мәселені шешу қолымнан келеді. Үйде 25 мың шақырым ғана жүрген көлігім бар. Жұмыскерлерімнің бірі сол машинаны Атлантаға жеткізеді де, бағушыға кілтін тапсырады. Ол кісі қатты қуанды. Кешкі жиналыста бағушының өзіне де, қауымға да Құдай Патшалығы жайлы тәлім бердім. Патшалықтың қаражат саласына қатысты заңдарын да ашып көрсеттім.

Қайтып келіп, машинаны Атлантаға жеткізуді ұйымдастыра бастадым. Көлікті бергенде, рухани әрекет жасайтынымды білемін. Көлігімді Құдай Патшалығына беріп, бір жағынан өзім көлікке мұқтаж боламын, екінші жағынан, жаңа көлікті сеніммен қабылдай алатын боламын. Машиналарға, кейбір адамдар сияқты, аса әуес емеспін. Мен үшін машина тек көлік қана. Жақсы

машинаны ұнатамын, әрине. Бірақ, бір көлікті ұзақ мініп жүре беремін.

Машинаны Атлантаға мініп кететін адам келді. Гаражға бардым да, көлікке қолымды қойып, мінәжат еттім. «Көктегі Әкем, осы машинаны Саған қызмет етсін деген ниетпен беріп тұрмын. Орнына ...» Осы тұста не дерімді білмей қалдым. Құдай Патшалығы өте нақты әрекет ететінін білемін. Жай ғана «басқа көлік» деуім дұрыс емес. Қандай көлік күтетінімді нақты айтуым керек. Және Дренда екеуіміз келісіп сенуге тиіспіз. Енді міне, нақты қандай машина сұрайтынымды өзім де білмей тұрмын. Мінәжатымды қайта бастадым: «Құдай Ием, осы машинаны Саған қызмет етсін деген ниетпен беріп тұрмын. Орнына жақсы көлік алатыныма сенемін. Нақты қандай машина қалайтынымды кейінірек айтамын» дедім. Сонымен, машина Атлантаға кетті. «Иә, ОСЫНДАЙ көлік мінгім келеді» деп айтатындай машина ойыма келе қоймады.

Арада бірнеше ай өтті. Әлгі машинаны беруге Дренда, әрине, келіскен болатын. Ал орнына қандай машина мінгісі келетінін ол да білмейді. Екеуіміз әр машинаны сөз қылып жүрік. Бірде Дренда «Меніңше, кабриолет жақсы болар еді» деді. Мен қарсы емеспін. Ал кабриолеттің қайсысы болсын? Кабриолеттердің қандай түрі болатынын білмейді екенбіз. Бірде, Дренда екеуіміз түскі асқа бара жатқанымызда, ол «міне, мынадай» деді. «Нені айтасың?» дедім. Ресторанның алдында тұрған машиналардың бірін көрсетіп, «міне, мынадай» деп қайталады жұбайым. «Нені айтасың?» деп тағы сұрадым. «Міне, осындай машина мінгім келеді!» Автотұрақтың арғы бетінде тұрған, көздің жауын алатын кабриолетті сонда ғана көзім шалды. «Жақынырақ барып көрейік» дедім. Кабриолеттің жанына барып тоқтадық.

BMW 645Ci болған соң, көздің жауын алмай, қайтсін. Бұл – әлбетте, тамаша көлік. Бағасы да удай. Шынымды айтсам, мына

машинаны көргенімде, ішімнен «Құдайым, не істеуім керек, айтшы» дедім. Бұл көліктің бағасы 115 мың доллар. Ондай ақша төлеп, жаңа BMW мінер жайым жоқ. Дегенмен, Құдайдың қолынан бәрі келеді. Дренда екеуіміз машина қарастырып жүргеніміз жайлы ешкімге тіс жарып айтқан емеспіз.

Екі аптадай уақыт өтті. Балдызым хабарласып, «Дрендаға керек көлік таптым!» деді. «Дрендаға керек машина дегеніңді қалай түсінуге болады?» дедім. «Сатылатын автокөліктерді қарап отырғанымда, бір машина көзіме түсті. Сол машина Дренданыкі болуы керек екенін, ол жайлы сендерге айтуым керек екенін анық сезіндім» деді. «Ол қандай машина?» деп сұрадым. «BMW 645Ci, өзі жап-жаңа. Екі жылдай мінілген, бірақ өте аз жүрген. Күтімі жақсы, бір жерінде бір сызат жоқ. Егесін де танисың». «Мен танитын адам дейсің бе?» деп сұрадым. «Иә, өзің хабарласып, сұрастыр» деді балдызым. Көліктің маркасын естігенімде-ақ, Құдайдың іске кіріскенін түсіне қойған едім.

Кабриолеттің иесіне телефон соқтым. Рас, таныс адам екен. Машина жайлы аздап сөйлестік, көліктің өте жақсы күйде екенін айтты. Содан кейін ол «Білесің бе, осы әңгіме барысында бұл машинаны Дренда мінуге тиіс деген тұжырымға келіп отырмын. Иә, бұл көлік Дренданыкі болуы керек» деді. Машинаны Дрендаға алмақпыз деп айтқан жоқпын. «Білесің бе, былай істейік. Мен саған осы көлікті 28 мың долларға сатайын» деді танысым. Сенерсенбесімді білмедім. Машинаның бағасы бұдан әлдеқайда қымбат еді. Мына жаңалықты Дрендаға айтқанымда, оның қуанышында шек болмады. Қолма-қол ақша төлеп, машинаны сатып алдық. Осы күнге дейін аман-есен жүріп тұр. Еш жеріне сызат түскен жоқ. Бұл машина бізге талай қуаныш сыйлады: талай рет әдемі саз бен күннің нұрына малынып, жақсы көлікпен жүрудің рахатын көрдік.

Кабриолетімізге мініп алып, Колорадо тауларына сапар шеккеніміз есімнен кетпейді. Саяхатқа қызымыз Кирстенді ала

шыққан болатынбыз. Жабдығымыз – жүксалғышта. Машинаның төбесін ашып қойып, Канзастың жолдарымен түнделетіп өткеніміз есімде. Кирстен артқы орындықта ұйықтап жатыр. Төбемізде – жұлдызды аспан, алдымызда – бос жатқан жол. Ауаны толтырған шөптің жұпар иісі. Екі аптаға созылған саяхатымызда Шатқалды тау деп аталатын таулы жотаны шарлап шықтық. Машинамыз айрықша қолайлы көлік болып шықты. Бір сөзбен айтсам, көлігіміз тамаша!

Ал енді маңызды сұрақ: бұл машина қолымызға қалай түсті? Дренданың “міне, осы машина” деп көрсеткен көлігі дәл келуінің себебі неде? Бізге бұл машина Құдай Патшалығынан келгені анық. Әлгі бағушыға машинамызды бергенімде, тұқым септім де, рухани заңның орындалуына себепші болдым. Орнына қабылдайтын машинамыздың нақты маркасын айта алмай, жақсы машина деп айтқаным да есімде. Алайда, осымен тоқтамай, Дренда екеуіміз егінге орақ салуымыз керек еді. “Міне, мына машина!” деп нақты айтпағанымызда, машина келмес еді.

Кейінірек осы заңдылықты растайтын тағы бір оқиға болды. Өзіңіз байқағандай, аң аулауға деген әуестігім бар. Аңшылыққа өте қолайлы жерде тұрамын. Жеке меншігімде аң аулауға жарамды жерім бар. 60 акр жерімнің 19 акрын орман, 10 акрын батпақты жер алып жатыр. Жылда бұғы мен тиін атам. Қашанда олжалы қайтамын. Үйрек-қаз да көп. Алайда, неге екенін өзім де білмеймін, құс атқан емеспін. Соңғы бірнеше жылда ұлым екеуіміз бір-екі рет батпақ жаққа барып, қаз атқанымыз бар. Ал үйрек ату ойыма да келмейті.

Бірде бір топ үйректің батпақты бетке алып, ұшып бара жатқанын көріп қалдым. Үйрек атып көрейінші деген ой келді. Сол жолғы аңшылықтың қызық болғаны-ай! Үйрек атуды ұнатып қалдым. Сол жылғы аңшылық барысында түсінгенім, қайтсем де үйрек атудағы шеберлігімді шыңдауым керек. Бірнеше үйрек

атып алғаннан кейін етінің тіл үйірет дәміне де үйір болып алдым. Аңшылық кезінде байқағаным, үйрек маңына жақын жолатпайды екен, ал мылтығым алыстағы нысананы атуға онша қолайлы емес. Мылтығым — «Ремингтон 11-87». Бұл кең тараған әмбебап мылтық. Қоянды да, бұғыны да атуға жарап жүрген, қолым әбден үйренген, қажетіме жарап жүрген қаруым. Алайда, үйрек ату үшін арнайы жасалған жаңадан шыққан мылтықтар бар екен. Алыстан көзге түспес үшін камуфляж түсіне боялған, патрондары 3,5 дюйм, алыс жерден атуға қолайлы. Келесі жылғы аңшылық маусымы басталарда осындай мылтықтың бірін алмақ болдым.

Сонымен, биылғы жылғы үйрек ату маусымы аяқталды. Қаңтар айы болатын. Балықшы, аңшыларға жабдық сататын Cabela атты дүкенге кірдім. Мылтық сататын бөлімге барып, әлгіндей мылтық қарайын деген ой келді. Сөйтсем, үйрек атуға арналған мылтықтардың өзі бір қабырғаны алып тұр екен. Бірнешеуін қарап шықтым. Біреуін алғым келді. Бағасы екі мың доллар екен. Үйрек ату маусымының басталуына әлі бірнеше ай бар. “Күте тұрайын” деп ойлады. Кетіп бара жатып, мылтықты нұсқадым да, “Исаның атымен, осындай мылтығым болады” дедім. Бұл сөз аузымнан қалай шыққанын өзім де байқамай қалдым. Ойға алған бір жоспарым болды дей алмаймын. Жай ғана, қалаған мылтығыма ие болатынымды дауыстап айттым. Қандай мылтық керек екенін енді анық білемін.

Екі апта өтті. Бизнес-конференцияға шақыру алдым. Сол жерде бір қызық жағдай болды. Мені шақырған компанияның қожайыны қасыма келді де, конференцияға келіп қатысқаным үшін алғыс ретінде маған сыйлық ұсынғысы келетінін айтты.

“Аңшылықты ұнататыныңызды білемін, сондықтан мына мылтықты сізге сыйлағым келеді” деді. Мылтықты көргенімде, тілім байланып қалды. Су жаңа, жартылай автомат Benelli мылтығы. Сол жолы дүкенде дәл осындай мылтықты нұсқап,

«осындай мылтығым болады» деген едім. Ғажап емес пе?! Бұл мылтық қайдан келді? Осы күнге дейін ондаған мылтықты тұқым ретінде сеуіппін де, егініме бір де бір рет орақ салмаппын. Бір де бір рет «Ием, міне, маған мына мылтық керек!» демеппін. Осы сөзді айтуым мұң екен, егінімді орып алдым!

Осы оқиғаны бір танысыма айттым. Ол да қызметкер. Ол «Иә, кейде Құдай бізге ұсақ-түйек сыйлық беріп, Өзінің сүйіспеншілігін көрсетеді» деді. Осы сөз біраз ойландырды. «Жоқ, олай емес. Құдайдың мені сүйетіні рас, бірақ Ием мені ұсақ-түйек сыйлығымен қуантпақ болды дегенге келіспеймін» деп түйдім. Ит, балық, белгілі бір ретпен келген бұғылар, машиналар – осылардың барлығын Құдай маған Өз сүйіспеншілігін көрсетейін деп берген жоқ. Жаратқан Ием мені сүйетінін Исаны мен үшін айқыш ағашқа жібергенде, сол ісі арқылы маған Өз Патшалығына жол ашқанда, көрсетті!

Егін ору жайында тағы бір әңгіме айтып берейін. Жоғарыда айтып кеткенімдей, машинаға аса әуес емеспін. Көлікті жиі ауыстыратын әдетім жоқ. Дренда екеуіміз машинамызды ұзақ мінеміз. Соның дәлелі — Honda Pilot деген машинамыз. Сенімді, ыңғайлы, мықты машина, тоза қоймаған, сондықтан оны сату ойымызда жоқ. Алайда, қонақтарымызды қыдыртуға үлкенірек джип керек-ау деген ойымыз да бар. Осыдан біраз уақыт бұрын Now Center деген орталықта бір үлкен іс-шара өткізген болатынбыз. Сол кезде жалға Cadillac Escalade алдық. Сол көлікті Дренда екеуіміз ұнатып қалдық. Маржандай ақ түсі де, ұзындығы да, ішінің кеңдігі де көңілімізден шықты. «Міне, осындай машина, Cadillac Escalade мінгіміз келеді» деп келістік. Содан кейін

қолымыз тимей, машина іздестіруге уақыт бөле алмадық.

Бір айдай уақыт өтті. Күндегі әдетім бойынша, пошта жәшігінен газет алайын деп, аулаға шықтым. Осы кезде телефоныма қоңырау түсті. «Бағушы, сізге Cadillac Escalade деген машинаны алып бергім келеді. Қай түсін таңдайсыз?» деді ар жақтағы адам. Таң қалып «Міне, ғажап! Тамаша! Дренда екеуімізге маржан түстес Cadillac ұнайды» дедім. Сасқанымнан шанағы қысқартылған Cadillac ұнайтынын айтуды ұмытып кетіппін. Әлгі адам бір-екі жыл ұсталған, көп мінілмеген, күтімі жақсы машина алмақ екен.

Бір айдай уақыт өткенде әлгі танысым телефон соқты. «Машинаңыз дайын. Пәлен уақытта, пәлен жерде кездесейік, машинаңызды алып кетіңіз» деді. Кездестік. Маржан түстес, шанағы қысқартылған Cadillac Escalade. Не деген сұлу көлік! «Машина алудың ұзап кеткені үшін кешіріңіз. Ұзын шанақтысын алайын деп едім, таппадым. Ондай Cadillac-тар тез сатылып кетеді екен. Тапқаным осы, Қалай қарайсыз, қарсы емессіз бе?» деді. Қарсы емеспін бе? Дәл біз сұраған көлік емес пе!

Баяғы сұрағымды тағы қайталайын. Көкейімізде жүрген көлік, Cadillac Escalade-қа қалай қол жеткіздік? Біріншіден, жоғарыда сөз болған машинадан басқа сегіз машинаны сыйлаған едім. Бірақ, «Міне, маған керегі – осы машина!» деп ешқашан айтпаппын. Ондай сөзді алғаш рет Дренда айтқаны есіңізде болар. Және сол BMW-ны аларда, Дренда екеуіміз сенімде келіскен болатынбыз. Қауым сенушілерге тұқым себуді үйретуде көп еңбек сіңірді, алайда, егінге орақ салуды үйреткен жоқ. Осыны талмай айтып келемін. Сонымен, жоғарыдағы мысалдардың әрқайсысында орақтың ролін не атқарғанын айта аласыз ба? Меніңше, сұрақтың жауабы айдан аян. Жемісін аламын деген сеніммен көптеген тұқым септім. Бірақ, Дренда екеуіміз бірауыздан келісіп, егінге орақ салған емеспіз. Тағы да қайталаймын, “Міне, осы машина!” дегенімізде, егінімізді орып алдық. Орақ – біздің сөзіміз!

*Тілде өмір мен өлімнің билігі болар,
Сөзге үйір соның жемісін татар.*

– Нақыл сөздер 18:21

Кезінде қауымда Құдайдың Сөзін, сенімді жариялау жайлы тәлім көп болушы еді. Әлденені айтып қалып, «Мұндай сөз айтпауым керек, не жариялап жүргеніме мұқият болғаным дұрыс» дейтін адамдарды көрген боларсыз. Құлаққа жағымды естіледі. Мұндай көзқарас Құдайдың Сөзін жүрегімізде сақтауға септігін тигізетін болар. Дегенмен, Құдайдың Сөзін жариялаудың егін оруға қатысы жоқ. «Тоқтай тұр. Орақ – біздің сөзіміз деп өзің айтқан жоқ па едің?» Айтқаным рас. Алайда, дұрыс сөз айту жеткіліксіз.

Құдайға сеніңдер! Сендерге шындығын айтайын: біреу мына тауға «Орныңнан көтеріліп, теңізге лақтырыл!» деп, айтқан сөзінің іске асатынына жүрегінде еш күмәнданбай сенсе, сол өтініші орындалады.

– Марқа 11:23

Марқа жазған Ізгі хабардағы орақ – біздің сөзіміз екенін қайталаймын! Орақ туралы сөз болғанға дейін сенімнің өсіп-өнуі жайлы айтылады. Егін ору науқаны басталғанда, егінге орақ саламыз. Жүрегіңіз Аспанмен келіскен жағдайда егін ору науқаны келеді. Марқа жазған Ізгі хабардан келтірілген жоғарыдағы аят та сол заңдылықты суреттейді. Жүрегіңіз Құдайдың Сөзіне сенеді, сонда сіздің сөзіңіз арқылы Құдайдың құдіреті босап шығады. Енді «*айтқан сөзінің іске асатынына жүрегінде еш күмәнданбай сенсе...*» деген сөзге назар аударайық. *Айтқан сөзіңізге сенесіз бе? Құдайдың Сөзін жай ғана жариялау немесе қайталап айта беру – сенім емес. Жүрегіңіз келіспесе, қанша жарияласаңыз да, ештеңе өзгермейді. Сонымен, аузымыздан шыққан сөз маңызды*

ма, жүрегіміздің қандай күйде екені маңызды ма?

Ізгі адам жан дүниесіндегі игілікті қазынадан игілік алып шығады, ал зұлым адам арам жан дүниесінен арамдық алып шығады. Жан дүниең неге толса, ауызың соны айтар.

– Лұқа 6:45

*Ең бастысы, таза сақта жүрегіңді,
Өйткені ол — өміріңнің қайнар көзі.
Лайым аузыңнан өтірік шықпасын,
Тілің жалғандықтан қашықтасын!*

– Нақыл сөздер 4:23, 24

Айтқан сөзіміз ауымыздан емес, жүрегімізден шығады екен, яғни, неге сенсек, ауымыздан сол шығады. Марқа жазған Ізгі хабардың 4-ші тарауынан жүрегімізді Аспанмен қалай үйлестіре алатынымызды білдік. Жүрегімізге нық сенім орнағаннан кейін сөзіміз бен іс-әрекетіміз арқылы егінімізді орып аламыз. Сенім осындай реттілікпен жүзеге асып, жеміс береді.

Сеніммен өмір сүргісі келетін әркім өзіне-өзі төмендегідей сұрақ қоюы тиіс.

Мен сенімдемін бе, сенімде екенімді қалай біле аламын?

Бұл өте дұрыс сұрақ. Оған МІНДЕТТІ түрде жауап беруіңіз керек, өйткені, сенімде болмай, сеніммен дұға ету мүмкін емес. Өзіңіздің сенімде екеніңізге көз жеткізудің бірнеше жолы бар. Адамның сенімде, не сенімде емес екенін көрсететін белгілер бар, соларды тани білгеніңіз дұрыс. Сенімде болмасаңыз, қорқынышқа негізделіп, шешім қабылдайсыз. Ал қорқынышқа негізделген шешімдер мен істер адамды жердегі қарғысқа ұшыраған жүйеден шығармай ұстап қалады, әрі Құдайдың жоспарына

кіруіне бөгет болады. Сонымен, өзіңіздің сенімде екеніңізге қалай көз жеткізе аласыз? Бірінші белгі мынау: «Сенім» сөзіне берген анықтамамызды қайта қарап шықсаңыз, кілт – жүректегі нық сенім екенін көресіз. Кейде біз нық сенеміз деп ойлаймыз, ал шын мәнінде ой-сана деңгейінде ғана келісеміз, жүрегімізде Құдайдың Сөзі жоқ. Осындай жағдайды дөп басып тани алған дұрыс. Сенімде екеніңіздің белгісі мынау: Құдайдың Сөзімен ой-санаңызда келісесіз, әлбетте, сонымен қатар, жүрегіңізде де тыныштық пен уәденің орындалуын күту бар.

Ал сенім дегеніміз — үміттенгеннің жүзеге асатынына күмәнданбау, әлі де көрінбей тұрған уәденің орындалуына шүбәсіз илану.

– Еврейлерге 11:1

Қолыңызда әлдебір мүліктің иесі екеніңізді куәландыратын құжат болса, жеткілікті, оған сенген-сенбегеніңіз маңызды емес. Сенімдегі адам да солай: Құдай уәде еткен игіліктерге ие екенін біледі, оларды әзірше көзімен көре алмаса да, жүрегі тыныштық пен сенімге толы. Сенімдегі адамдар «Құдайдан қабылдағанымды білетінімді білетінімді білетінімді білемін» дейді. Бұл білім сырт жағдайдан емес, іштен келеді. Ол рухымызда немесе жүрегімізде. Қорқыныш жоқ. Мазаны алатын ойлар жоқ. Уәденің орындалатынына еш күмән жоқ. Тіпті әлдеқашан орындалғандай көру.

Сенімде екеніңіздің тағы бір белгісі – қуанышпен күту. «Менде ол бар!» деген көзқарас. Сенім дегеніміз – жүректегі тыныштық қана емес. Ұстанымыңызды рухани әлемде қорғауға да дайын болуыңыз керек. Осыған орай бір мысал келтіре кетейін. Сіз адвокатсыз дейік. Сот залында куәгерлерді тергеу жүріп жатыр. Куәгерлерге қандай сұрақ қояр едіңіз: Осы оқиға жайлы неге осындай пікірдесіз? Өз ұстанымыңызды қалай қорғай аласыз?

**АЛ СЕНІМ ДЕГЕНІМІЗ
— ҮМІТТЕНГЕННІҢ
ЖҮЗЕГЕ АСАТЫНЫНА
КҮМӘНДАНБАУ,
ӘЛІ ДЕ КӨРІНБЕЙ
ТҰРҒАН УӘДЕНІҢ
ОРЫНДАЛУЫНА
ШҮБӘСІЗ ИЛАНУ.**

– ЕВРЕЙЛЕРГЕ 11:1

Жауап біреу ғана – Құдайдың Сөзі.

Мысалы, біреу үйіңізге келіп, «Үйімді босат!» десе, «Кешіріңіз, бір күн шыдай тұрыңыз, үйіңізден шығамын» дейсіз бе? Жоқ, олай демейсіз. Әлгі адамның бетіне қарап күлетін боларсыз. Ол «Бұл – менің үйім. Үйімді босатпасаң, сотқа жүгінемін» дейтін болса, «Сенімен сот залында қуана кездесемін!» дейсіз. Сот отырысында төрешіге мән-жайды асықпай-саспай баяндап бересіз. Төреші әлгі

адамды тұтқынға алады әрі сот шығынын түгел төлетеді. Сіздің соттағы байсалдылығыңызға негіз болған – сезіміңіз бен эмоцияларыңыз емес, заң және үйдің егесі екеніңізді растайтын құжаттарыңыз.

Сенімде болу мәселесінде сенімнің не екенін анық білмейтін адамдар жиі адасады. Олар сенімнің бірден-бір көзі – Құдайдың Сөзіне емес, өз іс-әрекетіне үміт артады. Құдай Патшалығының шынайы құдіреті сенімге толы жүректен шығады. Алайда кейбір сенушілер сол сенімді әлдебір іс-әрекетпен немесе Құдайдың Сөзіне сай келетін жүріс-тұрыс формуласымен алмастырып алады. Мысал үшін, Құдай Патшалығына қаржы еккен болсаңыз, “еккен тұқымыңыздан өнім алатыныңызды қайдан білесіз?” деген сұраққа “Өйткені пәлен күні пәлен ақша ектім” деп жауап беру дұрыс емес. Бұл сөзіңіз сіздің іс-әрекетіңізге негізделген, жүрегіңізді сенімге толтыра алмайды. Сенім тек Құдайдың Сөзінен келеді.

Талай адаммен бірге жеміс үшін мінәжат еттім. Мінәжаттан кейін жауап келетініне не себепті сенетінін сұрағанымда, көбісі не деп жауап берерін білмейді. Осы сұрақты қойғанымда,

олардың сенімін, Құдайдың Сөзімен келісетінін көргім келеді. “Киелі Кітаптың пәлен аятында былай деп жазылған. Осы аяттың негізінде сенемін” деген жауапты естігім келеді. Адам өз сенімінің Құдайдың нақты қай Сөзіне негізделетінін білмесе, өмірінің бағытын анық білмеуі де мүмкін.

Есіңізде болсын: Құдайдың еркін білсеңіз ғана, жүрегіңізде сенім болуы мүмкін. Неге? Өйткені, жүрегіңіз Құдайдың еркімен толықтай келіскенде ғана сенім пайда болады. Өздерін сенімдемін деп жүрген адамдар көп. Шын мәнінде олардың барлығы сенімде деп айта алмаймын. Олардың санасы Құдайдың Сөзімен келіседі, алайда жүректері ақиқатта орнықтамаған.

Бір мысал қарастырайық. Мен сізге аспан көгілдір емес, көгілдір деп жүргеніміз шын мәнінде сары түс екен десем, қалай қарайсыз? Яғни, осы уақытқа дейін алданып келіппіз, көгілдір түс көгілдір емес, сары екен деймін. Сіз не істейсіз? Бұл жаңалыққа қайран қалып, дереу алғашқы мұғаліміңізге телефон соғып, түстерді дұрыс үйретпей, өміріңіздің күл-талқанын шығарғанын айтып, айыптайсыз ба? Әй, қайдам. Олай ете қоймассыз. Меніңше, мұның бірі де болмас. Сіз мені әпенде біреу деп ойлайсыз да, сөзіме мән берместен, өз ісіңізбен айналыса бересіз. Неге? Өйткені, көгілдір түстің шынында да көгілдір екенін анық білесіз!

Енді осы мысалды сенімге қатысты қарастырайық. Сіз Иса Мәсіхтің айқыштағы құрбандығының арқасында дертіңізден сауыққаныңызға толық сенімдісіз. Ал дәрігеріңіз дерттен айықпайтыныңызды айтады дейік. Сіз дәрігердің сөзін әпенде адамның сөзіндей көресіз, өйткені, олай болуы мүмкін емес. Неге дейсіз ғой? Өйткені, Иса сіздің шипа алуыңыздың құнын толығымен төлеп шыққанын білесіз. Ойымды түсініп тұрсыз ба? Құдайға сиынып жүрген адам көп. Алайда, олардың мінәжаттары көбінесе сенім емес, үмітке негізделген. Үміт бар да, толық сенім жоқ. Достым, міне сол себепті, Құдайдың Сөзіне терең бойлаған

дұрыс. Біз Құдайдың еркін білуге, Көктегі Әкеміздің айтқанына нық сеніп, жүрегімізді орнықтыруға тиіспіз. Сонда Құдайдың еркіне жатпайтынның бәрінен бас тарта аламыз. Құдайдың Сөзінен нәр алуымыздың қаншалықты маңызды екенін көрсететін мысал келтірмекпін. Бұл мысал – өз өмірімде болған оқиға.

Кәсіпкердің жұмысы оңай емес. Кейде бірнеше апта бойы қиындықтан көз ашпайсың. Сондай кезеңдердің бірі болатын (қауым бағушысы болып, толық қызметке кіргеніме дейін болған жағдай). Бір күнде бірнеше келіссөз өткіземін. Менің табысым сатылымнан түскен пайданың белгілі бір пайызын құрайтын. Сондықтан, қаржы саласында да қысым бар. Тіс дәрігеріне бардым. Әкетіп бара жатқан ештеңе жоқ, жай пломба салу. Дәрігер новокаин салғанға дейін бәрі жақсы болатын. Әдетте новокаин салғаннан кейін жағыңыз бірте-бірте жансызданады. Бұл жолы қызылиегіме ине кірген сәтте оқыс селк ете қалдым, жағым сол сәт жансызданып қалды. Дәрігерден неге бұлай болғанын сұрадым. Ол “Инем жүйкеге тиіп кеткен болар” деді. Мен “Енді не болады?” деп сұрадым. Дәрігер “Емделетін нәрсе ғой” деп жауап берді. Не дейді? Емделеді дей ме? “Доктор, емделеді дейсіз бе? Сөзіңізді түсіндіріңізші” дедім. Ол “Жүйкеге ине тиіп кетсе, 80-85 пайыз жағдайда, науқас толық жазылып кетеді” деді.

Не дейді? Санамды қорқыныш жайлай бастады. Енді не болмақ? Жазылмай қалсам ше? Неше түрлі сұмдық ойлар үсті-үстіне келіп жатыр. Жағым осындай жансыз күйінде қалып қоятын болды. Бір сағаттан кейін клиентпен кездесуім керек. Сол уақыттың ішінде басыма талай-талай ой келді. Кездесуге бара жатқан жолда жаным әбден қиналды, тісім ауырғаннан емес, мазам кетіп, жаман ойлардан миым айналып кеткеннен.

Кездесуден кейін бір досымның үйіне соқтым. Жағым әлі де жансыз күйінде. Бетім осы қалпында қалып қойматынын айтып, жұбататын біреу керек. Жіберген қатем осы еді: қолдауды

Құдайдан емес, адамнан іздедім. Досым тіпті сенімі мықты мәсіхші де емес еді. Мән-жайды айттым да, “Бәрі жақсы болады, Гәри. Жазылып кетесің” деген сөз күттім. Оның орнына “Бір досымда да осындай жағдай болған. Содан бері бетінің бір жағы жансызданған күйі қалып қойды”. Мына сөз төбемнен жай түсіргендей болды! Санамды үрей билеп кетті. Алайда, сыр бермедім. Соңы жақсы болатынына сенетін адамша сөйлеп, сыпайы қоштастым да, шығып кеттім. Суға кеткен тал қармайды. Енді бір досыма жолығып, әңгімемді айттым. Естігенім – тағы сол жауап. “Бір досым бар, ол да тура осындай жағдайға тап болған еді. Беті әлі де сол, жансыз күйі”.

Мына сөз тіпті күйретіп тастады. Құдайдың шипа беруші екенін білемін. Дегенмен, қорқыныштан арыла алмай-ақ қойдым. Жүрегім ақиқатқа орнықпаған еді. Түні бойы көз ілмедім! Бетім сол жансыз қалпында. Ой-санамды қорқыныш билеп алған. Ұйықтай алмай дөңбекшіп жатырмын. Бір кезде оң жақ құлағымның түбі ауыра бастады. Мәссаған! Әкем бір-екі жыл бұрын бет жүйкесінің перифериялық параличіне шалдыққан еді. Ауру құлақ түбінің ауыруынан басталған болатын. Беттің бұлшық еттерін басқаратын жүйкетамыр қабынса, аяғы параличке әкеп соғуы мүмкін. Бұл ауруға шалдыққан адамның бетінің бір жағы жансызданып қалады.

Дөңбекшіп жатып “Әкеңіз тәрізді, сіз де бет жүйкесінің параличіне шалдықтыңыз” деген сөзді естігендей боламын. Таңға жақын көзім ілінді-ау әйтеуір. Оянсам, бетім толығымен паралич болып қалыпты! Енді жағым ғана емес бетімнің оң жағы түгел жансызданып, не ештеңе сезбей, не қимылдай алмай қалған. Көзімді жұма алар емеспін, аузымды да аша алмаймын. Жағдай қиын.

Емханаға барып, дәрігерге қаралдым. Дәрігер бет жүйкесінің параличі деген диагнозды растады. “Әрі қарай не болады?” деп

сұрадым. “Науқастардың 80-85 пайызы жазылып кетеді” деді. Дұрыс естімедім бе, әлде расында да, солай деді ме?

Жағдайым қиын екенін анық білемін. Шайтанның осымен тоқтамайтыны белгілі. Алда әлі не күтіп тұрғанын ойлағым да келмейді. Рухани соғыс туралы білемін, сондықтан, бағытым қате екенін түсіне аламын. Бұл шайқаста жеңіп шықпақ болсам, рухани әдістермен шайқасуым керек екенін де білемін. Жұмыстан шаршап, қажыған сәтімде шалып түсіру үшін құрылған тұзақ екені түсінікті.

Жалғыз үмітім – Құдайдың Сөзі. Санамды билеп алған үрейді тоқтатуға еш дәрменім жоқ. Сондықтан, шағын парақшаларға Киелі Кітаптағы дерттен сауығу жайлы аяттарды жазып алып, жүрегіме сенім қалыптастыруға кірістім. Жүрегіме Құдайдың Сөзін себуім керек, сонда сенімім өсіп-өне бастайды. Құдайдың Сөзін санама сіңірумен болдым.

Бастапқыда еш өзгеріс болған жоқ. Бетімнің оң жағы жансыз күйінде қала берді, қорқыныш рухымен арпалысумен болдым. Бұл жағдай бір аптаға созылды. Кенет рухани әлемде қозғалыс басталды! Марқа жазған Ізгі хабардың 4-ші тарауында айтылғандай, жүрегімде сенім өсіп-өне бастады: алдымен көк өскін, содан кейін масақ шықты, соңынан масақтағы дәндер өсіп толысты.

Осыған дейін Құдайдың Сөзімен жүрегім толық келіспей жүрген болатын, сенім де болған жоқ. Дегенмен, еш өзгеріс көрмесем де, жүрегімдегі сенімнің қалай өсіп жатқанын білмесем де, рухани өзгерістер жүріп жатты. Мен айтып отырған өзгеріс тәни әлемде емес, жүрегімде еді. Құдайдың Сөзін берік ұстансақ, ол ой-пікірімізді қайта қалыптастырады. Нәижесінде сенбеушіліктен шығып, Аспанмен толық келіскен қалыпқа енеміз. Жалғыз үмітім болғандықтан, Құдайдың Сөзін берік ұстандым.

Шипа туралы аяттар жазылған әлгі парақшаларды үйдің әр

жеріне іліп қойған болатынмын. Солардың біріне көзім түсті. Өзім жатқа білетін, жүз рет оқыған аят. Алайда, осы жолы санамда әлде не жарқ еткендей болды! Кенет майлану келді, Құдайдың құдіретімен дерттен сауыққанымды БІЛДІМ. Рас, бетім әлі де жансыз. Көзге көрініп тұрған өзгеріс жоқ. Дегенмен, шипа алғанымды білемін. Арада екі сағат өткенде, бетім бірте-бірте қалпына келді. Құдайға шүкір! Құдайдың Сөзінде құдірет бар!

Кейінгі кезде жұмысбасты болып, Құдайдың Сөзіне жеткілікті мөлшерде уақыт бөлмей жүргем, сол себепті рухым әлсіреп кетіпті. Құдайдың алдында тәубе етіп, бұл қателігімді енді қайталамауға бел будым. Бұл – баяғыда болған оқиға. Сенімнің қалай іске асатынын енді-енді біле бастаған кезім, бұл салада тәжірибем жоқ еді. Қазір ойласам, Құдайдың Сөзіне жүгінудің орнына, жағдайым қандай болатынын адамдардан сұрағаным – ақымақтық екен. Сенімнің қайдан және қалай келетінін ешкім оларға үйретпегендіктен, көптеген сенушілер қиын шақта қалай әрекет ету керектігін білмейді. Және әрекетінің нәтижелі болатынына сенбейді. Қандай үрдіс болып жатқанын білмегендіктен, қысым түскенде, Құдайдың Сөзін соңына дейін ұстана алмай, тайқып кетеді. Біраз күтіп, нәтиже алмаса, рухани іс-әрекеттен пайда жоқ деп ойлайды.

Шайтанның қарсы шабуылы

Кристин біздің қауымға келгенде, Құдай туралы білетіні көп емес-ті. Жексенбілік жиналыстардың бірінде жоғарыдан туылды, содан кейін өмірінде түбегейлі өзгерістер басталды. Қауымда Құдай Патшалығы жайлы тәлім береміз. Қарастыратын тақырыптарымыздың бірі – шипа алуға деген заңды құқымыз. Көп жылдан бері Кристиннің құлағының ақауы бар. 40 жылдан бері есту аппаратын құлағынан тастамайды. Есту қабілеті 50 пайызға төмендеген. Кристиннің анасы саңырау, ал ағасы нашар естиді.

Құдайдың жоғарыдан туылған перзенті ретінде шипа алуға заңды құқығы бар екенін естігенде қуанғанын көрсеңіз!

Сабақ кезінде дренда Кристин үшін қол қойып мінәжат етті. Сол сәт құлағы ашылып, есту қабілеті қалпына келді! Кристин көзіне жас алып, шаттана дауыстады, Құдайды бар даусымен мадақтады. Дрена мен Кристин менің бөлмеме келіп, осы жаңалықты айтқанда, шайтанның қарсы шабуыл жасайтынын Кристинге ескертіп айтуым керек екенін сездім. Кристинге дерт белгілері қайта оралса, шайтанға батылдықпен қарсы тұрып, шипа алғанын сеніммен жариялау керектігін түсіндіруді Дренаға тапсырдым.

Ертеңіне-ақ сынақ басталды. Кристиннің құлағы тағы да естімей қалды. Кристин біз айтқандай, сенімде тұрды. “Жоқ, шайтан, сенің өтірігіңе сенбеймін. Исаның атымен, дерттен сауықтым, сол сауыққан қалпымамын!” деп жариялады. Сол-ақ екен, құлағы ашылып кетті. Содан бері есту қабілеті төмендеген жоқ.

Шайтан қарсы шабуыл жасап, бұрын иелігінде болған жерді қайта басып алуға тырысатыны есіңізде болсын. Шегінбеңіз, жеңісіңізді шайтанның қолына беріп қоймаңыз! Құдайдың Сөзінде тұрып, табанды болыңыз!

Осы тараудың біраз бөлігін сенім қағидаларын түсіндіруге арнадым. Сенімнің қалай әрекет ететінін, өзіміздің сенімде не сенімде емес екенімізді қалай біле алатынымызды, сенімді қайдан алуға болатынын қарастырдық. Өміріңізде Құдай Патшалығының заңдары орындалуы үшін осылардың барлығын білгеніңіз жөн. Исаның дерттен айыққан әйелге “Сеніміңе бола құтқарылдың” деп айтқаны есіңізде ме? Сіздің өміріңізде де солай болмақ: сеніміңіз, Құдайдың Сөзіне нық сенетін жүрегіңіз, орағыңыз кез келген мәселе мен мұқтаждыққа жауап бола алады.

6-шы ТАРАУ

ЖАРАТҚАННЫҢ ЖАРЫЛҚАУЫ

Ресторанда кешкі асымызды ішіп отырмыз. Жанымда Дренда мен басқа қаладан келген уағыздаушы әйел бар. Кешкі сағат онның шамасы, жаңа ғана аяқталған кешкі жиналысымыз өте мықты болды. Тапсырыс алмақ болып, жанымызға официант жігіт келді. Әңгімелесіп қалдық. Қонақ әйел жиналысымыздың тамаша өткені жайлы және қауым туралы айта бастады. Сосын әлгі жігіттен “Аңшылықты ұнатасыз ба?” деп сұрады. Ол “Иә” деп жауап берді. Қонағымыз менің аңшылық әңгімелерімді қатты ұнататын еді. Сол күні мен ол кісіге өзімнің “Сенімге негізделген аңшылық” атты кітабымды сыйлаған болатынмын. Кітап үстел үстінде жатқан.

Официант жігіт қанша талпынса да, бір де бір рет бұғы ала алмағанын айтты. Біз Құдай Патшалығының заңдары туралы, олардың көмегімен қалаған олжасын ала алатынын айттық. Бірақ ондай нәрсені қысқа ғана әңгіме барысында мардымды етіп түсіндіру мүмкін емес. Жігітке әлгі кітапты ұсындым. Қонағымызға орнына басқасын беретінімді айтып едім, келісе кетті. Официант жігіт алғысын білдіріп, кітапты оқып шығатынын айтты. Алайда, мен бұл жігітті қайтып көрмейтін шығармын деп ойладым. Қателесіппін.

Бір жылдан кейін сол қызметкерді қауымымызға тағы шақырдық. Үзілісте ол кісі былтырғы ресторанға барып түстенгісі келетінін айтты. Ресторанға келіп үстел басына жайғастық. Жанымызға былтырғы официантымыз келгенде таңырқап қалдық. “Сәлеметсіздер ме, бір жыл бұрын осы ресторанға келген едіңіздер. Аңшылық жайлы сөйлескен болатынбыз” деді. “Иә, есімізде” дедік біз. “Сіздің кітабыңызды оқып шықтым. Кітапта айтылғандарды түгел орындадым. Былтыр екі бұғы атып алдым. Биыл тағы бір бұғы алмақпын”. Официант жігіттің әңгімені естіп, қуанып қалдық. Бірақ таң қалған жоқпыз. Құдай Патшалығының заңдары қашанда орындалады!

Бір жолы 25 бағушымен кездесу өткізіп, Құдай Патшалығының заңдарын үйреттім. Кездесу тамаша өтті. Кездесуді тәмамдап, шыға беріске қарай бет алдым. Зал босап, жұмыскерлер еден жууға кірісіп кеткен болатын. Сол кезде бағушылардың бірі қайтып келді. Әйелі екеуі Дрендаға жолығып, оларға уақыт бөлуімізді сұрады. Аптаның соңына дейін 6900 доллар қарызын төлемесе, үйін банк алып қоятынын айтты. Қолындағы 100 доллардан басқа ақшасы жоқ екен. “Барым – осы” деді ол. “Өзіңіз үйреткендей, осы ақшамды тұқым етіп себемін. Осы аптада қажет болып тұрған қаражат келеді деп сенемін. Менің сенімімді қолдап, мінәжат етуіңізді сұраймын”. Қол ұстасып мінәжат еттік те, Құдайға алғыс айттық.

Бір айдан кейін сол бағушыны бір жиналыста жолықтырдым. Мені алыстан көріп қалып, дереу жаныма келді. Өте қуанышты екен. “Сізге сол жолы не болғанын айтып беруім керек, – деді ол. – Өткен жолы айтқан жоқпын, әйелім екеуіміздің шағын кәсібіміз бар. Гаражымызда киімге сурет басатын жабдығымыз бар. Оқта-текте тапсырыс болып тұрады. Ауқымды тапсырыс алып көрген емеспіз. Айтпағым, мінәжат еткен күніміздің ертеңіне бірнеше тапсырыс түсті. Жалпы құны 8900 доллар. Сол аптада көп еңбек еттік. Үйдің қарызын төлейтін 6900 доллар жұма күні қолымызда болды. Сізге көп рахмет!”

Солтүстік Каролина штатында өткен, 500 бағушы қатысқан арнайы конференцияға бардым. Уағыз айтқан жоқпын, жай қатысушымын. Жаныма бір кісі келіп, “Сізбен сөйлесуім керек” деді. Германиядан келген бағушы екен. Маған айтатын әңгімесі бар көрінеді.

Бұл кісінің жасөспірім ұлы менің CD-дискілерімді тауып алып, түгел тыңдап шығыпты. Нәтижесінде сеніммен PlayStation 3 тіркемесіне қол жеткізбекке бел буған көрінеді. Сатып алатын ақшасы жоқ. PlayStation-ның не екенін білетін боларсыз (білмесеңіз, айтайын, PlayStation – ойын ойнайтын арнайы тіркеме). Бала әкесінің кеңсесіне барып, PlayStation 3-ті сеніммен қабылдайтынына ұлымен келісуін сұрапты. Менің тәлімімді тыңдап шыққанын, тұқым сепкісі келетінін, әкесімен бірге келісіп мінәжат еткісі келетінін айтыпты. Әкесі бұл сөзге көп мән бере қоймаса да, бағушы міндетін орындап, баласының берген құрбандығын қауымға көмек ретінде қабыл алыпты. Әкелі-балалы екеуі дұға етіп, ұлы сұрағанымды қабыл алдым деп сеніммен жариялайды. Бұдан былай PlayStation-ның мәселесі шешілген деп санайды.

Ертеңіне бағушыға қауымдағы бір кісі хабарласты. Қысқа мерзімді бір жобасы бар, соған көмекші керек. «Ұлыңызға уақытша жұмыс керек емес пе?» деп сұрады. Бағушының баласы жұмысқа қуана кірісті. Екі күннің ішінде PlayStation сатып алуға жететін ақша тапты.

Бұл жағдай балаға шабыт берді. Бір-екі апта өте, әкесінің кеңсесіне тағы келді. Тағы бір нәрсе үшін әкесімен келісіп мінәжат еткісі келеді екен. Не үшін дұға етеміз дегенде, Құдайдан бұлшық еттеріміздің өсіп қатаюын сұрамақпын депті баласы. Бағушы қапелімде не дерін білмей қалған екен. Сәл ойланып барып, айтқаны: «Құдайдан шыныққан бұлшық ет сұрасаң, өзің де еңбек етіп, тер төгуге дайын болуың керек. Осыған келіссең, бірге

мінәжат етуге мен дайынмын». Баласы келіседі. Сонымен, тұқым сеуіп, әкелі-балалы екеуі келісіп мінәжат етіпті.

Ертеңіне бағушының үйінің алдына бір машина келіп тоқтайды. Өздерінің қауымына келіп жүретін бір сенуші екен. Гаражын жинастырып жүріп, штангалар тауып алыпты. Сол зілтемірлер бағушының ұлына керек болар деп алып келген екен. Керек болмаса, кімге керек екенін бағушы білетін шығар. Ұлының бұлшық етін өсіргісі келетінін әкесі ешкімге айтқан жоқ. Және мінәжат еткені де – кеше ғана. Бағушы қайран қалып, таңырқап тұр. Танысы кеткеннен кейін үйге кіре сала, «Әлгі дискілерің қайда? Әкелші, тыңдайын» депті.

Мұндай әңгімелерге құлағым әбден үйренген, үнемі естимін, сіз үшін де үйреншікті болса екен деп тілеймін. Осы уақытқа дейін Құдай Патшалығының заңдары жүзеге асу үшін қандай шарттардың міндетті түрде орындалуы керек екенін қарастырдық. Біздің сеніміміз Аспан Патшалығының заңдары жер бетінде орындалуы үшін заңды негіз болып табылатынын да айттық. Енді әңгімемізді сабақтап, Патшалық заңдарының қаржы мәселесін шешуде қалай көмектесетінін қарастырайық.

Жаратқанның жарылқауы адамды бай қылар, бұл байлыққа Ол қайғы-қасірет қоспас.

– Нақыл сөздер 10:22

Осы аятты алғаш рет оқығанымда, «мұнда бір астарлы мағына болса керек, бұл аятты дәл жазылғанындай түсіну дұрыс болмас» деп ойладым. Кейін, рухани заңдарды зерттеу барысында ұққаным, дәл солай, жазылған қалпында түсіну керек екен! Аятты дұрыс түсінуіміз үшін адамның жаратылған сәтіне тоқтала кетейік.

Қайта, Киелі жазбалардың бір жерінде осы туралы біреуынанан байыппен айтқанғой: «Өзің ескеретіндей

адам сонша кім? Сен қамқорлайтындай адам баласы кім? Оны періштелерден сәл төмен қойдың, Құрмет, салтанатты оған тәждей сыйладың, Бәрін де оған бағындырып бердің».
Құдай адам баласына бәрін де бағындырып берген кезде оған бағындырмаған еш нәрсені қалдырған жоқ. Алайда біз бәрінің де адам баласына бағынғандығын қазір көре алмаймыз.

– Еврейлерге 2:6-8

Құдай әлемді адам баласына бағындырып берген болатын. Адамға бағынудан тыс қалған нәрсе болған жоқ. Адам жер бетінде Аспан Патшалығының өкілеттілігімен билік құрды. Құдайдың жердегі өкілі ретінде, Аспан Патшалығының салтанатына бөленіп жүрді. Құдай Адам атаны Өзі майлап, билеуші етіп тағайындаған болатын. Адам жаратылғанға дейін шайтан Құдайға қарсы бүлік шығарып, Аспаннан жерге қуылған еді. Құдайдың өкілі ретінде адам барлық жаратылысқа билігін жүргізіп, оның ішінде шайтанды да билеп-төстеуге тиіс еді. Өзінің табиғи, тәни қалпында адам шайтаннан әлдеқайда әлсіз, шайтан оны біледі. Құдайдың Өзіне бағынудан бас тартқан шайтан енді Жаратқан Иенің пендесіне бағынбақ емес. Алайда, Құдай Патшалығының өкілеттілігі адамға зор билік бергендіктен, Адам атаның әрбір сөзінде сол сөзді Құдайдың Өзі айтқандай құдірет бар еді. Адам Құдайдың салтанатты ұлылығына бөленген билік иесі болатын.

Сонымен, шайтан адамды қас дұшпаны санап, өшпенділікпен әрі қызғанышпен қарайтын болды. Ол Адамға берілген билікті өзі иемденуді көздеді. Дұшпанамыздың мақсаты, бір

**ЖАРАТҚАННЫҢ
ЖАРЫЛҚАУЫ АДАМДЫ
БАЙ ҚЫЛАР, БҰЛ
БАЙЛЫҚҚА ОЛ ҚАЙҒЫ-
ҚАСІРЕТ ҚОСПАС**

– НАҚЫЛ СӨЗДЕР 10:22

жағынан адамды билік пен өкілеттіліктен айыру болса, екінші жағынан, билікті өзі иемдену. Осы жолда бір-ақ бөгет бар: билікті Адамнан күшпен тартып ала алмайды, демек Адам атаны алдап, биліктен өзі бас тартатындай ету керек. Шайтан Хауа ананы Құдайға толық сенуге болмайды, Құдайдың адамнан жасырғаны бар деген өтірікке иландырды. Адам ата мен Хауа ана шайтанның сөзіне еріп, Құдайдан теріс айналды. Ақырында Адам мен Хауа Құдай Патшалығындағы мәртебесінен айырылды. Енді шайтан әлемнің билеушісіне айналды. Қорынттықтарға арналған 2-ші хаттың 4-ші аятында Пауыл елші былай дейді.

Бұлар оған сенбейді, себебі осы күнакар дүниенің «тәңірі» (әзәзіл шайтан) олардың ой-саналарын соқыр қылып қойған. Содан олар Мәсіхтің салтанатты ұлылығы туралы Ізгі хабардың нұрын көре алмайды. Ал Мәсіх Құдайдың қандай екенін айқын көрсетеді.

– 2-ші Қорынт. 4:4

Бүлік шығарғанға дейін Адам Құдайдың перзенті болудың артықшылықтарын пайдаланып, Жаратқан Иенің берген игіліктеріне рахаттанып жүрген еді. Құдайдың жаратылысы түгел Адам атаның қол астында болатын. Адам ата өмірінің бір де бір күнін жоқшылықта өткізген емес, қорқыныштың да не екенін білген жоқ. Адамның Жер шарындағы өміріне қажет болатынның барлығы өзінен бұрын жаратылып, енді иелігіне берілген еді.

Жаратылыстың басталуы кітабынан бүкіл әлем алты күнде жаратылғанын білеміз. Құдай Адамды алтыншы күннің кешінде жаратты, сөйтіп ісін тәмамдады. Жаратқан Ие жетінші күнді тыныштық күні деп жариялады. Адам сол тыныштықта өмір сүруге тиіс еді. Құдай бұл күнді тыныштық күні деп, атқарған жұмысынан шаршағандықтан жариялаған жоқ. Ісін тәмамдап, ойындағысын түгел орындап болғандықтан солай деді. Құдайдың атқарған ісі

жайлы, адамзаттың өміріне деген тамаша жоспары жайлы бір сәт ойланып көріңізші. Осының барлығынан Адамның айырылып қалғаны, Құдай берген билікті уысынан шығарып алғаны не деген өкінішті.

Адам ата Құдайдан бас тартқаннан кейін Жаратқан Ие былай деді:

*... сенің кесіріңнен жердің топырағын қарғыс атты!
Бұдан былай тамағыңды өмір бақи бейнет шегіп
топырақтан өсіріп жейтін боласың. Жердің топырағы
саған тіккенектер мен ошағандарды қаулатып, сен
далада өсетін дәнді дақылдармен қоректенетін
боласың. Өзің жаратылған жердің қойнына қайтып
кіргенше, жейтін наныңды маңдай теріңді төгіп жүріп
табатын боласың. Сен топырақтан жаратылдың,
қайтадан топыраққа айналасың!*

– Жаратылыс. 3:17-19

Назар аударыңыз, жерді қарғысқа ұшыратқан – Құдай емес, Адам. Жер толықтай Адамның билігінде еді. Жер бетіне толық әрі шексіз билігі бар Адам опасыздық жасап, Құдайдың қол астынан шығып кетті. Және сол ісімен Құдайды жердегі өмірден ығыстырып шығарып жіберді. Бұл шешімнің зардабы Адамның өзіне де, бүкіл Жер шарына да, Адам атадан кейін өмір сүрген әрбір адам баласына да тиді. Адамның жер бетіндегі билігі әлі де сақталғанымен, Адам Құдай Патшалығының өкілеттілігінен айырылып қалды. Енді адам салтанатты ұлылыққа бөленген, Құдайдың атынан билік еткен әмірші емес. Ол өмір беруші Құдайдан ажырап қалды. Енді әлемге өлім келіп, өз заңын орнатты.

Құдай Адам атаның күнәсін көрсетіп, Құдай Патшалығының өкілі болу мәртебесінен айырылғанын айтты. Бұдан былай Құдай

Патшалығының заңдары жерде жүрмейтін болды. Енді жер адамзаттың барлық қажетін Едем бағындағыдай қамтамасыз ете алмайды. Жерден өнім алып, өмірін қамтамасыз ету үшін, Адамның өзі тер төгіп, ауыр еңбектенуі қажет. Егіндік жерлерді арамшөп басып, өмір – азапқа, күнкөріс – басты мәселеге айналды.

Мұндай өмір – әрбір адам баласына төніп тұрған қорқыныш пен өлімнің арам рухына бағынып, қасірет тартып өмір сүру, қалт-құлт еткен күнкөріс – қарғысқа ұшыраған жүйе. Бәріміз де осы жүйеде туып өстік, осы жүйеде өмір сүруді қанымызға сіңірдік. 22-ші Забур жырында Дәуіт бұл жүйені «қараңғы шатқал» деп атайды.

*Қап-қараңғы шатқалда жүрсем де мен,
Қорықпаймын ешбір қауіп-қатерден,
Себебі Өзің менің қасымдасың,
Жігер береді сойылың мен таяғың.*

– Забур 22:4

Жердің бетін қорқыныш, әсіресе, ажалдан үрейлену жайлады. Жаратушысынан ажырап қалған адам өзін танудан, түсінуден де қалды. Адам жаратылғанда, оған аманат, тапсырма берілген болатын, ол әлдебір тамаша істерге тағайындалған еді. Ол Құдайдың атынан әлемге билік жүргізуге тиіс еді. Адам жаратылғанда, өмірінің нақты мақсаты, мән-мағынасы бар еді. Алайда, күнә жасағаннан кейін, бар көздегені күн көру болып, күнкөрістің қамынан аса алмай қалды. Бар мақсаты мен өмірінің мағынасы күнкөріс, күйбең тіршілік болып қалды.

Енді адамның әр шешімі мен әр қадамы осы мақсатқа бағынатын болды. Күнделікті қам-қарекетке шырмалып, материалдық игіліктерді иемденуді ғана көздеп, байлық жинап өмір сүру – қарғыстың салдары. Жүректе тыныштық жоқ, әрбір

күнің ауыр еңбекпен өтеді. Күнкөрістің күйбеңінен құтылудың жалғыз жолы – қайтсең де қаражат жинап, іргенді көміп алу.

Құдаймен қарым-қатынасы үзілгелі бері адамзаттың жалғыз арманы – күнкөрістің күйбеңінен құтылу.

Сәті түсіп, байлығын арттыра алған әркім енді сол байлығын сақтап, қорғау қамына кіріседі. Қаражаты бар адамдар байлығынан айырылып қалудан, сөйтіп, күнкөріс күйбеңіне қайта оралудан, тер төгіп еңбек етуге мәжбүр болудан қорқады.

Адамның арманы, бар көздейтіні – қайтсе де байлық жинап, күнкөріс азабынан құтылу, күн көрудің құлдығынан шығу. Қарғысқа ұшыраған осыдүниелік жүйедегі әрбір адам күнкөріс күйбеңінен қажыған. Бұған күмәніңіз болмасын.

Бір бағушының айтқан әңгімесі есімде. Ол кісі таңертең ерте тұрып, бағушы қызметін атқаруға қуана кіріседі екен. Біраздан кейін қарыздары, төленбеген төлемдері, ақшаның жетіспеушілігі есіне түсіп, көңілі су сепкендей басылады. Қаржылық мәселелері өмірін улап, қуанышын ұрлайды. Соның салдарынан қызметіне алаңсыз беріле алмайды екен. Осындай дәрменсіздік бағушылардың ғана басында емес, көптеген адамдарда да бар. Отбасылардың көбісі қарызға батып, ақшасын әрең жеткізіп отыр.

Бәріміз де қалыптасқан жағдайдан шығу жолын іздейміз. Ал күнкөріс күйбеңінен шығар жалғыз жол – молшылыққа жету. Яғни қаражатың, мүлкің, табысың жеткілікті деген деңгейден асып түсуі керек. Қарғысқа ұшыраған жүйеде адам тұлғасының құндылығы меншігіндегі мүлкіне немесе табысына қарап өлшенеді. Адам, біріншіден, жалаңаштығын қымтауға жанталаса тырысуда. Жалаңаштық деп адамның шынайы мақсаты мен болмысынан айырылуын айтамын. Шынайыдан қол үзіп, жалғанға жармасады. Әуел баста Құдайдың салтанатты ұлылығына бөленіп жүрген адам, одан айырылғандықтан, салтанат пен ұлылықтың орнын байлықпен толтырғысы келеді. Екіншіден, адамның Құдай

Патшалығындағы бұрынғы абыройлы мәртебесінің орнына менмендік пен басқа адамға үстемдігін жүргізуге деген құлшыныс келді. Адамның ендігі көксегені бір-ақ нәрсе – байлыққа қол жеткізу, байлыққа жетсе, оны қызғыштай қорғау. Енді адамның кім екенін әл-ауқаты мен қолындағы билігі көрсететін болды. Күнәға батқан адамның өзін-өзі бағалауы қоғамдағы дәрежесі мен беделіне байланысты болып отыр.

Ойландыратын нәрсе, адамдар танысқанда, алдымен нені білгісі келеді? «Немен айналысасыз?» немесе «Қайда жұмыс істейсіз?» Неге бұлай? Бізге адамның қандай кәсіппен шұғылданатыны, шынымен де, соншалық қызық па? Жоқ, ол емес, адамды мансабына қарап бағалаймыз. Мәселе сонда. Басқаша айтқанда, бұл адам кім? Дәрежесі мен беделі қандай? Бұл кісіге қаншалықты сый-құрмет көрсеткенім дұрыс? Ер адамның көзқарасын айтып отырмын. Адам тұлғасына деген әйелдердің көзқарасы басқаша екенін білемін.

Қарғысқа ұшыраған жүйе әлі де күшінде! Адамдар әр ісін, әр қадамын ақша табу мен байлықты сақтау тұрғысынан қарастырады. Жоғары айлыққа бола басқа штатқа көшіп баруға дайын, ал өмірінің мән-мағынасы мен Құдайдың өзіне берген аманатын шетке ысырып қояды. Жастар рок-жұлдыз болуды армандайды. Неге? Өйткені, аңсайтындары – байлық пен қошамет.

Бірнеше мың орта сынып оқушыларының арасында зерттеу жүргізіліпті. Зерттеу мақсаты – қандай мамандық таңдағысы келетінін анықтау. Сауалнамаға жауап берген оқушылардың 65 пайызы танымал болғысы келетінін айтыпты. Танымал дейді ме? Танымал болу деген мамандық жоқ, менің білуімше.

Басқа бір зерттеу көрсеткендей, жұмыскерлердің 30 пайызы өз жұмысын өте қатты жек көреді екен де, 40 пайызы ұнатпайды екен. Сонымен АҚШ-тағы жұмыс істейтін азаматтардың 70

пайызы айналысып жүрген кәсібіне көңілі толмайды! Жек көрсе, неге істейді ондай жұмысты? Өйткені, олар – күнкөрістің құлдары, күнін көру үшін ғана тынбай тер төгіп жүрген адамдар. Өмірлік мақсатын табу жайлы ойланбайды, көздегендері – төлемдерін төлеп шығу. Одан басқаны ойлауға жоқшылық мойын бұрғызбайды. Олардың таңдауы қаражат мөлшерімен шектелген. Қалтасы қалың адам қашанда ұтады. Міне, күйбең тірлік деген осы. Торға қамалған тышқанның дөңгелектің ішінде аласұра жүргені сияқты, қанша тырбыңдаса да, тордан қашып кете алмайды. Тордағы тышқанның қимылын қызық көреміз. Бірақ адамдардың өміріндегі дәл осындай дамылсыз жүгіріс — мүлде сүйкімді көрініс емес. Адамдар көздегеніне қол жеткізе алмаған қалпы сол дөңгелектің ішінде бүкіл өмірін өткізеді.

Сондықтан не ішіп-жейміз деп ойлап уайымға салынбаңдар! Осы күнәкар дүниенің адамдары сондай нәрселердің бәріне ие болуға тынымсыз ұмтылуда. Ал бұлардың сендерге қажет екенін көктегі Әкелерің біледі ғой. Ең бастысы, Құдайдың Патшалығының қамын ойлаңдар! Сонда Құдай сендерге бұлардың бәрін қосып береді.

– Лұқа 12:29-31

Тер төгіп еңбек ету, қиындыққа төзу, қасірет тарту – өмір деп осыларды айтамыз. Біз білетін жалғыз жүйе – осы. Мысалы, сіз барлық қарызыңызды бір жылда төлеп шығуыңыз керек, әйтпесе, отбасыңыз Солтүстік полюске (ойымды жеткізу үшін келтіріп отырған мысалым ғой) жер аударылады десем, не істер едіңіз? Не істейтініңізді айтайын, бұрынғыдан бетер тер төгіп, жанталаса жүгірудің амалын қарастырасыз. Сіз “тағы бір-екі қосымша жұмыс табамын. Әйелім де солай етеді, балаларым көмектеседі” дейсіз. Өйткені, сіз білетін қаржыландыру жүйесі – осы. Табыс

табудың өзіңіз білетін жалғыз жолы – қажырлы еңбек. Бұл жүйені сипаттайтын тағы бір мысал келтірейін.

Сіздің үйіңіз тұрған көшенің қарсы бетімен жүгіріп бара жатып, ішінде он миллион доллары бар пакет тауып алдым дейік. Бір жағынан қуанышым қойныма сыймай тұр, екінші жағынан ақша тауып алғанымды хабарлауым керек. Сізді танимын, сондықтан, үйіңізге келіп, телефоныңыздан қоңырау шалмақ боламын. Полицияға хабарласқанымда, сіз жанымда тұрып, әңгімені түгел естіп тұрсыз. Полиция қызметкері өзінде бар мәліметті тексереді де, ақша жоғалттым деген арыз түскен жоқ, сондықтан табылған ақшаны алып қалуыңызға болады деп жауап береді. (Шындығында полициядан мұндай жауап болады деп ойламаймын, дегенмен, қиялдап көрейік). Бұл жауапты естігенде, мен қуанышым қойныма сыймай, билей жөнелемін. Мән-жайды сізге де айтамын.

Мен аптығып, қуанышымды сізбен бөлісіп тұрғанымда, сіз сыпайы ғана жымыып тұрсыз. Алайда, кешкі ас үстінде осы әңгімені әйеліңізге айтқаныңызда “БҰЛ _____!” дейсіз. Сызықшаның орнына бір сөз қойғаныңыз рас па? Бұл сөйлемде ӘДІЛЕТСІЗДІК деген сөздің тұрғанын қайдан білдіңіз? Қайдан білетініңізді айтайын: өйткені санаңыз солай қалыптасқан, осындай жүйеде өскен адамсыз. Әркім ауыр еңбек етуге тиіс, басқа жол жоқ.

Жоғарыдағы мысалда мен еңбек етпестен, мол қаражатқа қол жеткіздім. Ал бұл – жүйені алдау деген сөз. Бұлай болмау керек, өйткені, әділдікке жатпайды. Мен бұл ақшаны еңбек етіп тапқан жоқпын, тауып алдым ғой. Сіз өзіңізге мұндай ақша тауып алудың сәті түспесін біліп, қызғанышқа батасыз, біреу аяқтың астынан он миллион доллар тауып алғанда, өз өміріңіз күнкөрістің құлы болумен өтетінін біліп, қайғы жұтасыз.

Мен бір күні қауымға жұпыны ғана киіммен келіп, ортаға шығамын да, “Дренда екеуіміздің арманымыз орындалды!

Соңғы он жыл бойы біз тәулігіне 22 сағат жұмыс істеп, үйіміздің ипотекасын төлеп шықтық” десем, отырғандар қол шапалақтап, қуанышты дауыстар естілер еді. Неге дейсіз ғой? Өйткені, біреудің қолынан келген іс басқаларға да жігер береді. Басқа біреудің қолынан келсе, менің де қолымнан келеді! Табандылық танытып, қажырлы еңбек етсем, қиындыққа төзсем, мен де қарызымды төлеп шығамын. Ал егер жолдан ақша тауып алдым десем, ешкім қол соқпайтын еді. Әлгі сөйлемдегі бос орынға қандай сөз қою керек екенін қайдан білдіңіз? Өйткені, ойыңыз, ұстанымыңыз – сол. Әділдік – бәріміз білетін ауыр еңбек. Тер төкпей, оңай келген ақша – әділдік емес.

Ауыр еңбек жүйесінен шығу – әр адамның арманы. Байып, миллионер болып кету – көптеген адамның жатса-тұрса, көкейінен кетпейтін арманы. Миллион доллар – бұрынғыдай көп ақша емес, бірақ осы сөз тіркесінің өзі байлықтың баламасы болып қала береді. Байлық – азаттықтың сыңары, көптеген адамдардың өміріндегі күйбең тіршіліктен шығу мүмкіндігі. Дөңгелек ішіндегі жанталасқан жүгірістен бәріміз шаршағанбыз. Ал миллион доллар сол жүгірістен дамылдап, жүрегің қалайтын іспен айналысуға мүмкіндік берер еді. Лотерея ойынының тартымдылығы неде деп ойлайсыз? Өйткені, ұтыс еркіндіктен дәмелендіреді. Таңдау еркіндігі, шешім қабылдау еркіндігі, ақшамды қайтсем жеткізем деген қарбалас емес, еркіндік.

“Кімнің миллионер болғысы келеді?” атты шоудың көрермені өте көп. Бұл телебағдарламаның өтімді болуының себебі – жұрттың бәрі, кедейшіліктен арылып, еркін өмір сүрсем деп армандайды. Көрермендер шоуға қатысушыларды қолдап, оларға жанкүйер болады, миллион доллар ұтып алады деп үміттенеді.

Тақырыбымыздан сәл ауытқып, ескерте кетейін, ұрлық та – еңбек етпей, оңай ақша табудың жолы. Қарғысқа ұшыраған жүйеден азат болудың бұрмаланған жолы. Жұрттың бәрі

қарбаластан, қажытатын жұмыстан құтылғысы келеді, осыны мойындағанымыз жөн! Ал оның амалы бар ма? Еңбек етпей, табыс табудың түрлі амалдары көп, әрине. Қайтыс болған туысынан 20 мың доллар мұра қалғанын, сол ақшаны сақтап бере алатын адам іздеп жүргенін жырдай ғып жазатын адамдар бар. Жердің түкпір-түкпірінен сондай хаттың күніне он шақтысын аламын. Байлығын сақтап беруге келіссем, ақысына жартысын беретін болады. Әрі қарай олар құжаттарын рәсімдеуге аздап қаражат сұрайды, мұраға қалған ақшаны сонда ғана ала алады-мыс. Мені соншалық ақымақ санайды ма?

Инвестиция жасаудан кеңес алмақ болып бір клиентім хабарласты. Мен өзім қоятын, әдеттегі сұрақтарымды қойып отырмын. Әлгі кісі бес миллиондай ақшасын жақсы компанияға салғысы келеді екен. Бұл мұраға қалған ақша. Бірақ қаражат әлі қолына тимеген, ақшасын мұрагер ретіндегі барлық құжаттарын рәсімдеп болған соң ғана алады. Онысы екі аптаға созылатын шаруа екен. Екі апта өткенде клиентіме телефон соқтым. Ақшасын әлі алмапты.

Қайтыс болған туысы, көзі тірісінде ақшасын Еуропадағы банктердің бірінде сақтапты. Енді мұрагері сол ақшаны ала алмай жүр. Осы жайт маған күдікті көрінді. Сондықтан мән-жайды тәптіштеп сұрастырдым. Оқиға былай болыпты: бұл кісіге біреу хабарласып, Францияда өзі білмейтін бір туысы болғанын, сол туысының қайтыс болып, артында банкте сақталған бес миллион доллар ақшасы қалғанын айтыпты. Қайтыс болған адамның жалғыз мұрагері – осы кісі болып шығыпты-мыс. Ақшаны банктен шығару үшін 50 мың доллар көлемінде салық төлеу керек екен. Сонда ғана көкесінен қалған мұраға заңды түрде ие бола алады. Сол елу мың долларды қайдан аларын білмей, үйін кепілдікке қойып, банктен несие алуға арыз жазған екен.

Заңгер жалдадың ба деп сұрап едім, “бұл мәселемен

Франциядан телефон соққан заңгер айналысып жатыр” деді. “Яғни, Америкада өзің жалдаған заңгерің жоқ па?” деп сұрадым. “Жоқ, маған хабарласып, сол ақшаға мұрагер екенімді айтқан заңгер ғана”. Елу мың доллар керек деген де сол адам екен. Менің клиентім ондай соманы таба алмайтынын айтқанда, Франциядағы заңгер жиырма бес мың доллар тапсаң, қалғанын өзім қосамын, ақшаңды алғаннан кейін қайтарасың депті. “Жоқ, келісе көрме, мынауың алаяқ!” дедім. Францияда көкесі барын бұрын-соңды естімеген адам, әлдебіреудің айтқан хикаясына әбден сеніп қалыпты. Арада тағы екі апта өтті. Клиентіме тағы хабарластым. “Банкте бес миллион доллар бар. Егер сол ақшадан салық ұстап қалуға тиіс болса, саған арнайы құжат жібереді. Сен қол қойып, банктегі ақшадан елу мың доллар ұстап қалуға келісім бересің. Мәселе солай шешілуі тиіс қой” деп тағы айттым. Өкінішке орай, танысым маған емес, әлгі Франциядағы “заңгерге” сенді.

Өткен аптада өзіміздің қауымда да осыған ұқсас оқиға болды. Бір жігіт инвестиция жасау жайлы кеңес сұрап келді. Мұраға қалған ақша екен, жуырда Еуропадан келуі керек. Сөзін бөліп, “Иә, иә, арғы жағын айтпасаң да, білемін, — дедім. — Енді сен оларға біраз ақша жіберуің керек, сонда ғана көкеңнен қалған ақшаны аласың, солай ма?” “Солай. Оны қайдан білдіңіз?” Әлгі клиентіме айтқанымды бұл жігітке де айттым: алаяқтарға кез болдың дедім. Бұл жігіт те қайтыс болған туысын білмейді екен, ондай адам туралы тіпті естіген де емес. Өзіміздің елде заңгер жалдаған жоқ. Сонда да Еуропадағы банкте ақшасы бар екенін айтып, менімен біраз айтысты. Адамдар осындайға неге сенгіш? Өйткені, еркіндікті аңсайды! Сол ақшаның қолына түсуінің миллиардтан бір мүмкіндігі болса да, сол мүмкіндікті қалт жібергісі келмейді.

Тағы бір мысал келтіруге рұқсат етіңіз. Дренда екеуіміздің қаржы қызметтеріне байланысты кәсібіміз бар. Ол Америка Құрама Штаттарын түгел қамтиды. Бұл тамаша бизнес! Компаниямыздың беретін мүмкіндіктері өте жақсы, біздің адамдар жылына

мыңдаған доллар табыс табады. Сонымен қатар, бұл бизнес едәуір білімді қажет етеді. Менің жұмыскерлерім басқа адамдардың қаражатын алып, айналымға салады. Бұл – үлкен жауапкершілік. Қаржы саласындағы заңдарды жақсы білуің керек, қаржылық жоспарлау стратегияларынан да хабардар болу шарт.

Огайо штатындағы Колумбус қаласының жергілікті мәсіхшілік радиостанциясына резюме қабылдаймын деп хабарландыру бердім. Компанияма бірнеше жұмыскер керек болатын. Елу шақты адам келді. Талапкерлермен сұхбаттасардан бұрын, келгендерді бір залда жинап, кездесу өткізбек болдым. Сол кездесу барысында талапкерлермен танысып, компаниямыздың талабына сай келетіндерін сол жерде-ақ іріктеп алмақ едім.

Кездесу кезінде компаниямның нарықтағы зор әлеуеті туралы, қаражатпен жұмыс істеуді үйретуді ғана емес, қаржы саласына деген мәсіхшілік көзқарасты таратуды көздейтініміз айтылды.

Сонымен қатар, жұмыскерлердің біліміне, лицензиясына қойылатын талаптар жайлы, төленетін компенсацияларға, басқа да түрлі процедураларға деген талаптарымызды да айттық. Жылына 200 мың доллар табыс табу үшін қандай көлемде еңбек ету қажет екенін білгенде, талай талапкердің беті қайтып қалатынын тәжірибемнен білемін.

Кездесу аяқталған соң қонақұйдің дәлізіне шықтым. Үлкен банкет залының есігі ашық тұр екен. Жанынан өтіп бара жатып, байқағаным, зал лық толы, мыңға жуық адам жиналған. Атышулы көп деңгейлі компанияның презентациясы өтіп жатыр екен. Менің компанияма келген елу адам мен мына отырған мың адам, осынша айырмашылықтың себебі неде? Бұл сұрақтың жауабы: ақша! Әлгі компанияның жұмысы көпшіліктің санасында “Компанияға кіріп, соңымнан үш адам алып келсем, бітті, миллионер болып шыға келемін” деп қалыптасқан. Шынтуайтында, мүлде олай емес. Қаржы саласында көп жыл жұмыс істеген адаммын, сондықтан,

көп деңгейлі компанияларда жақсы табыс табатындардың ауыр еңбек ететінін жақсы білемін! Ондай компаниялар ақша табу мүмкіндігін беретіні рас. Алайда, ондағы табыс – оңай табыс емес. “Бұл мүмкіндікті жіберіп алсам, санымды соғып қаламын. Мына адамдарға қарашы, олар көп қиналмай табыс тауып жүр ғой, мен де солай байи қаламын” деп алданбаңыз. Мені дұрыс түсініңіз. Көп деңгейлі компанияда жұмыс істеп, байыған достарым бар, MLM-компаниялардың ішінде жақсылары бар. Оларды жаппай жамандап отырған жоқпын. Менің айтпағым, көп деңгейлі компания мүшелерінің көбісінде болатын теріс ұғым. Басқаларды оңай табыстан дәмелендіріп, өзіңнің қалтаңды толтыру – жердегі қарғысқа ұшыраған жүйеге тән нәрсе.

Бір сәтке тоқтап, ақша жайлы қанша ойланатыныңызды байқап көріңізші. Табыс табу мен қаражатты сақтау жайлы ойлар таңның атысынан кештің батысына дейін санаңыздан шықпайтынын білсеңіз, қатты таң қалатын боларсыз. Тағы да қайталап айтамын: күнкөрістің қамынан бәріміз шаршадық, үздіксіз күйкі тірліктен әрбір адамның дамылдағысы келеді!

Демалыс күні ғана тоқтап, дамыл табамыз. Жексенбіні сол үшін жақсы көреміз. Зейнетке шығудың рахаты сол, қалаған ісіңмен шұғылдануға болады. Мені дұрыс түсініңіз. Адамдардың қалайтыны – түк бітірмей, қол қусырып отыру емес. Құдайдың өмірімізге деген еркі – сол деуден де аулақпын. Біз белсенді өмір сүруге, әрекет етіп, өзімізге тапсырылған аманатты орындауға, алдымызға қойылған мақсатқа жетуге жаралғанбыз. Өкінішке орай, көбіміз күнкөрістің қамымен күйбеңдеп жүріп, арман-мақсатымыздан көз жазып қалғанбыз.

“Жұмыс істеуге міндеттімін” немесе “жұмысқа баруға тиіспін” деген сөзді бәріміз де айтқан болармыз. Әлденені істеу міндетке айналғанда, адам көбінесе көтеріңкі көңіл-күй кешпейді. Алайда, жұмысқа өз қалауымен барып, құлшына еңбек еткен адам

жайнап жүреді. Өкінішке орай, мұндай бақыт сирек кездеседі. Көбіміз “жұмысқа баруға міндеттіміз”. Айлық алу үшін жүрмін ғой, кеңсеге барып тағы бір күн шыдасам, әйтеуір, үйтіп-бүйтіп, күнімді көрсем болды. Жас кезде көбімізде асқақ арман бар. Ұнатпаған жұмысқа уақытша шара ғой деп көнесің. Төлемдерімді төлеу үшін істей тұрайын, шыдайын дейсің. Сөйтіп жүріп, өміріңнің күйкі тірлікпен өтіп кеткенін бір-ақ түсінесің. Жасы қырықтан асқан адам, көбінесе, тығырыққа келіп тығылғанын, одан шығар жолдың жоқ екенін ұғады.

Достым, Құдайдың сізге дайындап қойған өмірі бұл емес. Оны өзіңіз де білесіз. Болашағыңыз өзекті өртеген өкінішке толы болмасын деп, Дренда екеуіміз көп жылдан бері мынаны айтып келеміз: қаражат мәселесін шешпесеңіз, Құдай өзіңізге дайындап қойған тағдырға кіре алмайсыз, өміріңіздің бірегей мақсатын, сізге берілген аманаттың қандай екенін біле алмайсыз. Қаржы мәселесін шешіп алмай, өміріңіздің соңына дейін жер бетіндегі қарғысқа ұшыраған күнкөріс жүйесіне тәуелді болып, соған шырмалып өтесіз.

Қаржы мәселесін шешіп алмасаңыз, қандай мақсатпен дүниеге келгеніңізді ешқашан біле алмайсыз!

Енді өміріңіз қандай бола алар еді, сол жайлы сөз қозғайық. Сіздің бір хоббиіңіз, әуес ісіңіз бар ма? Мәселен, сіз гольфты жақсы көресіз делік. “Тұь, бүгін тағы да гольф ойнауға тиіспін” деп қынжылған адамды көріп пе едіңіз? Ал біреудің “Қап, жұма күнінің кеші де келіп қалды-ау. Жұма күнді, әсіресе, жұманың кешін жақтырмаймын. Шіркін, дүйсенбі тезірек келсе екен. Рахаттанып тұрып жұмысқа барар едім” дегенін естігеніңіз бар ма? Ал, мысалы, сіз балық аулауға әуессіз дейік. “Бүгін тағы да балық аулауға баруым керек пе? Неге?” деген сөз аузыңыздан шығады ма? Қайдам, ондайды айта қоймассыз. Өйткені балық аулау – сүйікті ісіңіз. Ал істеп жүрген жұмысыңызға да дәл осылай

ЖАРАТҚАННЫҢ ЖАРЫЛҚАУЫ

әуес болсаңыз ше? Жұмысыңыз азап емес рахат болса ше? Қиналып емес, қуанып жұмыс істейтін болсаңыз, өміріңіз қандай болар еді? Ақшаңыз отбасыңызды қамтамасыз етуге жеткілікті болса, қаражат жағынан қам жемейтін болсаңыз, қалай болар еді? Ондай мүмкіндік бар ма? Дренда екеуіміз бар екенін білдік!

Жаратқанның жарылқауы адамды бай қылар, бұл байлыққа Ол қайғы-қасірет қоспас.

– Нақыл сөздер 10:22

Осы аятты асықпай қайталап оқып шығыңыз. Ежелгі еврей тілінен аударғанда, бұл аяттың мағынасы мынадай: «Жаратқанның жарылқауы байлық береді, бірақ ауыр еңбекті қосып бермейді». Көріп тұрсыз ба? Құдай Патшалығы бізге Адам атадан қалған, қарғысқа ұшыраған жүйеден азаттық береді. Осы аятта айтылған сөзді тікелей мағынасында түсінуге болады ма? Болса, өте жақсы жаңалық емес пе? Бәлкім, көптен бергі жаңалықтардың ең жақсысы болар. Иә, солай! Міне, сондықтан да Ишая пайғамбардың кітабында Исаның қызметі туралы былай деп жазылған:

Маған Жаратушы Тәңір Ие Өзінің Рухын қондырды. Жаратқан Ие мені жарлыларға ізгі хабар жеткізуге және жаралы жүректерді жұбатып орнықтыруға тағайындады, сондай-ақ тұтқындарға босатылатындарын, бұғаудағыларға азат болатындарын жар салуға жіберді.

– Ишая 61:1

Жердің бетіндегі қарғыс атқан жүйеде өмірі өтіп жатқан адам үшін ең қуанышты хабар – қандай хабар деп ойлайсыз? Қаражат бостандығы, әрине! Жер бетіндегі қарғысқа ұшыраған жүйе әрбір

адамды тер төгіп, қажырлы еңбек етуге міндеттейді. Иса болса, Құдайдың Патшалығы бізді қамтамасыз етіп, сол жүйеден азат етеді дейді. Шыны керек, қанша жерден жанталасып жүгірсеңіз де, белгілі бір жылдамдықтан аса алмайсыз. Адамдардың көбісі барын салып жүгірсе де, азаттыққа жете алмайтынын түсінеді. Қолымнан келгенше еңбектенсем де, Дренда екеуіміз тоғыз жыл бойы қарызға батып өмір сүрдік. 27 жыл ішінде компаниямызға келген мыңдаған клиенттеріміз де солай жанталасып жүрген адамдар. Алайда, қаржылық құлдықтан шығу қол жетпес армандарына айналған. Қанша еңбектенсе де, тұзақтан шыға алар емес. Олар қаражат саласында толық күйреген, қаржылық тәуелсіздікке жетем деген арманы алыстап барып, ғайып болған адамдар, олардың өміріндегі арман-мақсаттың орнын күнкөрістің қамы басқан.

«Қамсыздандыру» деген сөзді қарастырайықшы. Қамсыз болсақ, керегіміз қамтамасыз етілген болса, арман-мақсатымызға жету мүмкіндігі пайда болады. Өмірінің мән-мағынасын ойлауға қамтамасыз етілмеген адамның шамасы жоқ, өйткені, арман-мақсаты күнделікті қам-қарекетінен аспай қалады. Адамдардың көбісі осылай, арман-мақсатсыз өмір сүреді. Бұл – құлдықтың жасырын түрі, дегенмен, нағыз құлдық.

7-ші ТАРАУ

ЕСІК

Құдайдың Патшалығы жайлы білгендерімізді қысқаша шолып шығайық. Біріншіден, адамның жер бетіне билік жүргізу мақсатымен қоныстандырылғанын білдік. Еврейлерге арналған хаттан (2:7-8) жер бетіндегінің барлығы адамға бағындырылғанын көрдік. Яғни, адам – жер бетіндегі билік иесі. Жерге әмірін жүргізбек болған тыс күштер тек адам арқылы ғана әрекет ете алады, жерге билік етудің басқа жолы жоқ. Шайтан мұны біледі, сондықтан ол Адам мен Хауаға қарсы саясат жүргізіп, билікке қол жеткізбек болды. Адам ата мен Хауа ана шайтанның қармағын ілініп, күнә жасағанда, олар өздерінің өміріндегі Құдайдың заңды билігінен бас тартты. Олар жаратылған сәтінен бастап, Киелі Рухқа бөленіп жүрген еді, енді Құдайдың Рухы олардан кетті. Адам мен Хауаның тәні ғана емес, жаны мен рухы да жалаңаш қалды. Екеуінің Киелі Рухтан айырылып қалғандағы күйреген күйлері көз алдымда. Олар сол сәт жапырақтардан өздеріне лыпа жасай бастады. Өйткені, осалдық пен жалаңаштықтан пана іздеді.

Адам жерді басқару мәртебесін сақтап қалғанымен, рухани билігінен айырылып қалды. Ол өз таңдауын жасады, шайтанға сеніп, Құдайға қарсы бүлік шығарды. Енді ол шайтанға мойынсұнды, сөйтіп, шайтанға шығарылған үкімге ортақтасты.

Шайтанға белгіленген мәңгі жаза – тозақ, азап орны Құдайдан мәңгіге аластатылғандардың баратын жері. Тозақ – адамға арналған жер емес. Адамдардың онда түсуі – Құдайдың еркі емес.

Бұдан кейін Патша Өзінің сол жағындағыларға да былай деп үкім шығарады: «Менен аулақ кетіңдер, қарғыс атқандар! Шайтанға және оның хабаршыларына дайындалған мәңгілік тозақ отына түсіңдер!»

– Матай 25:41

Адамды осындай қорқынышты болашақтан құтқару үшін Құдай жердегі Өзінің билігін қалпына келтіруі керек еді. Шайтан алып қойған билікті Өзіне қайтарудың амалын табуы тиіс. Мұның жалғыз жолы бар. Күнәға арамданбаған біреу Адамның жазасын ерікті түрде өз мойнына алуы керек. Алайда, бұл жоспардың жүзеге асуына бір кедергі бар. Жер бетін мекендеген әрбір адам баласының бойында күнә бар. Соның салдарынан Құдайдың Рухы мен билігін алып жүре алмайды. Құдай бұл мәселені шешудің жолын тапты. Бұл жоспар бойынша Құдайдың стандарттары мен заңдары жерде жазылып, бекітілуі тиіс. Әрі адамның күнәсін өз мойнына алатын тұлға сол заң бойынша айып атаулыдан таза болуы керек. Сонда ғана ол Адамға белгіленген жазаны өз мойнына ала алады.

Ендігі мәселе, жазықсыз жазаланатын адам Адам атадан тарам ауы керек, өйткені Адам атаның ұрпақтарының қанында атадан балаға берілетін күнә бар, Адам атаның әулеті Құдайдан ажырап қалған. Олай болса, Құдайдың жоспары жүзеге қалай аспақ? Ол үшін Құдай жерге Адам атадан тарамайтын адамды әкелуі керек. Және ол Адамның жазасын мойнына алуға келісуі шарт. Бірақ жер Адам ата мен оның ұрпақтарына берілген, сондықтан, жер бетіне басқа бір жаратылысты сырттан әкелу заңға сыймайды. Жалғыз жол – сол адам жерде туып өсуі керек,

бірақ Адам атаның ұрпағынан тармауы керек.

Бір қарағанда, мұндай жоспардың жүзеге асуы мүмкін емес. Алайда, ондай мүмкіндік бар еді. Құдай заңды түрде ер адамның ұрығын әйел адамның құрсағына сала алады. Құдайдың құдіреті соған жететініне сеніп, сенімі арқылы Құдайға осы жоспарды жүзеге асыруға құқық беретін ер адам табылса болды. Жердегі тіршіліктің кілті адамның қолында екенін ұмытпайық. Шайтан сол кілтті пайдаланып, Адам атаның жердегі рухани билігін ұрлап алды. Құдайдың жоспары жүзеге асуы үшін және жоспардың орындалуы заңға қайшы келмеуі үшін (олай болмаса, шайтан міндетті түрде заңның бұзылғанын алға тартар еді) Құдай балалы бола алмайтын еркек пен әйелді табуы керек, ол екеуі Жаратқан Иенің өздерін балалы ете алатынына сенуі шарт. Яғни, олар Құдайдың құдіреті мүмкін емес нәрсені болдыруға жететініне сене алатын болуы керек.

Бұл баланың дүниеге келуі оның әулеті арқылы барлық халықтар жарылқанады деген уәденің орындалуының алғашқы қадамы болар еді. Сол баланың ұрпағы арқылы Құдай Исаны осы әлемге заңды түрде келтірер еді. Құдайдың құдіреті өлі құрсаққа бала бітіруге жететініне сене алатын жұп табылса, ол екеуі сол бала арқылы барлық халықтар жарылқанатынына, оның ұрпағы теңіз жағасындағы құмнан да көп болатынына сене алса, Құдай Мәриям қыздың құрсағына бала бітіруге деген заңды құқыққа ие болар еді. Ондай адам табылды ма? Иә, оның аты Ыбырайым, ол – сенушілердің түп атасы.

*Үміттенетін еш шара қалмаған кездің өзінде
Ыбырайым үмітін үзбей, сенімінде берік тұра берді.
Сондықтан да ол «Сенің үрім-бұтағың да осындай
сансыз көп болады!» деген уәде бойынша көптеген
халықтардың рухани түп атасы болды. Жасы жүзге
келіп қалған Ыбырайым өз денесінде ешқандай*

күш қалмағанын, әйелі Сараның да құрсағына бала бітпейтінін жақсы білгенімен, уайымдап сенімін әлсіретпеді. Қайта, Ыбырайым Құдайдың уәдесіне күмәнданбай, Оған деген сенімінен қуат алды. Осылай ол Тәңірдің өз уәдесін орындай алатынына қалтқысыз сеніп, Оған құрмет көрсетті

– Римдіктерге 4:18-21

Ыбырайым мен Сара Құдайға сеніп, балалы болды, әбден қартайған шағында дүниеге Ысқақ келді. Ыбырайым Құдайдың сөзіне сенгендіктен, жарылқау ол ашқан есіктен кірді. Иса Ыбырайымның әулетінен шығуы тиіс еді. Осы тұста айтқанымды түсіндіре кетейін. Құдай Исаны бұл дүниеге заңды түрде тек Ыбырайымның ұрпағы арқылы ғана келтіре алатын еді. Басқа заңды жол жоқ! Сондықтан да Матай жазған Ізгі хабардың 1-ші тарауын оқысаңыз, кімнен кімнің туғаны жазылған ұзақ-сонар тізімді көресіз. Бұл тізімнің кітаптың басында келтірілуі тегін емес. Ол Исаның жер бетіне Ыбырайым әулеті арқылы келгенін дәлелдейді. Шайтанның жер бетіндегі билікке таласы бар, сондықтан заң талабының орындалуы жайлы бұл мәлімет маңызды. Тізім дұрыс болмаса, немесе Иса Ыбырайымның әулеті емес, басқа әулеттен шыққан болса, шайтан Исаның тууы мен өмірін заңсыз деп тануды талап етер еді. Онда Иса біздің күнәміздің құнын өтеуге құқылы болмас еді.

Есіңізде болар, Израилдіктердің бөтен халықтармен құда болуына тыйым салынған болатын. Жат елдің адамымен некелескендер өлім жазасына кесілетін. Қан тазалығы не себепті қатаң сақталғанын енді түсініп отырған боларсыз. Израил жігіттерінің бөтен елден әйел алғаны кездесетіні рас, мысалы Израил тыңшыларын жасырып қалған, Иерихон қаласының тұрғыны Рахаб. Оның аты Матай жазған Ізгі хабардың 1-ші тарауында аталады. Рахаб Израилдікке тұрмысқа шыққан болатын.

Мұнда есте болар жайт, ұрпақ ер адам арқылы жалғасады.

Осы тұста тақырыптан сәл ауытқысам ба деп едім. Бүгінгі таңда адам баласының жерді мекендегеніне қанша уақыт болғаны туралы пікірталас көп. Осы мәселеде шындаққа жете аламыз ба? Иә! Неге десеңіз, айтайын, Матай жазған Ізгі хабардың 1-ші тарауындағы тізімнің дәл екеніне дау жоқ. Исаның шежіресіне кірмей қалған бір де бір ата жоқ. Шежіре дәл болмаса, шайтан талас тудырар еді. Бұл тізімде бір де бір қатенің кетуі мүмкін емес! Осы тізімге негізделіп, адамның жерді мекендегеніне қанша жыл болғанын есептей аласыз. Ойыма келіп тұрғанда айта салайын дегенім ғой.

**ЫБЫРАЙЫМ МЕН ОНЫҢ
ҰРПАҚТАРЫ ТЕР ТӨГІП,
АУЫР ЕҢБЕКТЕН ҚАЖУ
ҚАРҒЫСЫНАН АЗАТ ЕДІ.**

*Мен сенен үлкен халықты өрбітіп таратамын,
Сені жарылқаймын әрі атыңды шығарамын.
Сен арқылы ақ батам басқаларға да жететін болады.
Саған ақ батасын бергендерді Мен жарылқаймын,
Ал кім сені жамандап қарғаса, соны Мен қарғаймын.
Сен арқылы жер бетіндегі бар ұлттар жарылқанады».*

– Жаратылыс 12:2, 3

Ыбырайым ашқан есік арқылы кейін әлемге заңды түрде Иса келіп, жер бетіндегі бар ұлттарды жарылқады. Ыбырайым мен оның ұрпақтары Құдай Патшалығының жер бетіндегі билігі мен ықпалын қалпына келтіруге қажет заңды құқық пен өкілеттілікті Құдайға бергенімен, Иса келіп, Адамның күнәсінің құнын өтеп шыққанға дейін, адамзат әлі де күнә мен рухани өлім тұзағында қала берді. Ал әл-ауқат жағын қарастырсақ, Ыбырайым мен оның ұрпақтары молшылықта өмір сүрді. Сүндеттеліп, Құдаймен арадағы келісімге кірген олар қарғыстан да, ауыр еңбек азабынан да азат өмір сүрді.

Ыбырам малға, күміс пен алтынға өте бай болатын.

– Жаратылыс 13:2

Киелі Кітаптың осы тұсы Келісімнің арқасында адамның қажетін қамтамасыз ету саласындағы түбегейлі өзгеріс болғанын көрсетеді. Осы аят пен Жаратылыстың басталуы кітабының 3-ші тарауы, 17-ші аятындағы Құдайдың Адам атаға айтқан сөзін салыстырып көріңізші, айырмашылықты көріп тұрсыз ба? Есіңізде болар, Адам ата күнә жасағаннан кейін, Құдай оған “тамағыңды өмір бақи бейнет шегіп топырақтан өсіріп жейтін боласың» және “бұдан былай жейтін наныңды маңдай теріңді төгіп жүріп табатын боласың» деген еді. Ал енді, Ыбырайымға келсек, бұл қарғыс күшін жойған секілді. Құдай: «Сенен үлкен халықты өрбітіп таратамын» дейді. Ыбырайым Жаратушының қолдауынсыз қалып, өз күшіне ғана сенеді, маңдай терін төгіп жүріп, нанын бейнетпен тауып жейді делінбеген. Қайта, іске Құдайдың Өзі араласатыны айтылған! Жаратқан Ие: «Мен өрбітіп таратамын!» дейді. Осыдан кейін Ыбырайым күнін әрең көріп жүрді ме? Жоқ!

Ыбырайым бай болатын! Оның ұрпақтары да дәулетті адамдар еді! Ыбырайым қарғысқа ұшыраған жүйеден тыс өмір сүрді. Байлығы өзіне жетіп, артылатын! Өзгерістер көп құттірген жоқ. Игі өзгерістер Ыбырайымның ұрпақтарына да тарады. Ыбырайымның шөбересі Жақып қайын атасы Лабанның малын бақты. Лабан Жақыптың жолы болғыш адам екенін көріп, алдап аяғынан шалмақ болды. Шын мәнінде Жақып – жолы болғыш адам емес, Құдайдың батасы қонған адам еді. Құдай Лабанның айласын өзіне қайтарды да, Жақыпты бұрынғыдан бетер жарылқады. Яғни әлдекім Құдайдың жарылқауын тоқтатпақ болып, қанша күш салса да, адамның қолынан ол келмек емес. Ыбырайымның ұрпағы Құдайға табынып, Келісім шарттарын сақтап жүрген жағдайда, Жаратқанның жарылқауы сарқылған жоқ.

Осының бәрін тереңірек саралап көріңізші! Маған ақша

жайлы тым көп айтасың деп айып тағатындаркөп. Сондай мазмұндағы хаттар поштама да, электронды поштама да көптеп келеді. Табысты болу – Құдайдың еркі емес, Құдайға қызмет етудің құны – бейнет пен қасірет, табандылық танытып, сол қасіретке төзуіміз керек деген мағынадағы хаттар. Бұл оймен бір жағынан келісемін. Марқа жазған Ізгі хабардың 10-шы тарауы, 30-шы аятында Иса, шынымен де, құдалау көретінімізді айтады. Өкінішке орай, көптеген мәсіхшілер Құдайды қатал қожайын деп санайды, сенушінің өмірі қасірет-қайғы, ауру-сырқауға толы болуы керек деп сенеді. Жоқ, мұндай өмір – жарылқау емес, қарғысқа ұшыраған жүйедегі өмір!

Құдай сенің қаржылық жағдайыңды нығайтқысы келеді!

Қаражат жағынан қамсыз болмасаң, қаржылық жағдайың нық болмаса, өмір бойы күнкөрісті ойлап өтесің. Өзіңе берілген Құдайдың аманатын орындауға мойын бұруға шамаң келмейді. Мұндай өмір, сайып келгенде, – құлдық. Құдайдың Ыбырайымның ұрпағына айтқанын оқып көріңіз:

Құдайларың Жаратқан Ие өздеріңе беріп жатқан елінде сендерді жарылқап, қамбаларыңа және қолға алған барлық іс-әрекеттеріңе ақ батасын жаудырады. Егер де Құдайларың Жаратқан Иенің өсиеттерін сақтап, Оның тура жолымен жүретін болсаңдар, онда Жаратқан Ие ант еткеніндей, сендерді Өзіне

**ЖАРАТҚАН ИЕ ӨЗІНІҢ
«ИГІЛІКТІ ҚАЗЫНАСЫН»,
ЯҒНИ «АСПАННЫҢ
ҚАҚПАЛАРЫН», АШЫП,
ЕЛІҢЕ МЕЗГІЛІНДЕ
ЖАҢБЫР ЖАУДЫРЫП,
ҚОЛҒА АЛҒАН БАРЛЫҚ
ІС-ӘРЕКЕТТЕРІҢДІ
ЖАРЫЛҚАЙТЫН
БОЛАДЫ. СЕНДЕР
КӨП ХАЛЫҚТАРҒА
ҚАРЫЗ БЕРІП, ӨЗДЕРІҢ
ЕШҚАЙСЫСЫНАН
ҚАРЫЗ АЛМАЙСЫҢДАР.**

– ЗАҢДЫ ҚАЙТАЛАУ 28:12

бағышталған қасиетті халқы етіп бекітеді. Сонда жер бетіндегі күллі халықтар Жаратқан Иенің атымен аталғандарыңды көріп, сендерді қастерлеп, сендерден қаймығатын болады. Жаратқан Ие ата-бабаларыңа сендерге табыстауға ант еткен елінде әр түрлі игіліктерді молынан сыйламақ: сендердің ұл-қыздарыңа, малдарыңның төлдеріне, жеріңнің өніміне Ол ағыл-тегіл молшылық дарытады.

Жаратқан Ие Өзінің «игілікті қазынасын», яғни «аспанның қақпаларын», ашып, еліңе мезгілінде жаңбыр жаудырып, қолға алған барлық іс-әрекеттеріңді жарылқайтын болады. Сендер көп халықтарға қарыз беріп, өздерің ешқайсысынан қарыз алмайсыңдар. Егер де Құдай Иелеріңнің өсиеттеріне құлақ асып, оларды сақтап орындайтын болсаңдар, онда Жаратқан Ие сендерді көштің аяғы емес, басы етеді. Сендер төменде емес, тек жоғарыда жүретін боласыңдар.

– Заңды қайталау 28:8-13

Израил халқы әлі Уәде етілген жерге кіріп, қоныстанған жоқ. Жаңа жерді иеленіп, орныққан жоқ. Дегенмен, Мұса пайғамбар Құдайдың оларды орнықтырып, нығайтатынын, Өз халқы етіп бекітетінін айтады! Осыны тереңірек түсіндіру үшін емен ағашын мысалға келтірейін. Еменнің көшеті – нығайтылған ағаш емес. Көшетті қашан және қайда апарам десеңіз де, өз еркіңіз. Алайда, тамырын тереңге жайып, өсіп, кемеліне келген еменді ешкім де орнынан қозғай алмайды. Ол топыраққа нық орныққан, бекіген.

Құдайларың Жаратқан Ие өздеріңе беріп жатқан елінде сендерді жарылқап, қамбаларыңа және қолға алған барлық іс-әрекеттеріңе ақ батасын жаудырады. Егер де Құдайларың Жаратқан Иенің өсиеттерін

сақтап, Оның тура жолымен жүретін болсаңдар, онда Жаратқан Ие ант еткеніндей, сендерді Өзіне бағышталған қасиетті халқы етіп бекітеді.

– Заңды қайталау 28:8, 9

Құдай қаржылық жағдайыңды бекітті (немесе нығайтты) дегенді қалай түсінеміз? Көктегі Әкеміз оны осы тараудың 12-ші және 13-ші аяттарында түсіндіреді.

Жаратқан Ие Өзінің «игілікті қазынасын», яғни «аспанның қақпаларын», ашып, еліңе мезгілінде жаңбыр жаудырып, қолға алған барлық іс-әрекеттеріңді жарылқайтын болады. Сендер көп халықтарға қарыз беріп, өздерің ешқайсысынан қарыз алмайсыңдар. Егер де Құдай Иелеріңнің өсиеттеріне құлақ асып, оларды сақтап орындайтын болсаңдар, онда Жаратқан Ие сендерді көштің аяғы емес, басы етеді. Сендер төменде емес, тек жоғарыда жүретін боласыңдар.

– Заңды қайталау 28:12, 13

Құдай Өз халқын молынан жарылқап, басқаларға қарыз бере алатын және өздері ешқашан ешкімге қарыздар болмайтын етеді. Олар көштің соңы емес, басы болады. Бас қана шешім қабылдайды. Және бағыт таңдайтын да – бас.

*Бай адам жарлыға үстемдік құрар,
Қарыздар қарыз бергеннің құлы болар.*

– Нақыл сөздер 22:7

Қарызы бар адам нық тұра алмайды. Ол құлша еңбектеніп, қарыз берген адамның қас-қабағына қарауға мәжбүр. Алайда Құдай «Жоқ! Мен оларды Өз халқым етіп бекітемін!» дейді. Үйіңнің

СЕНІҢ ҚАРЖЫЛЫҚ РЕВОЛЮЦИЯҢ, келісімнің құдіреті

құны төленген болса, ешкім келіп кет дей алмайды. Көлігіңнің бағасы түгел төленген болса, оны ешкім тартып ала алмайды. Дастарханың мол болады, өз меншігіңдегі жерді мекендейсің. Құдайдың аманатын орындап, молшылық пен тыныштықта өмір сүресің. Құдай сені нығайтып, бекітеді!

Құдай сенің табысты болғаныңды қалайды!

8-ші ТАРАУ

КЕЛІСІМНІҢ ҚҰДІРЕТІ

Келісім – Құдай Патшалығындағы ең құдіретті қағидалардың бірі. Оны тараудың атауы етіп қойғаным бекер емес. Бұл қағиданың жүзеге асуын Ыбырайымның шөбересі Жүсіптің өмірінен көреміз. Әңгіменің неден басталғанын есіңізге салайын. Жүсіп ағаларына жек көрінішті болды, олар інісінен құтылмақты ойлады. Інісін өлтіруге ағаларының бірі қарсы болды. Сол кезде қастарынан керуен өтіп бара жатқан еді, ағалары Жүсіпті Мысырға бара жатқан саудагерлерге сатты. Мысырда Жүсіпті перғауынның күзетінің бастығы Потифар сатып алып, өзіне құл етті.

Ал Жүсіп болса, ысмағұлдық саудагерлер оны Мысырға апарған еді. Сол жерде Потифар есімді мысырлық уәзір Жүсіпті олардан сатып алды. Потифар перғауынның бас қорғаушысы болатын. Жаратқан Ие жар болғандықтан, Жүсіптің қай нәрседен де жолы бола кететін. Осылай ол мысырлық қожайынының сарайында тұрып қалды. Қожайыны Жаратқан Иенің Жүсіпке жар болып, оның қолы тиген заттың бәрінің орайын келтіріп отырғанына көз жеткізіп, оған мейірімін түсірді. Уәзір Жүсіпті жеке қызметшісі қылып, сарайын басқартып, өзіндегі барлық дүние-мүлікті де оның жауапкершілігіне

тапсырды. Қожайыны Жүсіпке сарайын, барлық дүние-мүлкін сеніп тапсырғаннан бері Жаратқан Ие оның өзінде, үйіндегі және даладағы барлық иелігін де Жүсіпке бола жарылқап, батасын қондырды.

– Жаратылыс 39:1-6

Осы мәтіндегі 2-ші аяттың екінші жартысына назар аударыңыз. «Жаратқан Ие жар болғандықтан, Жүсіптің қай нәрседен де жолы бола кететін» деп жазылған. Бұл сөзді қалай түсінеміз? Құдай біздің бәрімізге жар емес пе? Жаратқан Ие бізбен бірге емес пе? Алдыңғы тарауларда шежіре туралы сөз болған еді. Сондағы тұжырымдарға сүйенсек, сұрағымыздың жауабы «Жоқ, олай емес». Есіңізде болар, Ыбырайымның сенімі Құдайға Ыбырайым әулетінің ғана өміріне араласуға мүмкіндік берген еді. Сондықтан, Құдай бәрімізді сүйеді деген сөз рас. Бірақ бәрімізге жар болады деп айта алмаймыз. Құдайдың алдына заңды түрде келе алмайтын адамдардың өміріне Құдай, өкінішке орай, араласа алмайды.

Ол кезде сендер Мәсіхтен мүлдем алшақ болып, Исраил халқынан тыс және Құдайдың Келісімдерінде берген уәделерінен шет қалдыңдар. Құдайды танымай, үмітсіз өмір кештіңдер. Алайда Иса Мәсіхтің қанын төгіп, құрбан болғандығы арқылы бұрын алшақ жүрген сендер енді Құдайға жақындадыңдар.

– Ефестіктерге 2:12, 13

Назар аударыңыз, мұнда Келісімнен тыс болғанымыз жайлы айтылған. Яғни, Құдайдан да, Құдайдың құдіретінен де алшақ едік. Бұл заңды жағдай болатын. Неге дейсіз ғой? Өйткені, адаммен арада келісімі болмаса, Құдай заңды түрде жердегі өмірге араласа алмайды. Құдайға ондай құқықты беретін – адаммен жасалған келісім. Келісімнен шет қалған адам бұл дүниеде Құдайдан алшақ,

үмітсіз қалады. Иса – Жаңа Келісімнің кепілі, осы Келісімге сай, біз Құдайдың қол астына кірдік, Құдай Патшалығының азаматтығын алдық (Ефестіктерге хат 2:9). Жаратылыстың басталуы кітабының 39-шы тарауындағы «Жаратқан Ие жар болғандықтан, Жүсіптің қай нәрседен де жолы бола кететін» деген сөздің мағынасын енді дұрыс түсіне аламыз: Жүсіптің арғы атасы Ыбырайыммен арадағы Келісім арқылы Құдай Жүсіптің өміріне заңды түрде араласты деген сөз. Бұл Келісім Құдайдың жер бетінде әрекет етіп, Жүсіптің өміріндегі жарылқаудың жүзеге асуына мүмкіндік берді.

Құдайдың Ыбырайымға «Мен сенен үлкен халықты өрбітіп таратамын» деп айтқаны есіңізде болар. Жүсіпке Құдайдың Өзі жар болғандықтан, ол әрбірісін детабысты болды. Онысын пұтқа табынушы қожайыны Потифар байқап қалды. Жүсіптің басқа адамдарға қарағанда,

әлдеқайда қабілетті екені көзге түсіп тұр еді. Ескере кететін жайт, Құдайдың қолдауымен табысқа жеткенімізді, қарғысқа ұшыраған жүйеде жүрген адамдар арадағы айырмашылықты байқайды! Потифарға Жүсіптің қабілеттілігі мен жолы болғыштығы әсер еткені сонша, ол жас құлды сарай басшысы етіп тағайындады.

Киелі Жазбаның осы тұсында Патшалықтың бірнеше қағидасын көруге болады. Ең маңыздысын айтып кетейін. Оны мен «келісімнің құдіреті» деп атаймын. «Потифар қағидасы» десек те болады. Ол Жаратылыстың басталуы кітабының 39-шы аятында жазылған.

Қожайыны Жүсіпке сарайын, барлық дүние-мүлкін сеніп тапсырғаннан бері Жаратқан Ие оның өзін де, үйіндегі және даладағы барлық иелігін де Жүсіпке бола жарылқап, батасын қондырды.

– Жаратылыс 39:5

Осында айтылған оқиғаны көз алдымызға анық келтірейік. Бүгін Жүсіп қатардағы құлдардың бірі болса, ертеңіне қожайыны Жүсіпке сарайын, барлық дүние-мүлкін сеніп тапсырады. Осы өзгерістің орын алған сәтін Киелі Кітап анық көрсетеді. Қожайыны Жүсіпке сарайын, барлық дүние-мүлкін сеніп тапсырғанда, Жаратқан Ие оның өзін де, үйіндегі және даладағы барлық иелігін де Жүсіпке бола жарылқап, батасын қондырды! Алайда, Потифар Жүсіптің Құдайын танымайтын, Исраил халқының өкілі емес-ті. Олай болса, Құдайдың батасы оған қалай қонды? Бұл сұрақтың жауабын мен берейін. Потифар меншігін Жүсіптің басқаруына бергенде, Жүсіп пен Құдайдың арасындағы Келісімнің құдіреті оған да тарайтын болды.

Потифардың мүлкі, жері, бүкіл меншігі бір патшалықтың құзыретінен шығып, басқа Патшалықтың құзыретіне кірді!

Потифардың меншігі Жүсіптің қарамағына өткенге дейін қарғысқа ұшыраған жүйеге қарасты еді. Потифар мүлкін Жүсіптің басқаруына тапсырғанда, сол арқылы Құдайдың қол астына бағындырған еді. Потифар мұны біліп істеген жоқ, әрине. Әрі қарай, барлық меншік-мүлкін Жүсіп басқарып тұрғанда, Потифар ештеңеден қам жемей, алаңсыз жүрді. Ол қамсыз болды! Күйкі тіршіліктің қамынан босаған Потифар Мысырдың қолбасшысы лауазымындағы адамның алдында тұрған мақсаттар мен міндеттерге ден қойды. Потифар, өзі білмей, Еврейлерге арналған хаттың 4-ші тарауында айтылған сенбілік тыныштықты басынан кешті. Бұл – шынайы тыныштық, және ол Жаңа Өсиет сенушілеріне қолжетімді.

Киелі Кітаптағы сенбі тақырыбын тереңірек зерттесеңіз, Құдай Исраил халқына сенбі күні жұмыс істеуге, тер төгіп, ауыр еңбек етуге тыйым салғанын көресіз. Сенбі – аптаның жетінші күні, Құдайдың жарату жұмысын тәмамдаған соң тынығып, демалған күні. Жаратқан Иенің жетінші күнді тыныштық күні деп бекіткені

есіңізде болар. Сенбінің тыныштық күні деп жариялануының себебі Құдайдың шаршағанында емес, ісін тәмамдағанында. Әлемді жарату ісі аяқталды, Құдай жоспарын іске асырды. Әуел баста адам жетінші күнде, яғни, тыныштықта, кемелдікте өмір сүру үшін жаралған болатын. Адам қам-қарекетсіз өмір сүруі тиіс еді, өйткені, өміріне қажеттің барлығы айналасындағы әлемде бар, қажеттілік тұмай тұрып, қарастырылып қойған. Адам ата Құдайға қарсы бүлік шығарғанда, сол тыныштықтан айырылып қалды, оны білеміз. Ол Құдайдың тарапынан келетін қамтамасыз етуден өзін-өзі бөліп тастады. Жаратқан Ие өзіне дайындап қойған тыныштыққа толы өмірден қол үзіп қалды. Бұдан былай Адам бар уақытын күнкөрістің қамымен, ауыр еңбекпен өткізетін болды, ол енді өзін тек өзі ғана қамтамасыз етеді.

Алайда, Құдай адамзатты осы қалпында қалдырған жоқ. Жаратқан Ие болашақта Өзі қалпына келтірмек болған тыныштықтың – Сенбілік тыныштықтың бейнесін адамзатқа көрсетті. Сенбі – маңдай терін төгіп, нанын бейнетпен тауып жүрген адамның дамыл тауып, тыныштыққа кенелетін күні. Құдаймен арадағы Келісімнің жарылқауы Жүсіп арқылы Потифарға да қонды. Сол арқылы Потифар Құдайдың қамқорлығына кіріп, тыныштыққа ие болды. Оның иелігін Құдайдың батасы қонған сенімді адам басқаруда, ештеңеден қам жеудің қажеті жоқ.

Сол себептен Потифар өзіндегінің бәрін де Жүсіпке сеніп тапсырып, тек күнделікті жейтін тамағының ғана қамын ойлады.

– Жаратылыс 39:6

Сенбінің маңызы мен қай рухани ақиқатты бейнелейтінін түсінуіміз үшін, Сенбінің қалай жүзеге асатынын қарастырайық. Қарғысқа ұшыраған жүйеде жүрген адамның өмірі күнделікті қам-қарекетпен өтіп жатыр. Күнкөрістің қамы бір күнге тоқтар

емес, күрес бір күн де толастар емес. Олай болса, сенбі күні жұмысын қалай тоқтатып қояды? Адам еңбектенбесе, қажетін қайдан алады? Бұл өте жақсы сұрақ, Жүсіпке қонған Жаратқанның жарылқауын терең ұғынсақ, оған жауап бере аламыз.

Леуіліктер кітабын ашып, 25-ші тарауды оқиық. Құдай Исраил халқына Мерекелік жылдың не екенін түсіндіреді. Есіңізге сала кетейін, Құдай әрбір 50-ші жылды Мерекелік жыл деп жариялады. Мерекелік жылда халық егін екпеуі керек. Ал 49-шы жыл сенбілік жыл болатын, сонымен екі жыл қатарынан егін егілмейді. Анығында былай болатын: 49-шы және 50-ші жылдары тұқым себілмейді, 51-ші жылы егін салынады да, сол жылдың соңында ғана піседі. Яғни, үш жыл бойы Исраил халқы егін ормайды. Сізге біреу үш жыл бойы жалақы алмайсың десе, аздап мазасызданар едіңіз, солай ма? Исраил халқы да мазасызданды. Үш жыл бойы жеміс жинамай, егін ормай күн көру мүмкін емес. Алайда, Құдайдың жауабы дайын еді:

Ал сендер: «Жетінші жылы егін егуге де, жинауға да болмағанда күнімізді қалай көреміз?» деп сұрарсыңдар. Онда айтарым мынау: алтыншы жылы егіндіктеріңді молынан жарылқаймын, сонда сол жылы шыққан өнімнің өзі үш жылға жететіндей ағыл-тегіл болады. Сегізінші жылы егін еге бастаған кездеріңде әлі де алтыншы жылдың өнімімен күн көріп, тоғызыншы жылдың өнімі жиналып жатқан кезге дейін соны тамақ ететін боларсыңдар.

— Леуіліктер 25:20-22

Құдай алтыншы күнді екі есе жарылқап, жеткілікті деген мөлшерден асырып беретін. Сол екі есе жарылқаудың арқасында ғана сенбілік тыныштыққа кіру мүмкін болатын. Жеткіліктіден көп, яғни, мол етіп беретін деген ойға баса назар аударғым келеді.

Бәріміздің армандап жүргеніміз – молшылық емес пе? Алтыншы күні жарылқауды екі еселеп бергенде, Құдай Өз халқының Қамқоршысы екенін естеріне салатын. Жаратқан Иеміздің қолы қашанда мол. Шындығын айтайық, тапшылықтан молшылыққа аяқ басқан адам күнкөрістің күйбеңінен азат болып, құлдықтан шығады, өз қалауынша өмір сүреді, жүрек қалауына ере алады. Ең маңыздысы, өміріміздің мән-мақсатын, арман-қалауымызды анық ұғынып, асқақ арманға ұмтыла аламыз. Потифардың қолы осыған жеткен еді. Ештеңеден қам жемеу, уайымсыз, алаңсыз өмір. Барлық қажеттілігі қамтамасыз етілген. Қызметіне алаңсыз беріле алады. Дренда екеуіміз «Қаржы мәселесін шешіп алмай, Құдайдың өзіңе берген аманатын орындауға кірісе алмайсың» деп қайталаудан жалықпаймыз. Сүйінші, жағымды жаңалық! Сенбілік тыныштық біз үшін қолжетімді, барлық қажеттілігіміз қарастырылған, бұдан былай мол табысты, кемел өмірге аяқ баса аламыз.

... Құдайдың Өзі жетінші күні демалып тыныққаны сияқты, Оның халқы үшін де шынайы тыныштыққа жету мүмкіндігі әлі де бар. Құдайдың жарату жұмысын тамамдаған соң тынығып демалғанындай, Оның дайындап қойған шынайы тыныштығына ие болған әркім де өз бетімен еңбектенуін доғарып, тынығады.

— Еврейлерге 4:9, 10

Потифардың өмірінде Құдай Патшалығы тер төгіп бейнеттену заңынан үстем болды, сенің өміріңде де солай болады. Құдай Патшалығының қол астына кіріп, ықпалын қабылдауды үйренгенімізде, өміріміз табысты болып, гүлденеді, өз мақсатымызды біліп, соған ұмтыламыз. Өміріңіз қуанышқа, шаттыққа, ынта-жігерге толы болуы әбден мүмкін!

*Жаратқанның жарылқауы адамды бай қылар,
Бұл байлыққа Ол қайғы-қасірет қоспас.*

– Нақыл сөздер 10:22

Жаратқанның жарылқауы өміріңізге молшылық әкеледі, бірақ оған бейнет қосып бермейді! Жаратылыстың басталуы кітабының 3-ші тарауында айтылған бейнеттен азат, қарғысқа ұшыраған жүйеден тыс өмір сүре аламыз. Құдай Патшалығындағы заңдарды білгенге дейін, өзім де көп жыл бойы сол жүйеде болдым. Менің біліп, үйренгенімді сіз де біле аласыз! Құдай сізді қолдайды! Ол сізге жақ! Табысты бола аласыз! Жоқ, дұрысы, сіз табысты болуға міндеттісіз. Осы әлемнің Құдайды танымайтын, үмітсіздік, бейнет, күнкөріс қарғысына ұшыраған Потифарларына үміт сыйлай алатын адам – сіз.

Оларды біздің дініміз, ғимараттарымыз, Киелі Кітаптан келтірген аяттарымыз қызықтырмайды, өйткені, өмірімізден Құдайымыздың жарылқауы көрінбейді. Дәл өздері секілді қаржылық күйзелісте

**АЙНАЛАҢЫЗДАҒЫ
КҮМӘН МЕН
СЕНБЕУШІЛІККЕ ЕРГЕНДІ
ДОҒАРЫҢЫЗ. ҚҰДАЙ
ПАТШАЛЫҒЫНА
КІРІҢІЗ ДЕ, ҚҰДАЙДЫҢ
ЖАРЫЛҚАУЫН
ҚАБЫЛДАҢЫЗ!**

жүріп, Құдайдың құдіретін айтсаңыз, адамдар сізді тыңдай қояды деп ойламаймын. Жоқ, Құдай Патшалығының қандай екенін Жүсіп тәрізді, өз өміріңізбен көрсетуге тиіссіз. Дәрекі сөйлегім келмейді, дегенмен, айтайын, айналамыздағы адамдар ақымақ емес қой. Олар мұқтаждығы мен сұрағының шынай жауабын көргісі келеді.

Көп жылдар бойы ешкімге ешқандай ықпал ете алмадым. Мені теледидарға шақырған адам болған жоқ, мың адамдық қауым басқарған жоқпын. Не себепті? Өйткені, менің адамдарға айтарым болған жоқ, олардың

сұрақтарына берер жауабым да, Құдайымның құдіретті екенінің, мені қолдайтынының ешбір куәлігі де болған жоқ. Туыс-туғанымнан қарыз алып, күн көрдім. Үйім, машинам, тіпті, өмірімнің өзі де қирап қалуға аз-ақ қалған еді. Құдайымның қаншалықты құдіретті екенін айтсам, мені тыңдайтын адам табылар ма еді? Рас, ол кезде де мен Аспан Патшалығына бара жатқан адам болатынмын. Және Аспан Патшалығы – ең тамаша мекен. Алайда, Аспанның қандай екенін жерде жүріп, өміріңізбен көрсетпесеңіз, адамдар Аспан жайлы ештеңе білгісі келмейді. Құдайымыз шынымен де Құдай болса, Оның Сөзі рас болса, онда Құдайдың Сөзінің әсерін көруіміз керек! Өмірімізде өзгеріс болуы тиіс! Құдай Патшалығының ақиқаты айналамыздағы адамдарға ықпал етсін! Потифарлардың көзі бізде!

Сонымен, “келісімнің құдіретін” неліктен осынша маңызды деп ойлаймын? Өйткені, Потифар Құдай Патшалығының ықпалын сезініп, Сенбілік тыныштыққа кірді. Бейнетке толы өмірден, қорқыныштан шығып, тыныштық тапты. Күнкөріс күйбеңінің орнын биік мақсат пен ықылас, тапшылықтың орнын молшылық басты. Осыған Потифар қалай қол жеткізді? Мұқтаждықтары мен қам-қарекетін Құдай Патшалығының құзыретіне тапсырды. Өзі білмей, Құдайдың қамтамасыз етуіне кірді. Құдай Патшалығының құзыретіне кіргенде, онымен келісімге келді. Жүсіптің Құдайдың батасы қонған адам екенін көзімен көргендіктен, Потифар шаруасының барлығын жас құлының қолына тапсыруға бел буды. Сіз де сол сияқты шешім қабылдай аласыз. Ондай шешімді Дренда екеуіміз де қабылдағанбыз кезінде. Әлгі бұғылар да, ақша да, машиналар мен оймыздағыдай үй де соның арқасында келді. Сізге бір кеңес беруге рұқсат етіңіз. Құдайдың өзіңізге дайындап қойған игіліктеріне қол жеткізгіңіз келсе, қарғысқа ұшыраған жүйеден шығып, Құдай Патшалығының құзыретіне кіріңіз. Әлемді жайлаған күмән мен сенбеушілікке бой алдыруды доғарыңыз. Олармен бұдан былай келісімге келмеңіз. Құдайдың жарылқауына бөленіп өмір сүріңіз!

9-шы ТАРАУ

Оларға тамақты сендер беріңдер!

Донмен кеңсемде таныстым. Қарызға белшесінен батқан, тауы шағылған жігіт еді. Қаражат жайлы кеңес алуға келіпті. Өмірінің қай саласын айтса да, кілең қиындық. Жалға алған үйінің ақысын үш-төрт ай бойы төлемепті, басқа төлемдері де сол. Тапшылықтан әбден мезі болған әйелі де бес баланы асырай алмай отырғанын айтып, соңғы кезде Донға көңілі толмайтынын білдіре бастапты. Ең қиыны, Дон өзіне-өзі деген сенімінен айырылған көрінеді. Ой-санасы жауабы жоқ сұрақтарға толы, өзі әбден қажыған күйде.

Огайо штатында медициналық сақтандыру полистерін сатумен айналысады екен. Ісі алға баспай, тығырыққа тірелген.

Осындай жағдайға тап болғанына қарамастан, Донның едәуір әлеуеті барын байқадым. Ол еңбектен де, оқып, білім алудан да қашып отырған жоқ. Осы мінезіне бола Донды жұмысқа алып, болашағын жарқын етуге атсалыспақ болдым. Донның өміріне салған инвестициям болашақта екеуімізге де көп түсім берді.

Ол кезде менің компаниям жаңадан аяққа тұрып келе жатқан жас компания болатын. Серіктестеріміздің бірі бізді Гавай аралдарына шақырды. Сол сапардың Донға Құдай Патшалығы

жайлы айтып берудің жақсы мүмкіндігі боларын сездім. Дон мәсіхші болатын, дегенмен, менің білетінімді білмейді. Құдай Патшалығының қағидаларын Донмен бөліспек болып, бірнеше рет талпынып көргенім бар, алайда, сөзіме сене қоймаған еді.

Құдай Патшалығының заңдары қалай жүзеге асатынын біліп, қағидаларын үйренсе екен деген қалауым бар, Донға соны жеткізудің мүмкіндігін іздеп жүрген едім. Алайда, оның көңілі қалғаны сонша, өмірі өзгеруі мүмкін дегенге сенер емес. Гавай аралдарына саяхат Донның жүрегін Құдай Патшалығына қарай бұруға мүмкіндік беретінін сездім.

Саяхатқа екі аптадай қалған кез. Дон екеуіміз Гавай аралдарының қай тұсына барып, нелерді көргіміз келетінін әңгіме қылдық. Донды қатты қызықтыратын бір нәрсе бар екен. Тынық Мұхиттың әсем суларынан көгілдір марлин деген балықты аулап алуды армандайды екен. “Гавай аралдары көгілдір марлин аулаудың әлемдік орталығы болып саналады. Осы балықты аулап алуды көптен бері армандап жүр едім” деді. Донның даусынан шабыт естілді, көзінен арман оты жарқ етті. Бұл жігіттің әлденеге қызығып, шабыттанғанын бірінші рет көруім. Осы қызығушылығы жақсы сабақ алуына себеп болатынын біле қойдым.

“Құдай Патшалығының заңдарына сүйенсең, көгілдір марлинді олжалайтыныңды анық біле аласың. Үміттенбейсің, білесің” дедім. Дон аздап қипақтап қалды, дегенмен, қызығушылық танытты. Құдай Патшалығы жайлы айта бастадым. Марқа жазған Ізгі хабардың 11-ші тарауының 24-ші аятын келтірдім.

Сондықтан сендерге былай деймін: Құдайға сиынып (Оның еркіне сай) не сұрасаңдар да, соны қабылдадық деп сеніңдер! Сонда ол орындалмақ.

– Марқа 11:24

Донға айтқаным тым жақсы әрі тым оңай болып көрінді, сөзіме

сене алмады. Құдай Патшалығы мен сенім жолдарын түсіндіруге біраз күш салдым. Жолға шыққанымызға дейін Дон әйелімен бірге менің бұғы атып аларымдағыдай, тұқым сеуіп, көгілдір марлин алдық деп сенді.

Дон егін оруға қолынан келгенше дайындалды. Ол жалдамалы катерлерді қарап шығып, өзіне ұнаған катердің капитанымен алдын-ала келісіп қойды. Ұйымдастыру жұмыстарын тәмамдап, Гавай аралдарына қуана-қуана аттандық.

Балық аулайтын күніміз де келді. Катерге мініп, капитанға бүгін көгілдір марлин алатынымызды жігерлене хабарладық. Капитан бізге балық аулауда сәттілік тіледі де, бүгінгі күннің көгілдір марлин аулауға қолайсыз екенін айтты. Соңғы төрт айда балық аулауға күн сайын шығып жүрген екі катер көгілдір марлинның біреуін ғана олжалапты. Марлин – көшпелі балық, осы аймаққа келетін маусымы емес. Дегенмен, сенімімізден қайтпадық. Дайындығымызды жасап жүріп, капитанға бүгін көздеген олжамызды қайтсек те алатынымызды тағы да айттық.

Алты сағат бойы бір де бір балық қаппады. Донның сенімі шайқала ма деп алаңдай бастадым. Жоғарыда, капитанның орнында отырған едім, “Дон, бір сұрақ қояйын. Көгілдір марлинді мінәжат еткеніңде алдың ба, әлде, қармағыңа ілінгенде аласың ба?” деп дауыстадым. Дон салмақты кейіппен “Гэри, ойланатын несі бар, олжамды мінәжат еткенде-ақ қабылдағанмын” деп жауап берді. Бұл сөзді естіп, жүрегім орнына түсті. Дон менің

**СОНДЫҚТАН СЕНДЕРГЕ
БЫЛАЙ ДЕЙМІН:
ҚҰДАЙҒА СИЫНЫП
(ОНЫҢ ЕРКІНЕ САЙ) НЕ
СҰРАСАҢДАР ДА, СОНЫ
ҚАБЫЛДАДЫҚ ДЕП
СЕНІҢДЕР! СОНДА ОЛ
ОРЫНДАЛМАҚ.**

– МАРҚА 11:24

үйреткендерімді қалт жібермей, көңіліне тоқып қалыпты, оған көзім жетті. Енді өзіне тиесілі олжаны алып қайтпақ.

Арада бірнеше минут өтті. Донның қармағына балық қапты. Бәріміз “Қапты!” деп айқай салдық. “Көп дәмеленбей-ақ қойыңдар, – деді капитан. – Ірі балық екені рас, бірақ бұл көгілдір марлин емес. Марлиндер судың бетіне келіп, жоғарыға секіреді, ал мына балық тереңнен шықпады”. Уақыт өте берді. Дон қармақты тартып әуре. Бірақ балық көрінер емес. Дон қанша шаршаса да, балық та әлсіреді. Ақыры арпалысуға шамасы келмей, судың бетінде жоны көрінді. Дон көгілдір марлинді судан алып шыққанда, екеуіміз де таңырқай қойған жоқпыз, ал айналадағы жұрт қайран қалды.

**ЖЕЛДІҢ ӨЗІН КӨРЕ
АЛАМАСАҚ ТА,
ҚОРШАҒАН ОРТАҒА
ТИГІЗГЕН ӘСЕРІН КӨРЕ
АЛАМЫЗ. ҚҰДАЙ
ПАТШАЛЫҒЫ ДА СОЛАЙ,
КӨЗГЕ КӨРІНБЕГЕНІМЕН,
ОСЫ ӘЛЕМГЕ ЫҚПАЛ
ЕТЕДІ.**

Олжасын қолына ұстап түскен Донның суреті кеңсемнің қабырғасында әлі күнге дейін ілулі. Мен үшін бұл сурет – Құдай Патшалығы мен сенімнің айғағы. Көрер көзге жай балық, алайда, Дон үшін сол күнгі олжасы – Құдай Патшалығының құдіретінің дәлелі еді. Патшалықтың заңына сүйеніп, марлинге қол жеткізе алса, басқа қажеттілігінің барлығына да жете алады. Құдай Патшалығын өмірін түбегейлі өзгерте алатынына Донның көз жеткізуінің бастамасы еді.

Екі мың жыл бұрын болған бір оқиғаны қарастырайық. Никодим атты адам Исадан Құдай Патшалығы жайлы сұрады. Иеміздің жауабы Жохан жазған Ізгі хабардың 3-ші тарауында жазылған. “Жел қалаған жерінде соғады: оның гуілін естисің, бірақ қайдан келіп, қайда кеткенін білмейсің. Киелі Рұхтан туылған әр адамның басынан өткені де осыған ұқсас, — деді Иса». Гавай аралдарының

маңындағы Дон екеуіміздің балық аулаған сол бір күніміз осы ақиқаттың жақсы көрінісіне айналды.

Құдай Патшалығын көзімізбен көре аламасақ та, әлгі марлин қармаққа түскенде, Патшалықтың бар екеніне көзіміз жетіп, осы әлемге қалай ықпал ететінін көрдік. Жел де солай, өзін көре аламасақ та, қоршаған ортаға тигізген әсерін көре аламыз. Құдай Патшалығындағы заңдарды біліп, оларды қолдануды үйренсек, Дон сияқты біз де өмірімізге өзгеріс әкеле аламыз.

Ендігі сұрағым: әлгі марлин қайдан пайда болды? Бұл сұрақтың жауабы бар. Жай ғана «бұл Құдайдың ісі» дей алмаймыз. Бізге керек балықтың сол күні қолымызға түсетінін қайдан білдік, соны анықтау маңызды. Мұны білгеніңіз шынымен де өте маңызды, өйткені, бір күні сізге көгілдір марлин, немесе көгілдір машина, не болмаса, тағы бірдеңе қажет болады. Мәселе менің бұғы атқанымда немесе балық аулауда емес. Бұл әңгімелер Құдай Патшалығындағы заңдардың қалай жүзеге асатыны жайлы. Көгілдір марлиннің Донның қармағына түсуінің нақты себебі бар. Иса шәкірттеріне Құдай Патшалығы туралы ақиқатты үйретумен болды, алайда, тәлім берумен шектелмей, Патшалықты оларға көрсетті де.

Баса назар аударатын жайт: Бәрімізге таныс жердегі жүйедей емес, Құдай Патшалығында бәрі басқаша. Санамызға толығымен сыймаса да, солай. Ол жер бетіндегі өзімізге үйреншікті заңдарға бағынбайды. Құдай Патшалығындағы заңдар мүлде басқа. Сол заңдарды біліп, қолдануды үйрене аламыз. Иса Патшалық заңдарын адамдарға үйретіп, қайда барса да, оларды іс жүзінде көрсетіп жүрді. Марқа жазған Ізгі хабардың 6-шы тарауында Исаның Құдай Патшалығын көрсеткені жайлы әңгіме жазылған. Бұл – Исаның бес мың ер адамды бес күлше нан мен екі балыққа тойдырғаны жайындағы бәрімізге таныс әңгіме. Бала кезімнен осы әңгімені мың рет естідім, алайда, ешқашан ешкім Исаның

мұны қалай істегенін түсіндіріп айтқан емес.

Біршама уақыт өткеннен кейін шәкірттері Исаның қасына келіп:

— Бұл — құлазыған дала, ал кеш түсіп барады. Адамдарды таратып жіберіңіз. Олар жақын маңдағы ауылдар мен елді мекендерге барып, тамақ сатып алсын, — деген ұсыныс жасады. Бірақ Иса:

— Оларға тамақты сендер беріңдер! — деп жауап қатты. Шәкірттері:

— Онда біз барып, екі жүз күндік жалақыға нан сатып алып, бұларды тамақтандырайық па? — деп сұрады. Ал Иса оларға:

— Қанша нандарың бар? Барып, қарап келіңдер! — деп тапсырды. Біліп келген олар:

— Бес күлше нан мен екі кепкен балық бар екен, — деді. Сонда Иса шәкірттеріне адамдарды топ-топқа бөліп, көгалдың үстіне жайғастыруды тапсырды. Сонымен жұрт жүзден, елуден топтасып жайғасты. Иса бес күлше мен екі кепкен балықты қолына алып, көкке қарап тұрып шүкірлік етті. Нанды халыққа тарату үшін үзіп-үзіп, шәкірттеріне бере берді, екі балықты да бәріне бөліп, үлестірді. Барлығы да жеп тойды. Соңында олар нан үзімдері мен балықтан артылып қалғандарын жинап алғанда он екі себет толды. Ал тамақтанған ер адамдардың жалпы саны бес мыңдай еді.

— Марқа 6:35-44

«Иса, бір мәселе туындап тұр. Жұрт аш. Қазір таратып жіберсек, үйлеріне жеткенше, кеш батып кетеді. Алаңдаулымыз». Иса не деп жауап берді? «О, Құдайым, рас айтып тұрсыңдар. Уақыттың зымырап өтіп бара жатқанын байқамай қалыппын

ғой. Жиналысымызды тезірек аяқтайық» деді ме? Жоқ. Жай ғана «тамақты сендер тауып беріңдер» деді. Не дейді? Жиналған халықтың саны, ер адамдарды ғана санағанда, бес мың. Әйелдер мен бала-шағаны қосқанда, жиырма мыңға жетіп құлайды. Қолыңызда керектің бәрі тұрғанның өзінде осынша халықты тамақтандыру қиын емес-ау, қиынның қиыны болар. Шәкірттер Исаның мына сөзіне сене алмай қалған болар. Мәселені шешудің Иса ұсынған жолы олардың ақылына қонбады. Шәкірттердің сөзі жер бетін мекендейтін, жердегі жүйеден басқаны білмейтін адамның санасын көрсетеді. «Иса, бұлардың бәрін тойдыру үшін сегіз айдың жалақысы керек! Осыншама ақшаны тамаққа жұмсайық па?» Тамақ мәселесіне қарғысқа ұшыраған экономикалық жүйенің тұрғысынан қарады, бұл мәселені шешудің жолы – тек тер төгіп еңбектенуде деп ойлады. Тіпті, бейнеттің мерзімін де санап қойды, сегіз ай екен.

Бірде, мінәжат етіп отырғанымда, Құдай жүрегіме сөйледі. Ақыл-ойым рухани емес, тәни екенін айтты. Күмілжіп қалдым. Бұл не деген сөз? Құмарлықтарға беріліп жүрмін бе? Жоқ, Құдай менің ой-санамның шектеулі, өрісімнің тар екенін айтқан екен. Оның себебі – қарғысқа ұшыраған жүйеде адам өз күшіне ғана үміт арта алады, болашағын да өз шамасына қарай мөлшерлейді, бұл жүйеде адам әліне қарап өмір сүруді әбден санасына сіңіреді. Бәріміз де солаймыз. Жаңа үй керек болса, бағасын біліп, қалтамыздың көтеретін-көтермейтінін шамалаймыз. Есепті қалай жүргіземіз? Өз мүмкіндігімізді осы дүниелік экономикалық жүйенің тұрғысынан бағалаймыз. Мысалы, мен сағатына 15 доллар табамын дейік. Бір аптада 40 сағат жұмыс істеймін, сонда... “Жоқ, бұл үйді алуға шамам келмейді екен”. Осылайша бұл үйді сатып алу мен үшін мүмкін емес деген қорытындыға келесіз. Әрбір идеяны өзіңіздің адами мүмкіндіктеріңіздің елегінен өткізетін болсаңыз, Құдай Патшалығы беретін мүмкіндіктерді ЕШҚАШАН пайдалана алмайсыз. Өйткені, Құдай бұл жүйеде емес.

Құдай Патшалығының заңдарымен өмір сүргім келсе, әр нәрсеге Патшалық тұрғысынан қарауым керек, яғни, бәрі де мүмкін деп ойлауым керек!

“Бұл мәселені шешу үшін сегіз айдың жалақысы керек” дегенде, шәкірттер осындай күйде болатын. Олар, сайып келгенде, осынша көп халықты тамақтандыру – мүмкін емес демек еді.

Исаның “оларға тамақты сендер беріңдер” деген сөзін шәкірттер қалай қабылдағанын сипаттайтын мысал келтірейін. Мәселен, мен – сіздің бағушыңызбын делік. Сіз ипотекалық несиені төлеп, ауыртпалық көріп жүрген адамсыз. Ипотекаңызды үш ай бойы төлемей, үйден айырылуға шақ қалып жүрсіз. Маған жолығып, ипотекаңыздың мезгілі өтіп кеткен төлемдерін төлеуге қауым көмек бере ала ма деп сұрайсыз. “Менде бір жақсы идея бар. Ипотеканы толық жауып тастасаңыз қайтеді? Сонда тіпті ешқандай қарызыңыз болмайды ғой” деймін мен жайбарақат. Сіз маған қарап “Менің айтқанымды түсінбей қалса керек” деп ойлайсыз. “Жоқ, бағушы. Сіз мені дұрыс түсінбедіңіз. Біздің ақшамыз жоқ, сізге келіп тұрғанымның себебі де – сол. Мезгілі өтіп кеткен төлемдерімізді жабуға қауымнан көмек болады ма деп келіп едім” дейсіз. Мен сізге сабырлы кейіппен қарап, “Мен сізді түсініп тұрмын. Және мәселеңізді шешудің ең жақсы жолын айтып тұрмын. Ипотекалық несиеніңізді түгел төлеп қойыңыз, сонда еш қарызыңыз болмайды” деймін. Сіз мені сандырақтап тұр деп ойларсыз.

Исаның шәкірттері де солай ойласа керек. “Иса, жиырма мың адамды тамақтандырыңдар дегеніңді қалай түсінеміз? Қалжың ба? Қолымыздан келмейтінін Өзің де білесің ғой. Сенің айтқаныңды орындаудың еш мүмкіндігі жоқ. Айтқаныңа келісіп, барымызды салсақ та, көлік жалдап, жұмысты ұйымдастырып, тамақты керек мөлшерде осында жеткізетін болсақ та, бұл жұмысты атқарып болғанымызша, мына көпшілік аштан қырылып

қалар. Ақшамыз жетсе де, уақыт жеткіліксіз”. Осыдүниелік тұрғыдан қарағанда, тым күрделі болып көрінетін мәселеге тап болғанымызда, айтатынымыз – осы. Мақсатымызға жетуге шама-шарқымыз келмесе, арманымыз өледі.

Иса шәкірттерін сол жағдайда көмексіз қалдырған жоқ. Мәселені шешуге құдіреті жетпесе, шәкірттеріне ондай тапсырма бермес те еді. Шын мәнінде Иса оларға басқа жүйені – Құдай Патшалығын, оның әсерін көрсетуді көздеген еді. Шәкірттер абыржып, дәрменсіздік танытқандықтан, тізгінді өз қолына алды.

“Қандай тамақтарың бар? Көріп келіңдер” деді Иса. Шәкірттер қайтып келіп, “Тапқанымыз – бес күлше нан мен екі балық” деді. Нан мен балық табылысымен, Иса тамақты өзіне алдырды. Бес күлше мен екі балықты қолына алып, көкке қарап тұрып шүкірлік етті, сөйтті де, нанды үзіп-үзіп, шәкірттеріне берді. Адами тұрғыдан қарасақ, ештеңе де болған жоқ, еш өзгеріс байқамаймыз. Алайда, Исаның істегені рухани әлемде өте маңызды еді. Құдай Патшалығының кілті осында. Иса нанды үзіп, шәкірттеріне бере берді, екі балықты да бәріне бөліп, үлестірді. Шәкірттер астың көз алдарында көбейіп, молайғанын, жиырма мың адамның әлгі бес күлше нан мен екі балыққа әбден тойғанын көрді. Мұндай керемет жүзеге қалай асты?

Бұл сұраққа жауап табуымыз үшін, болған оқиғаның мән-жайына үңілейік. Иса асты қолына алып, шүкіршілік еткенде, асты Құдайға бағыштады, нәтижесінде нан мен балық осыдүниелік жүйеден Құдай Патшалығына ауысты. Жердегі экономикалық жүйеде жиырма мың адамды бес күлше нан мен екі балыққа тойдыру мүмкін емес. Ал Құдайдың Патшалығында бәрі мүмкін. Бұл әңгіме осымен біткен жоқ. Жұрт ас ішіп болғанда, шәкірттер қалған тамақты жинап, он екі себетті толтырды. Бес күлше нан мен екі балық тапшылық күйден жиырма мың адамды тойдырып, артылатын, бастапқыда болған мөлшерден әлдеқайда асып

түсетін күйге ауысты. Жеткілікті мөлшердеп асыра, мол етіп беру – Құдай Патшалығына тән нәрсе!

Рухани зерттеулерімді жүргізіп жүріп, Құдайдың маған бұғы бергендегі формуланың осы оқиғада да жүзеге асқанын байқадым. Аңшылығымның барысында Құдай маған әуелі қажет нәрсемнің тұқымын себуді үйретті. Наны мен балығы бар баланың істегені де осы еді. Қолыңда барын Құдай Патшалығына бағыштады, ас көбейіп, жиырма мың адамға қорек болды. Және, көріп тұрғанымыздай, нан көп нанға, балық көп балыққа айналды. Осы заңдылық есімізде болсын. Құдай Патшалығына балықты тұқым етіп ексем, балықтан өнім аламын. Ал қолымда балық болмаса, қалайша балықтан өнім алмақпын? Бұл сұрақтың жауабы: қаражат! Ақша – айырбас құралы болып табылатынын ұмытпайық. Біз ақшаны қолма-қол айырбас құралы ретінде күнделікті пайдаланып жүрміз. Ақшаға сүт, нан, үй, және керегіміздің барлығын сатып аламыз. Қолыңда бір нан алуға жететін ақшаң болса, бір наным бар деп айта аласың, яғни, ақшаның мөлшері сол ақшаға сатып алынатын әлдебір затқа пара-пар. Сонымен, керек затыңның тұқымы қолыңда болмаса, сол тұқымға пара-пар ақша тұқым бола алады. Дүкенге барып, балық сатып алып, тұқым ретінде егудің орнына, сол балыққа жұмсалған ақшаны ексек те болады. Бұл жағдайда балықтың орнын ақша басады. Алайда, бұл ереже құрбандық, сенім тұқымы, сый-тартуларға жүргенімен, ондыққа жүрмейді. Өйткені, ондық Құдайға бағышталған қаражат. Ол басқа нәрсені алмастыра алмайды. Лұқа жазған Ізгі хабардың 5-ші тарауында тұқым сеуіп, өнім алу заңының жүзеге асуын көре аламыз.

Бір күні Иса Генесәрет көлінің жағасында тұрғанда, халық Құдай сөзін тыңдау үшін Оның қасына жиналып, иін тіресіп тұрды. Иса көл жиегінде тұрған екі қайықты көрді. Олардан түскен балықшылар ауларын жуып жатты. Екі қайықтың бірі Шимондікі еді. Иса қайыққа отырып, Шимоннан жағадан арырақ жүзіп барып

тұруын сұрады. Осылай ол қайық үстінен халыққа тәлім берді. Иса сөзін бітіргеннен кейін Шимонға:

*— Көлдің терең жеріне жүзіп барып, балыққа ау сал,
— деді.*

Шимон:

— Ұстаз, біз түні бойы еңбектеніп, түк ұстай алған жоқпыз! Бірақ Сіз айтқан соң ауларды тағы да салып көрейін, — деп жауап берді. Ауларын салғанда олар өте көп балық ұстады. Балықтың көптігінен аулары жыртыла бастады. Содан олар екінші қайықтағы жолдастарын қол бұлғап көмекке шақырды. Олар келгеннен кейін бәрі бірігіп екі қайықты да балыққа толтырды. Тіпті қайықтары суға бата бастады!

— Лұқа 5:1-7

Болған оқиғаны мұқият қарастырайық. Балық қалай пайда болды? Иса жағалаудың бойымен келе жатып, судағы қайықты көріп қалады. Ол осы қайықта отырып, жиналған жұртқа уағыз айтпақ. Қайықтың иесінен рұқсат сұрайды, Петір келіседі. Қалай болғанда да, жұмыс тәмам, балықшылар түні бойы теңізде жүрсе де, құр қол қайтты. Иса қайықты уағыз айтуға пайдаланады да, артынша Петірге көлдің терең жеріне жүзіп барып, балыққа ау сал дейді. «Ұстаз, біз түні бойы еңбектеніп, түк ұстай алған жоқпыз!» деп жауап бергеніне қарағанда, Петірге Исаның сөзі оғаш көрінсе керек. Петір — кәсіпқой балықшы, балық аулаудың қыр-сырын жақсы біледі. Теңізге қайта шыққанымен, балық ала алмайтыны белгілі. Оны тәжірибелі балықшының қайсысы да біледі. Қайыққа мініп, қайта ау салып әуре болудың қажеті жоқ. Балықшылар ескек-жабдығын жинастырып, ауларын тазартып та қойған еді.

Петір жаңа ғана Исаның бір сағаттық уағызын тыңдаған еді, сол уағыз қатты әсер еткен болса керек. Олай болмаса, Петір Исаның айтқанына келіспес еді. «Сіз айтқан соң ауларды тағы да салып

көрейін» деді Петір. Балықшылар терең жерге барып, ауларын қайта салғанда, өте көп балық түсті. Балықтың көптігінен аулары жыртыла бастады. Содан олар екінші қайықтағы жолдастарын қол бұлғап көмекке шақырды. Олар келгеннен кейін бәрі бірігіп екі қайықты да балыққа толтырды. Тіпті қайықтары суға бата бастады! Петір де, қасындағылар да осынша көп балық ұстағандарынан үрейлері ұшып, қайран қалды.

Неліктен бұлай болды? Себебі неде? Осындай кереметтерге қол жеткізудің кілттері бар ма? Қысқаша айтсақ, бұл – жоғарыда айтылған келісімнің күші, Құдай Патшалығымен келісудің нәтижесі. Петір Исаға өз қайығын пайдалануға бергенде, оның қайығы да, кәсібі де осы дүние жүйесінен Құдай Патшалығына ауысты. Петірдің кәсібі қарғысқа ұшыраған жүйенің құзырынан шығып, Патшалықтың құзырына кірді. Сонда Құдай Исаға балықтың дәл қай жерде екенін көрсетуге заңды түрде құқылы болды. «Көлдің терең жеріне жүзіп бар» деді Иса.

Осы оқиғаны сараптап көрейік. Иса түні бойы теңізде жүріп, бос қайтқан балықшының қайығын пайдалана тұруға сұрайды. Петірдің қайығы Құдай Патшалығының құзырына өтеді. Киелі Рухтың көмегімен Иса балықтың қай жерде екенін дәл біле алады. Иса Петірге бағыт көрсетеді, нәтижесінде Петірдің қайығы балықтың астында қалады. Сонымен, осыншама олжа қалай түсті? Аспаннан келген тікелей нұсқаулар арқылы дей аламыз. Шыны керек, балықтың дәл қай жерде жүргенін білсең, оны ұстау қиынға соқпайды. Осыны есіңізде сақтаңыз. Құдай бәрін біледі. Ол сізге не істеу керек екенін айта алады.

Дренда екеуіміз жоқшылықтың тауқыметін тартып жүргенімізде, Құдай түс арқылы аян беріп, қандай кәсіппен айналысуым керек екенін көрсетті. Сол кезде мен бұл кәсіпті қалай бастайтынымды мүлде білмейтін едім. Сол кәсібімді істегеніме 28 жыл болды, әлі де бар. Бүгінгі таңда кәсібімнен жылына жүздеген

мың доллар таза пайда түседі. 28 жылдың ішінде сол кәсібімнің арқасында миллиондаған доллар қаражатты адамдарға көмек көрсету мен қызмет етуге жұмсадым. Осының бәріне қалай қол жеткіздің дейсіз ғой? Аспаннан келген сөзді естідім, сіз де ести аласыз! Рұқсат етсеңіз, бір мысал келтірейін.

Осыдан бірнеше жыл бұрын Құдай Патшалығы тақырыбына бес күндік конференция өткіздік. Екінші күні кешке Крис атты адам маған жолығып, мінәжат етуімді сұрады. Не үшін дұға ететінімізді сұрап едім, әңгімесін айтты. Кристің бизнестегі серіктесі ортақ қаражатты өз қажетіне жұмсап қойып, кәсіпті құлдыратып жіберіпті. Өзі төртінші рет үйленген екен. Отбасындағы жағдай да мәз емес. Жасы небары қырықта. Кристің айтуынша, күйзелгені сонша, тапаншасын оқтап алып, машинасына отырады да, төңіректі кезіп жүріп, бір оңаша жер табады. Сол жерде атылып өлмек. Түнгі сағат үштің шамасы.

Крис көлігін тоқтатып, тапаншасын қолына алғанда, телефонына қоңырау түседі. Таныс номер. Өзінің бұрынғы серіктесі. Крис, әлбетте, онымен сөйлесуге жоқ, жауап бермеді. Дегенмен, телефонына қоңырау тоқтаусыз түсе берді. Әлгі адам он бірінші рет телефон соққанда, Крис ақыры жауап берді. «Орныңнан қозғалма! Қазір барамын!» деді хабарласқан жігіт. Сөйтсе, ол жаңа ғана тәубе етіп, өмірін Құдайға арнаған екен. Ғажабы, түн ішінде Кристі дереу тауып алуы керек екенін сезіпті. Кристің жауап бермегеніне қарамастан, телефон шала берген.

Бұрынғы досы келіп, Криске Ізгі хабар айтады. Крис сол жерде тәубе етіпті, сондан кейін өмірінде түбегейлі өзгерістер болған. Өмірінің әр саласы ретке келе бастапты. Жақсы қауым тауып, соған баратын болыпты. Әйелімен қарым-қатынасы түзелген. Барлық сала оңалып, жалғыз-ақ қаржы саласы ақсап жүр екен. Кристің жұмысы жоқ, сол жайында дұға етуімді сұрады. Сол конференцияда осы кітапта айтқанымды айтқан болатынмын.

Құдайдың Патшалығы өзіміздің қабілетіміз жетпейтін ғажап нәрселерге қолымызды жеткізеді.

Киелі Рухтың бізді жетелеп, ойымызға бағыт беріп отыратыны жайлы ойланып жүргенінде, Криске кенет бір идея келді. Қаржы жағынан шынымен де қиналып жүрген кезі болатын. Дегенмен, Кристиң қолынан тамаша чизкейк пісіру келеді. Чизкейкті Крис пайдалы өнімдерді ғана қолданып, өте дәмді етіп пісіреді екен. Достарының арасында әлемдегі ең дәмді чизкейк пісіретін адам ретінде танымал көрінеді. Пайдалы тағамдар сататын қаншама дүкенге барып, өнімдерін алып көргенімен, Кристиң көңілі толмайды екен. Кәсіп бастаудың жолын таппай жүрген ол, чизкейк сатуда табысты боларын жүрегімен сезді. Пайдалы тағам сататын дүкендердің біріне өзі пісірген чизкейкті апарып, дәмін татырса, өнімі сатыла бастайтынына кәміл сенді. Дүкеннің сатып жүрген тоқаштарынан өзінің өнімі әлдеқайда жақсы өтетінін іші білді. Сонымен, Крис чизкейк пісірді де, алдын-ала келіспестен-ақ дүкенге апарды. Ғажап болғанда, пайдалы тағам сататын дүкендер желісінің басшысы дәл сол сәтте Крис барған дүкенге барыпты. Басшы Кристиң өнімінің дәмін көріп, пікірін білдіруге келісіпті.

Сол конференцияда, жиналыстардың бірінен кейін Крис тағы да жаныма келді. Жоғарыдағы әңгімені айтып болып, дүкенмен келісімшарт жасасуы үшін дұға етуімді сұрады. Ереңіне Крис тағы келді. Сондағы қобалжыған кейпін көрсеңіз! Әлгі басшы Криске чизкейкті бір дүкенге арнап емес, бүкіл желі үшін пісіртпек екен. Онымен қоймай, басқа қандай тағамдар дайындай алатынын да сұрапты. Кристиң таңырқауында шек жоқ! Одан да ғажабы, сол басшы конференцияның соңғы күнінде жиналысқа келіп, өмірін Құдайға арнады да, сол күні Киелі Рухқа кенелді. Екі апта өткенде ол кісіден хат келді. Ол компаниясының барлық капиталының он пайызын біздің Faith Life Now атты қызметімізге берді. Не деген ғажап! Біздің Құдайымыз жоқтан бар жасайды, ойыңыздағы идеяны ғажап істерге айналдырады!

10-шы ТАРАУ

ТЕР ТӨГУ ЕМЕС, ӨНІМ ЖИНАУ!

Бәйгеден келген атты көріп пе едіңіз? Әбден терлеген аттың тері көбікке айналады. «Гэри, сонда адам жұмыс істемеу керек демексің бе?!» деген сұрақты жиі естимін. Жоқ. Олай демеймін. Оны Құдайдың Сөзі де айтпайды. Алайда, қалай еңбек ететініңіз маңызды. Петір мен әріптестері екі қайықты балыққа толтырғаны сонша, суға кете жаздағаны есіңізде болар. Түні бойы еңбектеніп, түк таппаған еді. Таңертең Иса келді де, рухани әлемнен алған мәліметіне сүйеніп, оларға балықтың қайда екенін көрсетті. Ұстаздың нұсқауымен әрекет еткендері де – еңбек. Бірақ түндегіден өзгеше, берекелі еңбек. Осынша балықты тартып, қайыққа, одан жағаға шығару, – әлбетте, еңбек. Алайда, бұл жолы олар балық аулады дей аламыз ба?

Аңға шыққанымда, бұғыны қырық минуттың ішінде атып алатынымды жоғарыда айтқан болатынымын. Мен аң аулаймын ба? Басқаша айтқанда, балықтың қайда екенін дәл біліп барып алсаңыз, мұны балық аулау деп атауға болады ма? Бұғыны атып алатынымды анық білсем, мұным аңшылыққа жатады ма? Арадағы айырмашылықты сезінсін деп айтып отырмын.

Еңбектенетінім рас, алайда, түні бойы еңбектенген емеспін, ал түні бойы еңбектеніп, түк таппау дегенді тіпті білмеймін. Қажетімнің барлығы қамтамасыз етілгендіктен, Құдайдың Патшалығына еңбек сіңіруге мүмкіндігім бар, ештеңеге алаңдамай, Көктегі Әкемнің аманатын орындап, өз мақсаттарыма жетіп жүрмін.

Мен мұны егін ору деп атаймын.

Матай жазған Ізгі хабардың 17-ші тарауында Петір Исаға келіп, салықты қалай төлейтіндерін сұрады. Иса былай деп жауап берді:

Алайда әлгі садақа жинаушыларды өкпелетпеу үшін көлге барып, қармақ таста. Ілінген алғашқы балықтың аузын ашсаң, бір үлкен күміс теңгені табасың. Соны алып, оларға сен екеуіміз үшін бере сал, — деп тапсырды.

– Матай 17:27

Иса «Ал, Петір, салық төлеуіміз керек. Былай істе: қалаға барып, жұмысқа жалдан, үш ай жұмыс істесең, салық төлеуге жетерлік ақша табасың. Салықты төле де, қайтып келіп, қызметімізге қосыл» деген жоқ. Неге? Өйткені, олай етсе, Петір қызметін тастап, ақша табудың амалын іздейді, яғни, осыдүниелік экономика жүйесіне қайта оралады. Оның орнына Иса Құдай Патшалығының заңдарын пайдаланып, қалай әрекет етуіміз керек екенін көрсетті. Исаның Петірге берген жауабы – бәрімізге берілген жауап. Иса шәкіртіне қамтамасыз ету қайдан келетінін көрсетті, оған жетудің әдісін үйретіп, нақты нені іздеу керектігін де айтты. Петірге тек Исаның айтқанын дәл орындап, бар деген жеріне барып, дайын жарылқауды алу ғана қалды.

Исаның шәкірттері Құдай Патшалығының құзыретін көрген сайын таңырқап, қайран қалатын. Исаның сөзінен кейін інжір ағашының құрап қалғанын көргенде, Петірдің таң қалғаны есіңізде болар. Төрт күннен бері молада жатқан Елазардың тірілуі,

Петір, Жақып, Жохандардың көп балық ұстауы, тағысын тағылар шәкірттерді қайран қалдырды. Құдай Патшалығының заңдарымен танысқан сайын, Дренда екеуіміз де таң қалғанымыздан аузымыз ашылып, бірімізге біріміз «мына кереметті көрдің бе?» деумен болдық.

Жаратқанның жарылқауына Киелі Рухтың көмегімен қол жеткізу туралы айта отырып, Матай жазған Ізгі хабардың 6-шы тарауына назарыңызды аударғым келеді. Менің Киелі Кітабымда осы тараудың тұсында «қам жеме!» деп жазылған.

Ешкім екі қожайынға бірдей қызмет ете алмайды. Өйткені ол біреуін екіншісінен артық көріп, соған бағышталады, ал екіншісіне немкетті қарайтын болады. Сол сияқты, сендер де Құдайға және байлыққа бірдей бағышталып қызмет ете алмайсыңдар! Сондықтан сендерге мынаны айтамын: не ішіп-жейміз деп өмірлеріңді, не киеміз деп тәндеріңді уайымдамаңдар! Өмір тамақтан, тән киімнен артық қой! Әуеде ұшқан құстарға назар салыңдаршы: олар егін екпейді де, ормайды да, өнімін қамбаға жинамайды да, бірақ көктегі Әкелерің оларды асырайды. Ал сендер құстардан әлдеқайда артық емессіңдер ме?! Сондай-ақ осындай мәселелерді уайымдап, араларыңдағы қайсың өз бойын тіпті бір қарыс ұзарта алады? Неге киімдеріңді ойлап уайымдап жүрсіңдер? Даладағы қызғалдақтардың қалай өсіп тұрғанына көңіл бөліңдерші: олар еңбек те етпейді, жіп те иірмейді. Сендерге былай деймін: тіпті Сүлеймен патша өзінің бар сән-салтанатында сол гүлдердің біріндегі әдемі киінбеген. Ал енді, бүгін далада өсіп тұрған, ертең отқа тасталатын шөпті Құдай солай киіндірсе, сендерді, әлбетте, одан бетер киіндірмей ме, сенімі аздарым-ай! Сондықтан не ішіп-жейміз, не киеміз

деп уайымдамаңдар! Тәңірге мойынсұнбайтындар барлық сондай нәрселерге ие болуға тынымсыз ұмтылуда. Ал бұлардың бәрінің сендерге қажет екенін көктегі Әкелерің біледі ғой. Ең бастысы, Құдайдың Патшалығының қамын ойлап, Құдайдың әділ еркін орындауға ұмтылыңдар! Сонда көктегі Әкелерің сендерге бұлардың бәрін қосып береді. Сонымен, ертеңгі күн туралы уайымға салынбаңдар! Ертеңгі күннің өз уайымдары болады. Әр күннің қиыншылығы өзіне жетерлік.

– Матай 6:24-34

Иса екі қожайынға бірдей қызмет ете алмайтынымызды айтады. Бәлкім, сіз қызмет ете аламын деп ойлайтын боларсыз. Қателесесіз. Ықыласыңыз екеуінің біреуіне ғана ауады, тек біреуіне ғана. Қайсысына десеңіз, айтайын. Қажеттілігіңзді қамтамасыз еткеніне. Әлгі ескі үйде Көктегі Әкем Құдай Патшалығына көңіл бөліп, заңдарын білуге күш салмайтынымды айтқанда, шын мәнінде, менің қожайыным Өзі емес екенін білдірген еді. Сенімімді толық артатын, бар ынтаммен қызмет ететін қожайыным – Құдайым емес-ті. Жесенбі сайын қауымға баратынмын, Құдайды сүйетін, Аспан Патшалығына бара жатқан, жомарт сенуші болатынмын. Алайда, Құдайдың қаржы жүйесін, Құдай Патшалығындағы заңдарды зерттеп, үйренуге талпынған емеспін.

Байлықтарың қайда болса, жүректерің де сонда.

– Лұқа 12:34

Асықпай, қайталап оқып шығыңыз. «Байлықтарың қайда болса, жүректерің де сонда». Орындарын ауыстырып, «Жүректерің қайда болса, байлықтарың да сонда» деп жүргендер көп. Жоқ олай емес. Бұлай айтсаңыз, аяттың мағынасын бұрмалайсыз.

Исаның айтпағы ол емес. Кейбір сенушілер Құдайды тек жексенбі күні таңертең сүйемін де, байлығым сонда болады деп ойлайды. ОЛАЙ ЕМЕС! Қай жүйеге үміт артып, өзіңді асырайды деп сенсең, байлығың да сол жүйеде.

Көп нәрсені осылайша бұрмалап, теріс айналдырып алғанбыз!

Құдайөміріміздеақшаныңемес,Өзініңбіріншіорындаболғанын қалайды. Байлығымыз – ақша болса, ақша бәрінен құнды, бәрінен басым болады, ақшаға уақытымызды, күш-қуатымызды, сайып келгенде, өмірімізді арнаймыз. Міне, сондықтан да Петір салық төлеу мерзімі келгенде, қызметін тастап, жұмыс іздеп кеткен жоқ. Құдайдың бізге «тер төгу емес, өнім жинауды» үйреткісі келетіні де содан. Иса бізге Құдай Патшалығының заңдарына сүйеніп

өмір сүруді, мұқтаждықтарымызды Құдайдың қамтамасыз ететініне нық сенуді үйретпек, сонда уайым атаулыдан арылып, жүрегімізді Құдайымызға толық бағыштай аламыз! «Өмір тамақтан, тән киімнен артық!» деп айтқан Иеміз. Өмірдің мәні әлдебір заттарға ие болуда емес, мақсат – Құдайдың аманатын орындау, ал заттар сізге және сіздің өмірлік миссияңызға қызмет етуге тиіс.

**БАЙЛЫҒЫМЫЗ –
АҚША БОЛСА, АҚША
БӘРІНЕН ҚҰНДЫ,
БӘРІНЕН БАСЫМ
БОЛАДЫ, АҚШАҒА
УАҚЫТЫМЫЗДЫ, КҮШ-
ҚУАТЫМЫЗДЫ, САЙЫП
КЕЛГЕНДЕ, ӨМІРІМІЗДІ
АРНАЙМЫЗ.**

Қазіргі кезде мәсіхшілердің өмірі қандай? Сенушілердің көбісі материалдық игіліктерге құл болып, тоқтаусыз қам-қарекетке берілген. Олар ипотека төлеуге, көліктің несиесін жабуға, ай сайынғы басқа да төлемдерін мезгілінде төлеп шығуға тырысып, жанталасуда. Мұндай өмір – өмір емес, дейді Иса. Осы тұста «Міне, көрдің бе, материалдық игіліктерді иеленуге ұмтылу – дұрыс емес деп Исаның Өзі айтқан» деп маған бас салмай тұра тұрыңыз.

Жоқ, Иса олай деген жоқ. Сол тараудың 33-ші аятында Иеміз «Ең бастысы, Құдайдың Патшалығының қамын ойлап, Құдайдың әділ еркін орындауға ұмтылыңдар! Сонда көктегі Әкелерің сендерге бұлардың бәрін қосып береді» деген. Мәселе – біздің жүрегімізде. Иса біздің заттарды иеленуімізді қаламайтын болса, солай деп тікелей айтар еді. Оның орнына Құдайдың еркіне сай өмір сүрсек, осы дүниенің іздейтін игіліктерін де қосып беретінін айтты.

Өмірдің мәні – заттарға құл болуда емес. Дегенмен, адамдардың көбісі – сол құлдықта. Екі қожайынға бірдей қызмет ету мүмкін емес, ал затқа қызмет ету – өмір емес. Иса басқа жүйенің бар екенін айтады, сол жүйеде қажетіміз қамтамасыз етіліп, құлдықтан азат болып, тыныштықта өмір сүре аламыз. Бұл жүйенің аты – Құдайдың Патшалығы. Матай жазған Ізгі хабардың 6-шы тарауында Иса Құдай Патшалығын сипаттайтын екі мысал келтіреді.

Әуеде ұшқан құстарға назар салыңдаршы: олар егін екпейді де, ормайды да, өнімін қамбаға жинамайды да, бірақ көктегі Әкелерің оларды асырайды. Ал сендер құстардан әлдеқайда артық емессіңдер ме?!

– Матай 6:26

Құстар құрт-құмырсқа өсіретін ферма ұстамайды!

Олар күнделікті қажеттілігін қамтамасыз ету міндетін өздеріне алмайды. Жоқ, оларды Көктегі Әкеміз асырайды. Құстар Құдайдың бергенін теріп алумен ғана шектеледі. Міне, көріп отырсыз ба? Құстар бейнет көрмейді, тамақ тауып жеу үшін маңдай терін төкпейді. Құстар тек өнім жинайды!

Гүлдер еңбек етпейді, жіп те иірмейді!

Неге киімдеріңді ойлап уайымдап жүрсіңдер? Даладағы қызғалдақтардың қалай өсіп тұрғанына көңіл

*бөліңдерші: олар еңбек те етпейді, жіп те иірмейді.
Сендерге былай деймін: тіпті Сүлеймен патша өзінің
бар сән-салтанатында сол гүлдердің біріндегі әдемі
киінбеген.*

– Матай 6:28, 29

Гүлдер маңдай тері мен қажырлы еңбегінің арқасында әсем киінеді дей алмаймыз. Жоқ, оларды Көктегі Әке киіндіреді. Иса сөзін сабақтап, бәріміздің көкейіміздегі сұраққа жауап береді. Өмір сүрудің басқаша жолы бар, ол – Құдай Патшалығының жолы! «Ең бастысы, Құдайдың Патшалығының қамын ойлап, Құдайдың әділ еркін орындауға ұмтылыңдар! Сонда көктегі Әкелерің сендерге бұлардың бәрін қосып береді» дейді Иеміз (33-ші аят). «Құдайдың Патшалығының қамын ойлау» дегеніміз не? Заңдары қалай орындалатынын білу деген сөз! Құдайдың жүйесі қалай жұмыс істейді, Патшалықтың заңдары қалай жүзеге асады, осыны білу!

Әлдебір елге алғаш рет келдіңіз дейік. Ең алдымен бұл «патшалықтың» заңдары қандай екенін білуге тырысатын едіңіз. Салт-дәстүрлері қандай, тағамдары қандай, сауда-саттық қалай жасалады, елдегі заңдар қандай. Құдай Патшалығына да қатысты солай істеуіміз керек. Құдайдың Патшалығындағы өмір қандай, онда қандай заңдар бар екенін біліп, осы Патшалықтың азаматы ретінде өзіңізге тиесілі артықшылықтарды пайдалана аласыз. Құдай Патшалығының заңдарынан бейхабар болғандығымнан кезінде өзім де талай нәрседен құр қалдым. Менің қатемді қайталамаудың жолы оңай. Сізге қаржылық революция қажет. Революция кезінде халық елді басқару жүйесіне қарсы шығып, жаңа жүйе орнатады. Сіз де солай етуіңіз керек. Өміріңізге билік жүргізіп келген, қарғысқа ұшыраған экономикалық жүйені құлатып, тапшылық пен дәрменсіздіктен шығыңыз да, Құдай Патшалығындағы тамаша жаңа өмірге аяқ басыңыз, басқа заңдарына бағынып, шат-шадыман өмір сүріңіз!

11-ші ТАРАУ

ЖҮРГЕННЕН ҰШҚАН ОҢАЙ!

Өткен ғасырларда Нью-Йорктен Сан-Францискоға жету үшін, кемеге мініп сапар шегетін едіңіз. Панама каналы салынғанға дейін Оңтүстік Американы айналып өтіп, бір жылда жетуге болатын еді. Кейін, Орегона арқылы жол салынғанда, жолаушылар Нью-Йорктен Сан-Францискоға төрт айда жететін болды. Бүгінгі таңда төрт сағатта жетуге болады. Қалай дейсіз ғой? Кейін ашылған заң – аэродинамика заңына сүйеніп. Физиканың бұл заңы қашаннан да бар, құстар оны үнемі қолданып келеді, бірақ адамдар бұрын білген емес. Сол сияқты, Құдай Патшалығының заңдарын да сенушілердің көбісі, Киелі Кітаптан оқып жүрсе де, білмейді. Құдай Патшалығы осында, біздің жан-дүниемізде, ондағы игіліктерді пайдалануға біздің заңды құқымыз бар. Аэродинамика заңы жердің тартылыс күшін жоққа шығармайды, алайда, одан басым түседі. Аэродинамика заңына сай әрекет етсең, жердің тартылыс күші жойылмаса да, ұша аласың. Кемемен бір жыл сапар шеккеннен ұшақпен төрт сағат ұшып, межелі жеріңе жету – оңайырақ екенін мойындайтын боларсыз! Олай болса, ескі баяу әдістерден бас тартып, жылдам әдіске көшіңіз.

Монарх көбелегін көріп пе едіңіз? Біз тұратын Огайо штатында күзде жүздеген көбелектерді көруге болады, олар топтасып,

оңтүстікке, Мексикаға көшеді. Ғажабы, олар бұрын-соңды Мексикада болған емес! Қашан және қалай ұшатынын қайдан біледі? Құдай көбелектің өмірлік жолын қарастырып қойған болса, сізге де жол көрсетері анық. Көбелектің тіршілігіне назар аударайық.

Көбелектің өмірінде метаморфоза деп аталатын кезең болады. Сөздің түбірі — *-морф-*, яғни, «өзгеріс». Монарх өмірлік жолын көбелек болып бастамайды, оны көбіміз білеміз. Бастапқыда ол – жұлдызқұрт. Жұлдызқұрт сүттіген деп аталатын өсімдіктің жапырағын жеп, өміріндегі ең маңызды өзгеріске дайын болғанша өсе береді. Бірнеше рет түлеп барып, ақырында қуыршаққа айналады. Қуыршақ қоректенбейді, қимылдамайды, оның өмір сүру мерзімі 7 тәуліктен 15 тәулікке дейін. Осы мерзім өтеннен кейін қуыршақтан көбелек шығады, оның сыртқы кейпі де, тыныс-тіршілігі де жұлдызқұрттыкінен түбегейлі өзгеше. Көбелек мүлде басқа деңгейде өмір сүреді, ол ұша алады! Сүттігеннің жапырағын кеміру мен бұтағын мекен етумен шектелмей, қалаған жағына ұшып бара алады. Көбелектің көркіне көз тоймайды, ол – қайталанбас тамаша жаратылыс.

Көбелектің ең бір тамаша қасиеті – қиындық түскенде басқа жаққа ұшып кету. Монарх көбелегі біздің жақтағы қыс айларының суығына төзе алмайды. Сондықтан Құдай осынау әсем жаратылысының қыстайтын жерін, оған жетер жолын қарастырып қойған. Ол жерді көбелек бұрын-соңды көрмесе де, екі шақырым арақашықтықты ұшып өтіп, дөп табады. Көбелек жолды қалай табады? Межелі жерге адаспай қалай жетеді? Метаморфоза. Метаморфозаға жол беріп, монарх көбелегі тәрізді, сіз де көкке шарықтап, барлық проблемаңыздың, шешуін таппай жүрген мәселелеріңіздің үстінен қарай аласыз.

Стив есімді досым қараңғы жолмен келе жатып, қапелімде жолға шығып қалған бұғыны көлігімен қағып кетіпті. Соққыдан машина қирап, жөнге келмейтіндей болған. Екінші көлігі бір аптадан кейін істен шыққан. Сақтандыру компаниясы қираған

машинаның орнына екі апта мінуге көлік беріпті. Алайда, екінші машинаға сақтандыру төлемі төленбейтін болып шықты. Стив не істерін білмеді, өйткені кәсібі көлікті қажет етеді. Жұмысы – саудасаттық саласында, келісімшарт рәсімдеу үшін күн сайын қаланың әр ауданына баруға міндетті.

Стив пен Карен Құдай Патшалығы жайлы іліммен бұрыннан таныс, барлық мәселенің шешімі – Құдайда екенін біледі. Басқа көлік сатып алуға қаражаттары жоқ. Сондықтан, жалғыз үміті – Құдай мен Оның Патшалығы. Сақтандыру компаниясының машинасын мінуге рұқсат етілген екі апта өте шықты. Көлікті қайтаратын күннің алдында Стивке бір адам хабарласып, өзінің бір көлігін құрбандыққа бергісі келетінін айтыпты. Стивтен қауымда көлікке мұқтаж болып жүрген отбасы бар ма екен, соны білмекші. Стив өзінің жағдайын түсіндіріп, көлікті өзінің алғысы келетінін айтады. Көліктің ғажап жолмен келуі тамаша, әрине, бірақ, алты баласы бар отбасы үшін бір шағын машина аздық етеді. Дегенмен, бұл оқиға Стив пен жұбайы Каренге жігер берді.

Келесі жексенбіде екеуі тағы бір көлік үшін мінәжат етуімді сұрады. Карен: “Бағушы, сеніміміз арқылы Honda Odyssey машинасын алатынымызды білеміз. Тұқым сеуіп, дұғада бізбен келісуңізді сұраймыз» деді. «Әрине» дедім. Мінәжат еттік. Арада қанша уақыт өткені есімде жоқ, екі немесе үш апта болса керек. Стивтің үйінің жанынан өтіп бара жатып, кіріп шықпақ болдық. Тоңазытқыштың есігінде Honda Odyssey-дің суреті ілулі тұр екен. Карен тоңазытқышты ашқан сайын, суретке қолын қойып, Құдайға алғысын айтып жүргенін айтты.

Тағы бір апта өтті. Хатшым телефон шалып, «бағушы, бір кісі хабарласып, өзінің машинасын қауымға бергісі келетінін айтты» деді. Карен мен Стивтің Құдайдан автокөлік сұрағанын, оның нақты қандай модель екенін ешкім білмейді. Хатшыдан «қандай машина екен?» деп сұрадым. «Honda Odyssey» деді. «Машинаның жағдайы қандай екен, айтты ма?» деп сұрадым. Хатшы «Әлгі

кісінің айтуынша, машина 70 мың шақырымдай жүрген, еш жеріне бірде бір сызат түспеген, күтімі өте жақсы» деп жауап берді. «Бұл машинаның кімге арналғанын білемін» дедім. Болған жағдайды Дрендаға баяндап бердім де, Каренге хабарласуын сұрадым. Дренда Каренге телефон соғып, көлік мәселесінде не жаңалық барын сұрады. «Құдайдан келер жауап бір қадам болса да жақындады!» деді Карен. «Білесің бе, Карен, жауап сен ойлағаннан әлдеқайда жақын. Келіп, машинаны мініп кетіңдер».

Осындай әңгімелерді қатты ұнатамын, сіз ше? Бұл хикаяның жалғасы бар. Себебі, Стив пен жұбайының Құдай Патшалығы оларды қамтамасыз ете алады деген сенімі нығая түсті.

**БІЗ ШАМА-ШАРҚЫМЫЗҒА
ҚАРАП, ӨЗІМІЗДІ ӨЗІМІЗ
ШЕКТЕЙМІЗ. БІРАҚ ҚҰДАЙ
АРАЛАСА, БӘРІ ДЕ
МҮМКІН, ТЕК ҚҰДАЙДЫҢ
СӨЗІНІҢ ОЙ-САНАМЫЗДЫ
ӨЗГЕРТУІНЕ ЖОЛ БЕРСЕК
БОЛДЫ.**

Шамамен сол уақытта олар үй салуды ойластыра бастады. Бірнеше жыл бойы үй жалдап тұрды, енді өздерінің баспанасы болуы керек. Алайда бастапқы жарна төлеуге қаражат жетпейді.

Олар талай-талай банкке барып, жер сатып алу жайлы кеңес алды. Банктердің барлығы алынатын жердің құнының 50 пайызын төлеуін талап етеді

екен. Ол кезде Стивте мұндай ақша жоқ. Карен қынжылып, маған телефон соқты. Құдайдың оларға дайындап қойғаны бар екеніне сенетін болып келістік. Сонымен, Карен мен Стив үйлер мен жер телімдерін қарай беретін болды.

Бір телім олардың көңіліне қонды. Үй салғысы келіп жүрген ауданда екен, бағасы да жақсы, 55 акр 55 мың доллар. Алайда, несие алайын десе, бастапқы жарнаны төлей алмайды. Қаланың шетінде бір банк бар екен, жер сатып алушыларға несиені жеңілдетіп беретін көрінеді. Екеуі сол банкке барды. Банк жер телімінің құнын 100 мың доллар деп бағалады, бастапқы жарна

керек болмады. Сөйтіп, олар қаланың сыртындағы тамаша жерде жап-жақсы үй сатып алды. Стив пен Карен Құдай Патшалығының заңдарына сүйеніп, табыстан табысқа жетіп келеді.

Біздің қауымда осындай жағдайлар көп. Мұндай оқиғалар сіздің де өміріңізде болады деп сенемін. Құдай қажетімізді қамтамасыз ету үшін ғажайып, кейде тіпі біз күтпеген нәрселерді жасайды. Біз шама-шарқымызға қарап, өзімізді өзіміз шектейміз. Бірақ Құдай араласса, бәрі де мүмкін, тек Құдайдың Сөзінің ой-санамызды өзгертуіне жол берсек болды.

*Бұл күнәкар дүниенің өмір сүру салтын үлгі етпеңдер,
қайта, ой-тілектерің Құдайдың жаңартуымен түбегейлі
өзгерсін! Осылай сендер Оның еркін — ненің игілікті,
ұнамды және кемелді екенін ажырата білетін боласыңдар.*

– Римдіктерге 12:2

Сенушілерге күнәкар дүниенің өмір сүру салтын үлгі етудің қажеті жоқ. Пауыл елші қарғысқа ұшыраған осыдүниелік жүйені, күнәкар дүниенің өмір салтын, сол салтқа сай көзқарасты айтады. Белгілі бір үлгімен киім тігіп немесе сызбаға сай үй салып көрдіңіз бе? Тіккен көйлегіңіз не салған үйіңіз ұнамаса, келесіде тағы сол сызбаға жүгінесіз бе? Олай етсеңіз, нәтижеңіз қандай болмақ? Тағы да сол болады. Сондықтан да, Пауыл елші ой-тілектеріміздің түбегейлі өзгеруі керек екенін айтады. Яғни, өмір сүру үлгісін өзгерткеніміз жөн. Ой-тілектеріміз күнәкар дүниенікіндей емес, басқа болуы керек.

«Түбегейлі өзгеріс» дегеніміз – жоғарыда айтылған морф деген сөз. Бізге метаморфоза қажет! Құдай қалай ойласа, біз де солай ойлауымыз керек. Санамызда Құдай Патшалығының азаматына тән ойлар болсын. Бір бұтаны мекен етіп, соның жапырағын кемірумен шектелетін, қысқы аяздан үсіп өлгеннен басқа амалы жоқ ұсқынсыз, өресіз жұлдызқұрттай болмаңыз, Құдайға сенім артып, өміріңізді түбегейлі өзгертіңіз. Сонда ғана көкке самғап, мәселе атаулының үстінен қарайтын боламыз. Сонда ғана

әр жағдайда Құдайдың еркін — ненің игілікті, ұнамды және кемелді екенін ажырата білетін боламыз. Ой-санамыз түбегейлі өзгермесе, ескі сана «Жоқ, жоқ, бұл менің қолымнан келмейді. Жоқ, бұл мүмкін емес» деп, үнемі қарсыласатын болады.

Сол бір ұсқынсыз жұлдызқұрт уақыт өте келе сұлу қанатын қағып, қалықтап ұшады деп кім ойлаған? Жұлдызқұрттың былқылдаған денесіне қарап, екі мың шақырым арақашықтықты ойласаңыз, «МҮМКІН ЕМЕС!» деп басыңызды шайқайтын едіңіз. Алайда, Құдай Патшалығында бәрі де мүмкін. Маған қараңызшы. Телебағдарламам басталғанда, жүргізуші мені көрермендерге қаржы саласындағы сарапшы деп таныстырады. Сонда «жұлдызқұрт күндерім» есіме түседі де, «Не деген ғажап!» деймін ішімнен.

Ұшу жайына келейікші... Дренда екеуіміз Құдай Патшалығындағы заңдарды зерттей бастағанымызда, болашақта ұшақ аламын деп шештім. 19 жасымда ұшқыш кәсіпін алған болатынмын, ұшақтарды жалға алып жүрдім, бірақ өз ұшағым болған емес. Неге екенін өзіңіз де білесіз, ұшақ алуға жететін ақшам болған жоқ. Бірде бұлай болуы дұрыс емес екенін түсіндім, өйткені, Құдай Патшалығы үшін ұшақ – қиын нәрсе емес. Неге екенін білмеймін, Құдайды өзімнің шамам жететін нәрселермен шектеп жүр екенмін. Сондықтан, чек толтырдым да, шетіне «Менің ұшағым үшін» деп жаздым және ұшағымның қандай болатынын да жазып қойдым. Чекке қол қойып мінәжат еттім де, Марқа жазған Ізгі хабардың 11-ші тарау, 24-ші аятына сай ұшақты қабылдадым деген сеніммен жібердім.

Сондықтан сендерге былай деймін: Құдайға сиынып (Оның еркіне сай) не сұрасаңдар да, соны қабылдадық деп сеніңдер! Сонда ол орындалмақ.

– Марқа 11:24

Арада бір ай өтер-өтпестен дәрігерге барып, жоспарлы

қараудан өттім. Дәрігерім аяқ астынан «Ұшақ алғысы келетін танысыңыз жоқ па?» деп сұрағанда, таңырқап қалдым. «Қандай ұшақ?» деп сұрадым. Дәрігердің айтып тұрғаны өзім сұраған ұшақ болып шыққанда, таңырқауды қойып, қайран қалдым. Ұшақты қалай көруге болатынын сұрап едім, біздің округтың әуежайында тұр екен, менің үйімнен алыс емес. Дәлірек айтсам, менің үйім әуежай аумағының шетінде орналасқан. Онда барып қонатын ұшақтың әрқайсысы менің үйімнің үстінен ұшып өтеді. Ұшу-қону жолағы үйімнен бір-ақ шақырым жерде болса, күні бойы ұшақтардың келіп-кетіп жатқанын көріп тұратын болсам, өзімнің де ұшағым болуы тиіс деген сөз емес пе?

Сондықтан, өмір бойы ұшқыш, әрі ұшқыш-инструктор болған досыма хабарласып, менімен бірге барып, ұшақты көруін сұрадым. Ұшақты жан-жағынан қарап жүргенімізде, маған арналған ұшақ екенін ішім сезді: ұшақта бір мін жоқ. Ойымдағы ұшақтың дәл өзі. Жалғыз-ақ, ұшаққа жететін ақшам жоқ. Кезінде ұзақ жылдар бойғы мәселе болған нәрсе – ақшаның жоқтығы. Сізде осындай мәселе болып па еді? Алайда, осы жолы алған бағытымнан қайтпайтын да, бір қадам шегінбейтін болып бел будым. Ұшақтың менікі екенін білемін, тек Құдай маған оны сатып алуға жетрлік қаражатты қалай беретінін білмеймін.

Екі ай бұрын Дренда екеуіміз компаниямызды орналастыратын кеңсе іздеген едік. Кеңсеміздің қай жерде орналасуы керек екенін білеміз, алайда, ол төңіректе сатылатын жай табылмаған соң, басқа аудандардан қарастыра бастаған едік. Көңілімізге қонған бір-екі орынды таптық, бірақ оларды алудың қажеті жоқ екенін жүрегімізбен сездік. Бастапқыда көздеген ауданға қайта оралып, сол жерден орын сұрап, мінәжат ете бердік. Бір күні, дұға етіп отырғанымызда, әкем телефон шалып, “Сен мұны Құдайдың ісі деп айтарсың, анаң екеуіміз ақылдасып, меншігіміздегі ғимаратты саған беретін болып шештік, кеңсеңді сонда көшір” деді. Бұл ғимарат нақ біз көздеген ауданда. Міне ғажап!

Бұл оқиғаның мән-жайын дұрыс түсінуіңіз үшін әкемнің сол кезде Құдайды мойындамайтын адам екенін білгеніңіз жөн. Біреу Құдайды аузына алса, әкемнің қабағы түйіліп, тіпті, Құдайға тіл тигізуге дейін баратын. Әкем отырғанда Құдай туралы айтуға еш мүмкіндік жоқ еді. Құдай әкеме Ізгі хабарды жеткізетін басқа адамды жіберуін сұрап мінәжат ететінмін. Әкемнің жүрегін жібіте алмай-ақ қойдым. Дегенмен, әкем бірнеше жылдан кейін, 80 жасында Құдайға келді. Ғажабы, біздің телебағдарламамызды көріп, Құдайдың кереметтері туралы естігенде, тәубе еткен екен. Өмірінің соңғы үш жарым жылын жүрегі жаңарған адам ретінде, мүлде басқаша өткізді, жексенбі сайын қауымға келіп жүруші еді.

**БІР КЕЗДЕРІ ЖАНЫМДЫ
ШҮБЕРЕККЕ ТҮЙІП,
КҮНКӨРІСКЕ ЖЕТЕРЛІК
АҚША ТАБУҒА БАР
КҮШІМДІ САЛЫП
ЖҮРЕТІН ЕДІМ, ӨМІРІМ
СОНЫМЕН ҒАНА
ШЕКТЕУЛІ БОЛАТЫН.
ЕНДІ ӨМІРІМ ҚҰДАЙ
ПАТШАЛЫҒЫНЫҢ
ҚҰДІРЕТІМЕН
ТҮЛЕП, ТҮБЕГЕЙЛІ
ӨЗГЕРДІ. ПАТШАЛЫҚ
ЗАҢДАРЫНА
СҮЙЕНІП, ШЕКСІЗ
МҮМКІНДІКТЕРГЕ ТОЛЫ
ӨМІР СҮРІП ЖҮРМІН.**

Бірде, қауым жиналысы аяқталғаннан кейін дәлізге шығып, әкемнің бір кісімен сөйлесіп тұрғанын көрдім. Ол кісі – қауымның мүшесі, әкем екеуі көп жылдан бері таныс. Жақындап барып, әңгіменің шет жағасын естіп қалдым. Әлгі кісі әкемнен қауымға келуіне не түрткі болғанын сұрапты. Адами тұрғыдан түсіне алмаған нәрселерге куә болдым, сонда Құдайдың бар екеніне көзім жетті деді. Құдайға шүкір! Міне, осылай болу керек!

Дегенмен, әкем құтқарылмай тұрғанда болған, кеңсе жайындағы әлгі әңгімеге оралайық. Дренда екеуіміз ол кісінің ғимаратты бізге бергеніне сенер-сенбесімізді білмедік. Мұның бәрі – Құдайдың ісі екенін білеміз, әлбетте. Сондықтан “Рас, әке, рас айтасыз,

бұл – Құдайдың ісі!” деп жауап бердік.

Кеңсені көшірместен бұрын ғимаратта жөндеу жұмыстарын жүргізіп, ретке келтіріп алуымыз керек болды. Ғимаратты әкем желтоқсан айында берді. Жөндеуді көктемге дейін қоя тұруды жөн көрдім. Ғимаратты қыс бойы жауып қоятын болдық, ішіне ешкім кіріп-шықпайды. Әкем іштегі суды тоқтатып қойдым деді. Күн жыли бастағанда, жоғарыда әңгіме болған ұшақты барып көрдім. Сол кезде інім хабарласып, ғимаратқа тез жетуім керек екенін, іштен далаға су ағып жатқанын айтты. Әкем қателескен болса керек, су жабылмапты. Ішке кіргенімде көргенім, екінші қабаттағы дәретханадан су бірнеше күн, мүмкін, бернеше апта аққан. Бірінші қабаттағы қабырғалардың сылағы түсіп қалыпты.

Бір қарағанда, бұл оқиғада ешбір жақсылықтың нышаны жоқ. Алайда, сіз білмейтін, інім де білмеген бір жайт бар: мен ғимараттың іші-сыртындағы сылақты түгел түсіруге, басқа да жөндеу жұмыстарына адам жалдап қойған болатынмын. Екі аптадан кейін жұмыс басталады да, су кеткеннің еш зияны болмайды. Сылақ қалай да алынуы тиіс еді. Ал енді айтайын дегенім, сақтандыру компаниясы су кетудің зардабын өтеуге ақша бөлді, ақшаның мөлшері ұшақты сатып алуға жеткілікті болды!

Кеңсе мен ұшаққа есім шығып жанталаспай-ақ қол жеткізгенім бе? Иә, дәл солай! Қазіргі кезде, сол ұшақпен егістік алқаптарының үстінен ұшқанымда, Құдай Патшалығындағы өмірдің аспанға самғағанмен пара-пар екенін есіме аламын. Құдай Патшалығының заңдары басқа деңгейде өмір сүруге мүмкіндік береді. Көбелек пен жұлдызқұртты салыстырғандай: жұлдызқұрт қанша күш салса да, Мексикаға жете алмас еді. Бір кездері жанымды шүберекке түйіп, күнкөріске жетерлік ақша табуға бар күшімді салып жүретін едім, өмірім сонымен ғана шектеулі болатын. Енді өмірім Құдай Патшалығының құдіретімен түлеп, түбегейлі өзгерді. Патшалық заңдарына сүйеніп, шексіз мүмкіндіктерге толы өмір сүріп жүрмін.

Кітабымның соңында Киелі кітаптан бір аят келтірмекпін. Бұл

аятты талай рет оқыған боларсыз. Дегенмен, енді оның мағынасы сізге мүлде басқаша ашылады деп ойлаймын.

*Қиналып қатты шаршап-шалдыққандар,
Еңселерін тым ауыр жүк басқандар,
Менің қасыма келіңдер, бәрің,
Жандарыңды Мен рақатқа бөлеймін!
Қамытымды бірге киісіп, үйреніңдер Өзімнен,
Өйткені жуас, кішіпейілмін шын жүректен,
Тыныштық табады сонда көңілдерің.
Себебі ыңғайлы — қамытым Менің,
Әрі жеңіл — жүктейтін міндеттерім».*

– Матай 11:28-30

Иса бізді қамытымыздан – осыдүниелік жүйедегі бейнетке толы еңбектен азат етті. Енді Исаның қамытын киейік, жанымыз тыныштық тапсын (шынайы Сенбі, жетінші күн).

Потифар сияқты, ісімізді Құдайдың Патшалығына тапсырып өмір сүрсек, әр күніміз тыныштық пен Құдайдың кереметтеріне толы болады. Құдай Патшалығындағы заңдарға сай өмір сүруге бел буып, бүгіннен бастап, Жаратқанның жарылқауларын қабылдаңыз. Өміріңіздің қаржылық саласында төңкеріс жасаңыз, ескі өмір салтының езгісінен құтылыңыз, ескі жүйеден, қарғыс атқан жоқшылық жүйесінен, ауру-сырқаудан, дәрменсіздік бұғауынан босап шығыңыз! Бұрынғыдай жер бауырлап, құртша жорғалауды доғарыңыз да, көкке самғаңыз. Патшалықтың заңдарын қолдануымызға Иса толық құқық берді. Сіз – Құдай Патшалығының азаматысыз!

Осы кітапты оқуға тұрарлық деп тапсаңыз, Құдай Патшалығының шәкірті болғыңыз келсе, GaryKeese.com. сайтына кіріп, көбірек ақпарат алуыңызға болады. Парақшамда Патшалық жөнінде көп мәлімет жинақталған, пайдалы кітаптар жинағы да бар. Сонымен қатар, Team Revolution қызметіне серіктес болып, арнайы іс-шаралар мен семинарларға қатысуға шақырамын.

Қаржы саласында жеңіске жету үшін рухани біліммен қатар, кәсіби білім де қажет. Қарыздан шығудың жолын білгіңіз келсе немесе біздің Forward Financial Group атты компаниямыз жасаған қарыздан шығу жоспарын тегін алғыңыз келсе, 1-800-815-0818 телефонына хабарласыңыз.

Кәзіргідей қаржылық тұрақсыздық заманында табыс табумен қатар, зейнетақыңды қорғай алу да маңызды. Менің компаниям қауіпсіз инвестиция жасауда көмек көрсетеді. Клиенттеріміз осы кезге дейін жүз миллион доллардан артық инвестиция жасады. Соңғы 15 жылда елімізде болып жатқан қаржылық тұрақсыздыққа қарамастан, сол қомақты қаражаттың бірде бір центі шығын болған жоқ. Бізге хабарласып, тегін кеңес алуыңызға болады. Телефонымыз 1-800-815-0818.

Дренда екеуіміз жеке адамдар мен отбасылардың өмірін табысты етуге көмектесіп келеміз, өмірімізді осы мақсатқа арнадық. Сондықтан жұбайым теледидарда «Дренда ТВ» деп аталатын бағдарлама шығарады. Бағдарлама некені нығайтуды, әйелдерді қолдауды көздейді. Көбірек мәлімет алу үшін Drenda.com. сайтына кіріңіз.

Ең соңында Дренда екеуіміз дүние жүзіндегі қауымдар мен бағушыларды қолдау мүмкіндігін қарастыруыңызды сұраймыз. Біздің «Н-3» деп аталатын жобамыз бар, бұл – Ізгі хабар таратуды, адамдарға іс жүзінде көмек беруді қолдайтын жоба. «Н-3» жобасы жыл сайын мыңдаған оқу материалдарын әр елдердегі бағушыларға ұсынады. Сонымен қатар, кедейлерді тамақтандыру, адам сатумен күресіп жүрген ұйымдарды қолдау, балалар үйлеріне көмек, әр елдегі бағушыларды қаражатпен қолдау, Огайо штатындағы әйелдерге арналған рақымшылық үйін қамтамасыз ету – осылардың барлығына үлесімізді қосамыз. Мақсатымыз – Құдай Патшалығы жайлы хабарды әлемнің әр түкпіріне тарату, адамдарды Құдайдың еркіне сай, азат өмір сүруге үйрету.

Осы ғажап хикаяны өзіңізбен бөлісуіме рұқсат еткеніңіз үшін сізге алғысымды айтамын. Енді Құдай Патшалығындағы өзіңіздің тамаша хикаяңызды жасаңыз.



**«Сенің қаржылық революцияң»
топтамасындағы Гэри Кисидің
басқа кітаптары**

Келісімнің құдіреті

Тыныштықтың құдіреті

Стратегияның құдіреті

Қамсыздандырудың құдіреті

Жомарттықтың құдіреті

СЕНІҢ ҚАРЖЫЛЫҚ РЕВОЛЮЦИЯҢ

Келісімнің құдіреті

Егер...

ҚАРЖЫ МӘСЕЛЕСІНЕН ҚАЖЫҒАН БОЛСАҢЫЗ
ҚАРЫЗДАН ҚҰТЫЛҒЫҢЫЗ КЕЛСЕ
НЕДЕН БАСТАРЫҢЫЗДЫ БІЛМЕЙ ЖҮРСЕҢІЗ
ӨЗІҢІЗДІ ДӘРМЕНСІЗ СЕЗІНІП ЖҮРСЕҢІЗ
...ОСЫ КІТАПТЫ ОҚЫП ШЫҒЫҢЫЗ

Тоғыз жылға созылған ауыр қаржылық жағдай Гэри Кисидің жүйкесін әбден қыжытып тастаған еді. Сол кездегі өмірі кредиторлардың қоңырау шалып, маза бермеуі, салық мекемесінің сотқа түсірген шағымдары, Гэриді қарызын төлеуден қашып жүрген борышкер деп таныған сот шешімдері мен эмоционалдық күйзеліске толы еді. Алайда, Құдай Гэримен қаржы жайында сөйлесе бастады да, өмірін күрт өзгерткен ақиқатты ашып берді! Гэри қарыз атаулыдан құтылып, миллиондаған табыс әкелетін кәсіп бастады. Теледидарда күн сайын шығатын «Қаржы мәселесінің шешілуі» (Fixing the Money Thing) атты өз бағдарламасы бар. Бұл бағдарлама әлем бойынша көрсетіледі. Құдай ашып берген ақиқатты Гэри жүздеген мың адамдармен конференциялар мен жеке кездесулердің барысында бөліседі. Гэри табысқа жеткізе алатын қағидалардың көп екеніне келіседі. Дегенмен, ең басты, жалғыз қағидамен шектелер болсақ, ол –осы кітапта айтылған қағида. Гэри сізді қаржылық революцияға қосылып, Құдай Патшалығының қағидаларының көмегімен қаржылық жағдайыңызды түбегейлі өзгертуге шақырады.



Гэри Киси – бірнеше кітаптың авторы, спикер, кәсіпкер, қаржылық сарапшы, бағушы, сенушілерге өмірдің әр саласында, әсіресе, сенім, отбасылық қарым-қатынас және қаржы салаларында жеңіске жетуге көмектесіп жүрген адам. Гэри жұбайы Дрендамен бірлесіп бірнеше табысты компания құрды. Сонымен қатар, Дренда мен Гэри – «Faith Life Now» қызметінің негізін қалаушылар. Бұл қызмет «Қаржы мәселесінің шешілуі» және «Дренда» атты телебағдарламаларды шығарады, дүние жүзі бойынша конференциялар өткізеді, көптеген ресурстарды қолжетімді етеді. Гэри Киси жұбайы Дрендамен бірге Огайо штатындағы Колумбус қаласының маңындағы «Faith Life» қауымында бағушы болып қызмет етеді.